


Wedau Mark



The Gospel of Mark in the Wedau Language of Papua New Guinea

Wedau Mark
The Gospel of Mark in the Wedau Language of Papua New Guinea
Buk Mak long tokples Wedau long Niugini

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not sell this work for a profit.

 You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2017-08-30

PDF generated using Haiola and XeLaTeX on 28 Dec 2024 from source files dated 31 Aug 2023

aa19f3e3-98fb-51fa-9c53-3906edc75f11

Contents

FRT	1
INT	2
Genesis - Karena	3
Exodus - Oputawanana	31
Leviticus - Levi ai kaua	52
Numbers - Au Mutulua	55
Deuteronomy - Tarawatu Viruaina	63
Joshua	68
Judges - Taurauetara	70
1 Samuel	71
Samuel Viruaina	81
1 Kings - Gulagulau Naona	85
2 Kings - Gulagulau Viruaina	97
Chronicles Viruaina	104
Ezra	106
Nehemiah	107
Job	108
Psalm - Wela ma Pari	113
Proverbs - Nuaulaula Riwai	123
Ecclesiastes - Tauviararamana	127
Isaiah	133
Jeremiah	146
Lamentation	151
Ezekiel	153
Daniel	156
Hosea	157
Amos	158
Jonah	159
Micah	162
Zechariah	163
Mark	164
Apasol	197

**Buka Vivivireina
Parivainuagana Wadubona Ģuta Vinevine
ma
Mark ma Acts**

**Translation of The Gospel of Mark and Acts in the Wedau language,
Milne Bay Provins, Papua New Guinea.**

**Buka Vivivireina
Parivainuagana Wadubona Ģuta Vinevine ma Mark ma Acts**

**Translation of The Gospel of Mark and Acts in the Wedau language,
Milne Bay Provins, Papua New Guinea**

© VITAL/SIL PNG 2010

Milne Bay Province
Papua New Guinea.
Printed in Ukarumpa.
2016, 700 Printed
wed
ISBN 9980 0 3979 5

© Wycliffe Bible Translators 2016

Illustrations:

By Horace Knowles and are used by permission of
© The British and Foreign Bible Society, 1954, 1967, 1972
Additions and amendments by Louise Bass
© The British and Foreign Bible Society, 1994

© VITAL/SIL PNG 2010

*Translation of The Gospel of Mark in the Wedau language,
Milne Bay Provinz,
Papua New Guinea.*

Printed in Ukarumpa.

Preface - Pariverena

Nature & Purpose of book
Translation principles
Text followed
Orthography
Name location & number of speakers

Genesis Karena Pariverena

Wei bukana e ririweta ma e vivieğeta da menanarena mara ma dobu i tupuanei. Wei bukana maiteni e vivieğeta da aiai rava i kaeui ma menanarena mai Israel i tupuanei. Kaua ġaeğaei ruağħa e vivieğeta wei bukana au orana.

1. Kapita 1-11 e vivieğeta da menanarena mara, dobu ma rava i kaeui. E vivieğeta da Adam ma Eve, Cain ma Abel, Noah ma ututuva ma numa ġegetelarana au Babel.
2. Kapita 12-50 e ririweta menanarena mai Israel i tupuanei. E vivieğeta da Abraham natuna Isaac ma ġoġana Jacob ma Jacob natunatuna 12 Israel noinooi.

Wei bukana taugirumana eġa wvana ita vieğeta. Wate tauviararamana ġelaui e notanotai da Moses i girumi mai Israel aubaii da taui ita aramanei da God i vinei da Tauna ana rava, ma aiwai i kaeui mai Israel aubaii. Au gunai wei bukana Moses i girumi madeğħa! 1,500 - 1,230 BC. - muriai Iesu i tupua.

Giruma rereğħana

Virarautua wadubona

- God, mara ma dobu i kaeui (1:1 - 2:3)
- God, oroto ma wavine i kaeui (2:4, 7-9, 15-25)
- Apoapoe mena i vikarenei (3:1-24, 4:1-12; 25-26)
- Noah ana virarautua (6:5-22; 7:1-5, 17, 23; 8:15-22; 9:1-15)
- Babel ana numa ġeġe dewadewana (11:1-9)

Mai Israel ġoġogħai

Abraham, Isaac ma Jacob

- God Abram i kwatuei (12:1-7)
- Abram ma Lot i vilamonei (13:5-6, 8-1)
- Abram, Lot i vai-melei (14:11-16)
- Melkisedek, Abram i viaiaini (18-20)
- God parivainuāgħana bagibagina Abram maiteni i kaeui (15:1-6, 12-16)
- Sarai ma Hagar (16:1-3, 15)
- God ana mataira terenana (17:1-21)
- Nelara tonuā i nei Abraham awarina (18:1-15)
- Sodom ana virarautua (23; 19:1-7, 24-26)
- Isaac i tupua (21:1-5)
- Hagar ma natuna Ishmael i paritawanei (21:8-14)
- God Abraham ana tumaġa i raudadani (22:1-19)
- Esau ma Jacob i tupua (25:19-26)
- Esau, natuevou ana buderi i verenei Jacob awarina (25:27-34)
- God i parivainuāgħana da Isaac ina viaiaini (26:1-6)
- Isaac, Jacob i paritawanei Laban awarina (28:1-4)
- Jacob ana rauboni au Bethel (28:10-22)
- God, Jacob i viaiaini (35:9-15, 16-20, 22b-29)

Joseph, tuatana maiteni ai virarautua (37:1-8, 12-35)

- Joseph ana nola au Egypt (39:1-23)
- Joseph, rava ai rauboni anoi i vieğei (40:1-23)
- Pharaoh ana rauboni (41:1-16, 25-42, 45-49, 53-57)
- Jacob natunatuna i paritawanei au Egypt (42:1-10, 21-23)
- Joseph i vieğana-melei (45:4-11, 25-28)
- Jacob, natunatuna ma ġoġogħana maiteni i nae au Egypt (46:1-7, 28-30)
- Jacob, Ephraim ma Manasseh i viaiaini (48:1-6, 13-21)
- Jacob, Juda i viaiaini (49:8-10, 33)

Joseph, tuatuana i vinuaubai (50:15-21)

BADA, mara ma dobu i kaei

- ¹ Au karena, God, mara ma dobu i vitupui.
- ² Dobu kwakwavina ma ega aiwai ita mamae. Gimtona, gabinou i purui. Ma God Aruana, gabinou au tepana i genagenara gairai.
- ³ Ma God i riwa i pa, "Ina lalai!" Ma i lalai.
- ⁴ Ma lalalaina i 'nanai da i ai. Ma lalalaina ma gimtona i vilamonei.
- ⁵ Ma lalaina i gorei Marai ma gimtona i gorei Au Pom. Ma au bigai i nae ma ubaubanai i nei, au pom tagogi.
- ⁶ Ma God i riwa i pa, "Parata mara au tepana ina mae da waira au tepana ma waira au gabaurina ina vilamonei."
- ⁷ Ma parata mara au tepana i terei da waira au dobu ma waira au mara i vilamonei.
- ⁸ Ma parata i gorei Mara. Ma au biga i nae ma ubaubanai i nei, nai au pom viruaina.
- ⁹ Ma God i riwa, "Waira, mara au gabaurina, gabu au tagogi ona vitagogiemi ma doa alalana ina ega." Ma nanare i tupua.
- ¹⁰ Ma doa alalana i gorei, Dobu ma waira i vivitagogieia i gorei, Boga. Ma i 'nanai da i ai.
- ¹¹ Anina ma God i riwa i pa, "Dobu, tam modu ma ai ma vigogoi, modu rarauanoi nununai ma ai rarauanoi nununai, ma peii ina gogo ma ina rauano me aloi nanare, ma nanare i tupua."
- ¹² Ma dobu, modu ma ai anatapui i vigogoi. Ma i 'nanai da i ai.
- ¹³ Au bigai i nae ma ubaubanai i nei, au pom vitonuina.
- ¹⁴ Ma God i riwa i pa, "Aniravilala au mara ina mae da marai ma waguvvara ina vilamonei, ma iri ina viegeta ma nanare mara ma borima.*
- ¹⁵ Ma taui, mara ina ravilalai da lalaina dobu ina verei." Ma nanare i mae.
- ¹⁶ Ma aniravilala gaegeai ruauga i kaei, vogaegeena marai i vibadei ma voaburuna waguvvara i vibadei ma ubona maiteni i kaei.
- ¹⁷ Aniravilala au mara i terei da dobu ita ravilalai
- ¹⁸ da marai ma waguvvara ita vibadei ma lalalaina ma waguvvara ita vilamonei. Ma i 'nanai da i ai.
- ¹⁹ Ma au bigai i nae ma ubaubanai i nei, au pom vi-four-na.
- ²⁰ Ma God i riwa i pa, "Sia ma lawalawai anatapui waira ona vioai ma kiu ona tupua ma ona lave au aidamo."
- ²¹ Ma sia gaegeae ma sia tapuna ma tapuna, boga au orana maemaei ma kiu tapuna ma tapuna maiteni i vitupui. Ma God, i 'nanai da i ai.
- ²² I viaiaini ma i riwa i pa, "Ona vinatuna ma ona vimaigaimi da boga ona vioai ma kiu ona vinatuna da ona maga au dobu."
- ²³ Ma au bigai i nae ma ubaubanai i nei, au pom vi-five-na.
- ²⁴ Ma God i riwa i pa, "Doa, gamogamo nununai ma vitupui, gamogamo maramaragamai ma gamogamo moduei, ma gamogamo tetetei ma ina vinatuna da me taui nanare." Ma nanare i tupua.
- ²⁵ Gamogamo nununai anatapui i vitupui ma taui ina vinatuna da me taui nanare. Ma i 'nanai da i ai.
- ²⁶ Anina ma God i riwa i pa, "Marina, rava tana kaei me tauta ma ai kaua tauta nanare. Ma taui sia ma kiu ma gamogamo anatapui au dobu ina vibadei, gamogamo maramaragamai ma gamogamo moduei, gaegeai ma muomuoi."
- ²⁷ ²⁷ Ma God, rava i kaei
Anina ma oroto ma wavine i kaei,
me tauna nanare.

* ^{1:14:} Eng. **Year**; Madegä tagogi. ^{27:} Mrk 10:6

28 Rava i viaiaini ma i riwei i pa, “Ona vinatuna ma ona vimaǵaimi da dobu ona vioai ma dobu ona vibadei. Taumi, sia, kiu ma aiwai anatapui au doa tetetei ona vibadei.

29 Lam, modu anoi ma ai uana a vereveremi ami lam.

30 Ma ǵamoǵamo moduei ma kiu ma ǵamoǵamo nununai anatapui aubai; ai rugurugu a vereverei ai lam.” Ma nanare i mae.

31 Aiwai anatapui i kaukaueia i ’nanai da i ai kaua ma i vinuaiai. Ma au bigai i nae ma ubaubanai i nei, aupom vi-six-na.

2

1 Ma nanare God mara ma dobu ma anataputapuna au orana i vitupui.

2 [¶]God ana nola i vorovei ma mara au vi-seven-na i vilauvitau.

3 Ana nola i vikwai ma lamna aubaina God wei marana vi-seven-na i viaiaini ma i vovivirei.

Oroto ma Wavine

4 Wei lamna mara ma dobu ana virarautua. Menanare BADA God mara ma dobu i vitupui.

7 Ma BADA * God doa pokauna i vaia ma oroto i voai ma lavutu lawalawaina au giaganana i uveni ma oroto[†] i lawana.

8 Ma BADA God peipei Eden i paewi au maramatanei ma kampa orotona i vivitupua i terei da i mae.

9 Ma BADA God ai inanana aiaina ma uana amna aiaina anatapui i paewi ma peipei au pouna ai vinevinei ruaǵa i gogo. Ai tagogi uana lamna lawana tauvereina ma ai ǵelauna uana lamna nota rava ina verei da metauna aiaina ma metauna apoapoenia.

15 Ma BADA God oroto au peipei Eden i terei da ita nolei ma ita paini.

16 Ma BADA God riwa bagibaginei i riwei i pa, “Ai uana anatapui au peipei am ǵoanei ma ani.

17 Wate a viviǵaem da nota aiaii ma nota apoapoei aina uana eǵa ma ani! Mepa da u ani, tam nai au marana ma iraǵe!”

18 BADA God i riwa i pa, “Oroto ainelana e mamae ma lamna eǵa ita ai. Ana tauagu ana kuae da ina voagui.”

19 Ma BADA God doa pokauna i vaia ma ǵamoǵamo anatapui ma kiu anatapui i kuae. Ma taui i neiae oroto awarina da ita viwawai. Ma oroto aiwai i viwawai, nanare ai wava i mae.

20 Ma oroto kiu ma ǵamoǵamo maramaraǵamai ma moduei, wava i verei. Wate Adam eǵa ana tauagu ita nelaǵai da ita voagui.

21 Ma BADA God oroto i kuae da i matave ma maranaina i raunuavuru kaua, torotorona tagogi i votawanei ma vioa i pota-melei ana au gabu.

22 Ma BADA God oroto torotoronei wavine i kuae ma wavinena i neiae oroto awarina.

23 Anina ma oroto i auepai ma i riwa,

“Ee wei tauna! Marina gelama tau gelamiuei

ma vioa tauvioauei,

wei tauna awariu i votawanei,

lamna aubaina, ana ǵorei Wavine.[‡]”

24 [¶]Ma nanare i tupua ma lamna aubaina oroto, amana ma alona e vovoterei ma awana maiteni e vivitagogie.

25 Oroto awana maiteni, ana kovakovai, wate eǵa ita vinimala.

* 2:2: Exo 20:11 * 2:7: Yahweh bo Jehovah Exo 3:13-15. † 2:7: ... doa pokauna i vaia ma oroto Pona Hebrew **oroto** lamna **Adam**, ma **doa** lamna **adamah**. ‡ 2:23: Au Hebrew pona **oroto** lamna **ish** ma **wavine** lamna **ishah**. ¶ 2:24: Mrk 10:7-8

3

Apoapoe mena i vikarenei

Maranai God mara ma dobu i vitupui, aiwai anatapui i ai kaua ma rava aiaii. Wei virarautuana lamna menanare apoapoei au dobu i rui.

¹ Anina ma mota lamna terevaidega kaukauana ega me gamogamo gelaui i kaukaueia nanare. Ma mota wavine i paridadanei i pa, "Riwa kaua bo ega da God i riwem da ega ai uana au peipei ma ani."

² Ma wavine i paribelei i pa, "Tauai ai uana peipei au orana ana ani.

³ Wate God i riwa da peipei au pouna, ai uana ega ana ani bo ana vodadani. Mepa da ana ani bo ana vodadani lamna ana irage."

⁴ Ma mota wavine i paribelei, "Egateni! Amapo ega ma irage.

⁵ Nai maranai u ani, matam ina vikalai me God nanare ma aiaina ma apoapoena ona aramanei. Ma God i aramanei, lamna aubaina i vigaei da avena ma ani."

⁶ Ma wavine i 'nana da ai uana aniam aiaina ma inanana i ai kaua, ma i goei da ita ani da nuaulaula ita vaini, lamna aubaina tauna ai uana i vaia da i ani. Ma gelauna awana au ririvana i mamae i verei da i ani.

⁷ Ma matai i kala ma i aramanei da taui ana kovakovai, lamna aubaina ai bawara rugurugui i vaia da i vaturi da tupuai i tere-gagari.

⁸ Au biga ubana i opuopu ma taui i nonori BADA God au peipei i bababara nae. Ma oroto awana maiteni ai au orai BADA God i raugovaagei.

⁹ Wate BADA God oroto i kwatuei i pa, "Tam mepa?"

¹⁰ Tauna i paribelei i pa, "A nonorim au peipei ma tau ana kovakovau aubaina a rovo da a raugovaagei."

¹¹ Ma BADA God i riwa i pa, "Aiai i riwem da tam ana kovakovam? Ai uana a vigaei da avena uta ani, ma u ani bo?"

¹² Ma oroto i paribelei i pa, "Wavine u verevereu, tauna ai uana i vereu da a ani."

¹³ BADA God wavine i riwei i pa, "Aiwai u kaei?"

Ma wavine i paribelei i pa, "Mota i moruiu da a ani."

BADA, Rava ai kovoaga i vinolenolei

¹⁴ BADA God mota i riwei i pa, "Wei u kaei aubaina, kovoaga gaegea tam awarim, ega me gamogamo gelaui nanare, maramaraagamai ma moduei.

Manawamei ma matave-taitaina-nae
ma am lam doa ma ani
am mara au anatapuna.

¹⁵ Ana kaei da tam ma wavine ona vigavia nonoa,
ma am epaia ma wavine ana epaia ona vigavia.
Tauna kolam ina gwadai
ma tam ae karea ma ani."

¹⁶ Ma wavine i riwa i pa:

"Am nuabola ana viratai am au raumanawa,
ma am iniviara ina rata am au vinatuna.
Tam u goei da awam uta vibadei,
wate tauna tam ina vibadem."

¹⁷ Adam i riwei i pa,

"Ma tam awam ponana u rautaniiganei
ma ai uana a vivigaeia u ani,
Tam am kaelel doa u viapoapoeni.

Tam ma nola guratana ma inim ina viara da lam ma nelagai, am mara au anatapuna.

¹⁸ Ma doa, donadona ma modu viganaganai ina vigogoi aubaim
ma tam ma ipi da ma am.

¹⁹ Tam polopolam ina toi
da lam ma nelāgai
ma nanare ma mae da ma nae me au doa.
Doa pokauna a vaia da tam a kauem
ma tam ma nae me doa au pokauna.”

²⁰ Oroto i aramanei da awana tauna rava anatapui aloi ma lamna aubaina i ġorei Eve.*

²¹ BADA God ġamoġamo opina i vaia da iniġāġara i kaeui Adam† awana maiteni aubai ma in i tere-ġagħari.

BADA, Adam ma Eve Edenei i viopuni

²² BADA God i riwa i pa, “Orotona aiaina ma apoapoena i aramanei, tauna marina tauta nanare. Eġa tana voterei da urana ina vilolo-melei da lawana aina uana ina vaia da ina ani ma ina mae-nonoa.”

²³ Ma lamna aubaina peipeiei, oroto i viopuni da doa ita ipiei. BADA, doe i oroto i voai.

²⁴ Anina ma oroto i viaġaġana-opunei ma cherub‡ biaġa au peipei Eden au maramatanei i terei ma ana dabaruma araratana i terei da i nena ma i nenei ma lawana aina etanaina e gagagaloei.

4

Cain ma Abel

¹ Ma Adam awana Eve maiteni i matave ma i duama ma tevera orotona i tupua. Ma i riwa, “BADA ana aguei natu a vaia.” Lamna aubaina i ġorei “Cain.”*

² Ma muriai tevera orotona ġelauna i ġuni ma i ġorei “Abel.”†

Ma maranai taui i vilaraga, Abel tauna tauviġamoġamo ma Cain tauipi.

³ Mara tagogi Cain doa uana ġelaui i neiai da i puloei BADA awarina.

⁴ Wate Abel nanare sipu natuevouii i vunu-naiei ma sia monamonai i apui BADA awarina ana pulo. BADA Abel ma ana pulo i vinuaiaeie.

⁵ Wate Cain ma ana pulo eġa ita vinuaiaeie. Ma lamna aubaina, Cain amlona i ġaigai ma naona i peu.

⁶ Anina ma BADA Cain i riwei i pa, “Aiwai aubaina amlom i ġaigai? Aiwai aubaina naom i peu?

⁷ Mepa da kaua aiaina uta kauei, lamna ata vinuaiai awarim. Wate am nota da apoapoena ma kauei, lamna ma aramanei da apoapoe am au metaeta e daradaraim da ina vovaiubaim. Wate tam ma virewapania da ma vovaiubai.”

⁸ Ma muriai Cain ana tevera Abel i riwei, i pa, “Tana nae, tana babara.” Ma maranai i ġeta au wapu, Cain i vomairi ma ana tevera Abel i vunui da i viragħeni.

⁹ Ma BADA Cain i paridadani i pa, “Am tevera Abel mepa?”

Ma Cain i paribelei, i pa, “Eġa ata aramanei! Tau au tevera taupainina bo?”

¹⁰ Ma BADA i riwa, i pa, “Aiwai u kauei? Am tevera tarana doe i kwatukwatu raubiwa aubaina.

¹¹ Lamna aubaina tam marina apoapoe awarim a tereterei. Am tevera tarana uramei au doa i toi da doa i matave ġaġġari.

¹² Ma lamna aubaina maranai u ġoei da doa uta ipiei, lamna uana eġa ma nelāgai ma am animae eġa. Tam ma babara labalababa.”

¹³ Cain BADA i riwei, i pa, “Au kovoġa i rata kaua ma eġa tagotagogina da ana avarai!

* **3:20:** Eve Wei wavana nonorana me Hebrew ponanei *lawana tauverena*. † **3:21:** Au Hebrew ponana oroto lamna *adamah* lamna aubaina oroto i ġorei Adam. ‡ **3:24:** Arua lawalawaii gabu vivivireina taupaini. Tagogi lamna cherub * **4:1:** Cain Wei wavana nonorana me Hebrew ponanei anona *a vaia*. † **4:2:** Abel Wei wavana nonorana me Hebrew ponanei anona *lavutuna tupona*.

¹⁴ Tam wei doanei e viviopuniu da naom eēga ana inana-melei. Tau ana babara labalababa ma eēga au animae. Ma rava ina nelaāgaiu ma ina viraāgeniu."

¹⁵ Ma BADA i paribelei, i pa, "Eēga! Aiai da i viraāgenim, ana kovoāga ina rata guratana." Ma ana mataira Cain awarina i terei da rava ita viāgai da tauna avena ita vunui, maranai i nelaāgai.

²⁵ Adam awana maiteni i matave ma Eve natui īelauna i īuni. Eve i riwa, i pa, "Cain ana tevera Abel i viraāgeni. Ma lamna aubaina God natu orotona i vereu da Abel i raviepaiai." Ma i īorei Seth. [‡]

²⁶ Seth natuna orotona i tupua ma i īorei Enosh. Ma nai marana, rava, BADA wavana vivivireina viborumana i vikarei.

6

Rava ai īgo'apoapoe

⁵ Ma BADA i 'nanai da rava anatapui au dobu ai īgo'apoapoe i rata kaua ma aiwai i viogatarei ma i vinua-notenotei anatapui apoapoei.

⁶ BADA i 'nanai ma orana i viara kaua ma i vinuabola da aiwai aubaina rava i kaei.

⁷ Ma BADA i riwa, "Tau rava a kaukaueia ana vipupui dobu au anatapuna ma nanare īamoāgamo īaeāgaii ma īamoāgamo au doa tetetei ma kiu au aidamo. Nuanuau i bola-kauei da taui a kaei."

⁸ Wate BADA Noah i 'nanai ma i vinuaiaiei.

Noah ana virarautua

⁹⁻¹⁰ Noah ma ana epaepaeia ai virarautua wenanare.

Noah natunatuna nelarai tonuāga: Shem, Ham ma Japheth. Noah ana īgo'apoapoe eēga, tauna ainelana rava aiaina eēga me aiai īelauna nai au marana. Ma God maiteni i bababani nonoa ma ana au viaiaina i mamae.

¹¹ Rava ai īgo'apoapoelei dobu i viapoapoeni God au matana ma vigaigaiawa dobu i oai.

¹² Ma God i 'nanai da rava ai īgo'apoapoe i rata kaua ma lawana apoapoena i maemaelei.

¹³ Ma God Noah i riwei, "Rava pupunana a vivinua-notenotei. Aubaina rava ai īgo'apoapoe dobu i oai, lamna aubaina rava ma dobu anatapuna ana vipupui.

¹⁴ Lamna aubaina a īgoei da wei ma kaei. Waga īaeāgenna ai bagibaginei ma voai tam aubaim. Ma babalarāgi ma koltei au orana ma au doa ma pasi.

¹⁵ Wenanare ma voai. Waga ana manawa 140 mita ma ana dabora 22 mita ma ana īgae 14 mita*^{*}

¹⁶ Ma poewi ma gavogavo aburuna ma voterei poewa ma biribiri au poui, ive ma madeāgamo aubaina. Ma au ririvana, metaeta ma terei. Ma vatara, au gabaurina, au pouna ma au tepana ma voai.

¹⁷ —Ona rautaniāgana! Tau marina ututuva ana paritawaneiai au dobu ma aiwai anatapui lawalawaii ina amoia.

¹⁸ Wate marina tau parivainuaāgana bagibagina ana kaei tam maiteni. Tam, awam, ma natunatum awawai maiteni au waga ona rui.

¹⁹⁻²⁰ Ma īamoāgamo anatapui, wavinena ma orotona ma vigerui, kiu, ma īamoāgamo au doa tetetei ruaruāgei ava ina rui da ina lawana.

²¹ Ma lam taputapunei ava ma vaia da taumi ma īamoāgamo aubaii."

²² Ma God aiwai anatapuna i ririweia; Noah i kaei.

7

Ututuva i vikarei

^{‡ 4:25:} Seth Wei wavana nonorana me Hebrew ponanei anona i vereu. * 6:15: Hebrew pona ana manawa 300 cubits ma ana dabora, 50 cubits ma ana īgae 30 cubits.

¹ Ma BADA Noah i riwei, “Tam ainelam rava jijimanim au dobu wei au marana. Lamna aubaina tam ma am numa ravai anatapumi au waga ona geru.

² Ma BADA ġamoġamo i vianinei aniam ma pulo aubaina, ororotoi 7 ma waivinei 7 ma vaia. Ma BADA ġamoġamo eġa ita vianinei, orotona tagogi ma wavinena tagogi ma vaia.

³ Ma nanare kiu ma vaia, ororotoi 7 ma waivinei 7. Wei ma kaei da ġamoġamo da kiu anatapui lawalawai ina mae ma ina vinatuna.

⁴ Ma au pom 7 au murina ma garewa ana paritawanei da mara 40 ma au pom 40 ina atuna. Ma aiwai au dobu a kaukaueia, e mamae ma e lavulavutu anatapui ina pupu.”

⁵ Anina ma BADA anatapuna i ririweia, Noah i kaei.

¹⁷ Ma au pom 40 au orana ututuva i rarata ma waga i tenam epa.

²³ Anina ma BADA anatapuna lawalawai au dobu i pupuna-pai, rava ma ġamoġamo ma kiu ma ġamoġamo tetetei, anatapui i viamoai. Noah ma taui aiavoi au waga i gerugeru, taui ava i lawana.

8

Ututuva damona

¹⁵ Ma God Noah i riwei i pa,

¹⁶ “Tam ma awam ma natunatum ana awawai waga ona oputawanei.

¹⁷ Ma ġamoġamo lawalawai anatapui ma taravaina-opunei, kiu anatapui, ġamoġamo au doa tetetei da ina vinatuna ma ina maġa da dobu ina vioai.”

¹⁸ Ma Noah awana ma natunatuna ma awawai waga i opu-tawanei.

¹⁹ Ma ġamoġamo anatapui, kiu ma ġamoġamo ġelaui au doa tetetei, ai au dam nununai nanare waga i opu-tawanei.

²⁰ Ma Noah pulo aniapuna i voai BADA awarina ma ġamoġamo aiaii, kiu aiaii tagotagogi ava taputapuna i apui pulo aniapuna au tepana.

²¹ Ma maranai BADA pulo ġabuna i laġoni ma au nuanuana i pa, “A aramanei da rava melameliaeai ai nota i apoapoe. Wate dobu eġa ana viapoapoeni ma eġa melanai lawalawai anatapui ana pupuna-melei me a kaei nanare.

²² Ma maranai dobu e mamae
paewa ma tuaruta,
ubauba ma vibola,
bodu ma omra,
garewa ma madeġa,
maratom ma au pom,
ina mae-nonoa ma eġa ina kwa.”

9

BADA ana Parivainuaġana bagibagina Noah maiteni i kaei

¹ [✳]Ma God Noah natunatuna maiteni i viaiaini ma i riwei i pa, “Ona vinatuna ma ona vimaġaimi da dobu ona vioai.

² Ana kaei da ġamoġamo ġaegħei ma ġamoġamo tetetei, iana ma kiu, anatapui ina rovoemi. Ma au urami ana terei da ona vibadei.

³ Aiwai anatapui lawalawai ami aniam. Modu anoi ma ai uana a veremi, wate marina aiwai anatapuna a vereveremi ami aniam.

⁴ [✳]—Wate vioa taratarana eġa ona ani, aubaina tara au orana lawana e mamae, ona voterei da tarana ina toi tawananana ma muriai ona ani.

[✳] **9:1:** Gen 1:28 [✳] **9:4:** Lev 17:10-14

⁵ Ma mepa da ġamōġamo rava i viraġeni. Tau ana raubiwa, wate nanare rava, rava turana i viraġeni. Tau ana raubiwa.

⁶ [◇]Tau rava a kaei me tau inanau nanare, ma lamna aubaina Rava aiai i viraġena, rava ġelauna tauna ina viraġeni.

⁷ [◇]Ma tam natunatum ina maġa da am epaepaia dobu ina maena-pai.”

⁸ Ma God Noah natunatuna maiteni i riwei i pa,

⁹ “Ona rautaniġana wei marina, Tau au parivainuaġana bagibagina taumi ami epaepaia maiteni a kaukauei.

¹⁰ Ma ġamōġamo lawalawai anatapuna, kiu ma ġamōġamo numei ma moduei ma anatapui wagei i opuopu, ma ġamōġamo anatapui muriai au dobu ina mae.

¹¹ Wei riwanei au parivainuaġana bagibagina taumi maiteni a terei da eġa melanai ututuva ġelauna ana paritawanana-meleiāi au dobu da purapura lawalawai ina vipupui.”

¹² Ma God i riwa, “Parivainuaġana bagibagina a kaukauei taumi ma anatapui lawalawai maiteni anatapui muriai e nenei. Wei parivainuaġana matairana wenanare:

¹³ Warilolo au apau ana terei da ina vimataira da tau au parivainuaġana bagibagina a terei tau ma taumi ma anatapui lawalawai au dobu maemaei.

¹⁴ Maranai mara e ġuvaġuvai ma warilolo au apau e eġaeġa,

¹⁵ lamna ina vieġeu da au parivainuaġana bagibagina tau ma taumi ma anatapui lawalawai au dobu. Ma eġa melanai ututuva lawana ina vipupui.”

11

Babel ana numa ġeġe dewadewana

¹ Au naona rava anatapui au dobu pona tagogi ma riwa tagogina i bababaniei.

² Nai maranai rava i vaġavaġai nae au maramatanei ma wapu au ġaeġaena i ġeta au Shinar* ma kampa i mae.

³ Ma i babani vivira i pa, “Ona nei, doa tana vaia ma brik tana pasi ma tana apui da ina bagibagi.” Ma nanare ai numa brikie i voai ma koltei i ampasi.

⁴ Ma taui i riwa, “Ona nei melagai ġaeġaena tana voai tauta aubaita ma numa ġeġe dewadewana tana voai da ina ġae au Mara da wavata tana kaei ma eġa tana vilamoneita dobu au anatapuna.”

⁵ Anina ma BADA i ġairai da ravai melagai ġaeġaena ma numa ġeġe dewadewana i voovoaoia ita inanai.

⁶ Ma BADA i riwa i pa, “Wei taui rava tagogi ma pona tagogina e bababaniei. Wei lamna karena, aburuna ava aiwai ai au nota anatapuna ina kauana-paiei.

⁷ Ona nei tana ġaira da noi ravai ai pona tana vinua-raġaraġai ma ina babani labalababa.”

⁸⁻⁹ Anina ma BADA rava anatapui ai pona i vinua-raġaraġai ma i vilamonei dobu au anatapuna, lamna aubaina nai melagaina i ġorei Babel.[†] Ma melagai ġaeġaena voana i voterei. BADA taui i vilamonei dobu au anatapuna.

12

BADA, Abram i kwatuei

¹ [◇]BADA Abram i riwei i pa, “Am dobu, am rava ma amam ana dam ravai ma netawanei ma ma nae dobu ana viatataiem kampa ma mae.

² Ma am epaepaia ai dam ana viratai, ma ana viaiainim,

* 9:6: Exo 20:13; Gen 1:26 ◇ 9:7: Gen 1:28 * 11:2: Babilon au paratana. † 11:8-9: Babel Nonorana me Hebrew ponanei nuaraġaraġa. ◇ 12:1: Act 7:2-3

ma ana kaei da wavam ina rata,
ma tamei viaiaina ina nei rava awarii.

³ Ma aiai i viaiainim, tau ana viaiaini,
ma aiai i parivai-apoapoenim, tauna ana parivai-apoapoeni,
ma tamei dam anatapui au dobu ana viaiaini."

⁴⁻⁵ Ma BADA i ririweia nanare, Abram awana Sarai ma maiana Lot* Haran i opu-tawanei, Abram ana madega 75. Ai purapura, ai gamo-gamo ma ai laralaraga ma i vomairi Canaan aubaina.

⁶ I ḡeta Canaan ana au parata ma i verautua da au gabu vinevinena, Shekem melagaina gaēgaena au ririvana. Ma kampa au Moreh[†] ai gaēgaena au ḡouna i raūgaravu. (Nai maranaina mai Canaan, nai au dobuna i mamae.)

⁷ [☆]Kampa BADA i viatataeana-melei ma i riwa i pa, "Wei dobuna Canaan am epaepaia ana verei." Ma Abram pulo aniapuna, i voai BADA awarina ma pulo i apui. Mepa BADA i viatataeana-melei lamna au gabuna aniamapu i voai.

13

Abram ma Lot i vilamonei

⁵ Maranai Lot, Abram maiteni i vāgavāgai, Lot maiteni ana gamo-gamo māgamāgau ma ana numa ravai ma ana tauvilaraga.

⁶ Ma taui ai gamo-gamo i māga guratana ma gabu ēga tagotagogina da anatapui ita ḡamoi,

^{7a} Ma lamna aubaina ēga tagotagogina da taui ita mae-gogona.

⁸ Anina ma Abram Lot i riwei i pa, "Ma rautanīgana, tauta tara tagogi ma ēga tana vipariparinigai ma ata taunola avena ita vīgaīgaiawa vivira.

⁹ Weka tana vilamoneta ma ata naei tana nae. Doa au naota e inainanai. Metauna e goēgoe i ma nae ma kampa ma mae. Mepa da tam ma nae au oienā, tau ana nae au kelakela. Mepa da tam ma nae au kelakela, tau ana nae au oienā."

¹⁰ Anina ma Lot matana i tawanei da waira Jordan wapuna ma Zoar melagaina au paratana. Ma i 'nanai da waira i māga ma doa maumaurana me BADA ana peipei,* me doa maumaurana au Egypt. (Nai marana BADA ēga Sodom ma Gomorah ita vipupui.)

¹¹ Ma Lot waira Jordan wapuna i vinei tauna aubaina ma i nae au maramatanei. Taui nanare i vilamonei.

¹² Abram au Canaan i mae ma Lot Sodom au ririvana i mae.

¹³ Ma mai Sodom ai lawana i apoapoe kaua ma go'apoapoe i kaukauei BADA au matana.

¹⁴ Ma Lot Abram i netawanei ma muriai BADA Abram i riwei i pa, "Mepa u mamae lana, matam ma tawanei au lavaratei ma au rauanāgei ma madega e gogolana ma mepa madega e neneulai.

¹⁵ [☆]Dobu anatapuna e inainanai tam ma am epaepaia ana vere-nonoemi.

¹⁶ Ma am epaepaia ana kaei me doa pokauna ma aiai da pokau e iaiavi lamna am epaepaia tagotagogina ina iavi.

¹⁷ Dobuna anatapuna taumi a vereveremi, ma nae ma dobuna ana manawa ma ana dabora ma babarani."

¹⁸ Ma nanare Abram ana numagara i naiei Mamre ana ai gaēgaena au ḡerēgerena au Hebron i mae ma kampa pulo aniapuna i voai ma pulo i apui BADA awarina.

14

Abram, Lot i vai-melei

* **12:4-5:** Abram ana tevera Haran natuna Lot. † **12:6:** Mai Canaan weka ai god morumoruna i vimae-gaēgaeni.

☆ **12:7:** Act 7:5 * **13:10:** Eden peipeina, Gen 2:8. ☆ **13:15:** Act 7:5

¹¹⁻¹² Gulagulau 4 Sodom ma Gomorah ai purapura ma ai lam i kwalei. Abram maiana Lot au Sodom i mamae i vaia ma ana purapura maiteni i vaia ma i nae.

¹³ Abram tauna Hebrewei ma Mamre ana ai ġaegħaena au ġereġerena i mamae. Ai taniwagan wavana Mamre tauna Amoriei, varevareina Eskol ma Aner. Anatapui Abram ana tauagu, ġavia au marana. Ma oroto tagogi ġavia i rovoei da i rovo-nae ma i ġeta Abram awarina ma i vibenabenamei.

¹⁴ Ma maranai Abram i nonori da taui maiana Lot i vaia. Tauna ana sorodia vinevinei ana au melagai tuputupuai 318 i kwatuei. Ma ġavīgħaviai i votaġgoi da i ġae au Dan. *

¹⁵ Wagħvarai ana sorodia i ġutai ma ġavīgħaviai i viägħagi da Damaskas i verautuini da au Hobah i ġeta ma kampa i vovaiubai.

¹⁶ Purapura anatapui i vai-melei. Maiana Lot ma ana purapura ma waivine ma rava ġelaui.

Melkisedek, Abram i viaiaini

¹⁸ Melkisedek tauna Salem† ai gulau ma God AIDAMO TELARANA ana pirisi pulo tauapuina. Palawa ma wine i neiai,

¹⁹ ma Abram i viaiaini ma i pa,

“God AIDAMO TELARANA mara ma dobu taukaueina,
ina viaiainim.

²⁰ Ma God AIDAMO TELARANA am ġavia au uram i terei,
lamna Aubaina tana voepaepai.”

Ma Abram aiwai ana sorodia maiteni i tami i vitagogiei da ġuta 10 i kauei. Ma ġuta tagogi i votawanei ma Melkisedek i verei.

15

BADA, Parivainuāgħana bagibagina Abram maiteni i kauei

¹ Ma muriae BADA Abram ana au rauboni i riwei i pa, “Abram eġa ma rovo. Tau am taugagalo am pulo ġaegħaena.”

²⁻³ Ma Abram i paribelei i pa, “Oo BADA God. Tau eġa natunatu, ma am pulo eġa ina voagħi. Tam eġa natu orotona uta vereu ma lamna Aubaina au iraġe au murina, Eleasar au taunola Damaskasei au vigulau ina vaia.”

⁴ Anina ma BADA i riwana-melei i pa, “Eġa! Tauna am vigulau eġa ina vaia, wate natum orotona tamei ina tupua, tauna am vigulau ina vaia.”

⁵ Anina ma BADA tauna i taravaina-opunei au doa ma i riwei i pa, “Ma ġoutata au mara ma ubona ma inanai, mepa da tam tagotagogina da uta iavi. Lamna am epaepaia ina maġa me ubona nanare. Eġa aiai tagotagogina da ina iavi.”

⁶ Abram, BADA riwana i vitumaġġanei ma lamna Aubaina BADA i riwa da Abram rava jijimanina.

¹² Ma maranai madeġa i neneulai ma Abram i matave-nuavuru kaua. Ma gimtona ma rovo ġaegħaena i nei ma i purui.

¹³ ♦ Ma BADA i riwei i pa, “Wei ma aramana-kauei! Am epaepaia ina vitaomana au dobu ġela ma kampa ina vitaunola. Ma dobuna ravai* taui ina rau-iviapoapoelej da madęga 400 ina kwa.

¹⁴ ♦ Wate muriae tau nai dobuna ravai ana kovoġi ma am epaepaia ina vipurapura kaua ma ina nememei.

¹⁵⁻¹⁶ Ma mai Amori† ai ġo'apoapoe ina rata guratana, ma nai maranaina ana kovoġi

* **14:14:** Lamna melagai ġaegħaena au lavaratei Canaan ana parata au ġereġerena. † **14:18:** Jerusalem. ♦ **15:13:** Exo 1:1-14; Act 7:6 * **15:13:** Mai Egypt. ♦ **15:14:** Exo 12:40, 41; Act 7:7 † **15:15-16:** Nai maranai, mai Amori ma mai Canaan au dobuna Canaan i mamae.

ma ana viaḡagana-opunei wei au dobuna. Ma lamna aubaina am epaepaia eḡa ina nei laḡilaḡinai da kimta au vi-four-na. Wate tam, Abram ma magura kaua ma ana nuaubam ma iraḡe ma ina doboim.”

16

Sarai ma Hagar

¹⁻³ Abram au Canaan i mae madeḡa 10 i kwa, awana Sarai aipoi ma eḡa ita vinatuna. Sarai ana taunola wavinena Egyptei wavana Hagar. Ma Sarai Abram i riwei i pa, “BADA i viḡaeu da eḡa ata vinatuna. Ma nae au taunola maiteni ma matave, mepa da ina vinatuna, ma tevera ana vinatunei.” Abram, Sarai ponana i voteletelei ma Hagar i vaia ma i viawanei.

¹⁵ Ma Hagar i vinatuna da Abram natuna orotona i tupua. Ma Abram, natuna i viwawai Ishmael.

17

BADA ana mataira terenana

¹ Maranai Abram ana madeḡa 99 ma BADA i vieḡana-melei Abram awarina ma i riwei i pa, “Tau God VIVIREWAPANA KAUKAUANA.* Au naou ma babara ma kaua aiaina ava ma kaei

² da nanare au Parivainuaḡana bagibagina ana vovai-virewapani tau ma tam awarita ma am dam ana vimaḡa-guratei.”

³ Ma Abram i mae-ḡaira au doa ma i raudune. Ma God Abram i riwei i pa,

⁴ “Tau au navanava au parivainuaḡana bagibagina tam maiteni wenanare: Ana kaei, da dam patarana maḡamaḡaui tam ina viamanem.

⁵ Ma marina wavam Abram, [†] ana terevirai da Abraham; [‡] aubaina marina ana kaei da dam patarana maḡamaḡaui ina viamanem.

⁶ Ma ana kaei da am epaepaia ina maḡa ma am damei gulau maḡamaḡaui ina nei.

⁷ Au parivainuaḡana bagibagina ana vovai-virewapani, tau ma tam ma am epaepaia muriai e nenei da tau am God ma taui ai God.

⁸ [§]Canaan dobuna taputapuna marina e mamae-gubai, tam am epaepaia maiteni ana vere-nonoemi aubaimi ma tau, taui ai God.”

⁹ Ma God Abraham i riwei i pa, “Ma au parivainuaḡana bagibagina, tam ma am epaepaia maiteni ona voteletelei.

¹⁰ [§]Wei taumi ami au navanava parivainuaḡana bagibagina ona voteletelei, ami nelara anatapui inii ina bori.

¹¹ Ma taumi inimi ona bori, lamna ata parivainuaḡana matairana.

¹² Roaroa melamelai nelarai i tupua ma au pom 8 au murina inii ona bori. Wei kauana ona kaei, natunatumi nelarai ma ami taunola natunatui nelarai ma nelara anatapui am au numa e vivitaunola.

¹³ Riwa kaua, maranai roaroa nelarai i tupua am au dam bo maranai taunola o gimarai, taui au mataira lamna inii ona bori. Lamna au parivainuaḡana matairana au tupuami ina mae-nonoa.

¹⁴ Wate aiai orotona nai matairana eḡa au tupuana, lamna au parivainuaḡana bagibagina i viaigai ma lamna aubaina tauna ina viravaḡela.”

BADA, Sarai i parivainuaḡani

* **17:1:** Godvivirewapano kaukauana. Hebrew El-Shaddai. † **17:5:** Abram. Wei wavana nonorana Hebrew ponaiei anona viwalatalonana. ‡ **17:5:** Abraham. Wei nonorana me Hebrew anona dam maḡamaḡaui amai. § **17:8:** Act 7:5 § **17:10:** Act 7:8

¹⁵ God Abraham i riwei i pa, “Awam ega ma gorei Sarai, wate ma gorei Sarah. §

¹⁶ Tau ana viaiaini ma natum orotona ina vitupui. Anina ma ana viaiaini da ina vidam gaegeae aloi. Ma dam ai gulau magamaagaui taunei ina opu.”

¹⁷ Abraham i mae-peu ma i raudune ma i mutu-kaka ma au nuanuana i pa, “Amapo oroto ana madega 100 ma ina vinatuna bo? Ma Sarah ana madega 90 ma ina vinatuna bo?”

¹⁸ Ma Abraham God i riwei i pa, “Ma Ishmael menanare, uta viaiaini bo ega?”

¹⁹ Wate God i riwa i pa, “Ega! Awam Sarah natum orotona ina vitupui ma ma viwavai Isaac. * Au parivainuaagana bagibagina tauna awarina ma ana epaepaia awarii ina mae-nonoa.

²⁰ Ma Ishmael aubaina, am nuabola a nonori. Ana viaiaini ma natunatuna ana vimaagai ma ana epaepaia ana vituai. Tauna dam 12 ai babada amai ma ana epaepaia ai dam ana vimaagai.

²¹ Wate au parivainuaagana bagibagina ana kaei Isaac maiteni. Ma wei marana nanare, madega gelauna Sarah, Isaac ina vinatunei.”

18

Nelara tonuga i nei Abraham awarina.

¹ Au benai Abraham ana numagara au metaetana i kiakiala.

² I taepai ma nelara tonuga i 'nanai i maimairi. Maranai i 'nananai i ruba da au naoi i mae-gabe ma i raudune.

³ Ma i riwa i pa, “Au bada. Mepa da u notai da tau anina, ega ma tutelareu.

⁴ Waira ana neiai da aemi ana ogai ma ona vilauvitau ai au gouna.

⁵ Lam ana veremi da ina vovai-virewapanimi ma muriai ona vagai. Taumi o notaiu da o nei.”

Taui i paribelei, “Anina u ririweia ma kaei.”

⁶ Anina ma Abraham lagilaagina i nae au numagara ma Sarah i riwei i pa, “Lagilagina, am palawa aiaina baikena ma vaia ma palawa ma apui.”

⁷ Ma i ruba ma bulumakau orotona gaubona i vaia da ana taunola i verei ma i vokaukauei.

⁸ Anina ma Palawa ma mereki ma mereki ravi taputapui ma sia i neiai taui awarii au gou da i am ma tauna i mae-paini.

⁹ Taui i paridadana i pa, “Awam Sarah mepa?”

Tauna i paribelei i pa, “Tauna numagara au orana.”

¹⁰ Taui tagogi Abraham i riwei i pa, “Riwa kaua da wei au marana nanare madega au gelauna ana nemememei, lamna awam Sarah tevera orotona ina guni.”

Ma Sarah, ravai au muri numagara au metaetana, i rarautaniagana.

¹¹ Sarah ma Abraham i magura kaua ma Sarah ana vinatuna ana mara i kwa.

¹² Sarah i mutu-kaka ma i riwana-melei, “Tau ma awau a magura kaua ma au vinatuna ana mara i kwa. Ma amapo tagotagogina da duama ana morelanei bo?”

¹³ BADA Abraham i paridadanei i pa, “Aiwai aubaina Sarah i kaka ma i riwa, ‘Tau a magura kaua ma riwa kaua da ana vinatuna bo?’

¹⁴ Aiwai i piripiri guratana BADA au matana? Me a ririwem nanare, ana nemememei awarim wei marana nanare madega au gelauna ma awam Sarah tevera orotona ina guni.”

¹⁵ Sarah i rovo ma i bovi ma i riwa i pa, “Tau ega ata kaka.”

Tauna i paribelana i pa, “Ega! Tam u kaka.”

Sodom ana virarautua

¹⁶ Maranai nelara tonuga i vomairi da ita nae, Abraham taui maiteni i nae da au etanai ita tuterei. Ma taui i 'nana gaira au Sodom,

§ **17:15:** Sarai - Sarah: Wei wavai ruaga anoi wavalatona natuna wavinena. God Sarai wavana vouna i verei da ita viatataiei da tauna dam gaegea aloi. * **17:19:** Isaac. Wei wavana Hebrewei anona i kaka.

¹⁷⁻¹⁹ ma BADA ana au nota i pa, “Aiwai marina ana kuae, ega ana tere-govaigi Abraham awarina. Abraham ana epaepaia ina vidam gaeigaena ma vivirewapanana ma taunei dam anatapui au dobu ana viaiaini. Tauna a vinei da natunatuna ina riwei ma taui natunatui ina riwei da BADA ana lawana ina votagotaigoi da aiaina ma jijimanina, ina kaukuae da tau Abraham a paripari-vainuagania ana kuae.”

²⁰ Ma BADA Abraham i riwei, “Tau, vikaruwaigawaiga ma gamaigaui a nonori da Sodom ma Gomorah melagaii ravai ai go'apoapoe i rata guratana.

²¹ A gaiagaira da ana inanai da wei vikaruwaigawaigana riwa kaua bo ega.”

²² BADA Abraham maiteni i maimairi ma nelara ruaiga i nae au Sodom.

²³ Abraham i nei BADA awarina ma i riwa i pa, “Riwa kaua da rava aiai ma vipupui rava apoapoei maiteni?

²⁴ Mepa da rava aiai 50 au melagai, amapo melagaina ma vipupui bo? Ma rava 50 notaiei ma melagaina ega ma vipupui?

²⁵ Lamna ega ita ai, ma ega ma kuae. Tam ega rava aiai ma virageni rava apoapoei maiteni. Nai kauai e kaukuae rava aiai awarii, kauana tagogina rava apoapoei awarii e kaukuae, egateni! Tam rava anatapui au dobu tauetareina ma ma etarana-kuelai tapa?”

²⁶ BADA i riwa i pa, “Mepa da rava 50 aiai ana nelaigai au Sodom, dobuna ana voterei taui ai go'aiai aubaina.”

²⁷ Abraham i paribelei i pa, “Au BADA tau am molaka, wate tau wei babanina a vikarei aubaina amapo ana paridadana me.

²⁸ Mepa da rava 50 aiai ma 5 ina dega, amapo melagaina ma vipupui bo?”

I riwa i pa, “Mepa da rava 45 kampa ana nelaigai lamna ega ana vipupui.”

²⁹ Abraham i paridadana me i pa, “Mepa da rava aiai 40 ava kampa u nelaigai?”

I riwa i pa, “Mepa da kampa 40, amapo ega ana kuae.”

³⁰ Abraham i riwa i pa, “Au BADA, ega awariu ma gaiawa ma vianineu da ana babani me, mepa da 30 ava kampa ma nelaigai?”

I riwa i pa, “Mepa da 30 ava ana nelaigai, amapo ega ana kuae.”

³¹ Abraham i riwa i pa, “Tau wei babanina a vikarei, mepa da 20 ava kampa ma nelaigai?”

I riwa i pa, “Mepa da 20 ana nelaigai lamna, ega ana vipupui.”

³² Abraham i riwa i pa, “Au BADA, ega awariu ma gaiawa ma vianineu da mara tagogi ava ana babani me. Mepa da 10 kampa ma nelaigai?”

I riwa i pa, “Mepa da 10 ana nelaigai, amapo ega ana vipupui.”

³³ Maranai BADA Abraham awarina i babani vorove, tauna i nae ma Abraham i nae ana au melagai.

19

¹ Ma raviraviai anela ruaiga au Sodom i geta, Lot melagai au metaetana i kiakiala.* Maranai Lot taui i 'nanai, i vomairi da i nae awarii ma i raudune.

² Ma i riwa i pa, “Au babada, tau ami taunola a nei, ona nei au au numa. Aemi ona oga ma ona matave. Maratomtomai ona vomairi da ami au aninae ona nae.”

Ma taui i paribelei i pa, “Ega! Tauai weka au deba ana matave.”

³ Ma i riwana bagibagi da maiteni i nae ana au numa. Lot, palawa ega yist† maiteni i apui ma taui i am.

⁴ Ma ita matave ma mai Sodom nelarai laralaragai ma magumaguri anatapui i nei da numa i kwaipipini,

⁵ ma taui Lot i kwatuei i pa, “Nelara ruaiga waguvarai i nenei awarim, taui mepa? Ma opuneiai awariai da ana viawawanei.”

⁶ Ma Lot i opu taui awarii ma au murina metaeta i gudui.

⁷ Ma i riwei i pa, “Au rava a vivibaigaimi, ega wei kauai apoapoei ona kuae.”

* **19:1:** Melagai, gaiemei i gari-kwaviviroi; ma metaeta tagogi bo ruaiga i terererei. Weka i kiakiala gimara bo viboruboru ma i viviogatara. † **19:3:** Eng. Yeast.

⁸ Ona rautaniāneu, tau natunatu waivinei ruaāga, taui matatapu. Ana opuneiai awarimi da ami āoana nanare ona kaei. Wei nelarai a neiai au numa lamna tau au taomana ma eāga aiwai awarii ona kaei."

⁹ Ma Sodom nelarai i paribelei i pa, "Ma maeria! Tam dobu āgela ravam weka e mamaegubai ma marina u āgoei da ma vibadabada. Marina ana viapoapoena-kauem eāga me taui ruaāga!" Ma taui Lot au metaeta i dudu ratui da gudu ita rikai.

¹⁰ Wate nelara ruaāga numa au orana urai i tere-opunei ma Lot i taina-ruiei awarii ma metaeta i gudu.

¹¹ Ma nelara anatapui au metaeta matai i viaipotai mara tupona ava da eāga tagotagogina metaeta ita inanai.

¹²⁻¹³ Anina ma nelara ruaāga Lot i riwei i pa, "Tauai marina wei dobuna ana pupuni. BADA, vikaruwaāgawaāga maāgamaāgau i nonori wei melagaina ravai awarii ma Tauna, tauai i paritawanelai da dobuna ana pupuni. Am dam ravai āgelaui weka e mamae bo eāga? Natunatum nelarai ma waivinei ma poipoiam ma am rava aiavoi au melagai maemaei; ma taravaina-opunei!"

¹⁴ Ma Lot i opu natunatuna ai āgopapara awarii ma i riwei i pa, "BADA marina dobuna ina pupuni. Laāgilaāgina, wei dobuna ona oputawanei." Ma taui i notai da tauna i vivinama.

¹⁵ Ma mara karea i tereterei ma anela Lot i vivibaāgai da ita volaāgilaāgina. Ma i riwa i pa, "Eāga ita ai da ma irāge maranai BADA wei dobuna ina pupuni. Laāgilaāgina awam ma natunatum maiteni ona opu."

¹⁶ Wate Lot i tatavira. BADA i āgoei da Lot ita vilawani. Ma anela Lot awana maiteni ma natunatui urai i vojijini ma melagaie i taravaina-opunei.

¹⁷ Maranai melagai i opu-tawanei ma anela tagogi taui i riwei i pa, "Ona ruba ami lawana aubaina! Eāga au murimi ona inana ma eāga au wapu ona tumairi dadana. Ola aubaina ona ruba da ami lawana eāga ona vine-boai."

²³ Ma madeāga i gogogo ma Lot ana numa ravai maiteni au melagai Zoar i āgeta.[‡]

²⁴ Lamna maranai BADA salpa araratana marei i paritawanana āgaireiai me garewa, Sodom ma Gomorah melagaii au tepai. §

²⁵ Ma melagaii, wapu, rava anatapui ma aiwai gogogoi i aragibui.

²⁶ Ma Lot awana i vivimuri, i mae-tavirei ma i ravi-taputapui.

²⁷ Ma ubaubanai boibōgi Abraham i vomairi ma i nae mepa BADA maiteni i bababani lana.

²⁸ Ma i 'nana āgaira Sodom ma Gomorah ma wapuna ana taputapuna ma kampa bau potopotona i 'nanai i āgēgae.

²⁹ Maranai God nai melagaii ma wapuna i pupuni, tauna Abraham eāga ita notavainuavurui. Ma lamna aubaina God Lot i paritawana-opunei ma muriai nai melagaina i vipupui.

21

Isaac i tupua

¹ Ma BADA Sarah i viaiaini ma i paripari-vainuaāgani nanare i kaei.

² Ma God mara i vinevineia nanare, Sarah i duama ma i vinatuna. Natuna orotona i tupua, Abraham i magura ma natuna i tupua.

³ Abraham natuna i viwavai Isaac.

⁴ [‡] Ma au pom 8 au murina Abraham natuna inina i bori me God i ririweia nanare.

⁵ Abraham ana madeāga 100 maranai wei kauai i tupua.

[‡] **19:23:** Hebrewei wava Zoar anona Aburu. § **19:24:** Salpa lamna āgaima logalogana. Maranaina e ararata, lamna i vibola kaua ma puāguna i apoapoei. [‡] **21:4:** Gen 17:12; Act 7:8

Abraham, Hagar ma natuna Ishmael i paritawanei

- ⁸ Isaac i rata ma i viedai ma Abraham lam ġaeġaena i vokaukauei ma i am gogona.
- ⁹ Ma Sarah Ishmael i 'nanai Isaac i vivinamei. Ishmael lamna Abraham natuna ġelauna, ana taunola Hagar Egyptei i ġuniġunia.
- ¹⁰ Ma Sarah Abraham i riwei, "Taunola wavinena ma natuna ma viopuni! Eġa ata ġoei da tauna am buderi ina vaia. Natu Isaac ainelana am buderi ina vaia."
- ¹¹ Abraham wei riwana i nonori ma i vinuabola kaua aubaina tauna natuna Ishmael.
- ¹² Wate God Abraham i riwei i pa, "Eġa natum ma alona ma vinuabolei. Am epaia Isaac wavam ina mairiei. Aiwai Sarah i ririwem ma kaei.
- ¹³ Wate am taunola wavinena natuna ana epaepaia ana vimaġai ma ana dam ina rata aubaina tauna tam natum."
- ¹⁴ Ubaubanai boibogħi Abraham tamaina i vokaukauei ma waira i ġui ma Hagar i viavarai. Ma wavine natuna maiteni i paritawanei da i nelabalababa au mutulua.

22

BADA, Abraham ana tumaġana i raudadani

- ¹ Madeġa maġamaġa i kwa ma muriae God Abraham ana tumaġana i raudadani. God i riwa i pa, "Abraham!"
- Abraham i paribelei i pa, "Tau weka!"
- ² Ma God i riwa i pa, "Natum tagotago Isaac nuanuam pouna, ma taravaini ma ona nae au dobu Moriah. Ma ola ana viatataem, kampa natum ma puloei aniamapu."
- ³ Mara i tom ma ubaubanai boibogħi, Abraham i vomairi, ai i edari pulo apunana aubaina ma ana donki i vokaukauei. Ma ana taunola ruāga ma natuna Isaac i taravaini ma anatapui i nae gabu God i ririweiana kampa.
- ⁴ Taui au pom tonuā ībabara ma Abraham i taepai ma gabu aueia i 'nanai.
- ⁵ Ana taunola i riwei i pa, "Weka ona mae. Donki ona paini. Tau natu maiteni ana nae nore ma God ana viborumei. Ma airuāga ana nememei awarimi."
- ⁶ Ma Abraham ai i tavana Isaac i viavarai. Tauna naipi ma ai mutuara i voai ma i negogona.
- ⁷ Taui i nenea ma Isaac i riwa i pa, "Amau!"
- Abraham i riwa, "Ee, ma babani natu!"
- Isaac i riwa, "Ai ma ai mutuara awarita wate pulo aubaina sipu natuna mepa?"
- ⁸ Abraham i paribelei i pa, "Natu, God sipu ina vereta pulo aubaina." Ma airuāga ībabara nae.
- ⁹ Maranai gabu God i ririweiana i ġeta, kampa aniamapu ġaimei i voai ma ai i vatari. Ma natuna Isaac urana ma aena i raġini ma aniamapu au tepana, ai i vatavataria kampa i vimataveni.
- ¹⁰ Abraham urana i viloloi da naipi i vaia da natuna ita viraġeni.
- ¹¹ Wate lamna maranaina BADA ana anela marei i riwa, "Abraham, Abraham!"
- Abraham i paribelei, "Tau weka!"
- ¹² Ma BADA ana anela i riwa, "Eġa natum ma viraġeni! Eġa aiwai apoapoena awarina ma kaei! Tam natum tagotago eġa uta nuanei ma marina a aramanei da tam anina God e vivivrei."
- ¹³ Abraham i taepai ma sipu orotona i 'nanai, donana ai raġaraġai potopotona au orana i tapaiei. Ma i nae ma sipu i viraġeni ma sia taputapuna i apui ana pulo God awarina, natuna epaiana.
- ¹⁴ Ma lamna aubaina wei dobuna i ġorei, "BADA ina verena." Lamna marana da marina rava e ririwa, "BADA ana au ola ina verena."
- ¹⁵ Ma BADA ana anela marei Abraham i ġorei

¹⁶ “BADA i riwa, ‘Tam u voteleteleu ma natum tagotago ega uta nuanei. Tau wavauei a paripari-vainuaiganim da

¹⁷ anina ana viaiainim ma am epaepaia ana vimagai me ubona au mara ma bubu au gera. Taui ai gavia ina vovaiubai ma ai melagai ina vaia.

¹⁸ Ma am epaepaia wavaiei dam anatapui au dobu ana viaiaini. Tam u voteleteleu aubaina wei ana kaei.”

¹⁹ Ma Abraham natuna maiteni i nae me ana taunola awari ma anatapui i nae me au Beersheba. Ma kampa i mae.

25

Esau ma Jacob i tupua

¹⁹ Wei lamna Abraham natuna Isaac ana virarautua. Isaac amana Abraham

²⁰ Isaac ana madega 40 ma Rebekah i ravagi. Rebekah tauna Leban novuna aburuna; amai Bethuel. Taui mai Aram au Padan-Aram i mamae.

²¹ Rebekah aipoi ma Isaac i raupari BADA awarina da awana ita voagui. BADA ana pari i nonori ma Rebekah i duama.

²² Raagaraga i vivitua au manawa aubaina Rebekah i nae ma BADA i vibagai, “Aiwei aubaina wei e tuputupua awariu?”

²³ BADA i riwa i pa:

“Roaroa ruaiga au manawam ina vidam ruaiga,
ma vinatuna da dam ruaiga ma taui ina viigavia vivira.

Tagogi ina virewapana telara

ma magurina aburuna awarina ina vitaunola.”

²⁴ Ana vinatuna ana mara i geta ma riwa kaua da raagaraga nelarai i guni.

²⁵ Natuevou opina lebalebarina ma inina ororona ma lamna aubaina i viwavai Esau.*

²⁶ Natuna gelauna i tuputupua turana au ae karena i voijina ma i opu ma i viwavai Jacob.†
Isaac ana madega 60 ma awana raagaraga i vinatunei.

Esau, natuevou ana buder i verenei Jacob awarina

²⁷ Maranai raagaraga i vilaraga, Esau tauna rava aroarona. Wate Jacob rava genugenu-anana ma au numa maemaena.

²⁸ Isaac ana goana gaegaena Esau, aubaina sia moduei i vunuvunui amna i goei. Wate Rebekah, Jacob i goana-kaei.

²⁹ Mara tagogi Jacob gwada i vivitavi ma Esau i aroaro da i nei ma inina i garigari ma am i 'raage-kaua.

³⁰ Ma Jacob i riwei i pa, “Tau am a irage kaua. Nai gwada lebalebarina ma taraigui da ana ani!” (Wenanare i riwa aubaina wava i verei Edom.‡)

³¹ Ma Jacob i riwa i pa, “Tam natuevou, Mara muriai amata ana buder i voagaena ma vaia. Marina ma riweu da am buder i tau ma vereu ma gwada ana verem.”

³² Esau i riwa i pa, “Tau am a irage kaua ma natuevou buderina amapo ega ina voagui, anina ma vaia!”

³³ Ma Jacob i riwa i pa, “Marina ma parivai-nuaiganu da am buder i tau ma vereu.” Ma Esau i parivainuaiana da natuevou buderina Jacob ina verei.

³⁴ Ma Jacob gwada i taraigui ma palawa da Esau i verei ma Esau i am ma i uma ma i vomairi da i nae. Wenanare i kauei lamna Esau ana buder ega ita vinuabolei.

* 22:18: Act 3:25 * 25:25: Mai Hebrew ai pona, inina ororona nonorana me Esau. † 25:26: Mai Hebrew ai pona, Jacob anona ae karena i voijini. Wei lamna awanaina, anona lamna amkwakwalana. ‡ 25:30: Mai Hebrew au pona, Edom anona Lebalebarina.

26

BADA i parivainuağana da Isaac ina viaiaini me Abraham

¹ Gomara ġaeġaena i nei au Canaan, me wariaġa Abraham ana au mara i tupua nanare. Ma Isaac ana dam maiteni i ġaira au melagai ġaeġaena wavana Gerar, kampa mai Philistia ai gulau Abimelek i mae.

² Ma BADA Isaac awarina i eġa ma i riwa i pa, “Eġa ma ġaira au Egypt, ma dobu ana riwem kampa ma mae.

³ [☆]Weka ma mae-gubai, tam maiteni ana mae ma ana viaiainim. Wei dobuna anatapuna tam ma am epaepaia ana veremi. Ma Abraham aiwai a parivainuağani ana kauei aubaimi.

⁴ Am epaepaia ana vimaġai, ai maġa me ubona au mara ma wei dobuna anatapuna taui ana verei. Am epaepaia awariei dam anatapui au dobu ana viaiaini.

⁵ Abraham ponau i nonori ma au babani ma au viararamana ma au tarawatu i voteletelei, lamna aubaina wei ana kauei am epaepaia aubai.”

⁶ Anina ma Isaac au Gerar i mae.

28

Muriae Isaac i nae da au Beersheba i mae. Maranai tauna i magura kaua (ma matana i oaoa) natuna orotona keikeina Jacob, amana i morui tauna i viaiaini me tauna natuevou. Maranai tuana Esau wei i nonori, tauna amlona i ġaigai kaua ma i ġoie da Jacob ita virägeni.

Isaac, Jacob i paritawanei Laban awarina.

¹ Isaac Jacob i kwatuei, i viaiaini ma i riwei i pa, “Eġa au Canaan awam ma vaia,

² wate ma vomairi ma ma nelaġilaġina au Padan-Aram, ġoġam Bethuel ana au dam ma kampa avum Leban natunatuna waivinei e mamae, kampa awam ma vaia.

³ Ma God VIVIREWAPANA KAUCAUANA am tavine ina viaiaini ma ina viuaim ma natunatum ina vimaġai ma tam dam borui ġaeġaei ina viamanem.

⁴ [☆]Ma tam am epaepaia maiteni ina viaiainim me Abraham i viaiaini nanare, da dobu marina e mamae-gubai, God Abraham i verevereia tam ma vibuderiei.”

Jacob ana rauboni au Bethel.

¹⁰ Jacob Beersheba i netawanei ma i nenaue au Haran.

¹¹ Madeġa i neulai ma gabu au tagogi,* i ġeta ma i rauvirai da i matave ma ġaima tagogi i vaia ma i viunutanei.

¹² Ma i rauboni da tete i 'nanai, karena au dobu ma damona au mara ma God ana anela i ġeġae ma i ġaigaira.

¹³ [☆]Ma BADA, au ririvana i maimairi ma i riwa i pa, “Tau BADA, Abraham ma Isaac ai God, dobu e matamatave lana tam ma am epaepaia ana veremi.

¹⁴ [☆]Ma am dam ana vimaġai da me doa pokauna ma ai parata ana viratai au lavaratei, rauanaġei ma karuwabuei. Ma am epaepaia maiteni taumiei rava anatapui au dobu ana viaiaini.

¹⁵ Ma notai da tau au ririvam a mamae ma ana painim am au vaġai. Ma ana neiana-meleiaim wei au dobuna. Eġa ana voterem da aiwai a parivainuağanim ana kauei.”

¹⁶ Jacob i matave vomairi ma i riwa i pa, “BADA anina weka e mamae ma tau eġa ata aramanei!”

¹⁷ Jacob i rovo kaua ma i riwa i pa, “Wei dobuna i vinirovorovo ġaġa! Wei anina God ana numa, Mara ana metaeta.”

* 26:3: Gen 22:16-18 [☆] 28:4: Gen 17:4-8 * 28:11: Gabu vivivireina. [☆] 28:13: Gen 13:14-15 [☆] 28:14: Gen 12:3; 22:18

¹⁸ Ubaubanai boibogi Jacob i vomairi ma āgaima i viviunutaneia i vaia ma i vitura-mairini da ita vimataira. Ma Olive monamonana i buloi āgaima au tepana da i vovivirei God aubaina.

¹⁹ Dobuna i āgorei Bethel[†] (Melagaina au naona i āgoregorei Luz).

²⁰ Ma Jacob, BADA awarina i parivainuaāgana, “Mepa da tam au ririvau ma mae ma ma inana vaiteteu au vaāgai, lam ma gara ma vereu.

²¹ Ma lawalawaiu ana nememei amau awarina, lamna maranaina Tam tau au God.

²² Ma wei matairana a tereterei, weka ana viborumem, Ma aiwai u verevereu ana gimai da āguta 10 ma āguta tagogi ana veremelem.”

35

BADA, Jacob i viaiaini

⁹ Jacob, Padan-Aramei* i nememei au Bethel. God i eāga me Jacob awarina ma i viaiaini

¹⁰ ma i riwei i pa:

“Tam wavam Jacob,

wate marina eāga ina āgorei Jacob

ma wavam vouna Israel.[†]”

Ma i viwavai Israel

¹¹ [‡]ma i pa:

“Tau God VIVIREWAPANA KAUCAUANA

Ma vinatuna guratana ma ma vimaāgaimi

Am epaepaia ina virava-āgægæi ma dam borui āgægæi awarimei ina tupua
ma gulagulau maāgamaāgai ina viamanei.

¹² Dobu, Abraham ma Isaac a verei,

marina tam ana verem

ma am epaepaia

muriai wei dobuna ana verei.”

¹³ Ma God i babani vorovei ma i netawanei.

¹⁴ [‡]God weka Jacob awarina i babani lamna matairana Jacob gana i vimairini. Ma au tepana wine i waāgi ana pulo[‡] ma Olive monamonana i buloi.[§]

¹⁵ Weka God Jacob awarina i babani ma lamna aubaina wei gabuna i āgorei Bethel.*

Rachel ana irāgē

¹⁶ Muriai Jacob ana dam maiteni Bethel i voterei ma i vaāgai, ma taui uama i rata da au Ephrath ita āgeta. Ma Rachel malana i vaia da ina vinatuna ma vinatuna i voiana-guratei ma ana iniviara i rata kaua.

¹⁷ Ma i voivoia ma iniviara i rata ma tauvипипиавоа i riwa, “Eāga ma rovo! Tevera orotona āgelauna i tupua!”

¹⁸ Wate Rachel i'rairaāgē ma ana lavutu au damona ma tevera i viwavai “Ben-Oni.[†]
Wate amana i viwavai, “Benjamin.[‡]

¹⁹ Ma Rachel i 'raāgē ma eta e nenea au Ephrath (marina wavana Bethlehem) au ririvana i doboi.

²⁰ Ma Jacob gana i vimairini Rachel ana kokoaga au tepana da i vimataira. Matairana amadodo e mamae.

[†] **28:19:** Wavanaugh Hebrewei anona God ana numa. * **35:9:** Padan-Aram Wei dobuna Aram au wapuna au Mesopotamia. Haran lamna melagai tagogi wei au dobuna. [‡] **35:10:** Jacob anona amkwakwalakwala. Israel anona God maiteni i viāgaiāiawa. [‡] **35:11:** Gen 17:4-8 [‡] **35:14:** Gen 28:18, 19 [‡] **35:14:** Wine i puloei pulo āgelauni maiteni. Jacob mataira i kauei da tauna i verena-melei God awarina. § **35:14:** Jacob wei gabuna i vovivirei God viborumana aubaina. * **35:15:** Bethel anona God ana numa. [†] **35:18:** Ben-Oni lamna anona au iniviara natuna. [‡] **35:18:** Benjamin lamna anona au oienā natuna. Lamna anona au āgoana bo au tauagu āgægæna.

Isaac ana i 'rađe

- ^{22b} Jacob natunatuna nelarai 12:
- ²³ Leah natunatuna:
Reuben; Jacob ana natuevou
Simeon, Levi, Judah, Isakar, ma Zebulun.
- ²⁴ Rachel natunatuna:
Joseph ma Benjamin.
- ²⁵ Bilhah - Rachel ana taunola wavine natunatuna:
Dan ma Naphtali.
- ²⁶ Zilpah - Leah ana taunola wavine natunatuna:
Gad ma Asher.
Wei lamna Jacob natunatuna anatapui au Padan-Aram i ġuni.
- ²⁷ [☆]Ma Jacob i nememei amana Isaac awarina au Mamre au Kiriath-Arba; marina e ġoreġorei Hebron. Abraham ma Isaac wariaġa wei dobuna i mae-gubai.
- ²⁸ Isaac i mae da ana madeġa 180
- ²⁹ ma i magura kaua, i lavutu tawanana ma iraġe ma amamana i votaġoi. Natunatuna Esau ma Jacob amai i doboi.

37

Joseph, tuatuana maiteni ai virarautua

- ¹ Jacob ana dam maiteni kampa i mae, wariaġa amana weka i mae, mai Canaan ai au dobu.
- ² Wei lamna Jacob natunatuna maiteni ai virarautua.
Joseph tauna laraga ana madeġa 17. Tauna tuatuana maiteni, amai awawana Bilhah ma Zilpah natunatui, amai ana sipu ma *gote* i paipaini. Wate Joseph tuatuana ai kaua apoapoe ġelaui amai i vibenabenamei.
- ³ Jacob ana au magura Joseph i tupua ma lamna aubaina natuna nuanuana i vai-kauei, eġa me natunatuna ġelaui nanare. Ma gara girugirumana, maiana ġaegħena i kauei ma Joseph i verei.
- ⁴ Maranai tuatuana i 'nanai da amai Joseph i ġoana-guratei eġa me taui, ma ai ora-apoapoe ai tevera awarina i rata ma eġa ita bababani kaua awarina.
- ⁵ Wagħvara tagogi Joseph i rauboni ma maranai tuatuana ana rauboni i riwei, taui ai ora-apoapoe i virata-guratei.
- ⁶ Joseph i riwa, "Ona rautaniġana ma au rauboni ana riwemi.
- ⁷ Anataputa au wapu *witi* ta bawabawai. Ma tau au bawa au pouna i mairi ma taumi ami bawa i kwaviviroi ma i raudunelei!"
- ⁸ Ma tuatuana i riwa, "Tam u notai da ma vibada bo? Ma tam ma vibadelai bo?" Ma Joseph ana babani ma ana rauboni aubaina taui amlo i ġaiġai guratana.

Joseph i gimarei

- ¹² Mara tagogi Joseph tuatuana amai ana *sipu* ma *gote* i taravaini ma i naiei au Shekem ma kampa i paini.
- ¹³ Ma Israel (wavana ġelauna Jacob) Joseph i riwei i pa, "Tuatuam au Shekem sipu ma *gote* e paipaini. A ġoem da ma nae taui awari."
- Joseph i vianina ma i riwa, "Anina ana nae."

[☆] 35:27: Gen 13:18

¹⁴ Amana i riwa i pa, "Ma nae tuatuam ma ġamoġamo ma i 'nanai, taui anina bo eġa, ma ma nememei da ma riweu." Ma Joseph i paritawanei. Hebron wapuna i netawanei ma i nae.

Maranai au Shekem i ġeta,

¹⁵ ma kampa au wapu i kwavikwaviviro ma oroto tagogi tauna i 'nanai ma i riwei, "Aiwei e baibaiei?"

¹⁶ Joseph i paribelei, "Tau tuatuau a baibaiei, taui ai sipu ma gote e paipaini. Uta riweu taui mepa?"

¹⁷ Tauna i paribelei i pa, "Taui i nae. A nonori i bababani i pa, 'Tana nae au Dothan.'

Anina ma Joseph tuatuana i votaġoi da au Dothan i nelaġai.

¹⁸ Maranai tuatuana matai i tawanei ma Joseph i 'nanai i nenei ma i aramanei da tauna. Muriai da ita ġetai taui ai oga i tarai da tauna ita viraġeni.

¹⁹ Taui i babani vivira i pa, "Taurauboni e nenei.

²⁰ Ona nei tana vunui ma waira dogona paipairana au orana tana tawana ġairei. Ma tana riwa da ġamoġamo moduei tauna i viraġeni. Ma tana inanai ana rauboni mena ina ġoा."

²¹ Wate Reuben ai ogatara i nonori, ma i ġoei da ana tevera ita gagaloei ma i riwa i pa, "Eġa ana lawana tana vaitawanei."

²² "Eġa tana viraġeni. Tana tawana ġairei waira dogona paipairana au orana weka au mutulua ma eġa tupuana tana vodadani." Reuben wenanare i babani aubaina i ġoei da ana tevera ita naiana-melei amana awarina.

²³ Maranai Joseph i ġeta tuatuana awarii, tauna i vojjini ma ana gara girugirumana i ġiġi-tawanei.

²⁴ Ma i vaia ma i tawana ġairei waira dogona au orana.

²⁵ Ma taui i kiala da i amam ma i taepai da dam mai Ishmael i 'nanai au Gilead da i nena e au Egypt. Taui ai gimara lam anitavidagiai ma bunama *mur** au kamel i vigerui.

²⁶ Judah varevareina i riwei i pa, "Aiwei aiaina tana vaia mepa da ata tevera tana viraġeni ma tana moru.

²⁷ Ona nei ma tana gimarei dam mai Ishmael awarii ma eġa urataiei tarana ina toi, tauna ata tevera, tara tagogi." Ma varevareina i vianina.

²⁸ *Ma maranai taugimara mai Midian† i ġetai, Joseph tuatuana tauna dogoei i tainapai ma i gimarei mai Ishmael awarii maiana silva 20 ana ruva nanare ma taui i naiei au Egypt.

²⁹ Muriai Reuben i nememei da au dogo i 'nana ġaira, ma Joseph kampa eġa ma i vinuabola kaua ma ana gara i sikai.

³⁰ Ma i nae me ana roaroa awari ma i riwa, "Ata tevera kampa eġa. Aiwei ana kauei?"

³¹ Anina ma taui gote i vunui ma au tarana ana gara i virai.

³² Ma ana gara i naiei amai awarina ma i riwei i pa, "Tauai wei garana a nelaġai. Ma inanai wei natum ġarinei bo eġa?"

³³ Amai gara i 'nanai ma i riwa, "Anina wei tau natu ana gara. Ġamoġamo ġaġaiawai natui i vunui. Oo natu! Ġamoġamo natu i uta-sikasikai."

³⁴ Ma Jacob i vinuabola kaua ma ana gara i sikai. Ma ġamoġamo opina i oteni ma natuna i moguei da nawaravi biaġa i kwa.

³⁵ Ana numa ravai i nae awarina da ita vinuaubai. Wate tauna vinuauba i geduaiei ma i riwa i pa, "Ana tou ma natu ana moguei da au dogo ina tereġaireu ma ana nae mepa natu i nenelana." Ma natuna i touei.

* **37:25:** *MurMyrrh*. Wei dobuna ravai ai bunama ġabuabuna ma ana nola i maġa. † **37:28:** Act 7:9 † **37:28:** Buka taugirumana dam wavai ruaġa i terei, mai Ishmael ma Midian, wate mepa da taui dam tagogi.

39

Potiphar awana, Joseph i rauoġarei

¹ Dam mai Ishmael Joseph i ġairei au Egypt, ma Potiphar tauna i gimarai da ana taunola. Potiphar tauna Egyptei ma sorodia ai bada ġaeġaena.

² [✳]BADA Joseph i mae-ratui ma i voagui da anatapuna aiaina i kaukauei ana bada aubaina. Tauna Potiphar ana au numa i mae.

³ Potiphar i 'nanai da BADA Joseph i mae-ratui ma i voagui da aiwai anatapuna i kauana-kauei,

⁴ ma wei Potiphar i vinuaiaeī ma Joseph i terei da tauna aubaina ina nola, ma ana taunola numa au orana, ma ana purapura anatapuna ina vibadei.

⁵ Nai marana da i nenai, Joseph awarinei ma BADA Potiphar ana numa orana ravai ma ana purapura anatapui au numa ma ana au wapu i viaiaini.

⁶ Anina ma Joseph vaivai i verei da Potiphar ana purapura anatapui i paini, ma ana bada ana nola da am ava ina paipaini.

Joseph i tupua da karawata ma inanana aiaina.

⁷ Kampa eġa ita mae-pora ma ana bada awana Joseph i 'nana rauoġarei ma i riwei i pa, "Ma nei tana matave."

⁸ Wate Joseph i geduai ma wavine i riwei i pa, "Ma i 'nana, tau au bada weka i tereu da a vivipaipai ma lamna aubaina tauna eġa aiwai numa au orana ina vinuabolei. Tauna ana purapura anatapuna au urau i terei.

⁹ Tau au rewapani wei au numana nanare tauna, ma eġa aiwai ita nuanei anina tam ainelam. Menanare da kaua apoapoena ana kauei da God au matana au ġoа ina apoapoe."

¹⁰ Wavine marana patapatai Joseph i rarauelari da maiteni ita matave, wate Joseph i gedugeduai ma i nene-tawanei.

¹¹ Mara tagogi Joseph i nae au numa da ita nola, ma kampa eġa taunola ġelaui.

¹² Ma Potiphar awana i nae ma Joseph ana au kareko i voa ma i riwa i pa, "Ma nei tana matave!" Wate Joseph i ruba-opu au doa ma kareko wavine au urana i voterei.

¹³ Wavine i 'nanai da Joseph i ruba-opu ma ana gara au urana i voterei,

¹⁴ ma wavine ana taunola i kwatuei da i nei ma i riwa i pa, "Weka ona inana! Wei Hebreweina awau i neiai awarita, i vinameta. I nei awariu ma i ġoei da ita viawawaneu wate tau garara a vikarei.

¹⁵ Ma i nonori a garagarara ma i ruba-opu ma ana kareko i ruba-tawanei."

¹⁶ Ma wavine kareko i paini da awana i nememei au numa.

¹⁷ Ma wavine riwana tagogina awana i riwei i pa, "Wei Hebreweina tam u neiai awarita, i vinameta. I nei ma i ġoei da ita viawawaneu.

¹⁸ Wate maranaina a garagarara, tauna i ruba-opu ma ana kareko au ririvau i voterei."

¹⁹ Potiphar awana ana babana i nonori ma amlona i ġaġġai kaua.

²⁰ Anina ma tauna Joseph i vaia ma panipani au numana i tawana-ruiei, mepa gulau ana panipani e mamae ma kampa i mae.

Maranai Joseph au panipani-numana

²¹ [✳]BADA Joseph i mae-ratui ma i viaiaini, lamna aubaina da panipani taupainina Joseph i vinuaiaeī.

²² Ma tauna Joseph i terei da panipani ravai ita vibadei ma nola au urana i terei.

²³ Panipani taupainina ana nuabola eġa aiwai, aubaina Joseph aiwai anatapuna i paipaini. Ma BADA tauna i mae-ratui ma i voagui da aiwai anatapuna i kauana-kauei.

40

Joseph, taui ai rauboni anoi i viēgei.

¹ Ma mara tagogi Pharaoh* ana *wine* taupainina ma palawa tauapuina babadai, i kauana-boai Pharaoh awarina.

² Pharaoh amlona i āgaiābabadai ruaāgai awari.

³ Ma i vaia ma panipani au numana i terei mepa Joseph i mamae lana, sorodia ai bada ana au numa.

⁴ Sorodia ai bada wei ruaāgai i naiei Joseph awarina ma tauna ravai i paini. Taui i mae-guratana au panipani numana.

⁵ Waguvara tagogi babadai ruaāgai panipani au numana i rauboni. Ma ai rauboni anoi taputapunei ava.

⁶ Ma ubaubanai maranai Joseph i nei awari ma i 'nanai da taui eāga ita vinuaiai.

⁷ Ma ruaāgai i paridadanei, "Aiwai aubaina naomi i peu?"

⁸ Taui i paribelei, "Tauai airuaāga a rauboni ma eāga aiai da ai rauboni anona ita viēgelai." Joseph i riwa, "God ainelana rauboni e viviēgai. Ami rauboni ona riweu."

⁹ Anina ma *wine* taupainina ana rauboni Joseph i riwei, "Au rauboni au orana grape āgorōgorovana a inanai au naou.

¹⁰ Ma āgorōgorovana rāgaraāgana tonuāga. Ma i raurugu ma i talai ma anona tapina i magura.

¹¹ Pharaoh ana aniuma kelakana a vovoijini ma grape a purai ma au kelaka a buloi da Pharaoh a verei."

¹² Ma Joseph tauna i riwei, "Am rauboni anona wei. Grape rāgaraāgana tonuāga, anona lamna au pom tonuāga.

¹³ Au pom tonuāga au murina, Pharaoh ina tere-opunem ma am au nola ina tere-melem. Ma tam, Pharaoh ana aniuma kelakana au urana ina tere-melei, me au noana nanare.

¹⁴ Wate maranai wei gabuna u opu-tawanei ma aiwai anatapuna ina ai-me. Tau ma notaiu, am i viaiai ma kauei da au nuabola Pharaoh ma pariverei da panipani-numanei ina tere-opuneu.

¹⁵ Pharaoh ma riwei aiwai awariu i tupua. Mai Hebrew ai au dobu i daneneu ma weka i neiaiu, wate tau eāga aiwai ata kauana-boai ma weka au dogo i tawaneu."

¹⁶ Ma palawa tauapuina i 'nanai da Joseph nuaiai riwana i viēgai ma i riwa, "Tau nanare a rauboni. Palawa irigana tonuāga au kolau a terei.

¹⁷ Iriga au tepana, lamna palawa apuapunana tapuna ma tapuna Pharaoh aubaina, wate kiu i nei ma au kolau, au iriga palawa i amam."

¹⁸ Joseph i paribelei i pa, "Am rauboni anona wei. Iriga tonuāga lamna au pom tonuāga.

¹⁹ Aupom au vitonuina, Pharaoh panipani-numanei ina tere-opunem da uam ina borituini ma tupuam ai au tepana ina vitakei ma kiu ina nei ma vioam ina ani."

²⁰ Ma au pom au vitonuina, lamna Pharaoh ana tupua marana ma torela āgēgēna i kauei, ana gabemani babadai aubaii. Ma ana *wine* taupainina ma palawa tauapuina panipani-numanei i tere-opunei ma i neiai Pharaoh awarina, ana gabemani babadai au matai.

²¹ Ana *wine* taupainina, ana au nola i tere-melei me au naona nanare. Ma tauna, Pharaoh ana aniuma kelakana au urana i tere-melei.

²² Wate ana sorodia i egari da ana palawa tauapuina uana i borituini ma tupana ai au tepana i vitakei. Joseph menanare rauboni i viviēganei, nanare i tupua.

²³ Wate *wine* taupainina, Joseph nuanuana i vuru ma eāga ita vinua-notenotei.

* ^{40:1:} Mai Egypt ai wavalatona i āgorei Pharaoh. Wei lamna ana vaivai ma eāga wavana.

41

Pharaoh ana rauboni

- ¹ Ma madeğā ruağā i kwa, ma Pharaoh i rauboni da tauna waira Nile au adana i maimairi.
- ² Ma bulumakau 7 aiaii ma dododoi wairei i ġeta ma waira au adana gidagida i amam.
- ³ Ma bulumakau 7 apoapoei ma kirakiramai wairei i ġetai da bulumakau aiaii au ririvai i raumairiei waira au adana.
- ⁴ Bulumakau 7 apoapoei ma kirakiramai i vomairi da bulumakau 7 aiaii ma dododoi i lawana-pai. Anina, ma Pharaoh matana i kala.
- ⁵ Ma i matave me ma mara viruaina i rauboni da *witi* aina tagogi ma rovei 7 aiaii ma dododoi i 'nanai.
- ⁶ Anina ma *witi* rovei 7 muriai i gogogo wate rauanağā i ravi da i jinajina.
- ⁷ Ma *witi* rovei jinajinai 7 i vomairi da *witi* rovei dododoi 7 i lawani. Anina ma Pharaoh matana i kala ma i aramanei da i rauboni.
- ⁸ Ubaubanai Pharaoh nuantuana i bolai ma riwa i paritawanei da rauboni tauvieğai ma nuaulaulai anatapui au Egypt i nei. Ma ana rauboni i riwei ma eğā aiai ravana da ana rauboni anona ita vieğei.
- ⁹ Ma wine taupainina Pharaoh i riwei, "Amadodo ana rupena da tau a kauana-boai.
- ¹⁰ Mara tagogi tam amlom i ġaiğai palawa tauapuina ma tau awariu, da u paniai ma sorodia ai bada ana au numa a mae.
- ¹¹ Ma waguvvara tagogi tauai tagotagogi ava a rauboni ma ai rauboni anoi taputapunei ava.
- ¹² Laraga Hebrewei kampa tauai maiteni, tauna sorodia ai bada ana taunola. Ai rauboni a riwei ma tauna ai rauboni anona i vieğelai
- ¹³ Ma tauna aiwai i ririweia nanarena i tupua. Tau u tere-melevu au au nola ma palawa tauapuina u virağeni."
- ¹⁴ Ma Pharaoh, Joseph ana riwa i paritawanei ma panipani-numanei lağilağina i neiai. Joseph i viamğari ma ana gara aiaina i oteni. Ma i naiei Pharaoh awarina.
- ¹⁵ Ma Pharaoh Joseph i riwei, "Waguvvarai a rauboni ma eğā aiai au rauboni anona ita vieğeu. Wate rava i riwa da maranai tam rauboni e nononori, lamna anona e vivieğai."
- ¹⁶ Joseph i paribelana, "Tau eğā tagotagogina, wate God am rauboni anona ina verem da oram ina viubai."
- ²⁵ Joseph i paribelei, i pa, "Oo bada, rauboni ruağai anoi tagogina. God aburuna ava da aiwai ina kuae lamna gulau i viatataiei.
- ²⁶ Bulumakau dododoi 7, ma *witi* rovei aiaii 7, lamna maura madeğana 7.
- ²⁷ Bulumakau kirakiramai 7 muriai i nei, ma *witi* rovei jinajinai 7, lamna anona amapo madeğana 7 au orana gomara.
- ²⁸ —Aiwai a ririweia, nanare ina tupua. God i viatataiem da aiwai ina kuae.
- ²⁹ Madeğā 7 au orana, lamna maura ġaegäena Egypt au anatapuna.
- ³⁰ Wate au murina, gomara ġaegäena ina mae da madeğā 7 da Egypt ana maura marana rava nuantuai ina vuru ma gomara rava ina vipupui.
- ³¹ Gomara ina rata kqua da maura marana nuantuata ina vuru.
- ³² God i vianina da wei ina tupua ma eğā barana ina uama, lamna aubaina rauboni ruağā i verei.
- ³³ —Au bada, tam, oroto nuaulaulana ma notanotana uta vinei da Egypt ita vibadei.
- ³⁴ Wei uta kuae, babada uta terei Egypt au anatapuna da tuaruta au marana ġuta vi-five-na ita vaia madeğā 7 maura au marana.
- ³⁵ Ma rewapana ma verei da au maura, taui lam ina tami da au anara ina vidamni ma ina paini.

³⁶ Wei lamii ina tereriei rava aubaii maranai madeğä 7 gomara au Egypt ina nei. Ma wei taunei, mai Egypt eğä am ina irağe.”

³⁷ Anina, ma Pharaoh ana gabemani maiteni oga-tarana i vianinei.

³⁸ Ma i riwei i pa, “Mepa rava ġelauna tana nelağai me Joseph ma God Aruana tauna au orana e mamae?”

³⁹ Anina ma Pharaoh, Joseph i riwei, “God wei anatapuna i viatataiem, eğä aiai ġelauna nuaulaulana ma notanota kauana me tam.

⁴⁰ ♦ Tam ana terem da au dobu ma vibadei ma au rava anatapui am riwa ina voteletelei. Tau Pharaoh, ma am rewapani tau ainelau au rewapani eğä ina ġetawanei.”

⁴¹ Ma Pharaoh i riwa, “Marina tau a vinem da Egypt anatapuna ma vibadei.”

⁴² Ma Pharaoh au urana ana vigulau *ringna* i votawanei ma Joseph au urana i terei,* ma gara maiana ġaegħena i vioġteni ma sein goldei au uana i tere-taġonei.

⁴⁵ Ma Pharaoh Joseph wava Zaphenath-Paneah,[†] i verei ma mai On ai pirisi Potiphera[‡] natuna guguinina Asenath, Joseph i verei da awana. Anina ma Joseph, dobu Egypt i vibadei.

⁴⁶ Joseph ana madeğä 30 ma wei vibadana i vaia. Ma Joseph, Pharaoh i netawanei ma Egypt i naeni ma i tuvirevirei.

⁴⁷ Maura ġaegħena i nelağai madeğä 7 au orana.

⁴⁸ Joseph ai maura ġelaui i tami maura madeğana 7 au orana au Egypt, ma au melagai nununai i tere-kauei ma i paini. Melagai anatapui ai lam au anara i terei.

⁴⁹ Joseph lam i vidamni da olana i mairi me bubu au gera ma iavana i kauana-avei aubaina lam i rata dewadewa.

⁵³ Ma maura madeğana 7 au Egypt au damona i ġeta.

⁵⁴ ♦ Ma gomara madeğana 7 i raukarei, me Joseph i ririweia nanare. Gomara dobu au anatapuna, wate Egypt au anatapuna lam i mamae.

⁵⁵ Maranai mai Egypt raumolağau i vikarei, taui Pharaoh i vibağai lam aubaina. Ma taui i riwei da ita nae Joseph awarina ma tauna aiwai i ririweia ita kauei.

⁵⁶⁻⁵⁷ Maranai gomara Egypt anatapuna i vaia, Joseph anara i votawatawanei ma lam mai Egypt awari i gimarei. Anina ma gomara i rata kaua dobu au anatapuna da rava anatapui i nei Joseph awarina au Egypt lam gimarana aubaina.

42

Jacob, natunatuna i paritawanei au Egypt

¹ Ma au Canaan Jacob i nonori da au Egypt lam ma natunatuna nelarai i riwei, “Aiwaina da o mamae labalababa?

² ♦ Anina ona rautaniġana! A nonori da lam au Egypt. Ona ġaira kampa ma aubaita lam ona gimarai da tana lawana ma eğä tana irağe.”

³ Anina ma Joseph varevareina ten i ġaira au Egypt da lam ita gimarai.

⁴ Wate Jacob eğä Joseph ana tevera oien Benjamin ita paritawanei aubaina i rovo mepa da aiwai apoapoena awarina ita tupua.

⁵ Taui rava ġelaui maiteni i nae au Egypt da lam ita gimarai aubaina gomara ġaegħena dobu Canaan maiteni i vaia.

* **41:40:** Act 7:10 * **41:42:** Mataira da Joseph, Pharaoh ana rewapani ma ana riwei i nolanola. † **41:45:** *Safenat-panea* Egypt ai ponei anona *God i bababani ma i lawana*. ‡ **41:45:** *On Wei lamna dobu wavana, ma wavana ġelauna lamna Heliopolis*. Wei au dobuna rava, madeğä i raudunelei. ♦ **41:54:** Act 7:11 ♦ **42:2:** Act 7:12

⁶ Joseph i vibada ġaegħaena au Egypt ma tauna lam i għimġimarei dobu anatapui ravai awari. Varevareina i ġetai ma Joseph au naona i mae-ġairā au doa ma i raudune.

⁷ Joseph taui i 'nanai ma maratagogi i aramanei da taui aiavoi ma i kauana-melei da apamina taui eġa ita aramanei. Ma riwa bagibaginei i vitara-virevirei, "Taumi meiei o nei?"

Taui i paribelei, "Tauai Canaanei a nei da lam ata gimarai."

⁸ Joseph tuatuana i 'nanai da i aramanei, wate taui ai tevera i vinua-nainei.

⁹ [◊]Ma ana rauboni wariaġana i notai ma i riwei, "Taumi i paritawanemi da ai dobu ana ġokkokkara ota inanai bo."

¹⁰ Taui i paribelei, "Oo bada eġa! Tauai am laralaraga a nei da lam ana gimarai."

²¹ Ma taui i babani vivira, "Nai maranaina ata tevera ana ora-viarana agu i toutouei awarita ma, eġa tata rau-nu'apoapoelei. Tauta ata wavu lamna kovoġana marina ta vaivaia."

²² [◊]Reuben i paribelei, "Nai maranaina a riwemi, 'Eġa ata tevera ona vodadani!' Wate taumi eġa ota rautaniġaneu. Marina ata tevera tarana kovoġana ta vaivaia."

²³ Joseph Egypt ponanei i bababani ma rava ġelauna taui ai ponei i paripari-verei. Wate taui eġa ita aramanei da Joseph ai babani i nononori.

45

Joseph i vieġana-melei

⁴ Joseph varevareina i riwei, "Ona nei au ġereġereu." Ma taui i nei au ġereġerena. Ma i babani, i pa, "Tau ami tevera Joseph, mai Egypt awari o gimareu.

⁵ Wate eġa orami ina bolai, ma eġa ami rava maiteni tau o gimareu aubaina ona viamparipari. Wate God au naona i paritawaneu da rava ata vilawani.

⁶ Wei gomarana dobu e viviapoapoeni marina madeġa ruaġa i kwa. Wate madeġa five ġelauna e mamae da eġa tana ipi bo tana tuaruta.

⁷ God i aipari-tawaneu da taumi ma ami dam ravai maiteni ata vilawanimi, ma ami dam avena ita pupu.

⁸ Ma eġa taumi weka ota paritawaneu wate God, ma tauna i tereu da Pharaoh ana taunola ai bada ġaegħaena ma ana numa ma aiwai anatapuna au Egypt a vivibadei.

⁹ [◊]Marina laġilāġina ona nae me amau awarina ma ona riwei, 'Natum Joseph wenanare i riwa, God i tereu da Egypt anatapuna a vivibadei, ma tam laġilāġina ma ġairai awariu.

¹⁰ Tam au ġegħereu ma mae au Goshen; ma nanare natunatum ma ġoġogħam ma am ġamōġamo ma aiwai anatapuna ġarimei.

¹¹ Gomara madeġana five amaro e mamae, aubaina tau lam ana verem. Mepa da wei eġa ana kaei tam ma am dam ma am laraga ma am ġamōġamo anatapui ina vinuapoapoe ma ina raumolaġau."

²⁵ Anina ma Joseph tuatuana Egypt i opu-tawanei ma i nae me amai Jacob awarina au Canaan.

²⁶ Ma taui Jacob i riwei, "Natum Joseph lawalawaina e mamae, ma tauna marina Egypt e vivibadei." Jacob i vinu anaina ma nai babani eġa ita vitumaġanei.

²⁷ Wate taui aiwai anatapuna Joseph i ririweia amai i pariverei. Ma Joseph ana anigeru i paritawanei da Jacob ita vigerui da ita naiei au Egypt. Maranai weii i 'nanai, Jacob ana nota i nememe.

²⁸ I pa, “Tau marina a aramanei da natu lawalawaina e mamae, ma ana nae da ana inanai ma muriai da ana irāge.”

46

Jacob, natunatuna ma ġoġoġana maiteni i nae au Egypt.

¹ Anina ma Jacob ġarinei anatapuna maiteni i nae au Egypt. Ma au Beersheba i ġeta, ma kampa pulo i apui amana Isaac ana God awarina.

² Ma waguvvarai God rauboniei awarina i babani i pa, “Jacob! Jacob!”

Ma tauna i paribei, “Tau weka.”

³ God i riwa, “Tau God, amam ana God. Egypt ġairana eġa ma rovoei, aubaina tau am epaepaia ai dam boruna ana vimaġai kampa.

⁴ Tau maiteni tana nae au Egypt ma am epaepaia ana neiana-meleiai wei au dobuna. Joseph amapo au ririvam, maranai ma irāge.”

⁵ Jacob, Beersheba i voterei, ma natunatuna nelarai amai i vojjini, ma anatapui awawai ma natunatui maiteni, au anivigeru Pharaoh i paripari-tawaneiana i geru.

⁶⁻⁷ [✧]Ai ġamoġamo ma ġariei anatapuna au Canaan i vaivainia i naiei au Egypt. Anina ma Jacob, natunatuna nelarai ma waivinei ma ġoġoġai ma ana numa ravai anatapui i nae au Egypt.

²⁸ Jacob Judah i aiparitawanei au Egypt da Joseph ita riwei da au Goshen ita nebelei. Maranai i ġeta.

²⁹ Joseph ana chariot i gerui ma i nae au Goshen. Maranai amana i nebelei, i taragwabai ma i tou guratana.

³⁰ Jacob Joseph i riwei, “Naom a inanai ma a aramanei da tam lawalawaim, marina ana nuaubau ana irāge.”

48

Jacob, Ephraim ma Manasseh i viaiaini

¹ Wei kauai au murina, rava Joseph i riwei, “Amam i doria.” Anina ma natunatuna Manasseh ma Ephraim i taravaini ma i nae amana da ita inanai.

² Rava tagogi Jacob i riwei, “Natum Joseph i ġetai da ina inanaim.” Jacob doridorianma i voguratei da i vomairi ma ana animatave au tepanai i kiala.

³ [✧]Anina ma Jacob natuna Joseph i riwei, “God VIVIREWAPANA KAUCAUANA awariu i eġa au Luz (Bethel) au Canaan ma i viaiainiu.

⁴ Ma i riwei, ‘Natunatum ana vimaġai ma am epaepaia ai dam ana viratai; wei dobuna am epaepaia ana verei da ina viġariana-nonoei.’

⁵ —Ma lamna aubaina ġoġoġau ruaġa Manasseh ma Ephraim au Egypt tuputupuai muriai da a nei; lamna tau ana vaia da natunatu me natunatu Reuben ma Simeon.

⁶ Roaroa muriai e tuputupua lamna tam ġarimei; ma ai buderi Ephraim ma Manasseh awariei ina vaia.”

¹³ Anina ma Joseph natunatuna ruaġa i neiae Jacob awarina, Ephraim amana au oienam lamna Jacob au kelakelauna ma Manasseh amana au kelakelauna lamna Jacob au oienam

14 Wate Jacob uraoiена i tere-tаgonei ma Ephraim au kolana i terei avena da tauna umau, ma ura-kelakelauna i tere-tаgonei da Manasseh au kolana i terei avena da tauna natuevou.*

15 Anina ma Joseph† i viaiaini i pa,

“God. Tam Amau Isaac ma  og au Abraham ai God,
God taupainiu au lawana au anatapuna,

16 Ma am anela taugagaloeu au anatapuna wei roaroai ma viaiaini!

Ma wavau ma amamau wavai awarii ina mae-nonoa
ma a raraupari da ai dam ma viratai au dobu.”

17 Wate maranai Joseph i 'nanai da amana aiwai i kaukauei ma tauna e ga ita vinuaiai; ma amana urana Ephraim au kolana ita vaitawanei ma Manasseh au kolana ita terei.

18 Joseph amana i riwei, “Amau e ga nanare. Wei tauna natuevou uraoiem au kolana ma terei.”

19 Wate Amana i riwa, “Natu! Tau a aramanei aiwai a kaukauei. Manasseh maiteni ana dam ina rata kaua. Wate ana tevera wavana ina rata ma ana dam ina rata dewadewa e ga me tuana.”

20 Anina ma Jacob roaroa nai marana i viaiaini i pa,

“Mai Israel wavam ina latoni maranai e viviaaina, taui ina riwa,
‘Tauai a raraupari da God ina viaiainim me Ephraim ma Manasseh i viaiaini nanare.”

Wenanare lamna Ephraim wavana i ailatoni ma muriai Manasseh wavana.

21 Ma Israel, Joseph i riwei, “Tau aburuna ava da ana ir ge. Wate God awarim ina mae da ina naiana-melem au Canaan, amamam ai au dobu.”

49

Jacob, Judah i viaiaini

8 “Judah, varevareim ina voepaepaim,
ma amam natunatuna ina raudunelem
aubaina tam am  gavia au uai ma voa ma ma vovaiubai.

9 Judah natu, tam me lion natuna,
ana sia i am vorovei da i amruruna ma e matamatave,
e ga aiai ana matave ina viapoapoeni!

10 Gulau ana ji gona Judah ina vojjini
ma ana epaepaia ina vibada nonoa,
anina da ji gona taniwigana ina nei
maranaina dobu anatapui ravai tauna ina raudunelei ma ina viborumei.”

33♦ Ma Jacob natunatuna awarii i babani vorovei, ma tauna ana au animatave i rauvirai ma i 'r ge.

50

Joseph, tuatuana i vinuaubai

15 Ma maranai Jacob i 'r ge, Joseph tuatuana i rovo ma i riwa, “Mepa da Joseph amlona ina  gai gai ma ina raubiwa, kaua apoapoena awarina ta kuaeи aubaina.”

* **48:14:** Taui ai nota da au oiena kialana lamna kaua bo nota  g e g ena ma e ga me au kelakelauna kialana nanare. Lamna aubaina Jacob nimana au oiena tevera au kolana i tereterei tauna amapo viaiaina  g e g ena ina vaia e ga me  g elauna nanare. Lamna aubaina Joseph i baiei maranai Jacob nimana au oiena tevera umauna au kolana i terei.

† **48:15:** Maranai Jacob  og og ana i viaiaini, tauna Joseph i viaiaini. ♦ **49:33:** Act 7:15

¹⁶ Ma lamna aubaina riwa i paritawanei Joseph awarina i pa, “Amata maeninai ma wenanare i riwelai i pa,

¹⁷ ‘Joseph wenanare ona riwei, “Tuatuam kaua apoapoe kaukauana awarim i kauei. Wate a īgoeida ai kaua apoapoe ma nota-tawanei.” “Tauai amam ana God a vovoepaepai, ma a vivibaā-guratem da ai īgo’apoapoe ma nota-tawanei.” Maranai Joseph wei riwana i nonori tauna orana i viara kaua ma i tou.

¹⁸ Anina ma tuatuana i nei ma au naona i mae-peu ma i riwa, “Ma inanaiai tauai am taunola a nei.”

¹⁹ Wate Joseph taui wenanare i riwei, “Tau īga ona rovoeu, tau īga God da ana kovoīgimi.

²⁰ Wariāga o īgoeida ota viapoapoeniu wate God i virai da aiaina i kauei da rava mağamağau ina vilawani ma īga ina pupu.

²¹ Anina, īga ona rovo! Tau ana painimi, natunatumi maiteni.” Ma nanare i babani da orai i rauei.

Exodus Oputawanana

Jacob dam ȁaēgaena i vitupui au Egypt

¹ Jacob natunatuna ana awawai ma natunatui anatapui maiteni i ȁgaira au Egypt. Taui wavai wenanare:

² Reuben, Simeon, Levi, Judah;

³ Isakar, Zebulun ma Benjamin;

⁴ Dan, Naphtali, Gad ma Asher.

⁵ Jacob natunatuna ma ȁogogana nelarai, anatapui ai māga 70 i ȁgaira, Joseph au Egypt maemaena maiteni i 'avi.

⁶ Muriai Joseph ma varevareina ma nai kimtana i 'rāge-pai,

⁷ [♂]Wate ai epaepaia - mai Israel, i vinatuna guratana da dam ȁaēgaena i vitupui ma Egypt anatapuna i vioai.

Pharaoh mai Israel i rau-iviapoapoelei

⁸ [♂]Madēga māgamāgaui au murina Pharaoh vouna i vibada au Egypt, ma Joseph ma aiwai i kuae ēga ita aramanei.

⁹ Pharaoh ana rava i riwei, "Ona inana, mai Israel i māga guratana ma i virewapana kaua ēga me tauta.

¹⁰ [♂]Tauta tana viogatara da menanare tana kauanei da ai vinatuna ēga ina rata guratana. Ma mepa da wei ēga tana kuae ma maranai ȁavia ina nei, ma taui ȁavia maiteni ina vitagogie i da ina vīgavieta, ma ina opu-tawaneta."

¹¹ Ma nola babadai i terei da mai Israel nolei i vunuvunu. Wei babadai mai Israel i egari da taon ȁaēgæi ruāga i voai wavai Pithom ma Rameses, ma kampa Pharaoh ana lam ma purapura ȁelaui i vidamni.

¹² Mai Egypt amapo da taui i rau-iviapoapoelei, wate mai Israel amapo da i vivinatuna ma ai dam i rarata au Egypt. Ma lamna aubaina mai Egypt mai Israel i rovoei.

¹³⁻¹⁴ Ma taui mai Israel i egari da nola vivitaina i kaukauei ma i vinuapoapoe. Ma brik i kaukauei ma doa i gwadai da brik anipasina, ma wapu nolai maiteni i kaukauei. Mai Egypt nolei mai Israel i vunuvunu ma ēga ita rau-nuapoapoelei.

²² [♂]Pharaoh ana rava i riwei, "Maranai wavine Hebrewei tevera orotona i ȁuni, teverana au waira Nile ona tawanei. Wate maranai tevera wavinena i tupua, ona voterei da ina mae."

2

Moses i tupua

¹ Maranai wei kauai i tuputupua, oroto tagogi Levi ana damei ma wavine ana damei i ravāgi,

² [♂]wavine i raumanawa ma natuna orotona i ȁuni. Ma wavine i 'nanai da natuna inanana aiaina i tupua, ma natuna i tere-govāgi da nawaravi tonūga i kwa.

³ Wate ēga tagotagogina da ita teregovāga-nonoei ma iriga waira modunei* voavoana i vaia ma koltei gavogavo i pasi-tomeni da waira ēga ina rui. Ma tevera au iriga i poai ma waira modui au orai i terei au waira Nile.

⁴ Tevera tuana wavinena aueia i mae ma ana tevera i vineneğanei da ita inanai awarina aiwai ita tupua.

⁵ Ma Pharaoh natuna gugunina i ġairai da ita toa. Ma ana taunola waivinei waira au adana i bababara-nae. Pharaoh natuna iriga i 'nanai modu au orana ma ana taunola i paritawanei da irigana ita neiae.

⁶ Maranai Pharaoh natuna iriga i votawanei ma tevera i toutou i 'nanai, nuanuana i bolai ma i riwa, "Wei mai Hebrew natui."

⁷ Tevera tuana wavinena i nae ma Pharaoh natuna i vibaġai, "Anina bo eġa da ana nae ma tataovao Hebrewei ana baiei da tevera ina viġuġui ma ina ġamoi?"

⁸ Wavine i vianina ma i riwa, "Anina, ma nae!" Ma tevera i nae ma alo oina i taravainiai.

⁹ Ma Pharaoh natuna wavinena i riwei, "Wei teverana ma viġuġui aubaiu ma ana vimaiem." Ma wavine teverana i naiei ana au numa ma i ġamoi.

¹⁰ [◇]Ma tevera i eda ma i naiei Pharaoh natuna awarina ma tauna i vaini da natuna. Ma Pharaoh natuna i riwa, "Au waira a sinaepai." Lamna aubaina ana viwavai Moses.[†]

Moses ana rovona Egypt i ruba-tawanei.

¹¹ [◇]Maranai Moses i vilaraga, ma i nae da ana rava oina ita rauenari, ma i 'nanai menanare mai Egypt ana rava i egari da i nolanola ma i rau-iviapoapoelei, ma i 'nanai Egyptei Hebrewei i vunuvunui.

¹² Moses i 'nana viravira ma eġa aiai ita inanai, anina ma Egyptei i viraġeni ma au bubu i doboi.

¹³ Ma marana i tom Moses i naeme, da ana rava ruāga i viġaiġaiawa i 'nanai ma ġaiawa tauvikareina i riwei, "Aiwai aubaina turam Hebrewei e raviravi?"

¹⁴ Ma orotona i riwa, "Aiai i terem da ma vibadelai bo ma rauetaralai? Tam ma viraġeniu me Egyptei u viraġeni nanare bo?" Kampa Moses i rovo ma i riwa, "Rava boibogħi i aramanei tau aiwai a kaei."

¹⁵ [◇]Pharaoh wei riwana i nonori ma i ġoie da menanare Moses ina viraġenanei, wate Moses Egypt i ruba-tawanei ma i nae au Midian ma waira dogona au adana i kiala.

3

Moses kampa mai Midian ai pirisi pulo tauapuna maiteni i mae, ma natuna Zippora i ravaġi.

God Moses awarina i babani

¹ Moses poiana Jethro ana sipu ma gote i ġamoġamoi - Jethro lamna mai Midian ai pirisi pulo tauapuna. Mara tagogi Moses ġamoġamo i naiei au mutulua au gia dewadewana ma au Sinai i ġeta, God ana au ola.

² [◇]Kampa BADA ana anela Moses awarina i eġa, inanana me ai menamenana, ai rugurugui au orana da i ġegħae. Moses ai i lebalebara i 'nanai wate aina ruguruguna maiteni eġa ita ararai.

³ Moses i vinua-notanota, "Wei lamna aiwai? Aiwai aubaina ai e lebalebara wate ai eġa ita ararai? Ana nae au ġereġerena ma ana tuvirevirei."

⁴ Maranai BADA i 'nanai da Moses i nenei au ġereġere da ita tuvirevirei, God ai menamenana au orana Moses i ġorei, "Moses! Moses!"

Ma i paribelei, "Ee, Tau weka."

⁵ BADA i riwa, "Eġa ma neguratana. Wei gabuna au tepana e maimairi lamna doa vivivireina, lamna aubaina am ae uma ma votawanei.

[◇] **2:10:** Act 7:21 [†] **2:10:** Moses Au Hebrew ponana ana nonora me *sinaepai*. [◇] **2:11:** Act 7:23-28 [◇] **2:15:** Act 7:29 [◇] **3:2:** Act 7:30-34

6 Tau amamam Abraham ma Isaac ma Jacob ai God.” Maranai Moses wei babanina i nonori i rovo kaua ma naona i tere-govağı da avena God naona ita inanai.

7 Anina ma BADA i riwa, “A inanai menanare mai Egypt natunatu e rarau-iviapoapoelei. Ma ai tou agu aubaina i ġetai awariu da vibadabadai awarii ata vaitawanei. Menanare e vinua-apoapoenei a aramanei.

8 Lamna aubaina a ġairai da natunatu Egypt awari ana vaitawanei ma ana opunei da dobu wapuna ġaeġaena ma doana maumaurana ina maeni. Kampa marina mai Canaan, mai Hitti, mai Amori, mai Perisi, mai Hivi ma mai Jebus e mamae.

9 Ai tou a nonori. A inanai menanare mai Egypt taui e rarau-iviapoapoelei.

10 Tau a paripari-tawanem, marina ma nae vibadabadana Pharaoh awarina da mai Israel au Egypt ma taravaina-opunei.”

11 Wate Moses i riwa, “Tau aiai da ata nae Pharaoh awarina ma mai Israel ata taravaina-opunei?”

12 Ma God i paribelei, “Tau tam maiteni ana mae. Maranai ravai Egyptei ma taravaina-opunei. Taumi wei au olana ona rauduneleu. Lamna ina vimataira da Tau a pari-tawanem.”

13 Wate Moses i riwa, “Maranai ana nae au rava awarii ma ana riwei, ‘Amamata ai God i paritawaneu awarimi.’ Ma taui ina paridadaneu, ‘Tauna wavana aiai?’ Ma aiwai ana riwei?”

14 God Moses i riwei, “TAU MAEMAE-NONOAU.* Wei mai Israel ma riwei, Tauna wavana, TAU MAEMAE NONOAU. i paritawaneu awarimi.

15 Mai Israel ma riwei, ‘TAU BADA, amamami ai God, Abraham, Isaac ma Jacob ai God, tauna i paritawaneu awarimi.’

—Wei Tau wavau Maemae-Nonoana, kimta anatapui wenanare wavau ina ġorei.”

Wei au murina Moses i naeme poiana ana au dobu, ma i nae au Egypt. Ma kaua anatapui i tuputupua tuana Aaron ma Israel babadai i riwei. Ma Moses ma Aaron i nae Pharaoh awarina ma i riwei, “BADA i paritawaneiai awarim da ata riwem da natunatuna mai Israel ma vianinei da ina opu au mutulua da pulo ina apui tauna awarina.”

Egypt gulauna i riwa, “Tau eġa ana vianinei da nanare ina kauei. Taui eġa aiwai ġelauna ina kauei ma ina nola.”

Ma God kaua maġamaġauna aniba ma vi'nirovorovoi i kaukauei mai Egypt awarii, wate Egypt ai gulau amapo da i viviġa. Waira i vitara wate amapo da Egypt ai gulau kolana i vobagibagi. Mai Egypt ai ġamoġamo i vi'rairaġelana ma mai Egypt tupuai paramaitua i oai, Wate amapo da mai Egypt ai gulau eġa mai Israel ita voterei da ita nae.

11

Moses, natuevou au Egypt ai iraġe i vinolenolei

1 Ma BADA Moses i riwei, “Anivinuabola tagogi ava ana neiae Pharaoh ma Egypt awarii. Ma au murina tauna ina voteremi da ona nae ma lamna maranaina ina viaġaġana-opunemi.

2 Ma nae ma mai Israel ma riwei, ‘Anatapumi ona nae ma mae-turami Egyptei ona vibaġai da ai via goldei ma silvei ina veremi.”

3 BADA i kauei da mai Egypt mai Israel i vivirei. Pharaoh ana gabemani babadai ma rava anatapui au Egypt Moses i vivirana-kauei.

* **3:14:** Pona Hebrewei, *Tau maemae-nonoau* nonorana me *Yahweh*. Vipanipani au Babilon i kwa ma mai Jew i nememei au murina, taui i vitumaġana da wava *Yahweh* lamna vivivireina ma eġa aiai ina latoni. Aubaina da ai au buka giruma ġaeġaei wei wavana i girumi da eġa melanai ina latoni ma *Adonai* (bada) i latolatoni epaiana. Ma riwa BADA muomuonei i girumi lamna God wavana.

⁴ Ma Moses i nae ma Pharaoh i riwei, “BADA e ririwa, ‘Nubautuva nanare tau Egypt anatapuna ana babarani.

⁵ Natuevou nelarai au Egypt anatapui ina irāge, Pharaoh natuevouna orotona, amana ana epaepaia, awarina ina vikarei, ma ina īgaira da taunola awarina ina īeta, waivinewiti taugudaina natunatui maiteni. Ġamoġamo natuevou anatapui ina irāge.

⁶ Ma dobu Egypt au anatapuna tou īgaeġaena ina īgħe, rorova eġa nanare ma eġa melanai nanare ina tupua me.’

⁷ Wate eġa aiwai apoapoena mai Israel awari ina tupua, eġa auou tagogi, rava tagogi, bo ġamoġamo ina gwauei. Ma kampa ona aramanei da TAU BADA, mai Israel ma mai Egypt awariei a vivilamonei.

⁸ Am gabemani babadai anatapui ina īgħir awariu ma au naou ina mae-īgħira ma ina raudune ma ina riwa, ‘Laġilaġina ma ruba-nae am rava tauvotaġoim anatapui maiteni.’ Lamna au murina tau ana nae.” Moses meji orana i oai ma Pharaoh i netawanei.

⁹ BADA Moses i riwei, “Pharaoh tam eġa ina rautaniġanem. Wenanare ina tupua da tau kaua babai ana kauēi au Egypt.”

¹⁰ Moses ma Aaron kaua īgaġaei ma babai i kauēi Pharaoh au matana wate BADA Pharaoh orana i vibadoi da mai Israel eġa ita paritawanei.

12

Raġona karena

¹ BADA, wenanare i babani Moses ma Aaron awarii au Egypt,

²*“Marina da e nenai wei nawaravina lamna nawaravi tagogi ma weka ona vikarei da ami madeġa ona iavi.

³ Ona vinolanola mai Israel anatapui awarii, ‘Au pom ^vi-10-^vna wei au nawaravina oroto tagotagogi ava sipu īgaubona bo gote īgaubona ina rautani ana numa ravai aubai. Ġamoġamo tagogi numa tagogi aubaina.’

⁴ Mepa da numa tagogi ana rava i viruāġa ma sia i rata guratana, lamna mae-turai maiteni sia ina īgħut rava ai maġa ma ai am ana au ruva nanare.

⁵ Ġamoġamo e rarautani lamna orotona ma ana madeġa tagogi ma aiaina eġa ana apoapoe aiwai.

⁶ Ona ġamo-kauei da au pom ^vi-14-^vna wei au nawaravina. Ma maranai madeġa e arearere, mai Israel anatapui ai ġamoġamo ina viraġeni.

⁷ Metauna au numana sia e aniani kampa tara ina taraiġui ma metaeta au tepana, au gabaurina ma au ririvana ina pasi-naiei.

⁸ Wagħuvaranaina tagogina taui siana ai moniana au tepana ina apui, ma palawa eġa yist maiteni ma sipeni viviġorai maiteni ina ani

¹¹ Anatapumi wenanare ona am, vaġai vigara ona vigarei: Ami ae uma ona oteni, ami jiġona au urami, Ma ona am laġilaġina. Wei lamna BADA ana Raġona torelana.

¹²—Wei wagħuvaraina, Tau Egypt ana naeni ma ġamoġamo da rava natuevoui ororotoi anatapui ana viraġeni, ma Egypt ai god anatapui ana tuvaidoedoei. Tau BADA.

¹³ Wate tara au metaeta ina vimataira da taumi kampa o mamae. Ma maranai wei matairana ana inanai, ana raġonimi. Ma eġa aiwai apoapoena awarimi ina tupua maranai mai Egypt ana kovoġi,

¹⁴ Wei torelana ona nota-nonoei madeġana patapatana, da TAU BADA aiwai a kauēi nuanuami eġa melanai ina vuru. Ami epaepaia anatapui wei marana ina vivrei ai mara au anatapuna.”

* ^{12:2:} Ai madeġa iavana (Calenda) weka i vikarei

Palawa ēga yist maiteni ana torela

¹⁵ “Au pom 7 au orana Palawa ēga yist maiteni ona ani. Ma torela au karena, au numa yist anatapui ona tawanei. Aiai da palawa yist maiteni i apui ma i ani, wei ravana anina da mai Israel ai damei ona viopuni.

¹⁶ Au pom tagogi torela au karena ona vitagogiemi ma nanare torela au damona, ma BADA ona voepaepai ma ona viborumei. Wei au marai ēga aiai ina nola dadana, Wate ami lam ava ona lauvoa.

¹⁷ —Taumi palawa ēga yist maiteni torelana ona kauaei da ēga nuanuami ina vuru aubaina wei au marana, mai Israel au Egypt a taravaina-opunei. Am epaepaia wei torelana ina kaukauei madeğana au patapatana.”

Rāgona

²¹ Ma Moses Israel dam nununai babadai i kwatuei ma i riwei, “Ona nae ma sipu bo gote natuna orotona ona vunui ma ami numa ravai maiteni Rāgona torelana ona ani.

²² Rugurugu ona turautuvi sipu au tarana au aboma ma ami numa metaetana au tepana ma au adana ona pasi. Ma ēga aiai numa ina opu-tawanei da ubaubanai.

²³ Ma waguvvarai BADA Egypt anatapuna ina naeni ma mai Egypt ai natuevou ina virağeni. Wate maranai tara ina inanai metaeta au tepana ma au adana, BADA wei numana ina rāgoni ma irağe-anelana ina viğaei da ēga ina rui da ina virağenimi.

²⁴⁻²⁵ —Ma maranai BADA dobu i paripari-vainuağanimi ona ġeta, taumi ēga nuanuami ina vuru da madeğana patapatana Rāgona torelana ona kaukauei. Taumi natunatumi maiteni wei tarawatuna ona vojjina-nonoei.

²⁶ Maranai natunatumi ina paridadana, ‘Wei torelana anona aiwai?’

²⁷ Ma taumi ona paribelei, ‘Wei torelana lamna Rāgona viegualau pulona BADA awarina, aubaina wariağā au Egypt BADA mai Israel ai numa i rāgoni, ma mai Egypt ai natuevou i pupuni, ma tauai natunatuiai i voterei.’ Ma mai Israel i mae-ğaira au doa ma BADA i raudunelei.

²⁸ Ma mai Israel i nae ma BADA aiwai Moses ma Aaron i riweia i kauaei.

Natuevou nelarai i 'rağe

²⁹ Waguvvarai nubautuva BADA natuevou nelarai anatapui i virağeni au Egypt. Pharaoh natuna, ana epaia awarina i vikarei, ma i ğaira da panipani ai natuevou nelarai awari. Ma ğamoğamo ororotoi natuevoui anatapui maiteni i pupuni.

³⁰ Waguvvara au pouna Pharaoh ma ana gabemani babada ma mai Egypt anatapui i vomairi. Numa tagotagogi ava au Egypt tevera tagogi i 'rağe, ma tou ma tarakwatu ğaeğäena i ğae.

³¹ Pharaoh wei waguvraina Moses ma Aaron ai riwa i paritawanei da i nei awarina ma i egari, “Ami rava mai Israel maiteni ona vomairi ma au dobu ona oputawanei! O vivibağei nanare ona nae ma ami BADA ona voepaepai!

³² Taumi ami ğamoğamo anatapui ona vaia ma ona opu, ona nae, wate ami God ona vibağai da ina viaiainiu.”

³³ Mai Egypt anatapui mai Israel i egari da ina vipaparana ma Egypt ina opu-tawanei ma i riwa, “Mepa da ēga ona nae tauai anatapuiai ana irağe.”

³⁷ Mai Israel dobu Rameses i netawanei ma i babara-nae au Sukoth. Nelara anatapui 600,000 nanare, waivine ma roaroa ēga ita iavi.

³⁸ Patara ğaeğäena ğelauna i vomairi mai Israel maiteni. Taui ğamoğamo boruna ğaeğäena maiteni i nae.

³⁹ Maranai mai Egypt i viağagana-opunei taui ēga ai tamaina ita yokaukauei ma lagilağina i opu, taui palawa pasipasi nonoana ēga yist maiteni i vaia ma palawa bagibagina i apui.

40 ✧Mai Israel madeğā 430 i mae au Egypt.

Raǵona torelana ana tarawatu

- ⁴³ Ma BADA Moses ma Aaron i riwei,
Raǵona torelana ana tarawatu wenanare:
Dobu ġela wei torelana eǵa ina ani.
⁴⁴ Ami taunola gimagimaranā ma inibori i vaia wei torelana ina ani.
⁴⁵ Taomana ma taunola maia aubaina e nolanola taui eǵa ina ani.
⁴⁶ Raǵona sipuna numa tagogiava au orana ona ani, ma eǵa sia aiwaina ona opunei au
doa ma gelamina eǵa ona gai.
⁴⁷ Mai Israel anatapui Raǵona torelana ina ani.

13

Natuevou vovivirana

- ¹ BADA Moses i riwei,
² “Natuevou nelarai au Israel anatapui ona vovivirei Tau awariu. Roaroa ma ġamoǵamo
natuevoui ororotoi au Israel anatapui, Tau ġariuei.”

Moses mai Israel i riwei,

¹¹ “BADA ina ruiemi mai Canaan ai au dobu ma dobuna ina veremi, noinoimi i paripari-
vainuaǵani nanare.

¹² Natuevoumi nelarai ma ami ġamoǵamo natuevoui ororotoi anatapui BADA ona verei,

¹³ Wate supu orotona BADA ona verei ma awarina *donki* natuevouna ona gimara-melei,
ma mepa da eǵa ona gimara-melei, lamna *donkina* uana ona gomui. Taumi natunatumi
nelarai natuevoui ona gimara-melei.

¹⁴ —Ma mara au murina, natunatumi ina vitara-viravira, ‘Aiwai aubaina wei
ta kaukauei?’ Tam ma paribelei, ‘BADA urana vivirewapananei i taravaina-opunelai,
panipani numanei au Egypt.

¹⁵ Pharaoh orana i bagibagi ma eǵa mai Israel ita voterei da ita nae. Lamna aubaina
BADA natuevou anatapui au Egypt i viraǵeni, rava ma ġamoǵamo anatapui. Lamna
aubaina tau ġamoǵamo natuevouna BADA a vereverei ma natuevou orotona a gimagimara-
melei.’

¹⁶ Wei gimara melanana lamna me mataira au uram ma au muruam e oteoteni ma wei
e vivimataira da BADA urana vivirewapananei Egyptei i taravaina-opunelai.”

²⁰ Mai Israel Sukoth i voterei ma mutulua au giana au Etham i mae-gubai.

²¹ Ma marai BADA i vinao me apau maimairina ma wagavarai BADA i vinao me tuatua
araratana maimairina ma lalalainei taui i rau-etalaveni. Ma lamnei, taui marai ma
wagavarai i bababara.

14

Pharaoh mai Israel i viaǵaǵana-opunei

⁵ Maranai riwa i ǵeta Pharaoh awarina, da mai Israel i ruba. Pharaoh ana gabegabe-
mani maiteni ai nota i virai ma i riwa, “Tauta aiwai ta kuae? Ma ata taunola ta voterei da
i nepai!”

⁶ Anina ma Pharaoh ana chariot i yokaukauei, ma ana sorodia i vaia ma i nae.

⁷ Ana sorodia anatapui 600 vinevinei ai au chariot i geru, ma chariot ġelaui au Egypt maiteni i nae.

⁸ BADA, i kaei da Pharaoh, Egypt ai gulau nuanuana i vopotai ma mai Israel i viaġaġanatagħoei, Mai Israel ana teprorai i nena.

⁹ Mai Egypt ana sorodia i viaġaġa, Pharaoh ana horse ma chariot anatapui ma horse babadai ma ana sorodia anatapui, maiteni i viaġaġa da au gera i mamaelana, i votani dobu Pi-Hahiroth, Baal-Sephon au baba ġelauna.

¹⁰ Maranai Pharaoh i tuturiae, mai Israel i taepai da i 'nanai ma i rovo kaukaua da orai i sisi, ma BADA awarina i garara agu aubaina.

¹¹ Ma mai Israel Moses awarina amlo i ġaġai i pa, "Au Egypt eġa kokoaga da u taravaina-opunelai da weka au mutulua ana iraġe bo? Aiwai u kaei awariai?

¹² Tauai au Egypt a riwem, 'Ma voterelai ma ana mae ma Egypt ai taunola!' I ai kaua da tauai ata mae Egypt ai panipani, ma eġa au mutulua ata iraġe."

¹³ Moses ana rava i paribelei, "Eġa ona rovo! Ona mairi jijina ma ona inana menanarena BADA ina vilawanimi amadodo. Mai Egypt amadodo o inainanai eġa melanai ona inana-melei.

¹⁴ BADA aubaimi ina viġavia. Taumi ona mae-genuatau."

Israel boga au pouna i babara damana

¹⁵ Ma BADA, Moses i riwei, "Aiwai aubaina awariu agu e toutouei? Mai Israel ma riwei da ina vidagu.

¹⁶ Am jiġona ma voepai da ma viloloi boga au tepana ma boga ina vilamonei, ma mai Israel boga au pouna doa au alalana ina babara damana.

¹⁷ Tam ma raubiga, Tau mai Egypt a viteprorai da mai Israel ina viaġaġei. Maranai Pharaoh ana vovaiubai, ana sorodia, chariot ma ana horse sorodiae, rava Tau ina voepaepaiu.

¹⁸ Tau Pharaoh ana vovaiubai, ana chariot ma ana horse sorodiae da mai Egypt ina vivivireu ma ina aramanei da TAU BADA."

¹⁹ Anina ma God ana anela, mai Israel ai eta tauravenia i nae ma mai Israel au muri i mairi. Ma apau maimairina au naoi i nei ma taui au muri i mairi.

²⁰ Apau mai Israel ma mai Egypt au poui i mairi, ma maranai au i pom, apau lalalaina mai Israel i verei ma mai Egypt au waguwaguvareina i mae. Ma lamna aubaina mai Israel ma mai Egypt ai au gabu i mae-genuatau.

²¹ Moses ana jiġona i viloloi boga au tepana ma BADA kariwabu ġaġaena i paritawanei, ma boga i vilamonei, kariwabu i ruba da mara i tom da doa boga au pouna i alala.

²² Ma mai Israel boga i damani doa au alalana, Ma boga olana i mairi au oiei ma au kelakelau.

²³ Anina ma mai Egypt, Pharaoh ana horse ġelaui, chariot ma taurubeina mai Israel i votaġoi da au boga i rui, mai Israel au murii.

²⁴ Ubaubanai boibogħi BADA apau maimairina ma ai tuatuana araratana au orana ma i 'nana ġaira ma mai Egypt i viaiġoagoi.

²⁵ Ma chariot ana aniruba i viapoapoeni da ruba i kauana-avei. Ma mai Egypt i riwa, "BADA mai Israel e vovoagui, ma e viviġavieta, lamna aubaina tana ruba-tawanei!"

²⁶ Ma BADA Moses i riwei, "Am jiġona ma viloloi boga au tepana da boga ina nememei, mai Egypt au chariot ma sorodia horse au tepana anatapui ina puru-pai."

²⁷ Madegħi i ġoġi ma Moses urana i viloloi boga au tepana, ma laġilägħina boga i naeme ana au gabu. Mai Egypt ita ruba wate BADA taui au boga i viorereni.

²⁸ Boga i naeme ana au gabu ma mai Egypt sorodia anatapuina i ruirui au boga i monu. Ega aiai tagogi ita lawana.

³¹ Maranai mai Israel i 'nanai da BADA wei kauana vivirewapanana i kauei mai Egypt awarii, taui BADA i vivirana-kauei ma i vitumaġanei ana taunola Moses maiteni.

15

Moses ana wela

¹ Anina ma Moses mai Israel maiteni wei voepaepa welana i ravi BADA awarina: Tau ana wela BADA awarina ma ana voepaepai, aubaina ana ġavia i vipupui,
ma horse ma chariot taugeruii au boga i viorerena-naiei,

² BADA au rewapana ġaeġaena,
ma welei ana voepaepai;

Tauna i vilawaniu Tauna au God ma ana voepaepai,
Amamau ai God ma lamna aubaina ana vima-e-ġaeġaeni ma ana voepaepai.

³ Tauna wavana BADA.
Tauna ġavia ravana.

⁴ Pharaoh ana chariot ma ana sorodia au boga i viorereni;
Ana sorodia vinevinei au Boga Lebalebarina i monui.

⁵ Gabinou i wanaiwaġi da taui i purui;
ma i monu boga au gabaurina me ġaima.

⁶ Oo BADA ura-oiem vivirewapanana kaukauana,
ura-oiem am ġavia e viviaimutumutui.

⁷ Tam ġegetelaram
ma taui i viġaviem u vovaiubai.

Am meji araratana u paritawanei
da taui i aragibui me ai ragorago.

⁸ Boga au tepana u uvena ma boga olana i mairi,
i mairi genuatau me biribiri,
ma gabinou i alala.

⁹ Am ġavia i riwa, "Ana viaġaġei,
ana vojjini,
ai purapura ma ai maura anatapui ana ġutai,
ma aiwai a ġoegħoei ana vaia,
Au sod ana lavui ma ana vipupui."

¹⁰ Wate lavutumei u uvena,
ma gabinou taui i purui;
i monu me ġaima rabama au ġaeġaena.

¹¹ BADA, mepa god ġelaui me tam bo eġa? Egateni!
Tam anina vivivrem,
am rewapana i rata dewadewa da tauai a rovorovoem,
Tam kaua babai ma virewapanai taukaueina.

¹² Tam uraoiem u viloloi,
ma doa am ġavia i lawani.

¹³ Am rava u vaimelei ma u rauetaraveni am nuavaina patupatutunei,
Ma am rewapanei u taravaina-naiei am au animae vivivireina.

¹⁴ Dobu ġelaui wei riwana i nonori ma orai i sisi kaua.
Mai Philistia orai rovo ina vioai.

¹⁵ Edom gulagulaui ina rovo kaukaua,
Moab nelara rewapana ini ina sisi.

Canaan maemaei anatapui inii i wanagwadai.

- ¹⁶ Rovo ġaeġaena anatapui orai i oai,
uram ana rewapanai taui i mairi kwakwa me kokoitau,
ma am rava ina verautua BADA,
da ravai u vaivai-melei ina verautua.
¹⁷ BADA ma taravaina da am au ola ina raunuma,
Gabu u vinevineiana,
tam uramei voavoaina.
¹⁸ BADA ina vibada nonoa.

¹⁹ Mai Israel doa au alalana i babara damana. Wate maranai mai Egypt ai horse ma
ai chariot taugerui i rui au boga, BADA waira i neiana-meleiai da anatapui i purui *Lamna
aubaina Moses ana rava maiteni wei welana i ravi*.

Miriam ana wela

²⁰ Peroveta Miriam, Aaron novuna tambourine i vaia ma waivine anatapui, tauna
i votaġoġoġi ma tambourine i vikalokaloei ma i ara.

²¹ Miriam wei welana i ravi, “Tana raua BADA awarina, aubaina tauna ġavia
i vilamolamonei ma horse ma chariot taugerui au boga i viorereni.”

Waira viviġorana i aii

²² Anina ma Moses mai Israel i taravaini da Boga lebalebarina i netawanei ma i nae au
Shur mutuluana. Aupom tonuġa au mutulua i babara wate waira eġa ita nelaġai.

²³ Maranai au waira vuvura Marah i ġeta da ita uma wate wairana umana i viġora da
eġa ita uma, lamna aubaina wei dobu wavana Marah.*

²⁴ Ma rava Moses awarina i pariġai i pa, “Aiwai tana umai?”

²⁵ Anina ma Moses i paritou BADA awarina agu aubaina, ma BADA ai tupona i viatataiei.
Ma wei aina i tawanei au waira ma waira i viaini aniuma aubaina.

Nai au gabuna BADA ana tarawatu rava i verei ai lawana aubaina, ma ai votelatela
i raudadani.

²⁶ BADA i riwa, “Mepa da riwau ona nonora-kauei ma kaua aiai ona kauei au matau ma
riwau anatapuna ona voteletelei, da kovoġa mai Egypt a vereverei, eġa ana veremi. Tau
BADA tauvilawanimi.”

²⁷ Muriae taui i nei au Elim kampa vuvura 12 ma mutulua ai me pa 70 i maimairi ma
kampa waira au adana i mae mara aburuna.

16

God Israel lam i verei

¹ Anina ma mai Israel Elim i netawanei ma i nae au mutulua wavana Sin, wei dobuna
lamna Elim ma Sinai au poui. Egypt i opu-tawanei nawaravi tagogi ma wiki ruāga i kwa
ma wei au dobuna i ġeta.*

² Mai Israel Moses ma Aaron awarii i ġaiġaiawa.

³ Ma i riwei, “BADA boibogħi au Egypt ita virażen! Kampa sia nauii a kiala kwaviviroi
ma ai ġoanei a amam, wate taumi o taravaina-opunelai au mutulua da am-iraġe ana iraġelei.”

⁴ Anina ma BADA Moses i riwei, “Lam marei ana paritawana-ġaireiāi me garewa. Au pom
patapatana rava ina opu ma lam au pom tagogi ruvana ava ina vaia. Wei taunei rava
ana raudadani da riwau bagibagina ina voteletelei bo eġa.”

⁵ Au pom ^vi-6-na au pom ruāga ruvana ina tami da ina vokaukauei.

¹¹ BADA Moses i riwei,

* **15:23:** Au Hebrew pona *Mara nonorana me viġora*. * **16:1:** Mai Israel au pom 15 nawaravi tagogi (madeġa weka
iavana i vikarei) ma Egypt i opu-tawanei.

¹² “Mai Israel ai āgaiawa a nonori. Ma riwei, ‘Raviraviai taumi sia ona ani, ma ubaubanai lam ona maurei.’ Ma lamna maranai ona aramanei da Tau BADA ami God.”

¹³ Raviraviai kiu iviki boruna i nei da taui i maemae lana gabuna i vioai. Ma ubaubanai īgelauna doa anatapuna turuvani i vioai.

¹⁴ Maranai turuvani i paira ma purapura avavai me palawa nanare doa au tepana i mae.

¹⁵ Maranai mai Israel wei purapurai i ’nanai ma i vinuanaina ma i vitara-viravira vivira i pa, “Wei aiwai?”

Ma Moses rava i riwei, “Wei aniam BADA i veremi.”

¹⁶ BADA riwana bagibagina lamna wei, “Rava tagogi lam ana au ruva ina tuarui. Nau muomuoi ruaġa[†] ruvana ona tuarui, rava tagogi au numa aubaina.”

¹⁷ Aiwai i ririweia nanare mai Israel i kauei, īgelaui ruva īgægæna i tami ma īgelaui ruva aburuna i vaia.

¹⁸ Wate maranai i ruvai ma i ’nanai da rava anatapui ruva i vaia da tagotagogina, Taui da ruva īgægæna i tami eġa aiwai ita mae-terei ma taui da aburuna i tami ma i nelāgai da lamna tagotagogina taui aubaii. Numa nununai ravai lam ruvaruvana i vaia.

¹⁹ Anina ma Moses i riwa, “Eġa aiai lam ina tereriei da au maratom aubaina.”

²⁰ Wate rava īgelaui Moses eġa ita rautaniġanei ma lam īgelaui i tereriei ma ubaubanai motamota lam i oai ma i bova, ma Moses amlona i īgaiġai taui awarii.

²¹ Ubaubanai patapatana taui lam ai au ruva i tuarui, ma maranai madeġa i vibola ma lam i viwaira da i amo.

²² Ma au pom ^vi-6-na taui au pom ruaġa ruvana nanare i tuarui, ma melagai babadai i nei da Moses i pariverei.

²³ ⋆Moses taui i riwei, “BADA riwa bagibaginei wenanare i riwa, ‘Maratom lauvitau vivireina Sabate ana mara, Tau aubaiu. Aiwai apuna o īgoeġoeia amadodo ona apui ma aiwai vitavana o īgoeġoei amadodo ona vitavi. Ma aiwai i mae-terei, ona tereriei au maratom aubaina.’”

²⁴ Ma taui lam i tereriei ma eġa ita bova ma ita motamota me Moses i ririwa nanare,

²⁵ Moses i riwa, “Wei lamna amadodo ona ani, aubaina amadodo Sabate, lauvitau ana mara vivivireina i terei BADA aubaina. Ma amadodo amapo lam au doa eġa ona nelāgai.

²⁶ Au pom 6 lam ona tuarui, wate au pom ^vi-7-na Sabate, amapo lam eġa ona nelāgai.”

²⁷ Ma au pom ^vi-7-na rava īgelaui i opu da lam ita tuarui wate eġa aiwai ita nelāgai.

²⁸ Anina ma BADA, Moses i riwei da rava i riwei i pa, “Mara biaġa au tarawatu ma au viararamana ona rau-āgħaġie?

²⁹ Ona notai da Tau BADA, Sabate a veremi, ma au pom ^vi-6-na lam a veremi da au pom ruaġa aubaina. Ma rava anatapui au numa ita mae ma avena ita opu.”

³⁰ Ma au pom ^vi-7-na rava i vilauvitau.

³¹ Rava mai Israel wei lamna i īgorei “manna.”

³⁵ ⋆Ma mai Israel manna i amam da madeġa 40 i kwa. Taui manna i amam da Canaan ana au parata i īgeta.

17

Waira kirei i opu

¹ ⋆Mai Israel mutulua Sin i netawanei, ma mepa BADA i ririweia nanare kampa i mae-nae. Taui au Rephidim i rauġaravu, wate kampa eġa waira da rava ita uma.

² Anina ma taui Moses maiteni i viparipariniġai i pa, “Waira ma verelai da ana uma!”

[†] **16:16:** Hebrew ai ponei 1omer ana ruva lamna 2 Ltr ruaġa wei lamna ruva tagogi ana ruva. ⋆ **16:23:** Exo 20:8-11

[‡] **16:35:** Jos 5:12 ⋆ **17:1:** Num 20:2-13

Ma Moses i paribelei, “Aiwai aubaina o pariparinīgaieu? Aiwai aubaina BADA o raraudadani?”

³ Wate rava nuanuai i arelana-kauei waira aubaina ma Moses i eni i pa, “Aiwai aubaina Egyptei u tere-opunelai da natunatuiai ma ai ġamoġamo maiteni nuarelana ana iraġelei?”

⁴ Ma Moses i paritoutou BADA awarina i pa, “Aiwai ana kauei wei ravai awarii? Taui ġaimej marina ina viraġeniu.”

⁵ BADA Moses i paribelei, “Israel babadai ġelaui ma taravaini ma kwapu taunei Nile u raviravia ma vaia ma ma vinao.

⁶ Tau kampa au naom au kira ana maimairi au Horeb. Kira ma ravi da waira ina opu da rava ina uma.” Ma Moses nanare i kauei Israel babadai au matai.

⁷ Moses wei dobuna i ġorei Massah* ma Meribah, † aubaina weka mai Israel Moses maiteni i vipariparinīgai ma BADA i raudadani maranai i riwa, “BADA weka tauta maiteni bo eġa?”

Mai Israel ma mai Amalek i viġaiġaiawa

⁸ Mai Amalek i nei ma Mai Israel maiteni i viġaiġaiawa au Rephidim.

⁹ Moses Joshua i riwei, “Rava ma vinei da ona nae mai Amalek maiteni ina viġaiġaiawa. Au maratom tau ola au tepana ana mairi ma God ana kwapu ana vovojjini.”

¹⁰ Ma Joshua mai Amalek maiteni i viġaiġaiawa me Moses i ririweia nanare. Moses, Aaron ma Hur i ġae ola au tepana.

¹¹ Maranai Moses urana ana kwapuna i voepai mai Israel i vivirewapana wate maranai urana i teretere-ġairei mai Amalek i vivirewapana.

¹² Moses urana i garigari ma Aaron ma Hur ġaima i neiae da i terei ma au tepana Moses i kiala. Aaron ma Hur, Moses au ririvana i mae, tagogi au navanavana ma ġelauna au navanavana ġelauna ma urana i voepai ma i vojjini da madeġa i neulai.

¹³ Ma Joshua ana sorodia maiteni Amalek ai sorodia sodiei i vovaiubai.

18

Jethro poiana Moses i raugenari

¹ Moses poiana Jethro, mai Midian ai pirisi pulo tauapuna i nonori aiwai anatapuna BADA i kaukaueia Moses ma mai Israel awarii; ma menanare Egyptei i taravaina-opunei.

⁵ Moses poiana - Jethro, Moses awana ma natunatuna nelarai ruaġa i nei da Moses ita raugenari au mutulua. Weka Moses ana rava maiteni i rauġaravu God ana ola au ġereġerena.

⁶ Jethro riwa i paritawanei Moses awarina da taui i nenei.

⁷ Ma Moses i opu da poiana ita nebelei. Tauna i mae-ġaira ma poiana i raudunelei ma i vigia-laġolaġonei. Taui i viegualau vivira ma i rui Moses ana au numagara.

⁸ Ma BADA aiwai i kaukaueia Pharaoh ma mai Egypt awari mai Israel aubai; ma apoapoe anatapui au eta i nebelei; ma menanare God taui i vilawani; anatapui poiana i pariverei.

⁹ Ma Jethro nuanuana i ai kaua maranai i nonori menanare BADA aiwai anatapuna aiaii i kauei mai Israel aubai maranai Egypt urai vivirewapanana awariei i tere-opunei.

¹⁰ Jethro i riwa i pa, “Voepaepa BADA awarina. Tauna Pharaoh ma mai Egypt awarii i vai-tawanemi. Ee, Egypt urai vivirewapanana awariei i vai-tawanemi.

* **17:7:** Hebrew ponanei, *Massah anona raudadana* † **17:7:** Pona Hebrew, *Meribah anona vipariparinīgai*

¹¹ Marina a aramanei da BADA i ġetelara eġa me god ġelaui nanare. Aubaina BADA ġogogulagulaui mai Egypt ai kaua apoapoe mai Israel awarii aubaina i kovoġi.”

Jethro Moses i vinua-terenei

¹³ Ma marana i tom, Moses ana au anikiala i kiala da ita rauetara. Ma rava Moses i mairi-kwaviviroi ma i vipaipai ubaubanai da madeġa i ġgħira.

¹⁴ Maranai Jethro i 'nanai aiwai anatapuna Moses i kaukauei rava aubaii. Tauna i vitara-viravira i pa, “Wei aiwai rava awarii e kaukauei? Aiwai aubaina ainelam wei e kaukauei, ma wei ravai e maimairi pompom da am riwa ita nonori?”

¹⁵ Moses i paribelei i pa, “Tau wei a kaukauei aubaina rava e nenei awariu da ita aramanei aiwai God e ġoēgoei da ita kaei.

¹⁶ Maranai rava ruāga e viviamparipari. Taui e nenei awariu da a teretere-vajjjimani; ma God ana riwa ma ana tarawatu a ririwei.”

¹⁷ Moses poiana i riwa i pa, “Aiwai tam e kaukauei lamna eġa ita ai.

¹⁸ Nola e kaukaueia i vitai kaua da tam ainelam eġa tagotagogina uta kaei. Tam ma rava ona voirairaġe.

¹⁹ Ma rautaniġana ma ana vinuaterenem; ma God awarim ina mae. Tam anina da rava ma raviepaiai God au naona ma ai viamparipari ma neiai awarina.

²⁰ God ana parivai-araramana ma ana tarawatu ma viararamani ma taui ma viataiae da menanare ita maenei ma aiwai ita kaei.

²¹ Wate am patara awariei nelara ġelaui araramanii ma God e viviborumei ma eġa amkwalakwalai ma vinei da rava ina vibadei: ġelaui rava 1,000 ina vibadei; ma ġelaui rava 100; ma ġelaui rava 50; ma ġelaui rava 10 ina vibadei.

²² Taui rava ai viamparipari ina tere-vajjjimani. Wate aiwai da i piripiri, ina neiai awarim. Taui ina voaguim da am vita ina avarai ma ina votelatelai.

²³ Mepa da God i ririweia ma kaei amapo eġa ma voirairaġe ma rava anatapui ana nuaiai ina nae ai au numa.”

²⁴ Moses, poiana i rautaniġanei ma aiwai anatapuna i ririweia i kaei

²⁵ Ma Moses mai Israel araramani i vinei da rava 1,000 i vibadei, ma 100, ma 50 ma 10 i vibadei.

²⁶ Wei babadai, rava ai viamparipari i teretere-vajjjimani ma aiwai da i piripiri i neneiai Moses awarina. Ma kaua telatelai i teretere-vajjjimani.

²⁷ Anina ma Moses, poiana Jethro i viegualuae, ma Jethro i naeme ana au dobu.

19

BADA i vieġana-melei au ola Sinai

² Mai Israel Rephidim i netawanei da i nae au mutulua wavana Sinai. Ma kampa ola au karena i rauġgaruvu.

³ Ma Moses i ġae au ola da God ita nebelei. Ma BADA ola au tepana ma Moses i ġorei i pa, “Wei mai Israel Jacob noinoina ma riwei.”

⁴ —Taumi matamiei o inanai aiwai mai Egypt awarii a kaei ma me manubada natunatuna au papena e avavarai nanare a avaraimi ma a neiana-melemi awariu.

⁵ [✳]Mepa da ona voleteleu ma au parivainuġana bagibagina ona vojjina-kauei, lamna dam anatapui au dobu awariei taumi ana vinemi nuanuau pouna. Avena da dobu anatapuna Tau ġarieui.

⁶ Wate taumi aubaiu ona vpirisi, ma ami dam ona vovivirei tau ainelau aubaiu, wei babani mai Israel ma riwei.”

⁷ Ma Moses i ġaira me ma dogadogara i kwatuei ma aiwai anatapuna BADA i ririwei i pariverei.

⁸ Ma rava anatapui i paribelana gogona i pa, “Tauai aiwai anatapuna BADA i ririwei ana kuae.” Ma Moses ai paribelana i ġaiana-melei BADA awarina.

⁹ BADA, Moses i riwei, “Tau apau potopotona au orana ana nei, da rava ina nonoriu Awarim ana bababani da ina vitumaġana-nonoem.” Anina ma aiwai rava i ririwei Moses BADA i riwei.

¹⁰ Ma BADA Moses i riwei, “Ma ġaira ma rava ma voagui amadodo ma au maratom da orai ina oħgai da tau ina viborumeu. Ma ai gara ina oħgai.

¹¹ Ma ina vokaukaua au pom vitonuina aubaina. Nai maranaina Tau ana ġairai au Ola Sinai, rava anatapui au matai.

¹² Parata ma tere-kwaviviroi au ola. Ma riwa bagibaginei ma riwei ma pa, ‘Ona inana-kaua da eġa au ola ona ġae bo ola ona tapedadani. Aiai da ola i tapedadani ina iraġe.’

¹³ Mepa da rava bo ġamoġamo wei paratana i vorażoni, taumi eġa nai ravana bo ġamoġamona ona vodadani wate ġaimei bo aierei ona viraġeni. Wate maranai taure ponana i rarata lamna rava ina ġae au ola.”

¹⁴ Ma Moses olei i ġaira memei ma ana rava i riwei da orai i vokaukauei da God ina viborumei ma ai gara i oħgai.

¹⁵ Ma i riwei, “Ona vokaukaua mara vitonuina aubaina, marina da nai marana eġa ona viawawana.”

¹⁶ Ubaubanai au pom vitonuina, waiparara, namanamara ma apau potopotona ola i purui, ma taure i tou. Maratagogi rava anatapui kampa i mamae i rovo kaukaua ma i sisi.

¹⁷ Ma Moses rava i ravena-opunei da God ita nebelei. Taui ola au karena i mairi.

¹⁸ BADA ai araratanei i ġairai ola Sinai au tepana. Ma bau potopotona olana i puru-pai. Bau kampa i ġegħae me modu potopotona e ararai nanare, ma olana anatapuna i vigugui.

¹⁹ Ma taure ponana i rarata. Ma Moses i babani ma God i paribelei ponana nonorana me waiparara.

²⁰ BADA i ġairai ola Sinai au tepana ma Moses i kwatuei da ita ġei ola au tepana. Ma Moses i ġae.

20

God ana tarawatu 10

¹ Ma God i babani ma wei riwai i latoni,

² TAU BADA ami God, panipaniei au Egypt a taravaina-opunemi.

³ Taumi eġa god ġelaui ona raudunelei, Tau ainelau ona rauduneleu.

⁴ Taumi eġa aiwai au mara bo au dobu bo boga au orana dobu au gabaurina kokoitaui ona kuae da ona raudunelei.

⁵ [✳]Taumi eġa kokoitaui ona raudunelei bo ona viborumei, aubaina TAU BADA ami God ununurana. Ma taui i gedugeduaiu ana kovoġi da kimta au ^vi-4-na.

⁶ Wate taui aiavoi nuanuau e vaivaini ma au tarawatu e vovojiji au nuavaina maemae-nonoana ana verei da kimta tausen nanare.

⁷ Taumi eġa BADA ami God wavana ona vinamei. Aiai da BADA wavana e vivinamei ina kovoġi.

⁸ [✳]Sabate eġa nuanuami ina vuru ma ona notanotai ma ona vovivirei tau awariu.

⁹ Aupom 6 ami nola ona kuae.

¹⁰ Wate au pom ^vi-7-na lamna Sabate, lauvitau marana, i vovivirei BADA ami God aubaina. Wei au marana eġa aiai ina nola: eġa tam, natum orotona bo wavinena, am taunola orotona ma wavinena, bo am ġamoġamo, ma dobuġela ravai awarim e mamae.

11 ✽Aubaina au pom six au orana BADA mara ma dobu i kaeui; boga ma anatapui au orana. Wate i vilauvitau au pom au ^vi-7-na. Lamna aubaina BADA Sabate i viaiaini ma i vovivirei.

12 ✽Amam ma alom ma vivirei, da am lawana ina manawa au dobu, BADA am God e vereverem.

13 ✽Ega ma viraġena.

14 ✽Ega ravaġela awana ma viawawanei.

15 ✽Ega ma danene.

16 ✽Ega ma viwatu-moru

17 Ega ravaġela ana numa ma vikwinei. Ega ravaġela awana ma vikwinei, bo ana taunola orotona bo wavinena, ana bulumakau, ana donki, bo aiwai ġelau ġarnei.

21

Rau iviapoapoe ai Tarawatu

12 “Aiai rava ġelauna i ravi da i viraġeni, nai ravana ina viraġeni.

13 ✽Wate mepa da i vunu-boai da i viraġeni. Tauna ina ruba dobu a vinevineia kampa.

14 Wate rava i vioga da i viraġena, ma ana lawana aubaina i ruba pulo au aniapuna, ravana ina taravaina-opunei ma ina viraġeni.

15 —Aiai amana bo alona i ravi, nai ravana ina viraġeni.

16 —Aiai da rava ġelauna i danenei da i gimarei bo awarina ma i nelaġai, nai ravana ina viraġeni.

17 ✽—Aiai da amana bo alona e parivai-apoapoeni nai ravana ina viraġeni.”

22

Tarawatu am lawana aubaina

16 “Mepa da oroto wavine matatapu i gwalai da i viawawanei, ma ega aiai wei wavinena ita rautani da ita ravaġi. Nai orotona wavine mataopana ina vimaiei ma ina ravaġi.

17 Wate mepa da amana i viġa, lamna maranai oroto matatapu ana mataopa ina vimaiei wavine amana awarina.

18 ✽Aiai wavinena e paraparauma lamna ina viraġeni.

19 ✽—Aiai ġamogamo i viawawanei lamna orotona ina viraġeni.

20 —Aiai pulo i apui god ġelauna awarina ma ega tau BADA awariu lamna nai ravana ina viraġeni.

21 —Ega dobūġela ravai ona ġoa-boai, ona notai da taumi mara tagogi o mae dobūġela ravami au Egypt.

22 —Ega kaikaiababa ma kedakeda ona ġoa-boai.

23 Mepa da nanare ona kaeui ma taui ina tou awariu agu aubaina, Tau BADA, ai tou anina ana nonori ma ana voagui.

24 Ma Tau ana meji guratana ma ġavia au orana ana viraġenimi. Awawami ina vikaibaba ma natunatumi ega amamai.

25 —Mepa da mane u unelei molamolakana awarina, lamna ega mane ġelauna au tepana ma vibāġei.

26 Mepa da rava ġelauna ana kwama u vaia da manena ina veremelem ma muriae ma vere-melei, ana kwama ma vere-melei muriae da madeġa ina ġaira.

✽ 20:11: Gen 2:1-3 ✽ 20:12: Mrk 7:10; 10:19 ✽ 20:13: Gen 9:6; Mrk 10:19 ✽ 20:14: Mrk 10:19 ✽ 20:15:

Mrk 10:19 ✽ 20:16: Exo 23:1; Mrk 10:19 ✽ 21:13: Num 35:10-34 ✽ 21:17: Mrk 7:10 ✽ 22:18: Deu 18:10-11

✽ 22:19: Lev 18:23

²⁷ Kwamana lamnei e purupurui da inina e vivibola. Bo aiwai ġelauna e mamae da ina vipuruei? Mepa da kwama eġa uta veremelei ma tauna awariu i tou agu aubaina ma Tau ana paribelei aubaina Tau rau-nuapoapoeu.”

23

Rau-nuapoapoe

¹ Eġa riwa moru ma vituai. Ma eġa au numa-etara moruei kaua apoapoe ravana ma voagui.

² Eġa patara ma ġovaivaitei ma ġo'apoapoe ma kaukauei. Maranai au numa etara e maimairi eġa moruei ġo'apoapoe patarai ma voagui.

24

Israel BADA ana parivainuaġana i vianinei

³ Moses i nae mai Israel awari ma BADA ana viararamana ma ana tarawatu anatapui i riwei ma rava anatapui ponā tagoginei i paribelei i pa, “Tauai BADA aiwai i ririwei anatapuna ana kaei.”

⁴ Ma Moses, BADA aiwai i ririwei anatapuna i girumi. Ubaubanai boibogħi i vomairi ma pulo aniapuna i voai ola au karena ma ġaima ġaġġae 12 i vimairini Israel ana dam 12 i vimatairei.

⁵ Anina ma Israel laralaragai i paritawanei da ġamoġamo i vununaiei ma pulo i apui BADA awarina ma bulumakau ġelaui i vunui da ai viturana ma mae-kaua pulona.

⁶ Moses ġamoġamo tarai navanavana i ġunaiei au aboma ma navanavana ġelauna pulo aniapuna au tepana i voiwiwaġi.

⁷ Ma parivainuaġana bagibagina bukana i vaia ma rava awarii i 'avi. Taui i paribelei, “Tauai aiwai anatapuna BADA i ririwei ana kaei, ana babani ana voteletelei.”

⁸ Ma Moses aboma i vaia ma tara i voiwiwaġi rava au tepai. Ma i riwa i pa, “Wei taranei ata tarawatu i vovai-virewapani ma i vianinei.

—Maranai BADA tarawatu i veremi, Tauna parivainuaġana bagibagina taumi maiteni i kaei.”

¹² BADA, Moses i riwei, “Ma ġei awariu au ola ma weka ma mae, ma ġaima dabab-abai ruaġa au tepai, riwau ma au tarawatu a girugirumia ana verem da mai Israel ma viararamani.”

¹³⁻¹⁴ Ma Moses ana taunola Joshua maiteni i vokaukaua da ita ġae au ola. Ma Moses babada awarii i babani i pa, “Weka ona painiai da ana opu-memei. Aaron ma Hur e mamae, mepa da ami paripariġai aiwai da ona nae awarii.”

¹⁵ Ma Moses i ġeġġae au ola ma apau ola i purui

¹⁶ Ma BADA ana boruma i peu au ola Sinai. Ma au pom six apau ola i purui, ma au pom au ^vi-7-na BADA apau au orana ma Moses i ġorei.

¹⁷ Mai Israel i taepai ma ola au tepana BADA ana boruma i 'nanai me ai arata ġaegħaena ai menamenana ma bauna potopotona.

¹⁸ Ma Moses i ġae au ola ma apau au orana i rui. Ma au ola i mae au pom 40 ma waguvvarai 40.

25

God ana numagara vivivireina

* **23:1:** Exo 20:16 * **24:8:** Mrk 14:24

God Moses i riwei da rava ita pariverei da ai ġoanei ita verena, kaua ma ġamagħauei da God ana numagara vivivireina aubaina.

⁸ “Rava Numa Gara Vivivireina ina voai, da taui maiteni ana mae.

⁹ Numa gara ma orana purapurai ana viatataiem nanare ona voai.”

Parivainuaġana bokisina

¹⁰ “Ma bokisi ai *acaciei* ina voai, ana manawa 110 cm, ma ana dabora 66 cm, ma ana ġae 66 cm.

¹¹ Ma gold aiainei ma viaitani au orana ma au doa, ma au tepana ana via goldei ma terekwaviviroi.

¹² Ma ana loji 4 ma vokaukauei ma au aena 4 ma terei; ma au baba ġelauna loji ruaġa ina mae ma au baba ġelauna loji ruaġa ina mae.

¹³ Ma ai *acaciei* anipawe ma kuae, ma goldei ma viaitani.

¹⁴ Ma anipawe au loji bokisi au babana ma raviai, da ina pawei.

¹⁵ Anipawe au loji ina mae, eġa ina taina-lavui.

¹⁶ Ma au tarawatu ġaima dabababai ruaġa au tepai a girugirumia bokisi au orana ma terei.

¹⁷ —Ma uġu*, gold aiainei ma kuae, ana manawa 110 cm, ma ana dabora 66 cm.

¹⁸ Ma Cherub ruaġa ma kuae gold gudagudanei ma uġu au giana ruaġa ma terei.

¹⁹ Ma Cherubim ġelauna augia ġelauna ma Cherubim ġelauna augia ġelauna ma kuae uġu maiteni ina vitagogi.

²⁰ Ma Cherubim papei au aidamo ina viloloi, ma ina vinao vereverena, da ġo'apoapoe tauvaitawaneina uġuna ina gagaloei.

²¹ Uġu au tepana ma terei, ma ġaima dabababai ruaġa bokisi au orana ma terei.

²² Ma uġu au tepana, Cherubim ruaġa au poui kampa tana vinenebelana da au tarawatu ana verem rava mai Israel aubaii.”

28

Ma God nanare Moses i riwei da wei purapurai i voai, kepakepa vinevinena ma incense aniapuna goldei, ma rampa anivojijinana rampa seven aubaii. Ma i viararamani menanare BADA ana numagara vivivireina ina voai ma au orana gara ġamogħamo opinei ina babalaragi da gabu ruaġa, ma gabuna ana gari ina kuae da wei gabuna ina gari-kwaikwaipipini. Ma wate maiteni i riwei da pulo aniapuna bronzei, ma aboma ġaegħena ina kuae anioġa aubaina.

Pirisi ai gara

¹ Ma God i riwa, Tuam Aaron natunatuna Nadab, Abihu, Eleasar ma Ithamar maiteni mai Israel awariei ma tereriei. Ma ma viaiaini da Tau aubaiu ina vpirisi pulo tauapuina.

² Ma pirisi ana ġara vivivireina ma popoi vareim aubaina da inanana ina vinualaulauna ma rava ina vivirei,

³ Rava raraū-ġarōġaroi ma nuaulaulai, ma ġoreiai da Aaron ana pirisi garana ina popoi da ina oteni ma ina viaiaini da aubaiu ina vpirisi.

31

God ana numagara taukaueina

¹ Ma BADA Moses i riwei,

² “Ma inana, Tau Besalel, Judah ana damei a vinei, tauna Uri natuna, ma Hur ġogħana,

³ ma Aruau Vivivireina a verei. Ma nuaulaula ma nota ma aramana a verei da rau-ġarōġaroi anatapui awari tauna tagotagogina.

⁴ Tauna taurauġarōġaro amai, *Gold, Silver* ma *Bronze* taunoleina aiaina.

* ^{25:17:} uġu ġo'apoapoei e viviātani

⁵ Tauna i ai kaua āgaima e boribori ma e laāgalāgai, ma amtai awarina. Tauna rau-āgarōgaro anatapuna awarina tagotagogina.

⁶ Ma nanare Oholiab a vinei, tauna Ahisamak natuna, Dan ana au dam da ana tauagu. Ma nanare taurauāgarōgaro nuaulaula ma aramana a verei da aiwai anatapuna a ririwem ina kauei.

⁷ Numagara Vivivireina ma parivainuaāgana bokisi ma uāgu ma numagara ana purapura:

⁸ kepakepa ma ana purapura; rampa gold aiainei ma purapura īelaui ma incense aniapunana.

⁹ Pulo aniapuna īamoāgamo taputapuna apuna aubaina.

¹⁰ Ma gara vinualaulaunai ina popoi, gara vivireina ina popoi Pirisi Īēgetelarana Aaron aubaina ma natunatuna pirisi nolana aubaina aubaii,

¹¹ monamona viaiaina aubaina ma incense BADA ana numa aubaina. Taurauāgarōgaro wei purapurai ina rauāgaroei me a ririwei nanare.”

32

Bull natuna goldei

¹ Maranai rava i 'nanai da Moses barana i uama au ola, taui i nei Aaron awarina ma i riwei, “Ma nei ma god ma voai da ina painita. Wei ravana Moses, Egyptei i neiaita weka, ēga ata aramanei aiwai i tupua awarina.”

² Aaron i paribelei, “Awawami ma natunatumi waivinei ma nelarai ai loji goldei ona neiai awariu!”

³ Anina ma rava anatapui ai loji i votawatawanei ma i neiai Aaron awarina.

⁴ ⁵Tauna i vaia ma ai au menamenana i apui da i wanagwadai ma bull natuna kokoitauna i voai. Maranai rava wei i 'nanai ma i riwa, “Oo mai Israel wei ami god, Egyptei i tere-opunemi.”

⁵ Maranai Aaron wei i 'nanai ma pulo aniapuna i voai bull au naona ma i vinolanola i pa, “Au maratom tana torela BADA aubaina.”

⁶ Ma Ubaubana boibogi rava i vomairi da īamoāgamo taputapuna i apui ma viturana maiteni pulona i terei. Muriai i kiala da i am gogona ma i uma-bua guratana da i kaua labalababa.

⁷ Anina ma BADA Moses i riwei, “Ma īgaira ma am rava Egyptei u tere-opunei. Tau i geduaieu ma kaua apoapoena i kaei.

⁸ Taui me marana au tarawatu i geduaiei ma bull natuna kokoitauna i kaei. Ma i raudunelei ma pulo i apui awarina ma i riwa, ‘Wei ami god, Oo Israel, Egyptei i tere-opunemi.’

⁹ Ma BADA Moses i riwei, “Wei ravai a inanai ma a aramanei taui kolai bagibagii, ma nuapoui ēga.

¹⁰ Ma votereu da au meji ana vikwai taui awarii ma ana pupuni. Ma tam Moses ana terem da am epaepaia maiteni dam patarai īaeāgena ona vitupui.”

¹¹ Wate Moses God i vigigimanei i pa, “Oo BADA am rewapanā īaeāgeni am rava Egyptei u tere-opunei lamna aubaina ēga am rava awarii ma meji ma ma pupuni.

¹² Mepa da ma pupuni, Mai Egypt ina riwa, ‘Ana nota apoapoena maranai i tere-opunei da au ola anatapui ita pupuni.’ Meji avena, oram ina uba, ma ēga ma vipupui.

¹³ ⁵Am taunola Abraham, Isaac ma Israel ma notai, tam wavamei u parivainuaāgani, ‘Tau am epaepaia ana vimaāgai me ubona au mara ma wei dobuna a paripari-vainuaāgani ami epaepaia ana vere-nonoei.’”

¹⁴ Anina ma BADA orana i uba ma ega apoapoena ita neiai awarii.

¹⁵ Ma Moses i gaira me, au urana gaima ruaaga dabababai. God ana tarawatu wei gaimai au naoi ma au murii i girumi.

¹⁶ Gaima dabababai lamna God ana kaua. Tauna ainelana i girumi.

¹⁹ Maranai Moses i turiai mepa rava i rauigaravu ma bull natuna goldei i 'nanai i maimairi ma rava i arara i 'nanai. Tauna meji orana i oai ma gaima dabababai ruaaga i viorereni au doa. I viaigimagimai ola au karena.

²⁰ Moses bull natuna goldei i vaia ma i apui ma i tutu-gwadagwadai da i vipokau ma au waira i tawanei ma mai Israel i egari da i uma.

²¹ Ma Aaron i riwei, "Rava aiwai i kauei awarim da u kauei da kaua apoapoe kaukauna i kauei."

²² Aaron i paribelei, "Au bada ega ma gaiawa, rava ai kaua u aramanei, kaua apoapoe ai gai.

²³ Ma i riweu, 'god ma kauei da ina ravenita. Ma wei ravana Moses, Egyptei i tere-opunelai, tauai ega ata aramanei aiwai awarina i tupua.'

²⁴ Lamna aubaina rava a riwei, 'Aiaia awarina via goldei ona votawanei ma i vereu.' Ma ai au menamenana a tawana-ruiei ma wei bull natuna i opui!"

²⁵ Moses i 'nanai da Aaron ega tagotagogina da rava ita vibadei, ma ana gavia ai anivinama i kauei.

²⁶ Lamna aubaina ai rauigaravu au metaetana i mairi ma i garara, "Aiai da BADA au murina, ona nei awariu!" Ma Levi ana dam i nae Moses au murina.

²⁷ Ma Moses taui i riwei, "BADA, Israel ana God e ririwa. Nelara sod ona lavui ma ona nae garavu au giana da ona nenememei ma dam turam ma vareim ma mae-turam ma viraageni."

²⁸ Levi ana dam Moses i voteletelei ma nai au marana nelara 3,000 i viraageni.

²⁹ Ma Moses i riwa, "Amadodo BADA taumi i voviviremi ma i viaiainimi da aubaina ona vipirisi pulo tauapuina, aubaina taumi BADA o voteletelei da natunatumi ma varevareimi o viraageni."

³⁰ Ma maratomna Moses rava i riwei, "Taumi go'apoapoe gae gaeena o kauei wate ana gae BADA awarina da ana kauana dadanei da ami go'apoapoe ina nota-tawanei."

³¹ Anina ma Moses i gae me BADA awarina ma i riwa, "Au rava kaua i apoapoe gaga i kauei. Taui ai god goldei i kauei ma i raudunelei!"

³² Wate marina BADA a vivibaagaim da ai go'apoapoei ma nota-tawanei ma mepa da ega lamna avena ma wavau am au buka ma boa-tawanei."

³³ Ma BADA Moses i paribelei, "Aiavoi go'apoapoei i kauei awariu, Tau wawai au buka ana boai.

³⁴ Marina ma nae, rava ma naiei dobu a ririweia ma au anela ina ravenim. Wate marina geta da ana kovoagi, taui ai go'apoapoe aubaina ana kovoagi."

³⁵ Ma BADA doria apoapoenei rava i kovoagi aubaina taui god bull natuna Aaron i voai i raudunelei.

34

Gaima ruaaga

¹ BADA, Moses i riwei, "Gaima ruaaga dabababai ma bori inanana me ruaaga u wamawamaia, ma au tepana riwana tagogina ana girumi me au naona.

² Ma vokaukaua ma ubaubanai ma gei ola Sinai au tepana ma nebeleu."

⁴ Ma Moses, gaima ruaaga i bori me au naona nanare. Ubaubanai boibogi gaimai i voai ma i gae au ola BADA i ririwei nanare.

⁵ Ma BADA apauei i gairai ma au ririvana i raumairie, ma wavana i latoni, "BADA!"

⁶ [✧]Ma Moses au naona i babara ma i viğoreğore, “TAU MAEMAE NONOANA! Tau raraunuapoapoeu ma iviu aiaina, tau eğä lağilağina amlou ita voğaiğai.

⁷ Au nuavaina maemaeina ina mae au rava awarii da kimta tausan ina kwa ma kaua apoapoe, mae-ğaeğae ma ığo'apoapoe ina nota-tawanei. Wate tauna eğä kaua apoapoe taukauei ita inana-tawanei, natunatui ma ığoğai, amamai i kaukauei kovoğana e vaivaia da kimta vitonuina da vi-four-na.”

⁸ Moses maratagogi i mae-peu au doa ma BADA i viborumei.

⁹ I riwa, “Au bada mepa da riwa kaua da tam nuanuau u vaia, a vivibağaim da uta vinao ma tata nae. Wei ravai orai badobadoi, wate ai kaua apoapoe ma ai ığo'apoapoei ma nota-tawanei, ma ma vai-meleiai am buderi.”

Parivainuağana bagibagina i ravivouni

¹⁰ BADA, Moses i riwei, “Ma rautaniğana! Au parivainuağana bagibagina tam maiteni a kaukauei am patara Israel maiteni. Ma au matami kaua ığaeğae aniba kauai ana kuae. Eğä melanai aiai wenanare ita kuae au dobu. Rava anatapui au ririvami e mamae, au rewapana ina inanai da tau, BADA kaua ığaeğae ana kuae aubaimi.”

²⁸ Moses kampa i mae BADA maiteni au pom 40 ma waguvurai 40, eğä ita am ma eğä ita uma nai au marana. Ma BADA ığaima au tepana parivainuağana riwai - Tarawatu 10 i girumi.

Moses naona i lalai

²⁹ Moses ığaima ruağau tepai parivainuağana riwai i vinimavoei ma ola Sinaiei i ığairai. Wate eğä malana ita vaia da naona i lalalai aubaina tauna BADA maiteni i babani.

³⁰ Aaron ma Israel patarai i 'nanai da Moses naona i lalalai ma awarina naena i rovoei.

³¹ Wate Moses taui i ığorei, ma Aaron ma dogadogara i nei awarina, ma awarii i babani.

³² Ma mai Israel i riei Moses awarina ma tarawatu ola au tepana i vereverei rava i pariverei.

³³ Moses naona garei i purui maranai awari i babani-vorovei.

³⁴ Maranai Moses e ruirui au numagara da BADA maiteni ina babani, ığarana naona i purupurui lamna, e vovotawanei. Ma e opuropu memei ma BADA aiwai i riwei mai Israel e paripariverei,

³⁵ ma mai Israel, i 'nanai da Moses naona i lalalai. Lamna maranai Moses naona i puru-melei da ina rui me da BADA awarina ina babani.

40

Ma Moses rava i vibagai numa voa purapurai BADA ana numa ığara vivivireina voana aubaina, ma wate purapura vivivirei numa au orana bada vimae-ğaeğenana aubaina, ma pirisi ai gara popona aubaina, ma rava i amverena da tagotagogina da nola ita vikwai. Bezalel ma Oholiab ma rava nolanolai nelara ma waivine wei purapurai i kuae me BADA i ririwei nanare.

Numa gara vivivireina i vikwai

¹ Ma BADA Moses i riwei,

² “Au Numa Gara Vivivireina ma vimairini aupom tagogi, madeğä au vouna.

³ Tarawatu 10, Parivainuağana bokisina au orana ma poai, ma au naona anitereğägara ma teretağonei da numa garana ina babalaragi.

⁴ Teibol ma ruiei ma au tepana aiwai i kaukauei aubaina ma terei. Ma rampa anivojiji-nana ma ruiei, ma rampa mä terei

⁵ Ma incense aniapuna goldei ma terei bokisi au naona ma anitereğägara ığelauna ma terei da BADA ana numa gara vivivireina ina gudui.

⁶ Numa gara au metaetana, au doa, pulo aniapuna ma terei.
⁷ Anirauoġa numa gara ma pulo aniapuna au poui ma terei ma waira ma vioai.
⁸ Numa gara ma pulo aniapuna aniteregāgara ma tere-kwaviviroi da dobuna ma gari. Ma au anirui aniteregāgara ma vidawei.

⁹ —Ma oil viaiainana ma vaia ma numa gara ma purapura anatapui au orana ma buloi ma ma vovivirei da vivivireina.

¹⁰ Ma pulo aniapuna ma ana purapura maiteni ma buloi ma ma vovivirei da vivivireina.

¹¹ Anioġa abomana ma ana animairi maiteni ma buloi ma ma vovivirei da vivivirei.

¹² —Aaron natunatuna ma neiai numa gara vivivireina au metaetana ma wairei ma oġai.

¹³ Ma Aaron pirisi ana gara vivivireina ma vioteni ma oili ma vovivirei da aubaiu ina vipirisi pulo tauapuina.

¹⁴ Ma natunatuna ma neiai ma pirisi pulo tauapuina ai gara ma vioteni.

¹⁵ Ma ma buloi me amai u buloi nanare da ina vipirisi pulo tauapuina. Wei viaiainana Aaron ana epaepaia i vovivirei da mara nonoa kmtana patapatana awari ina vipirisi pulo tauapuina.

¹⁶ Moses anatapuna i kauana-paiei me BADA i ririwa nanare.

¹⁷ —Anina ma madeġa au viruaina au pom tagogi nawaravi tagogi, taui numa gara vivivireina i vimairini.

¹⁸ Moses dogo i ġarai ma tuatua i tonei ma terewaba ma anitapejijinana i ragini.

¹⁹ Ma gara ġamoġamo opinei i ġaġauri au tepana i eban, BADA i ririwei nanare.”

²⁰ Anina ma Moses ġaima dababai ruāga bokisi au orana i terei. Ma anipawe loji au orana i vionaġi bokisi au adana, ma uġuna i vaitani.

²¹ Ma bokisi i ruiei God ana au numa gara vivivireina ma aniteregāgara i terei da bokisi i mae-ġaġari, BADA i ririwei nanare.

²² Ma nanare teibol i ruiei God ana au numa gara, aniteregāgara i mae ma au doe, au laubadei i terei

²³ ma teibol au tepana palawa i pulopuloei BADA awarina i terei, BADA i ririwei nanare.

²⁴ Rampa aniterenana i vaia ma au numa gara teibol au naona, au babaġela au rauanaġei i vikalai.

²⁵ Ma rampa i apui BADA awarina, me i ririwei nanare.

²⁶ Incense aniapuna goldei aniteregāgara au naona i terei numa gara vivivireina au orana.

²⁷ Anina ma au tepana incense ġabuġabui i apui, BADA i ririwei nanare.

²⁸ Ma aniteregāgara i terei da aninae au numa gara vivireina i gudui.

²⁹ Pulo aniapuna BADA ana numa gara vivivireina au metaetana. Au tepana ġamoġamo ma palawa i apui me BADA i ririwei nanare.

³⁰ Ma aboma ġaġaena numa gara ma pulo aniapuna au poui i terei, ma au orana waira i waġi anioġa aubaina,

³¹ ma kampa Moses ma Aaron ma natunatuna urai ma aei i oġai.

³² Taui aei ma urai e oġaoġai maranai e ruirui au numa gara bo e nenaе pulo au aniapuna.

³³ Ma Moses Numa gara ma Pulo aniapuna i gari-kwaviviroi. Ma aniteregāgara i terei au anirui. Anina ma Moses ana nola i kwa.

BADA ana Numa Gara Vivivireina viborumana

³⁴ ☩ Ma apau BADA ana Numa Gara Vivivireina i purui ma ana boruma numana i vioai.

³⁵ Apau numa gara vivivireina au tepana i kiala ma BADA ana boruma numana i vioai ma lamna aubaina Moses eġa tagotagogina da ita rui.

³⁶ Ma apau i vovoepa lamna maranai mai Israel ina vaġai au dobuġela.

³⁷ Ma mepa da apau ēga ita voepa lana taui ēga ina nae.

³⁸ Maranai mai Israel e vāgavāgai, BADA ana animae apau au orana numa gara vivivireina au tepana ma waguvvarai tauna ai apau au orana e ararata.

Leviticus Levi ai kaua

Wei bukana wavana Leviticus, aubaina Levi ana dam e bababaniei. Taui pirisi pulo tauapuna i vovoagui. Ma BADA ana Numa Gara Vivivireina i paipaini.

Pulo taputapuna apuna

¹ BADA au Numa gara Vivivireina ma Moses i kwatuei ma i riwei i pa,

² “Wei au pariverena pulo apunana aubaina. Mai Israel ma riwei ma pa, ‘Aiai da BADA awarina ġamoġamo e apuapui, lamna bulumakau tagogi bo sipu bo gote i ġamoġamoi ina neiai ana pulo.

³ ‘Mepa da ġamoġamo taputapuna e apuapui am pulo, ma inanai da ġamoġamo orotona aiaina ma eġa ana apoapoe aiwai. Ma neiai Numa gara Vivivireina ana au anirui, da BADA ina vianinem.’

⁴ Ma uram ġamoġamona au kolana ma terei, wei e vivimataira da ġamoġamo i raviepaim da ina iraġe am ġo'apoapoe ina oġa-tawanei.

⁵ Ma bulumakau BADA au naona ma viraġeni, ma pirisi Aaron natunatuna tara, ina neiai da pulo aniapuna au adana ina voiwaiwaġa-naiei.

⁶ Anina ma Ġamoġamo ma opai ma ma api.

⁷ Ma Aaron natunatuna, ai ina viviri pulo aniapuna au tepana.

⁸⁻⁹ Taui sia apiapina ai araratana au tepana ina terei da ina arai, kolana da monamona maiteni. Wate amoamo da ganigani ma sia aei wairei ina oġai, ma pirisi siana anati-puna ina apui. Wei pulona apuapunana lamna ġabuna aiaina BADA ina vinuaiaini.”

Wate God Moses i riwei da rava sipu bo gote, gabubu bo bunebune ita puloei me pulo e apuapui nanarena. Tauna wate Moses i riwei da menanare wei ina puloana-nei.

3

Viegualau pulona

¹ BADA Moses awarina i babani i pa, “Aiai da nuauba amna aubaina ana pulo bulumakau e apuapui, ma inana-kauei da burumakauna orotona bo wavinena, aiaina ma eġa ana apoapoe aiwai.

² Ma urana ġamoġamo au kolana ina terei ma ina viraġeni Numa Gara Vivivireina ana au anirui. Ma pirisi Aaron natunatuna tara pulo aniapuna au adana ina voiwaiwaġa-naiei.

³⁻⁴ Ma amoamo monamona ava ma kaina monamona ma ganigani ana monamonana, pirisi ina verei da ina apui nuauba pulona.

⁵ Ma Aaron natunatuna wei monamonai sia taputapuna e ararai au tepana ina terei ma ina apu-tagogie, pulo aniapuna au tepana. Wei amgogona pulona ma ġabuna i ai kaua BADA awarina.”

Ma ġamoġamo taupuloina ana numa ravai maiteni ma ai rava ġelaui sia mae-terenai e aniani. Wei lamna BADA ana babani bulumakau aubaina ma riwana tagogina sipu ma gote aubaii amgogona pulona.

13

Opi dorianana ana tarawatu

¹ BADA Moses ma Aaron i riwei i pa,

² “Mepa da aiai kero bo paramaitua i vaia bo opina i lebara ma e notanotai da wei kerona e viviopardiana, lamna ana rava tauna ina naiei pirisi Aaron bo natuna tagogi awarina.

³ Pirisi kero vioana ina inanai. Mepa da apara au kero e vivimairiana i arapoira ma dogona i ġaira lamna opidorian. Ma pirisi ina riwa da tauna eġa aiaina BADA au matana.

45 —Rava aiai opidoriana i vaia, tauna gara wanasikasikana ina oteni, aparana e ġa ina jinai ma naona ina purui ma ina kwatu ina pa, ‘Tau e ġa aiaiu! E ġa ona nei au ririvau!’

46 Maranai doriane awarina e mamae lamna tauna anina miramirana, Tauna ainelana ina mae au tano.”

17

Tara ana tarawatu

10 ✱ Aiai Israelieina bo jentail maiteni o mamae, sia taratarana e aniani, BADA tauna ina mae-puputei ma ana rava awariei ina bori-tawanei.

11 Aiwai anatapui da lawalawai ai lawana au tarai e mamae ma lamna aubaina BADA i riwa da tara pulo au aniapuna ona voiwaiwaġi da rava ai ġo'apoapoe ina vaitawanei. Tara lamna lawana, ma lamnei ġo'apoapoe e vaivai-tawanei.

18

Viawawana ana tarawatu

1 BADA Moses i riwei i pa,

2 “Mai Israel awari ma babani ma ma riwei, ‘TAU BADA ami God.’

3 Mai Egypt ai kaua e ġa ona ġovaivaiti, Wariaġa kampa o mae, marina a taratara-vainanaiemi au Canaan ma ai kaua e ġa ona ġovaivaiti. E ġa ai lawana ona votaġotaġoi.

4 Taumi au tarawatu ona voteletelei ma riwau ona votaġotaġoi. Tau BADA ami God.

5 Mepa da au tarawatu ma riwau ona voteletelei taumi lawana ona nelāgai. TAU BADA a riwa.”

6 TAU BADA wei au babani bagibagii a vereveremi, “E ġa aiai novuna bo vareina ina viawawanei.

19 —Maranai wavine nawaravi i vunui tauna miramirana, e ġa maiteni ma viawawana.

20 —E ġa oroto ġelauna awana maiteni ma viawawana, lamna tam u vimira-melem.

21 —Natunatumi e ġa ona puloei god Molek* awarina, aubaina TAU BADA ma vinimala e neineiaw avariū.

22 —E ġa aiai orotona, oroto ġelauna ina viawawanei, me oroto waivine e viawawanei, wei lamna ġo'apoapoe kaukauana God au matana.

23 ✱ —E ġa aiai orotona ġamōġamo ina viawawanei bo wavine ina verena-melei da ġamōġamo ina viawawanei. Mepa da wei u kauei tam u vimira-melem.

24 —E ġa wei kauai ona kauei da ina vimiramiraimi. Dam au Canaan maemaei anatapui wei kauai i kauei ma i vimira-melei. Lamna aubaina ana viġaġana-opunei ma taumi ona rui.”

19

Apoapoe terevai-jijimanina riwai

1 Ma BADA Moses i riwei i pa,

2 “Dam Israel anatapui ma tuarui ma ma riwei, ‘Taumi lawana vivivireina ona maeni. Aubaina Tau BADA ami God vivivireiu.’

17 —E ġa oram ina raviapiāi kaua apoapoa ravana awarina, wate maiteni ona kiala da kaua ona tere-vaijijimani, da e ġa ġo'apoapoe ona kauei.

18 ✱ —E ġa ma raubiwa am rava awarīi, e ġa aiai ma ġoāġaiei, wate rava turam nuanuam ina vaia me tam nuanuam e vaivai-melei. TAU BADA.”

* **17:10:** Gen 9:4 * **18:21:** Molek lamna mai Ammon ai god ✱ **18:23:** Exo 22:19 ✱ **19:18:** Mrk 12:31

20*Konaǵa riwana*

⁶ Aiai ravana i ǵoei da kaua anoi ita aramanei, lamna Tau ina vibaǵaiu. Eǵa vinuaterena aubaina ina nae konakonaǵa awarii ina bababani. Mepa da aiai wei i kauei, nai ravana ana mae-puputei, ma au rava awariei ana viopuni.

24*Vimaimaia riwana*

¹⁹ Mepa da aiai turana i vikeroi, aiwai i kaukaueia awarina nanare ina kauei.

²⁰ Mepa da gelama i viaigai, gelamina tagogi ina wanagai, mepa da mata tagogi i viapoapoeni, matana tagogi ina apoapoei. Mepa da ivo tagogi i viaigai, ivona tagogi ina wanagai. Aiwai kerona rava ǵelauna i verei, tauna nanare ina kero.

²¹ Aiai ravana ǵamoǵamo i viraǵeni ina vimaiei, wate aiai da rava i viraǵeni, tauna ina iraǵe.

²² Wei tarawatuna taumi anatapumi aubaimi, mai Israel ma dobu ǵela ravai, aubaii TAU BADA ami God.

Numbers Au Mutulua

Pariverena

Wei bukana wavana *Numbers*, aubaina au kapita 1 da kapita 4 e ririweta da Israel ana dam 12 ma ai dam nelara biaġa sorodia. Wei bukana nanare Mai Israel ai mae au mutulua madeġa 38 i kwa, ma aiwai i kaukauei bo ai babara au Sinai i vikarei da i nae au Canaan lamna e bababaniei.

6

Aaron natunatuna maiteni ai Viaiaina

²² BADA Moses i riwei i pa,
²³ “Aaron ma natunatuna ma riwei da wenanare mai Israel ina viaiaini ina pa,
²⁴ ‘BADA ina viaiainimi
ma ina gagaloemi.
²⁵ BADA ivina ina ai awarimi
ma ina paina-kauemi.
²⁶ BADA ana nuaiaina ina mae-tavirei awarimi
ma nuauba ina veremi.’
²⁷ Ma nanarena, maranai Aaron ma natunatuna Tau wavauei mai Israel e viviaiaini, ma Tau ana viaiaini.”

13

Taurauivu Canaan i tuvirevirei

¹ BADA Moses i riwei i pa,
² “Mai Israel ai dam 12 au orai rewapani tagotagogi ava ma vinei, da ma paritawanei da Canaan dobuna ina ivui, wei dobuna mai Israel a vereverei.”
³ Ma BADA i ririweia nanare Moses i kauei. Mai Israel ai dam 12 babadai i paritawanei. Taui ai ġaravu au mutulua Paran i voterei da i nae au Canaan.
¹⁷ Maranai Moses ravai i paritawanei da dobuna ita ivui ma i riwei i pa, “Au Negev ona virautua da dobu violaolana ona naeni da au navanava ġelauna.
¹⁸ Dobu ona tuvirevirei, ma ana patara ona inanai menanare, rava ai maġa ma ai rewapani bo ai ġokokokara?
¹⁹ Doa maumaurana bo eġa? Ai melaġai ona tuvirevirei, garigarina bo e mamae lota?
²⁰ Doa maumaurana bo eġa? Ai e gogogo bo eġa? Ma ona kauana-guratei da ai anoi ġelauui ona purai da ona neiai.”
²¹ Anina ma taui dobuna i naeni, au mutulua Zin* i vikarei ma dobuna i naeni da au già dewadewana au Rehob, wei lamna Lebo Hamath au ġereġerena.

Taurauivu i nememei

²⁵ Au pom 40 taurauivu dobu i tuvirevirei ma i nememei,
²⁶⁻²⁷ I nei Moses, Aaron ma Israel patarai awari au Paran mutuluana au Kadesh ma ai anoi au dobuna i vaivaia i viatataie. Ma i pariverei i pa, “U paritawanelai da dobuna a ivui, marina grape ana ġou marana ma a inanai da ani ipi gabuna aiaina ma doa maumaurana, ma aina anoi ġelauui a neiai da ona inanai.

* **13:21:** Wei lamna dobu ġaegħaena Negev au paratana i vikarei da i nae da ola Hermon au ġereġerena ma Hamath melagħaina.

²⁸ Wate kampa rava ġaiġaiawai e mamae, ma ai melagai i rata kaua ma i gari-kwaviviroi da eġa ġavia ina rui. Ma kampa mai Anak a inanai.

²⁹ Mai Amalek au mutulua Negev e mamae, ma mai Hitti mai Jebus ma mai Amori au ola e mamae ma mai Canaan au gera, Jordan wairana au ririvana e mamae.”

³⁰ Ma Caleb, rava i riwei da i genuana ma i riwa i pa, “Tana nae dobuna ravai tana virubai ma dobuna tana yaia!”

³¹ Wate taurauivu maiteni i ġegħae i pa, “Eġa! Ravai i virewapano kaua eġa me tauta. Eġa tana viġavie.”

³² Ma nanare taui nai dobuna ana apoapoe riwana i vibabarai mai Israel awari i pa, “Nai eġa ani ipi doana aiaina ma rava manamanai ma ġaiġaiawai kampa e mamae.

³³ Ma kampa rava ġaiġaiwai Mai Nephili[†] a inanai (Mai Anak noinooi) tauai a inana-meleiae lamna me kapau ma nanare taui au matai lamna tauai me kapau.”

14

Mai Israel Moses ma Aaron i viġavie

¹ Ma nai waguvvaraina rava anatapui i tou mara.

² Taui anatapui Moses ma Aaron i viġavie i pa, “Airake au Egypt ata iraġe ota! Bo weka au mutulua.

³ Aiwai aubaina BADA e nainaieta wei au dobuna da ravai sodei ina viraġenita ma awawata ma natunatuta ina pani-naiei. I ai kaua da tata wanaviraita au Egypt.”

⁴ Ma taui i babani vivira i pa, “Bada tana vinei da ina naiana-meleta au Egypt.”

⁵ Anina ma Moses ma Aaron i mae-ġaira da naoi au doa Israel patarana au matai.

⁶ Nun natuna Joshua ma Jephune natuna Caleb ruāgai, taui maiteni dobu i tuvirevirei, ai gara i sikai,

⁷ ma mai Israel anatapui i riwei, “Dobuna anatapunana a naeni ma a tuvirevirei ma dobu maumaurana.

⁸ Mepa da BADA nuantuana ina ai awarita ma ina ruieta dobuna maumaurana awarina, weka sia ma lam eġa anibaiana.

⁹ Wate BADA eġa ona viġavie. Ma ravai dobuna e maemaeni eġa ona rovoei, tana viaġaġana-opunei. Taui ai agu eġa. Tauta BADA maiteni ta mamae! Ravai eġa ona rovoei!”

¹⁰ Mai Israel Caleb ma Joshua ġaimei ita viraġeni wate BADA ana borumana i eġa numagara au tepana.

God Moses i riwei da ita wanavirai ma ana rava ita taravaina-naiei au mutulua da etanai e nena au Boga lebalebarina ita naeni.

God i riwa da rava ina kovoġi

²⁶ BADA Moses ma Aaron i riwei,

²⁷ “Wei ravai apoapoe ai beura awariu a nonora, iauei! Mai Israel ai pariviravira awariu a nonori.”

²⁸ Wenanare ma paribelei, “BADA i riwa, ‘Tau wavauei a ririwa da aiwai o vivibaġei, nanare ana kauei.’”

²⁹ Taumi au mutulua tupuami urabovai ina nae. O pari-virevireu aubaina taumi ami madeġa 20 ma e ġegħae ona iraġe.

³⁰ A parivainuġami da wei au dobuna ota mae wate eġa aiait tagogi wei au dobuna ina rui anina Jephune natuna Caleb ma Nun natuna Joshua.

³¹ Ma o ririwa da natunatumi ina vaia ai panipani, wate taui kampa ana ruie i da dobuna o gedugueduaieia ina maeni.

³² Wate taumi patarami tupuami au mutulua ina bova-nae.

[†] **13:33:** Mai Nephili eġa tata aramana-kauei, wate taui rava gogogobui. Gen 6:4 e ririweta da taui meie i nei.

33 ✽Ega ota vipatutu ma lamna aubaina natunatumi ina vinuapoapoe au mutulua ma ina kovōgi da ina vīgamōgamo-nae da madēga 40 ina kwa nai maranaina taumi kimta magurimi ona irāge-pai.

34 Aupom 40 dobuna o tuvirevirei lamna aubaina ana kovōgimi da madēga 40, au pom tagogi maiana madēga tagogi. Ami āgō'apoapoei aubai au kovōga malana ona vaia.

35 TAU BADA, A riwa! Tau wei ana kaei taumi āgō'apoapoe ravami anatapumi awarimi. Ami rava maiteni o vitagogiem i ma o vīgavieu. Taumi anatapumi au mutulua ona kwa, taumi weka ona irāge.

20

Miriam i 'rāge

1 Nawaravi au vouna mai Israel anatapui au mutulua Zin i āgeta ma au Kadesh i raūgaravu. Weka Miriam i 'rāge da i doboi.

Mai Israel Moses maiteni i vipariparinīgai

2 ✽Kampa Waira ega ma lamna aubaina taui i vitagogiei ma Moses ma Aaron ai āgavia i vomairi,

3 ma Moses maiteni i vipariparinīgai i pa, "Rorova varevareiai maiteni ata irāge tagogi BADA au matana!"

4 Aiwai aubaina BADA ana rava u neiai au mutulua ana āgamōgamo da ina irāge

5 Aiwai aubaina Egyptei u tere-opunelai ma u neiai wei dobuna apoapoena awarina? Weka ega ani ipi doana aiaina da witi da damala aina bo grape warami bo *Pomegranates* aina ina gogo, ma ega waira aniuma!

6 Moses ma Aaron, patara i voterei ma i nae BADA ana numagara au metaetana ma i mae-peu au doa ma i raudune. Ma BADA ana borumana i ega.

7 Ma BADA Moses i riwei,

8 "Am jīgona ma vaia ma tuam Aaron maiteni rava ona vitagogiei. Ma au matai kira awarina ma babani ma ana waira ina veremi. Nanare waira kirei ina opu da Israel patarana ina uma ai āgamōgamo maiteni.

9 Anina ma Moses jīgona BADA au naona i vaia, i ririwei nanare."

Moses kira i ravi

10 Ma Moses ma Aaron dam Israel i vitagogiei kira au naona ma Moses i riwa, "Ora potapotami! Ona genuana! Tauai waira kira au orana ana tere-opuniai aubaimi!"

11 Ma Moses ana jigona i voepai ma kira i ravi mara ruāga. Ma waira āgēgaena i ruba-opu da rava ma āgamōgamo i uma.

12 Anina ma BADA, Moses ma Aaron i riwei, "Taumi ega ota vitumāgana-kaueu da Tau vivivireu ami dam Israel au matai, ma lamna aubaina taumi ega wei ravai ona ruie dobuna a vereveremiana awarina."

Aaron i 'rāge

23 Au ola Hor, Edom ana au parata, kampa BADA Moses ma Aaron i riwei,

24 "Taumi riwau o rauāgaīgaiei au Meribah ma lamna aubaina, dobu mai Israel a verevereria, Aaron kampa ega ina rui. Tauna noinoina ina votāgoi.

25 Aaron ma natuna Eleasar ma taravaia ma ma āgai au ola Hor.

26 Kampa Aaron ana pirisi garana ma votawanei ma natuna Eleasar ma vioten. Aaron kampa ina irāge ma noinoina ina votāgoi."

27 Moses BADA i ririwei i kaei. Taui ola i āgeni, mai Israel anatapui au matai.

²⁸ Moses Aaron ana pirisi garai i votawanei ma natuna Eleasar i vioteni. Ma kampa ola au tepana Aaron i 'rağe. Ma Moses ma Eleasar i ġaira memei.

²⁹ Maranai patarana i aramanei da Aaron i 'rağe ma i touei da au pom 30.

21

Mota bronzei i kaei

⁴ Taui ola Hor i netawanei ma boga lebalebarina etanaina i vaia da Edom ita vorei. Au etanai rava amloï i ġaiġai aubaina ai vaġai i manawa,

⁵ ma Moses ma God i eni i pa, "Aiwai aubaina Egyptei o taravaina-opunelai da au mutulua ana iraġe? Ai lam eġa! Ai waira eġa! Ma wei lam tagogina manna a amgeduaiei."

⁶ Ma BADA mota ġaiġaiawai i paritawanei awari ma maġamaġau i ani ma i 'rağe.

⁷ Rava i nei Moses awarina ma i riwa, "Tauai ġo'apoapoena a kaei maranai BADA ma tam a parivireviremi. Ma raupari da BADA mota ina vaitawanei." Ma Moses i raupari rava aubaii.

⁸ Ma BADA Moses i riwei i pa, "Mota ġaiġaiawana kokoitauna ma kaei ma ai au damona ma raġini. Maranai mota, rava aiai i ani ma i taepai da mota kokoitauna i 'nanai, ma tauna ina lawana."

⁹ Ma Moses mota bronzei i kaei ma ai au damona i raġini. Maranai mota aiai i ani ma ravana i taepai da mota i 'nanai ma i lawana!

Au Ola Hor da i nae au Moab

¹⁰ Mai Israel i nae ma au Oboth i rauġaravu.

¹¹ Ma Oboth i netawanei ma i nae au Iye-Abarim i mae, wei lamna mutulua, Moab au naona au maramatanei.

¹² Kampa da i nae Zered au wapuna i rauġaravu.

¹³ Ma wei dobuna i netawanei ma i nae waira Arnon au baba ġelauna au mutulua mai Amori ai au parata. (Moab ma Amori ai dobu au poui wei wairana e viviparata).

Mai Israel, gulau Sihon i vovaiubai

²¹ Ma mai Israel taupariverena i paritawanei da Sihon mai Amori ai gulau i pariverei i pa,

²² "Tauai a ġoei da am au dobu ata verautua. Tauai eġa ana deġa ami au wapu bo grape wapuna, bo ami au waira dogona waira ana umai. Tauai gulau ana au etanai ava ana babara da am dobu paratana ana opu-tawanei."

²³ Wate gulau Sihon mai Israel eġa ita vianinei da ana au dobu ita verautua. Ma ana sorodia anatapui i tami ma i nae au mutulua da Israel ita nebelei. Au Jahas i ġeta da Israel maiteni i viġaiġaiawa.

²⁴ Wate mai Israel i virewapana ma gulau Sihon i viubai ma ai dobu waira Arnon i ġae da waira Jabok ana parata i vaia, wei kampa mai Ammon au dobu e viviparata. Mai Ammon ai parata i gagaloana-kauei ma lamna aubaina mai Israel eġa ai au dobuna ita rui.

²⁵ Ma mai Israel i viġavia da, mai Amori ai melagai i vaipai da i maeni, taon Heshbon ma melagai ġelaui kampa maiteni i vaia.

Mai Israel gulau Og i vovaiubai

³¹ Nanare mai Israel mai Amori ai dobu i vaia ma kampa i mae

³² Ma Moses tauivu i paritawanei da Jaser taon i tuvirevirei, ma muriae mai Israel i nae ma ai melaġai anatapui i vaia ma mai Amori kampa maemaei i viġaġana-opunei.

³³ Ma mai Israel i vira ma etanaie i ġae au Bashanei. Ma Bashan ai gulau Og ai sorodia anatapui maiteni i opui da taui i nebelei au Edrei.

◊ 21:9: 2Ki 18:4

³⁴ Ma BADA Moses i riwei i pa, “Ega tauna ma rovoei, aubaina tauna, ana rava anatapui, ma ai dobu maiteni au uram a tereterei. Aiwai u kaei Amori ai gulau Sihon awarina, au Heshbon taon, nanare gulau Og awarina ma kaei.”

³⁵ Ma gulau Og i virañeni natunatuna nelarai ma rava anatapui i virañena-pai, ega aiai ita mae. Ma mai Israel dobuna i vaia da ai dobu.

22

Balaam Israel ñagñalana i geduaiei

¹ Ma mai Israel i vomairi da Moab au wapuna, Waira Jordan au adana i rauñgaravu, ma au baba ñelauna Jeriko taon.

² Ma mai Israel aiwai i kaei mai Amori awari, Zippor natuna Balak anatapuna i 'nana-pai.

³ Mai Israel i maña kaua ma lamna aubaina mai Moab i rovo kaukaua, rovo ita irañelei.

⁴ Ma mai Moab mai Midian babadai i riwei i pa, “Aburuna ava ma wei patarana aiwai anatapuna au ririvata ina pupuna-pai, me bulumakau au wapu modu e amam.”

⁵ Anina ma Moab ai gulau Balak, Beor natuna Balaam ana riwa i paritawanei au Pethor, waira ñaegena wavana Euphrates au ririvana. Ana riwa wenanare, “Dam tagogi Egyptei i opu, ma dobu anatapuna e vaivaia ma marina au ririvau i rauñgaravu.

⁶ Taui i virewapana kaua ega me tau, ma nei ma ravai ma parivai-iviapoapoeni, mepa da tau ravai ana vovaiubai ma wei dobunei ana viañgagañana-opunei. Aramanai da maranai tam rava e viviaiaini tauna viaiaina e vaivaia ma maranai u parivai-apoapoeni tauna ina apoapoe.”

⁷ Ma Midian ma Moab babadai mane i vaia Balaam vimaiana aubaina ma i vomairi. Ma i ñeta Balaam awarina ma Balak ana riwa i parivereti.

⁸ Balaam ravai i paribelei i pa, “Weka ona matave ma au maratom BADA aiwai ina riweu ana pariveremi.” Ma babadai kampa Balaam maiteni i mae.

⁹ God i nei ma Balaam i vitara-virevirei i pa, “Aiavoi i nei awarim?”

¹⁰ Balaam i paribelei, “Zippor natuna Balak, Moab ai gulau wei riwana i paritawaneiai i pa,

¹¹ ‘Ma rautaniñana dam ñaegena Egyptei i opui ma dobu anatapuna e vivioai. Ma nei ma aubaiu ravai ma ñagñalei, da maiteni ana viñgaiñaiawa ma ana viagagei da ina vinelana.’

¹² Wate God Balaam i riwei i pa, “Ega maiteni ma nae. Ega wei ravai ma ñagñalei aubaina Tau au viaiaina awarri.”

¹³ Ubaubanai Balaam i nae ma Balak ana taupariverena i riwei, “Ona nae me ami au melañai! BADA ega ita vianineu da maitemi tana nae.”

¹⁴ Ma Moab babadai i nae me ai bada Balak awarina ma i riwei i pa, “Balaam ega ita goei da ita nei.”

Anina ma Balak babada ñaegñai i paritawanei Balaam awarina. Ma i riwei da pulo ñaegena ita verei mepa da tauna ita nei da mai Israel ita ñagñalei. Ma marina God Balaam i riwei da babadai maiteni ita nae Balak awarina ma God aiwai i riwei lamna ava ita kaei.

²¹ Ma ubaubanai Balaam i vomairi ana donki i vokaukauei ma Moab babadai maiteni i nae.

²² Wate God amlona i ñaigñai kaua da Balaam i nene, ma ana anela i paritawanei da ana etanai i mae-tomeni. Balaam donki i gerui ma ana taunola ruña maiteni i nene.

²³ Ma maranai donki BADA ana anela i 'nanai ana sodna au etanai i maimairi ma i tawana-ruie au ririva. Balaam donki i kwakwapui da ita opu me au etanai.

²⁴ Ma BADA ana anela etanai ñuriñuririna i mae-potai, Grape ñoroñorovai epaepana ruña ñaimei i garigaria au poui.

²⁵ Maranai donki BADA ana anela i 'nanai ma ita deḡa lamna Balaam aena au gari i viairaturatui. Ma Balaam donki i kwapu-melei.

²⁶ Ma BADA ana anela i nae ma etanai au ġuriġuririna i mairi, weka eḡa gabu ita mamaedadana da taui ita deḡa.

²⁷ Maranai donki anela i 'nanai, i mae-ḡaira da i kiala, Balaam amlona i ġaiġai kaua ma ana jiġonei donki i kwapui.

²⁸ Anina ma BADA donki gamona i votawanei da i babani i pa, "Aiwai apoapoena a kaeui awarim da mara tonuġa u kwapui?"

²⁹ Balaam donki i riwei i pa, "Tam u vikalokaloeu me bua! Awariu sod lamna marina ata viraġenim."

³⁰ Ma donki Balaam i riwei i pa, "Tau donkina tagogina marana patapatai u gerugeruiu bo? Wenanare a kauana dadanei awarim bo eḡa?"

Balaam i riwa, "Eḡa!"

³¹ Ma BADA Balaam matana i vikalai da ana anela i 'nanai ana sodna i maimairi au etanai. Ma i mae-ḡaira au doa ma i raudune.

³² Ma BADA ana anela i riwa i pa, "Aiwai aubaina am donki mara tonuġa u ravi? Ma nonori am vaġai lamna eḡa aiainā, Tau a nei da ata viġaem.

³³ —Mara tonuġa am donki i 'nanai ma mara tonuġai i deġeu. Mepa da eḡa, lamna tau ata viraġenim ma donki ata voterei."

³⁴ Ma Balaam BADA ana anela i riwei i pa, "A kauana-boai. Eḡa ata aramanei da tam au etanai u maimairi da uta viġaeiu. Marina mepa da u notai da eḡa ita ai au matam, tau ana nae me."

³⁵ BADA ana anela i riwa i pa, "Ravai maiteni ma nae, wate aiwai ana riwem lamna ava ma latoni." Anina ma Balaam, Balak ana babadai maiteni i nae.

23

Mara tonuġa Balak polo i apui Balaam ana god awarina da mai Israel ita ġaġalei. Wate marana patapatai Balaam eḡa mai Israel ita ġaġalei. Ma God aiainā ita kaeui mai Israel awarii lamna ava i babaniei. Balaam mara 4 God ana babani mai Israel awarii i babaniei. Wei lamna ana babani viruaina.

¹⁸ Ma Balaam wei riwana i riwei i pa,
"Balak, Zippor natuna ma vomairi;
ma Ma rautaniġana kaua.

¹⁹ God eḡa rava ota, Tauna eḡa ita morumoru.
Bo ana nota ita viravirai.

Tauna aiwai i babaniei,

nanare ina tupua

Aiwai i parivainuāġani;

nanare ina kaeui.

²⁰ I riweu da wei ravai ana viaiaini;
maranai God e viaiaina, tau eḡa tagotagogina da ana virai.

²¹ BADA ai God
taui maiteni e mamae, ma taui e vovoepaepai da Tauna ai gulau.

Tauna eḡa nuabola bo apoapoe ita neineiai Jacob ġoġoġana - mai Israel awari.

²² God taui Egyptei i tere-opunei,
Aubaii i viġavia me bulumakau moduei.

²³ Eḡa aiai Israel ina ġaġalei,
bo ina baravui.

Marina rava ina riwa,

'Ona inanai God aiwai i kaeui mai Israel aubai.'

²⁴ Mai Israel lamna me Lion vivirewapanana.

E vovomairi da ana ġavia e viviraġeni
ma tarana e umaumai,
Anina ma ina rauvirai da ina matave."

24

- Anina ma Balaam mara vi-four-na God riwana i babaniei, i pa:*
- ¹⁷ "God i viatataieu da rava muriae i nenei,
a inanai wate eġa laġilaġina ita nenei,
Jacob ana damei gulau ana jiġona
Ana borumana me ubona gamrina Israeliei e opuopu.
Moab muruai ma Seth natunatuna
anatapui kolai ina viaigwadagwadai.
- ¹⁸ Ana ġavia Edom ina vovaiubai
ma ai dobu ina vaia,
ma mai Israel ina virewapana guratana.
- ¹⁹ Gulau, Jacob ana damei ina nei
ma mai Moab mae-tereterei ai au melagai ina pupuni."

25

Mai Israel, Baal i raudunelei

- ¹ Maranai mai Israel au Shittim i mamae, nelara i vikarei da Moab waivinei i viawawanei.
- ² Wei waivine, nelara i riwei da i nei da ai god awarii puloi i apuapui.* Ma anatapui i am gogona ma ai godna i raudunelei.
- ³ Wei kauanei mai Israel Baal-Peor i voepaepai ma lamnei BADA ana meji i vikalai.
- ⁴ BADA Moses i riwei i pa, "Babadai anatapui ona vaia ma madeġai BADA au matana ona viraġena-naiei, da tau au meji awarimi ina dauva."
- ⁵ Ma Moses Israel babadai i riwei i pa, "Taumi tagotagogi ava ami au dam anatapui da Baal-Peor i raudunelei ona viraġeni."
- ⁶ Moses ma Israel patarana BADA ana numa gara au metaeta i toutou, ma au matai oroto Israeliei wavine Midianei i taravaina-ruiei ana au numa gara.
- ⁷ Maranai Aaron ġoġana pirisi wavana Phineas wei kauana i 'nananai, boru i voterei ma pawasi i lavui,
- ⁸ ma Israel iei i votaġoi da ana au numa gara ma pawasiei uporana i tonai da wavine au uporana i opu-vivira. Ma doriane apoapoena au Israel i kwa.
- ⁹ Wate wei gimna rava 24,000 i viraġeni.
- ¹⁰ BADA Moses i riwei i pa,
- ¹¹ "Aaron ġoġana pirisi Phineas au meji mai Israel awari i viubai; da tau eġa ata pupuni aubaina tauna ana nota me tau au nota, rava eġa god ġelaui ina voepaepaei anina Tau ava.
- ¹² Lamna aubaina tauna ma riwei da maiteni parivainuaġana bagibagina ana kauei da ata ruāga tana viturana vivira.
- ¹³ Tau aubaiu ina vipirisi nonoa."

27

God Joshua i vinei

* **25:2:** Wei kauai lamna god ġelauna i raraudunelei, ma lamnei Moab waivinei ai vitumaġana nanare i eraerawa. Maranai Israel nelarai wei waivinei maiteni i viviawawana, taui ai god Baal i raraudunelei ma i vovoagui da ai dobu ita viaiaini da ita maura.

¹⁸ *Muriai BADA Moses i riwei i pa, “Aruau Nun natuna - Joshua awarina, lamna aubaina ma taravaini ma uram au tepana ma terei da ma vovivirei au nola aubaina.

¹⁹ Ma naei Pirisi Eleasar awarina, Israel patarana anatapui au matai ma ma viaiaini da ina raviepaiem.

²⁰ Ma vovai-virewapani da Israel patarana tauna ina rautaniānei.

²¹ Tauna Pirisi Eleasar maiteni ina nola da ġaima e ġoreġorei urim, * awarinei au nota ina vaivaia. Wei taunei Eleasar, ma Joshua ina agui Israel ai au lawana.”

²² Ma BADA aiwai i ririwei, Moses nanare i kauei. Joshua i taravaini ma Pirisi Eleasar ma Israel patarana au naoi i vimairini.

²³ Ma urana au tepana i terei ma i vinei da ana raviepaia.

33

God mai Israel i egari da Canaan ina vaia

⁵⁰ Mai Israel Moab au wapuna, waira Jordan au ririvana i mamae ma, mai Jeriko au baba ġelauna. Ma BADA Moses i riwei,

⁵¹ “Wei riwai mai Israel ma riwei, ‘Maranai Jordan o damani da au Canaan,

⁵² Dobuna taumaenina anatapui ona viägägana-opunei. Ai gana da ai kokoitau anata-pui ona rika-viamoamoai.

⁵³ Dobu a veremi ona vaia, ġariemi da ona maeni.

⁵⁴ Doa ona ġutai dam damai awarii, au ġaima ina viatataiemi nanare. Doa vounaina dam vounaina ona verei ma dam voaburuna nanare ana ġuta voaburuna. Wate ġaimej ana pariveremi metauna damna, metauna doana ina vaia. Dam anatapui doa ina vaia.

⁵⁵ – ‘Wate mepa da nai dobuna taumaenina ega ona viägägana-opunei ma o vianinei da ina mae, taui lamna me vunavuna au matami bo donadona au ririvami maemaena, ma wei vita ġaegäena ina veremi wei au doana.

⁵⁶ Mepa da ravai ega ona viägägana-opunei. Lamna taumi ana pupunimi me a viogei da taui ana pupuni.”

35

Anigagalo melagaii

⁹ Ma BADA Moses i riwei i pa,

¹⁰ “Mai Israel ma riwei, ‘Maranai Waira Jordan o damani da au Canaan o rui,

¹¹ melagai ġelaui ona vinei da rava ai anigagalo. Maranai rava turana i vunu-boai da i ’raġe, taui weka ina ruba da ina gagaloei’

¹² Ona riwei, ‘Weka ma mae da raubiwa ravai ega ina vodadanim ma rauetara ma paini.”

* 27:18: Exo 24:13 * 27:21: Urim lamna ġaima aburuna. Ma nai ġaemana pirisi e viviatataiei da God ana nota i ririweta. Tauta ega tata aramanei 29-30 Exodus ma inanai.

Deuteronomy Tarawatu Viruaina

Pariverena

Moses wei au bukana mai Israel i pariverei menanare ina kauanei maranai au Canaan ina rui da ina vaia da ina vīgariei. Moses ēga maiteni au dobuna ina rui ma lamna aubaina i vitauririwei muriai da tauna ita irāge. I parivainotai menanare God taui Egyptei i taravaina-opuneiai ma au mutulua i 'nana-vaitetei. I riwana-melei menanare God ina voteletelana-kauei maranai i rui au Keinan.

Mai Greece ai ponei, wei bukana wavana* anona Tarawatu Viruaina, aubaina Moses marina mara viruaina God ana tarawatu mai Israel e vereverei. Wei lamna ēga tarawatu vouna bo tarawatu tapuna ma tagogina.

4

Moses mai Israel i egari da God ina voteletelei

¹ Ma Moses, Israel i riwei i pa, "Mai Israel Ona rautanīgana kaua! Au Tarawatu ma au viararamana anatapui ona votelatelana-kauei da ona lawana da BADA, noinoita ai God, dobu i vereveremi, ona vaia da ina vīgarimie."

² BADA ana tarawatu a ririwemi, ēga tarawatu āelaui au tepana ona viruini ma ēga ona vaitawanei. Anina ona voteletelei."

⁶ Tarawatui ona vojjina-kauei da dam āelaui ami nuaulaula ma ami aramana ina inanai. Ma tarawatu ina nonori ma ina riwa, "Riwa kaua da dam Israel lamna dam nuanuaulaulai ma araramani.

⁷ Ata BADA au ririvata ma e vovoaguita maranai ta raraupari awarina. Metauna damna āelaui, āēgæ bo muomuo, ai God nanare ai rava awarii e kaukauei.

⁸ Tarawatui aiaii ma jijimani anatapui amadodo a ririwemi, Ēga mepa dam āelauna aburuna bo āēgæna ana tarawatu jijimanina me wei."

³²⁻³⁴ Maranai BADA urana vivrewapananei Egypt ei i tereopunemi, tauna kaua babai ma virewapanai i kauei. Mai Egypt i vipupui aubaimi. Ma i vainimi da natunatuna, ma au ola Sinai o nonori awarimi i babani, ma o nonori ai menamena au orana ma awarimi i babani, ma lawalawaimi o mae! Wenanare wariāga i tupua dadana awarii bo ēga? Ēga! Ona nae me da au karena, maranai God oroto ma wavine i kauei da marina; ma dobu au giana da dobu āelaui au giana ona baiei. Kaua wenanare aniba i tupua-dadana bo ēga?

³⁹ Amadodo ona aramanei ma ēga melanai nuanuami ina vuru da BADA lamna God au mara ma au dobu. Ēga god āelauna ita mamae.

⁴⁰ Ana tarawatu amadodo a vereveremi anatapuna ona voteletelei. Da aiwai anatapuna ina ai taumi ma ami epaepaia au murimi ma ami mae ina manawa wei au dobuna BADA e verevere-nonoemi.

6

BADA ami God nuanuami ina vaia

⁴ * "Ona rautanīgana Oo Israel! BADA ata God, Tauna ava BADA.

⁵ * Nuanuami ina vaia orami anatapunei ma aruami anatapunei, ma ami rewapanan anatapunei.

⁶ * Wei tarawatuna amadodo a vereveremi ona vojjina-kauei.

* :: Deuteronomy ✝ 6:4: Mrk 12:29 ✝ 6:5: Mrk 12:30 ✝ 6:6: Deu 11:18-20

⁷ Natunatum i ona viararamani. Ona babaniei maranai o vivoruboru numa au orana bo o bababara-nae, bo muriai da ona matave bo o matave-vomairi."

7

BADA ana rava vinevinei mai Israel

¹ Ma Moses mai Israel i riwei, "Maranai BADA ami God i ruiemi dobuna i vereveremiana; Tauna au naomi ami āavia anatapui ina viāgāana-opunei: mai Hitti, mai Girkash, mai Amori, mai Canaan, mai Perisi, mai Hivi, ma mai Jebus. Dam seven āgāgei ma vivire-wapana kauai ega me taumi.

² Ma maranai BADA ami God taui au urami i terei ma o vovaiubai lamna taumi wei ravai ona pupuni. Ega maiteni aiwai babanina ona kaei; ma ega ona rau-nuapoapoelei.

³ Ega awarii ona tavine. Ega natunatum i guguinii bo laragai ona verei da ina ravaī.

⁴ Aubaina natunatum i na raveni da BADA ina voterei ma god āelaui ina raudunelei. Ma BADA ana amloāigai awarimi ina nei ma ina pupunimi.

⁵ Wenanare awari ona kaei. Ai pulo aniapuna ona viairikarikai ma ganai ona viaigwadagwadai; ma Asherah kokoitaui ona viaigaigai ma ai au menamenana ona apui.

⁶ [☆]Aubaina BADA taumi i vinemi ma i viaianimi Tauna aubaina. BADA rava maāgamaāgai au dobu ma taumi i vinemi da āgarinei.

⁷ —Ma BADA ega ita rauoāgarem ma ita vinem aubaina taumi dam patarana āgāena, ega me dam āelaui. Riwa kaua da taumi dam aburuoina au dobu.

⁸ Wate BADA nuanuami i vaia ma parivainuaāgana bagibagina noinoimi maiteni i kaei. Ma lamna aubaina urana virewapananei panipani au orana i vai-melemi, Pharaoh - mai Egypt ai gulau awarina.

⁹ [☆]Ona aramana-kauei da BADA ami God. Tauna ava God ma tauna God vipatutuna ma aiwai e ririwei e kaukauei. Taui da nuanuana e vaivaia ma ana babani e vovoteletelei, Tauna taui nuanuana e vaivai-kauei ma e viviaaina-kauei i parivainuaāgani nanare da kimta tausan.

¹⁰ Wate taumi da BADA o rauāigaei; Tauna ega ina volatelatemi ma ina pupunimi.

¹¹ Nanare taumi ona inana-kauei da tarawatu ma viararamana anatapui amadodo a vereveremi ona voteletelei."

8

BADA ami God ega nuanuami ina vuru

² Moses ana rava i riwei i pa, "Nuanuami ega ina vuru; menanare BADA ami God au mutulua i ravenimi da madeāgai 40 da volaāgota ota aramanei ma orami ana rewapani ita inanai. Ma ita aramanei ana tarawatu ona voteletelei bo ega.

³ Ee nanare! I viamiraāgenimi da o volaāgota ma mannei i viambagibagim. Amamami maiteni manna o vinuanainei; ega mepa ota amdadani. I kaei da ita viararamanimi da rava ega lam ava awarinei ita mamae, wate riwa anatapui BADA gamonei e opuopu.

¹² —Maranai o amam kaua, ma numa aiaii o maemaeni,

¹³ ma maranai ami bulumakau ma sipu borui e maāgamaāgā, ma e vivipurapura; ma e maumaura-kaua.

¹⁴ Ona inana-kaua da ega ona mae-āgāe, ma nuanuami ina vuru! Da BADA menanare Egypt ei panipani au dobuna i tere-opunemi.

¹⁵ I taravaina-naiemi au mutulua āgāena ma vi'nirovorovona mota āgāgaiawai ma tanara ai dobu. Dobu paipairana ma ega waira. Wate i kaei da kira i ravi ma waira i ruba-opu taumi aubaimi.

16 Au mutulua *manna* i veremi da o am; amamami nai lamna ega ita am-dadani. Wei lamnei i raudadanimi da ota volagota; da au damona ami lawana ita ai.

17 Ona inana-kaua da ega au nuanuami ona riwa, ‘Tauai ai rewapanei ma ai egolei a vipurapura ma a maura.’

18 Wate BADA am God ega nuanuami ina vuru aubaina tauna tepanei ta maumaura, ma lamnei parivainuaiana bagibagina noinoimi maiteni i kaukauei e rarauano.”

11

God aiwai i kaukaueia ona notai

18 [☆]Moses mai Israel i riwei, “BADA riwana ega nuanuami ina vurvuru ma ae-tuguna ona reregi. Ona girumi da au urami ona ragini ma gelaui au muruami ona ragini ami mataira.

19 Natunatumi ona viararamani, ona babaniei: ami au viboruboru bo maranai o bababara bo o vivilauvitau ma maranai o vovobagibagi.

26 —Ona inana! Au naomi viaiaina ma kovoaga a tereterei, ma tam am goana.

27 Marina BADA ami God ana tarawatu a vereverem. Mepa da Ona votagotaigoi; tauna ina viaiainimi.

28 Mepa da ana tarawatu ona geduaiei ma ona mae-taviremi ma god gelaui ona viborumei; BADA ina kovoigimi.

32 Lamna aubaina tarawatu ma viararamana a vereverem, ona kauana-kauei da ona voteletelei.”

17

Gulau vinena

14 [☆]“Maranai BADA ami God dobu e vereveremia o ruiruiana, ma o vaia, ma numa o voanaiei da o maeni. Ma ona riwa, ‘Dam gelaui ai gulau e mamae ma tauta menanare?’

15 Ona inana-kauei da BADA ami dam nununai awariei ami gulau ina vinevinei, ma ega dobu gela ravai ona vinei.

16 Ma tauna ega ana horse magamaigai ina gamoi. Ma ega rava ina paritawanei au Egypt da horse ina gimarai. Aubaina BADA i riwa da natunatuna ega melanai ina naeme kampa.

17 [☆]Ma gulau ega awawana ina maga, ma ega gold ma silver ina maurei da nuapouna ina vinua-ragaraigai.

18 Ma maranai i vigulau, tauna pirisi Levi ana damei maiteni ina kiala da nimanei tarawatu bukana ina giruma tauna aubaina.

19 Wei bukana au ririvana ina mae ma ina iava-nonoei ma lamnei BADA ina vivrei ma ana tarawatu ina vipatutuei.

20 Ma lamnei ega ina terepa-melei ma ana rava ina inana-gairei bo ega tarawatu ina mae-puputei ma ina dega au kelakelauna bo au oiena. Ma tauna ma ana epaepaia ina mae gulau au Israel da kimta magamaigai ina kwa.”

18

BADA wei kauai i geduaina-kauei

9 Maranai BADA dobu i vereveremiana o ruirui, ega dobuna taumaeni ai kaua apoapoe ma vinimalamai ona govaivaitei.

10 [☆]Ega melanai:

aiai tam natum orotona bo wavinena ma verenei da pulo aubaina ina apui;

bo ma vimata gamgam, mataira aiwai ma inainanai ma muriai aiwai ina tupua, rava
 ma ririwei;
 bo ma parauma;
 bo ma ġagala;
 bo ma vigwerigweri;

- ¹¹ ma eġa konāga bo arua maiteni ma babani bo arua ma ġorei da ina rui awarim.
¹² BADA taui da wei kauai apoapoe e kaukauei, i geduaina-kauei. Ma lamna aubaina aburuna ava Tauna rava wei dobuna maemaei ina viāgħana-opunei au naomi.
¹³ Marana patapatana BADA ami God ona voteletelei.
¹⁴ Wei ravai barabaravui ma paraparaumai. Wate aburuna ava da ai doa anatapuna ona kwalei. Ma BADA ami God e viviġaemi da wei ravai eġa ai kaua ona ġoavaivaitei.

God Peroveta me Moses ina paritawaneiai

¹⁵ [✧]BADA ami God, Peroveta me tau ami damei ina paritawaneiai. Taumi nai ravana ona rautaniganei.

¹⁶ Aubaina taumi wei lamna o vivibaġei maranai o vitagogiemi ola Horeb au karena ma o riwa, “Eġa BADA ponana tana nonori bo ai ġaegħena menamenana tana inana-melei da tana vi'rāgera ġelana.”

¹⁷ BADA i riweu, “Ai vibaġa i ai.

¹⁸ Tau ai damei peroveta ana terepai me tam nanare, Ma riwau au gamona ana terei, da aubai ina vitau-vibabani.

¹⁹ [✧]Tauna wavauei ina jima, ma pariviravirai ana kovoġi.

²⁰ Wate maranai peroveta i mae-ġaegħae ma e ririwa da wavauei e jimajima wate tau eġa babani ata verei, bo god ġelauai aubai e nolanola, Nai perovetana ona viraġeni.

²¹ Mepa da o vinuanaina, ‘Menanare tana aramanei da lamna eġa BADA ita babani?’

²² Wenanare ona aramanei. Maranai peroveta i babani BADA au wavanei ma anona eġa ita tupua lamna nai babanina tauna ana babani ma eġa BADA. Lamna tauna ana vinuanotanota, nai ravana eġa ona rovoe!”

31

Joshua Moses i raviepaiai

⁷ Ma Moses Joshua i kwatuei da i nei. Ma Israel patarai au matai i riwei i pa, “Ma virewapana ma tepam ina tora. Tam wei patarai ma ruiei dobū BADA noinoim i verevereiana. Dobuna ma ġutai da Israel dam ma patai ma ma voagui da ina viġariei.

⁸ [✧]BADA Tauoina awarim ina mae ma am etanai ina raveni. Eġa melanai ina netawanem bo ina voterem. Lamna aubaina eġa ma rovo bo oram ina peu!”

34

Moses i 'raġe

¹ Ma Moses Moab wapuna i netawanei ma ola Nebo i ġaeni da au tepea dewadewana e ġoreġorei Pisgah, ma au navanava ġelauna lamna Jeriko. Weka au Pisgah BADA Moses dobū anatapuna i viatataiei, au Gilead i vikarei da i ġae au Dan.

² Ma dobū Naphtali, dobū Ephraim ma dobū Manasseh, dobū Judah, ma i nae da au Mediteranean bogana.

³ Ma BADA Moses mutulua e ġoreġorei Negev i viatataiei; ma Jordan gaubana da i nae da au Jeriko da i nae da au uama Zoar melagħaina.

⁴ [✧]Ma BADA i riwa, “Wei dobuna lamna Abraham, Isaac ma Jacob a parivainuāġani da

[✧] **18:15:** Act 3:22; 7:37 [✧] **18:19:** Act 3:23 [✧] **31:8:** Jos 1:5 [✧] **34:4:** Gen 12:7; Gen 26:3; Gen 28:13

'ami epaepaipaia ana verei.' A voterem da dobu matamei u inanai, wate au dobuna ega ma rui."

⁵⁻⁹ Muriai Moses urana Joshua, Nun natuna au kolana i terei ma i viaiaini ma nuaulaula orana i ruini. Ma lamna aubaina mai Israel Joshua i voteletelei Moses i ririweia nanare. Ma BADA ana taunola Moses, i 'rage mai Moab ai au dobu, BADA i ririwei nanare.

Joshua

Pariverena

Wei bukana e ririweta da menanare mai Israel i rui au Canaan da rava kampa maemaei i vovaiubai. Ma nanare e ririweta da mai Israel menanare dobu i ġutanei ai dam 12 awari. Wei bukanawavana Joshua aubaina bukana au karena e ririweta da aiwai aubaina da Joshua i terei da mai Israel ai bada, maranai Moses i 'raġe.

BADA, Joshua i vinei

¹ Maranai BADA ana taunola Moses i 'raġe; ma Joshua, Nun natuna ma Moses ana tauagu i riwei,

² "Au taunola Moses i 'raġe. Marina mai Israel maiteni ona vokaukaua ma Jordan ona damani da dobu a vereveremiana kampa ona ġeta.

³ Metaui dobui ae-lapalapami o terei, lamna ina viġarimiei, Moses wenanare a parivainuaġani.

⁴ Ami dobu lamna mutulua Negev da Lebanon; au waira Euphrates (au maramatanei) da mai Hitti ai dobu anatapuna da i ġaira madęga e arearere lana Mediteranean au bogana.

⁵ ♦Eġa aiai ina vobelem bo ina viubaim am au lawana. Tau awarim ana mae, me Moses awarina a kaukauei nanare. Tau eġa melanai ana tere-ġairem bo ana voterem.

⁶ ♦—Parivainuaġana bagibagina a kuaeい wei ravai noinooi maiteni da wei dobuna ana verei. Lamna aubaina ma virewapana ma tepam ina tora ma am rava ma ruiei wei au dobuna.

⁷ Anina ma virewapana ma tepam ina tora; ma nuanuam eġa ina vuru da tarawatu Moses i verem, anatapuna ma voteletelei. Ma ma vojjina-kauei da awarina eġa ma deġa au oiem bo au kelakelaum da aiwai anatapuna e kaukauei ina ai.

⁸ Marana patapatai wei tarawatuna ma iaiavi. Ma marai da waguvvarai ma vinu-notenotei; wei lamnei tarawatu anatapuna ma aramanei. Mepa da wenanare ma kuaeī lamna tam ma maura ma nuaiai ġaeġaena ma nelaġai kaua au anatapuna."

5

Raġona naona au Canaan

¹⁰ ♦Mai Israel au Gilgal i mae Jeriko au wapuna. Ma Aupom vi-14-na aubigai nawaravi naona taui raġona torelana i apui.

¹¹⁻¹² ♦Ma ubaubanai ġelauna, raġona au murina, taui witi au wapu i tuarui ma palawa dabababai i apui ma i am. Ma ubaubanai ġelauna Manna raua i voterei, taui wei lamna eġa ita am-melei, ma ai lam wapuei i tuarui. Mai Israel eġa manna ita am-melei, lam ai au doa au dobu Canaan i vaia da i amam.

24

Muriai Joshua ma mai Israel mai Canaan maiteni i viġaiġaiawa, dobu au giana da au giana. Ma dobuna ravai i viraqeni, wate ġelaui eġa ita viraqeni ma maiteni i mae. Muriai Joshua dobu i ġutai Israel ana dam twelve awari. Taui i næma ai doa i maeni melagai nonoana mai Canaan i voavoaoia. Madeġa maġamaġaui i kwa ma Joshua mai Israel i vitagogiana-melei.

♦ **1:5:** Deu 31:6, 8 ♦ **1:6:** Deu 31:6-7, 23 ♦ **5:10:** Exo 12:1-13 ♦ **5:11-12:** Exo 16:35

Mai Israel i riwa da BADA ina vitaunolei

¹ Muriai Joshua dam anatapui i ġorei da au Shekem ita vitagogiei. Maranai kampa i ġeta Joshua, dogadogara, dam babadai ma melagai babadai i ġoreiai da ita nae BADA au naona ita mairi.

² Joshua rava anatapui i riwei i pa, “BADA mai Israel ai God e ririwa, ‘Wariaġa noimi Terah ma natunatuna Abraham ma Nahor waira Euphrates au baba ġelauna i mae, ma god maġamaġaui i raraudunelei.

³ [◊]Wate noimi Abraham nai dobunei a vaitawanei ma i naiei da Canaan doana ana tapuna a viatataiei, ma ana epaepaia a vimaġai. Ma natuna Isaac a verei.

¹³ —‘Tau dobu a veremi ana debagauna ma ana peipeina, doana eġa ota nolei ma taon gaeġiae i vereoimi, marina o maemaeni, eġa ota voai, ma grape ma olive o amam wate eġa, taumi ota paewi.’

¹⁴ —Lamna aubaina BADA ona voteletelei ma orami taputapunei ona vipatutu. Noinoimi god morumorui kokoitau, i raraudunelei au Egypt bo au waira Euphrates ona kwajiei au modu ma BADA ainelana ona viborumei.

¹⁵ Wate mepa da BADA viborumeina o geduaiei, lamna amadodo ona vine da noinoimi ai god waira Euphrates au baba ġelauna bo marina ravai ai au dobu o mamae mai Amori ai god ona nolei. Wate tau au numa ravai maiteni BADA ana viborumei.”

¹⁶ Ma rava i paribelei, “Tauai eġa melanai ai BADA ana voterei ma god ġelauj ana viborumei.

¹⁷ BADA ata God tauoina au Egypt i tere-opuneta noinoita maiteni maranai au Egypt ta vilaraga. Ma kaua vivirewapanai ma aniba i kauei au mataiai. Ma ai au vaġai manamanaina i painiai dam ġelauj au poui da wei au paratana.

¹⁸ Mai Amori ma dam ġelauj wei au dobuna i mamae wate BADA aubaiai ravai i viaġaġana-opunei. Lamna aubaina tauai BADA ana borumei, aubaina tauna ainelana ata God.”

Judges Taurauetara

Pariverena

Wei au bukana Joshua ana irāge marana ma i nae da Samuel ana tupua marana e ririweta.

Vinevinena

Joshua au murina aiwai i tupua (Jdg 2:7-19).

2

Joshua au murina

⁷ Mai Israel BADA i viborumei maranai Joshua lawalawaina i mamae ma i 'rađe ma kimitana magumagurii biađa i mamae i 'rađe-pai, wei ravai BADA kaua ġaegae i kauei i vimateatei.

⁸ Nun natuna - Joshua BADA ana taunola ana madeđa 110 ma i 'rađe.

⁹ Ma doa i verevereia au Timnat Herek i doboi, Ephraim au olana, wei lamna Ola Gaash ana au laubadei.

¹⁰ Anina ma wei kimitana i nepai amamai awarii ma kimta ġelauna ai gabu i vaia. Wate taui BADA eđa ita aramanei ma nanare aiwai i kauei mai Israel aubai.

¹¹ Ma kaua apoapoei i kauei BADA awarina ma Baal kokoitaui i raudunelei.

¹² Taui BADA amamai ai God i votere-tawanei; Wei Godna taui Egyptei i taravaina-opunei.

Ma i nae ma dobuđela ravai au ririvai maemaei ai god i viborumei. Wei kauana BADA i viamlo-ğaiğaini.

¹³ Taui BADA i voterei ma Baal ma awana Ashtoreth kokoitaui i viborumei.

¹⁴ Ma BADA amlona i ğaiğai kaua mai Israel awari, da i veredamanei ai ğavia awari ma taui ai purapura i tama-naiei. Ma i voterei ai ğaviai mağamağau i ririvai awari, ma taui eđa tagotagogina da ita vobelei.

¹⁵ BADA mai Israel i viğavie i maranai i opuopu viğavia aubaina. Lamna aubaina eđa ita vovaiuba BADA i ririwei nanare. Ma taui i yinuabola kaua.

¹⁶ Anina ma BADA taurauetara bo ğavia babadai i terepai, da i voagui da ai ğavia i vovaiubai.

¹⁷ Wate taui ai taurauetara i parivirevirei ma god ġelaui i erawai ma i raudunelei. Taui lağilägina amamai i bababara lana i voterei ma BADA i rau-ağaiğaei.

¹⁸ BADA mai Israel ai tou i nonori menanare ai ğavia taui i rau-iviapoapoelei. BADA taurauetara i terei ma i voagui ma i gagaloei. Maranai taurauetara i mae, BADA mai Israel i raunuapoapolei.

¹⁹ Wate maranai taurauetara i 'rađe, rava, BADA i mae-puputei ma i apoapoe kaua eđa me amamai nanare ma god ġelaui i vitaunolei ma i raudunelei. Taui i geduai kaua da ai kauai apoapoei ma ai ora pota ita voterei.

Mai Israel kaua apoapoei i kaukauei lamna ai parivainuağana bagibagina BADA maiteni i kaukauei i viviaigai. BADA amlona i ğaiğai ma ana nota i terei da mai Israel ita raudadani da ita voagui da dobuđela ravai ita viağagana-opunei. Dobuđela ravai mai Israel i raudadani da taui BADA ina votağotağoi bo eđa me amamai i kauei nanare.

1 Samuel

Samuel ana buka tagogi

Pariverena

Buka 4 ma Samuel ana buka i vinao da Israel ma Judah ai vigulau riwana i parivereta, Samuel tauna wavana naenaena wei bukana tagogi au orana. Tauna mai Israel ai *taurauetara* damona. Tauna, Saul ma David au kolai monamona i waġi da i vigulau, lamna aubaina wei bukana i viwavai Samuel. Wei bukana mai Israel ai kaua e bababaniei i nae da Saul ana au iraġe.

Vinevinei

Samuel ana tupua (1; 2:1-11; 3:1-21)

Mai Israel gulau i vibaġei (8:1-22a)

Samuel Saul i buloi (9:1-3, 15-16, 10:1-2, 5-24)

Saul i vivibada (11:14-15; 13:13-14; 15:1-4)

BADA Saul i geduaiei (15:7-23, 27-29, 34-35)

Samuel David i buloi (16:1-7)

Saul David i unurei (18:7-9)

David Saul i ruba-tawanei (21:1-6)

Saul ana iraġe (31:1-5)

Samuel i tupua

¹ Orotu tagogi wavana Elkanah, ana dam Ephraim ma ana melaġai Ramah, Ephraim au olana i mae. Elkanah amana Jeroham, ġogħana Elihu ma noina Tohu, ma ai bariawa Zuph, ai dam Ephraim.

² Tauna awawana ruaġa Hannah ma Peninah. Peninah i vinatuna ma Hannah aipoi.

³ Madegħana patapatana Elkanah Ramah i netawanei ma i nae au Shiloh da BADA VIVIREWAPANA KAUKAUANA ita voepaepai ma pulo ita apui awarina. Weka Eli natunatuna Hophni ma Phineas BADA ana pirisi pulo tauapui i mae.

⁴ Maranai Elkanah pulo i apuapui ma sia sikasikana i ġutai da awana Peninah ma natunatuna i patai.

⁵ Wate awana Hannah sia vinevinena i verei aubaina awana nuanuana i vai-kauei avena da BADA i kauei da tauna aipoi.

⁶ BADA Hannah manawana i gudu ma lamna aubaina turana i vivinamei ma i vivijibog-anonoei da ita vinuabolai.

⁷ Wei kauana i mae madegħana patapatana. Maranai Hannah i nae BADA ana au numa, Peninah tauna i vivinuabolai ma i vitoutouni da eġa ita amam.

⁸ Maranai Elkanah awana Hannah i paripari-dadanei, “Hannah aiwai e toutouei? Aiwai aubaina eġa uta amam? Aiwai aubaina e vivinuabola, natunatum eġa lamna e vivinuabolei bo? Tau weka! Natunatum nelarai 10 epaiai!”

⁹⁻¹⁰ Mara tagogi maranai taui i am vorovei BADA ana au numa au Shiloh, Hannah orana i viara kaua ma ana toutouna BADA awarina i raupari. Pirisi Eli kampa ana au gabu tempol au metaetana i kiakiala.

¹¹ Ma i parivainuġana i pa, “Oo BADA VIVIREWAPANA KAUKAUAM. Ma inanai am taunola au ora-tou uta inanai! Ma uta notaiu ma eġa nuanuam ina vuru. Mepa da natu orotona uta vereu lamna teverana ana veremelem da ina vilaragħem ana au lawana au anatapuna, ma aparana eġa ina borid-dadanei.”

¹² Ma i raraupari BADA awarina ma Eli tauna ipirina i 'nainanai.

¹³ Hannah au nuanuana i raraupari ma ipirina ava i vidagħidagu wate eġa babani ita opuopu. Ma Eli i notai da tauna i uma-bua,

¹⁴ ma awarina i riwa, "Ina baem bo, uma bua ma voterei!"

¹⁵ Wate Hannah i paribelei, "Ega nanare au bada tau ega waira bagibagina ata umai, tau au nuabola i rata kaua ma lamna aubaina a toutou BADA awarina.

¹⁶ Wenanare a raraupari aubaina nuanuau i bola-kauei ma ega ma notai da tau wavine apoapoeu."

¹⁷ Eli i paribelei, "Ana nuaubam ma nae! Ma BADA Israel ana God am vibaiga ina kuae."

¹⁸ Tauna i paribelei, "Au bada egualau kaua ma ega ma nota-boaiu." Ma i nae ma i am da orana i uba.

¹⁹ Ma ubaubanai boibogi Elkanah ana numa ravai i vomairi ma i nae da BADA i raudunelei ma i gaira me au Ramah. Elkanah awana Hannah maiteni i matave ma BADA wavine ana pari i paribelei.

²⁰ Hannah i duama ma natuna orotona i guni ma wavana i gorei Samuel ma i riwa, "Wei lamna aubaina BADA a vibaigai.*"

Samuel i puloei BADA awarina

²¹ Ma madega gelauna i getai ma Elkanah ana numa ravai maiteni i gae au Shiloh da pulo ita apui BADA awarina ma pulo gelauna BADA i parivainuaGANI ita kuae.

²² Hannah ega maiteni ita nae ma awana i riwei, "Maranai tevera ina eda ma ana gaiei BADA ana au numa ma kampa ina mae-nonoa."

²³ Elkanah i paribelei, "Ee nanare aiwai e notanotai da i ai ma kuae, ma weka ma mae da tevera ina eda. Ma BADA ina voaguim da am parivainuaGANI anona ina tupua." Ma wavine au numa i mae da natuna i eda.

²⁴ Maranai tevera i viedai ma alona i naiei au Shiloh, bulumakau orotona ana madega tonuga, palawa baikena tagogi ma wine wagina gaegea maiteni. Avena da tevera melamelana ma alona i naiei da Eli au urana i terei.

²⁵ Ma burumakauna i apui God awarina ma tevera i naiei Eli awarina.

²⁶ Ma Hannah i riwa, "Oo BADA e notanotai rorova tau weka a raraupari BADA awarina.

²⁷ BADA a vibaigai wei teverana aubaina ma a vivibaigei i vereu.

²⁸ Lamna aubaina marina natu a vereverei BADA awarina. Ana lawana anatapuna BADA ina verei." Ma kampa taui BADA i voepaepai.

2

Hannah ana voepaepa

¹ Ma Hannah i raupari BADA awarina i pa,

Tau a vinuaiai kaua BADA awarina;

Tauna rewapana i vereu.

A vinuaiai aubaina Tam u vilawaniu
ma lamna aubaina au gavia a vivinamei.

² Oo BADA ega aiai gelauna vivivireina me tam;

ega mepa god gelauai anina tam ava;

ega taugagalo gelauna me tam, ai God.

³ Tau a ririwa, "Vogulagulau ma pari-gulagulau ona voterei;

Mae-gaegea babanina ona voterei.

Aubaina BADA ami kaua anatapui e araramanei
ma ina kovoġimi."

⁴ BADA Tam sorodia vivrewapanai ai pidu u viaigaigai;

wate vovokokarai u vovai-virewapani

⁵ Amam iauai marina ina nola da ina am;

* ^{1:20:} *Samuel* ponā Hebrewi nonorana me God awarina agu i vibaigei.

am-irairāgei ēga am ina irāge.
 Wavine aipoina roaroa 7 i ġuni;
 wate roaroa maġamaġau aloi i netawanei ma tauna ava e mamae.
⁶ BADA, irāge ma lawana e neineiai;
 Tauna rava au kokoaga e teretere-ġairei ma e vovovai-mairini.
⁷ BADA rava ġelaui e vivimaurai ma ġelaui e vivigomari;
 ma ġelaui e teretere-ġairei ma ġelaui e teretere-ġaiei.
⁸ Tam rava molamolakai pokau au orana e sinasina-epai;
 ma rava vigigimanai logilogi au orana e sinasina-epai; da gulagulau maiteni e kiakiala
 ma vigulau taui ina viġariei.

Dobu anatapuna tam ġarimei;
 ma aiwai anatapuna ana au animae u terei
⁹ Tam am rava patupatutui e gagagaloei;
 ma apoapoe taukauei e amoamo aui irāge
 Rava ēga ai rewapani ita vovaiuba;
¹⁰ Tam am ġavia ma pupuni;
 am meji ina viarapawa me waiparara
 BADA tam dobu ma rauetarei
 ma am gulau ma vovai-virewapani,
 ma am vinevine bulobulona ina virewapani kaua.

¹¹ Elkanah natuna Samuel i voterei ma i nae me ana au melagau au Ramah. Samuel pirisi Eli au urana i mae au Shiloh ma BADA aubaina i vitaunola.

Maranai Samuel i rarata tauna au numa gara i vovoagu da God ana nola i kaukauei. God ma rava Samuel ana nola i ġoana-kauei. Eli natunatuna ruāga pulo tauapui, pirisi apoapoei. Maranai rava i nei da ai ġoa apoapoe aubaina pulo i apui BADA awarina, taui wei siai vovivirana i voviviri da i amam. Ma lamna aubaina Bada peroveta i paritawanei da Eli i riwei da tauna natunatuna ēga ita vinua-terenei aubaina ġo'apoapoe i kaukauei, ma natunatuna ina viṛaġena ruāgei. Wei au murina Eli ana epaepaia laragai ma anatapui ina irāge-pai.

3

BADA Samuel i ġorei

¹ Wei au marai BADA ēga rava awari ita bababani bo ai au rauboni bo ai au inana ita vivieġana-melei, mara tagotagogi ava wei i tuputupua. Tevera Samuel Eli i voagui ma BADA awarina i vitaunola.

² Eli matana i apoapoe kaua ma ēga ita inainana kaua. Ma waguvvara tagogi ana au gabu i matamatave.

³ Ma Samuel BADA ana au numa i matamatave Parivainuāġana bokisina au ririvana ma God ana rampa au Gabu vivivireina i ararata.

⁴ Ma BADA Samuel i ġorei, “Samuel!”

Ma Samuel i paribelei i pa, “Ee tau weka!”

⁵ Ma i vomairi ma i ruba Eli awarina ma i riwa, “U ġoreu da a nei.”

Eli i riwa, “Ēga ata ġorem, ma nae me da ma matave.”

⁶ Ma BADA i viġore me, “Samuel!”

Samuel i vomairi me ma i ruba Eli awarina ma i riwa, “U ġoreu da a nei.”

Eli i riwa, “Natu tau ēga ata ġorem ma nae me da ma matave.”

⁷ BADA ēga Samuel awarina ita babani dadana lamna aubaina ponana ēga ita aramanei.

⁸ Anina ma mara vitonuina BADA i viġore ma Samuel i vomairi ma i nae Eli awarina ma i riwei, “U ġoreiu da a nei.”

Anina ma Eli i aramanei da lamna BADA tevera i ġoreġorei.

⁹ Ma Samuel i riwei, “Ma nae me da ma matave. Mepa da ina viñore me lamna wenanare ma riwei, ‘BADA ma babani, am taunola a rarautaniñana.’”

Anina ma Samuel i nae me da i matave.

¹⁰ Ma BADA i nei ma i mairi ma i viñore me au naona i kaukaueia nanare, “Samuel, Samuel!”

Samuel i paribelei i pa, “Ma babani am taunola a rarautaniñana.”

¹¹ Ma BADA Samuel i riwei, “Tau kaua vivi-inirovorovo kaukauana ana kauei mai Israel awarii ma maranai rava riwana ina nonori taui orai ina sisi.

¹² Rorova a riwa nanare, Eli ana numa ravai maiteni ana kovoñgi.

¹³ A riwana-guratei da ana numa ravai ana kovoñga-nonoei aubaina natunatuna i vijibogiu ma i vinimalamalaiu ma tauna natunatuna i vibae-naenaelei.

¹⁴ Riwa bagibaginei a ririwa da Eli ana numa ravai ai ñgo’apoapoe ega melanai ana notawanei. Avena da pulo ina apui awariu.”

¹⁵ Samuel ana au aravi i mae da mara i tom ma BADA ana numagara metaetai i votawatawanei. BADA aiwai Samuel i riwei tauna i rovo da Eli ita pariverei.

¹⁶ Wate Eli Samuel i ñgorei i pa, “Samuel natu.”

Ma i paribelei i pa, “Tau weka.”

¹⁷ Eli i paridadana, “BADA aiwai i riwem? Anatapuna ma riwei ma ega lamna BADA ina kovoñga-guratem!”

¹⁸ Anina ma Samuel anatapuna i riwei, ega aiwai ita tajijini. Ma Eli i riwa, “Tauna BADA, ma aiwai awarina i jijimana ina kauei.”

¹⁹ BADA Samuel i mae-ratui maranai i rarata ma Samuel aiwai i ririweia ma nanare i tuputupua.

²⁰ Ma Israel au giana da au giana, au Dan i vikarei da au Beersheba, anatapui i aramanei da Samuel lamna BADA ana peroveta.

²¹ Mara i maña BADA au Shiloh Samuel awarina i ega ma i babani.

8

Mai Israel Gulau i vibañei

¹⁻² Samuel natunatuna ruaña, natuevou wavana Joel ma umauna Abijah. Maranai Samuel i magura ma natunatuna i vinei taurauetara au Israel ma i terei da au Beersheba i nola.

³ Wate taui ega amai ana kaua ita vaia ma ai nuavaina mane ma lamna aubaina manelei i gwalai ma rauetara i vibarai.

⁴ Ma lamna aubaina Israel babadai i riei Samuel awarina au Ramah.

⁵ [◊]Ma i riwei, “Ma rautaniñana bada! Tam u magura ma natunatum ega am kaua ita ñgovaivaitei. Ma lamna aubaina tauai a ñgoei da gulau ma verelai da ina raveniae, me dobu ñgelaui ravai e kaukauei nanare.”

⁶ Wate maranai wenanare i riwa Samuel ega ita vinuiai dadana, ma i raupari BADA awarina.

⁷ BADA i paribelei i pa, “Aiwai anatapuna ravai e ririwem ma kauei, taui ega tam ita geduaiem wate Tau ai gulau i geduaieu.

⁸ Maranai Egyptei a teretere-opunei da wei paratana, taui marana patapatana i mae-puputeu ma god ñgelaui i raraudunelei; marina nanare tam awarim e kaukauei.

⁹ Ai ñgoana ma verei wate riwa bagibaginei ma riwei menanare gulau ina kauanei taui awari.”

¹⁰ Samuel BADA ana babani anatapuna taui gulau i vivibañei i riwei

¹¹ i pa, “Maranai gulau ina vibademi lamna awarimi wenanare ina kaei. Tauna natunatum i na tama-naiei sorodia da ana chariot ma ana horse ina gerui ma ġelaui ana chariot au naona ina ruba.

¹² Ĝelaui sorodia 1,000 ma ġelaui 50 ina vibadei. Ĝelaui ana wapu ina ipiei ma ana lam ina tuarui. Ĝelaui ġavia apiae iramei ma chariot iramai ina kaukauei.

¹³ Gulau, natunatum guguinii ina egari da ana monamona ġabuġabui ina kaukauei ma ġelaui ana palawa ina apuapui ma ana taulauvoa.

¹⁴ Am wapu ma grape wapui ma nanare olive wapui aiaii avavai ina vaia da ana gabemani babadai ina verei.

¹⁵ Ma maranai ami witi ma grape ma olive o tuarui ma ġuta 10 ona terei ma tauna ġuta tagogi ina vaia ma ana gabemani babadai ina ġutei.

¹⁶ Ami laraga nelarai ma guguini ma am bulumakau ma donkey vinevinei ina vaia tauna aubaina.

¹⁷ Ma ami sипу ma gote ġuta 10 o terei ma tauna ġuta tagogi ina vaia tauna aubaina, ma taumi ina vainimi ana taunola.

¹⁸ Maranai wei kauai i tupua ma ona tou guratana BADA awarina da gulau taumi o tereterei awarimi ina vaitawanei, wate BADA eġa ina voaguimi.”

¹⁹ Wate rava Samuel ana babani bagibagina eġa ita rautaniġanei. Taui i riwa, “Tauai anatapuiai a ġoei da gulau ina vibadelai,

²⁰ da tauai me dobu ġelaui ravai nanare ma ai gulau ina raveniae ma ana opu viġavia aubaina.”

²¹ Anina ma Samuel BADA i riwei aiwai ravai i ririweia

²² ma BADA i paribelei i pa, “Ai ġoana ma kaei, gulau ma verei.”

Ma Samuel ravai i paritawanei ai au numa.

9

Samuel, Saul i buloi gulau

¹ Benjamin ana au dam rava tagogi wavana naenaena ma manemanena i mae wavana Kish. Tauna amana Abiel, ġoġana Zeror ma noina Bekorath ma ai magura Aphiah, Benjamin ana damei.

² Kish natuna Saul i tupua kaua ma laraga inanana aiaina eġa me laraga ġelaui au Israel, ma tevera ae manawa.

³ Maratagogi Kish ana donkey i kwako ma natuna Saul i riwei, “Am taunola ma taravaini ma ona nae donkey ona baiei!”

Saul ma ana taunola donkina i baiana-guratei wate eġa ita nelaġai ma i nae da peroveta Samuel ita raugenari da ita vibaġai da mepa donkey ita baiei.

¹⁵ Ma maratomna da Saul ana taunola maiteni ita ġeta Samuel awarina, BADA Samuel i riwei,

¹⁶ “Wenanare marana au maratom oroto laragana Benjamin ana damei ana paritawanei. Olive monamonanei kolana ma buloi da ina vimataira da tauna a tereriei da au rava Israel ina vibadei. Tauna mai Israel ina voagui da mai Philistia ina vovaiubai. Au rava mai Israel a inanai i vinuapoapoe ma ai tou awariu agu aubaina a nonori.”

10

¹ Ma Samuel olive monamonana wagħi i vaia ma monamona i waġi Saul au kolana. Ma i vigia-laġolagħonei ma i riwei, “Wei a kaukauei aubaina BADA i terem ana rava vinulaulaunai Israel ma vibadei.

² Amadodo rava ruāġa ma nebelei Rachel ana kokoaga au ririvana au Zelsah, Benjamin ana au dobu. Taui ina riwem, ‘Donkina o baibaei i nelaġai. Ma marina amam eġa donkey ita baibaei wate tam e vivinuabolem, e paripari-dadana, Menanare natu ana nelaġanei.’

⁵ —Ma ona nae God ana au Gibeah ola aburuna, weka mai Philistia ai sorodia i raugaravu. Ma ona ruirui au taon ma Peroveta borui olei ina ġaiġairai. Taui gitar* ma harp, tambourine ma duraio ina vikalokaloei ma BADA ana babani ina garagararei.

⁶ BADA Aruana Vivivireina ana rewapanana oram ina naeni da ina vibadem, ma taui maiteni BADA ana babani ona jimei. Ma oram ina ravivouni da tam me rava ġela.

⁷ Maranai wei kauai i tupua, aiwai BADA e viviatataiem ma kaei.”

⁸ Samuel i riwa, “Tam ma vinao au Gilgal, ma kampa ana nebelem da ġamoġamo ana vunui ma taputapuna ana apui ma ġamoġamo ġelaui ana apui viturana pulona. Wate kampa ma vipaipai aupom 7 da ana ġetai ma riwa ġelaui ana riwei.”

Saul i terei gulau

⁹ Ma Saul i mae-tavirei da i nenea ma God ana nota i ruini ma orana i ravivouni. Wei marana aiwai anatapuna Samuel i ririwei i tupua.

¹⁰ Maranai Saul ana taunola maiteni au ola Gibeah i ġeta, peroveta borui i 'nanai i nenei awarri. Anina ma God Aruana Saul i ruini ma i vibadei da tauna maiteni God ana babani i garagaraei.

¹¹ Maranai ravai Saul i araramaneia Saul i 'nanai peroveta au borui i jimajima taui orai i aeupai ma ai rava i ririwei, “Riwa kaua bo aiwai i tupua Kish natuna awarina? Saul i viperoveta bo?”

¹² Ma nai dobuna ravana i paribelei i pa, “Amana aiai lamna avena aubaina maraġela ravarava ota e viviperoveta.” Anina ma wei babanina i mae kampa, “Moina riwa kaua da Saul peroveta?”

¹³ Ma Saul jima i voterei ma i ġae au ola au dobu vivivireina.

¹⁴ Muriai maiana Saul ana taunola maiteni i nelāgħi ma i paridadanei i pa, “Mepa o nae?”

Saul i riwa, “Donkey a baibaiei ma a baiana-avei da a nae Samuel awarina da ata paridadanei ġamoġamoi mepa.”

¹⁵ Maiana i riwa i pa, “Ma riweu Samuel aiwai i riwem.”

¹⁶ Saul i paribelei, “I riwelai da donkina i nelāgħi.” Wate maiana eġa ita riwei Samuel aiwai i riwei, da tauna ina vigulau Israel aubaii.

¹⁷ Muriai Samuel mai Israel anatapui i ġorei da ita riei au Mispa da BADA riwana ita nonori.

¹⁸ Ma Samuel i riwa, “BADA Israel ai God wei e ririwemi, ‘Tau noinoimi mai Egypt vivirewapanai au urai a vaitawanei. Ma a neiaimi wei au dobuna ma nanare ami ġavia au ririvami a vovaiubai.

¹⁹ Wate amadodo tau ami God o geduaiei, i kauana-guratei ami au nuabola ma ami au piripiri.’ Ma o riwa, ‘Eġa! Tauai gulau a ġoegħoei da ina vibadelai! Lamna aubaina dam damai ona opui tau ami BADA au naou.’

²⁰ Maranai Samuel damdamai i neiai BADA au naona ma BADA Benjamin ana dam i vinei.

²¹ Ma Benjamin ana dam i neiai au naona ma BADA Matri ana epaepaia i vinei ma kampa BADA Kish natuna Saul i vinei. Ma maranai i baibaiei tauna kampa eġa.

²² Ma lamna aubaina i raupari BADA awarina, “Tauna mepa?”

BADA i paribelei, “Tauna kampa purapura au orai e raraugovaġa.”

²³ Taui i nae da i taravaini da i neiai, tauna rava aena manamanaina ma i mairi ma rava anatapui i votani.

²⁴ Samuel rava anatapui i riwei, “BADA rava i tereriei da ami gulau, o inainai bo eġa? Eġa aiai ġelauna au orata me wei orotona.” Ma rava anatapui i garara, “Gulau ana lawana ina manawa.”

* **10:5:** Eng. lyre

11

Saul ana vigulau i vianinei

¹⁴ Muriai Samuel mai Israel i riwei, “Ona nei ma anataputa tana nae au Gilgal ma Saul ana vigulau tana vianinei ma tana amei.

¹⁵ Anina ma anatapui i nae au Gilgal ma BADA i voepaepai ma i riwei da Saul lamna taui ai gulau. Ma taui viturana ma mae-kaua pulona i apui Bada awarina ma mai Israel siana i am ma i uma ma i vinuaiai-kaua.”

Saul ana madega 30 maranai i vigulau. Tauna sorodia mai Israel i rau-etalaveni da mai Ammon maiteni i viigaigaiawa da i vovaiubai. Muriai taui mai Philistia maiteni i viigaigaiawa, Wate nai ravai ai sorodia i maga guratana aubaina da mai Israel i rovo. Saul i vipaipai da Samuel ita nae da BADA ita puloi ma muriai ita nae ita viigaigaiawa. Wate Samuel ega lagilaigina ita nei. Lamna aubaina Saul pulo i apui BADA awarina. Ma BADA i viamlo-agaigaini. Ma muriai Samuel i getai.

13

Saul BADA i rau-agaiagiae

¹³ Samuel Saul i riwei, “Tam u bua! Tam Ega BADA ana tarawatu uta voteletelei. Uta votelatela lamna am epaepaia maiteni ita teremi da ota vigulau nonoa au Israel.

¹⁴ [☆]Wate marina tam am vibada ega ina mae; BADA rava notanotana me tauna nanare i vinei ma i terei da ana rava ina vibadei, aubaina tam BADA ega uta voteletelei.”

15

BADA Saul i geduaiei

¹ [☆]Muriai Samuel Saul i riwei, “BADA tau i paritawaneu da a buloim da u vigulau Israel aubaii. Lamna aubaina BADA ana riwa ma nonora-kauei.

² [☆]BADA Vivirewapano Kaukauana i riwa i pa, ‘Tau mai Amalek ana kovoigi aubaina amamai mai Israel i viigavie maranai Egypte i opu da i nenei.

³ Marina ona nae mai Amalek ona viigavie ma ona pupuni, ega tagogi ona voterei, nelara, waivine, roaroa melamelai, bulumakau, sipu, kamel ma donkey.”

⁴ Ma Saul ana sorodia ai riwa i paritawanei da ita nei. Ma anatapui au Telaim taon i vinenebelana. Sorodia 10,000 Judah ana damei i nei ma 200,000 mai Israel gelauei i nei.

⁷ Ma Saul ana sorodia maiteni i opu ma Amalek i vunu-naiei ma i vovaiubai, i viigavia au Havilah ma au Shur i vikwai Egypt au geregrena.

⁸ Agag mai Amalek ai gulau lawalawaina i vovijini wate rava anatapui i viraageni.

⁹ Wate Saul ana sorodia maiteni Agag ega ita viraageni ma ai sipu ma bulumakau vinevinei ma bulumakau ma sipu natunatui aiaii ega ita viraageni. Taui gamogamo kirakiramai ava i viraageni.

¹⁰ Ma BADA Samuel i riwei,

¹¹ “Tau orau i viara kaua da Saul a terei Gulau aubaina tauna i mae-puputeu ma riwau i rau-agaiagiae.” Samuel nuanuana i bola-kauei maranai wei riwana i nonori ma BADA awarina i tou-maratom.

¹² Ubaubana boibogi Samuel i nae da Saul ita inanai wate i riwei da Saul i nae au Carmel taon. Kampa gana i vidamni da rava ita nei weka da tauna ita voepaepai, ma i gaia me au Gilgal.

¹³ Ma Samuel i geta Saul awarina, Saul, tauna i viegualaei ma i pa, “Samuel, BADA ina viaiainim. Tau BADA riwana a voteletelei.”

¹⁴ Samuel i paribelei, “Aiwai aubaina sipu ma bulumakau e vivotouana a nononori?”

¹⁵ Saul i pa, “Sorodia mai Amalek awarii i vaia, bulumakau ma sipu vinevinei i vojjini da ina puloei BADA am God awarina wate ġelaui anatapui a viraġena-naiei.”

¹⁶ Anina ma Samuel Saul i riwei, “Ma genuana! Waguvvarai BADA awariu i babani ana riwem.”

Saul i paridadanei, “Ma riweu!”

¹⁷ Samuel i paribelei, “Avena da u nota-melem da tam rava labalababa, tam marina mai Israel ai rauetaravena. BADA i tereriem da mai Israel ai gulau.

¹⁸ Riwa bagibagina i riwem ma i paritawanem da tanīga potapotai mai Amalek uta viġavie i da anatapui uta pupuna-pai.

¹⁹ Aiwai aubaina BADA eġa uta voteletelei? I riwem da eġa purapura i 'rairāġe-tawanei ona tami, wate tam vipurapura u ġoei ma u vai-labalababai da u nuanei, wei lamna kaua apoapoe BADA au matana.”

²⁰ Saul i paribelei, “Tau, BADA a voteletelei! I egariu da ana nae, da mai Amalek ana pupuni ma ai gulau Agag a neiasi.

²¹ Wate au sorodia sipu ma bulumakau aiaii eġa ita viraġeni wate i neiasi weka au Gilgal da ita apui pulo BADA am God awarina.”

²² Anina ma Samuel i riwa,

“BADA metauna e vinuajiae?

Votelatela bo pulo ma ġamoġamo apuapunana.

Votelatela i ai-telara, eġa me pulo apuapunana;

Ma rautaniġana i ai-telara, eġa me sipu monamonana.

²³ Pariviravira BADA awarina lamna me parauma

ma mae-ġaeġae lamna me god ġelaui e viviborumei

Ma tam BADA riwana u geduaiei;

lamna aubaina BADA am vigulau i geduaiei,

Tam am vigulau i vai-tawanei.”

²⁷ [✧] Ma Samuel i mae-tavirei da ita nae ma Saul i ġoei da ita viġaei ma ana kwama adana i vojjini ma i sikai.

²⁸ Samuel i riwa, “Me au ġara u sikasikai nanare amadodo BADA am vibada mai Israel awarii i vai-tawanei ma rava ġelauna aiaina eġa me tam i verei.

²⁹ Israel ai God vinuallauna eġa morumoruna bo nuuanuna ita viravirai. Tauna eġa rava da nuuanuna ita viravirai.”

³⁴ Ma Samuel i nae au Ramah ma Saul i nae me ana au numa au Gibeah.

³⁵ Samuel eġa Saul ita inana-melei da i 'raġe wate Saul i vinuabolana-maelei. Ma BADA nuuanuna i bola-kauei da Saul i terei mai Israel ai gulau.

16

BADA David i terei gulau

¹ BADA Samuel i riwei, “Amapo da Saul ma mogumoguei bo? Tau Saul a vaitawanei mai Israel ai gulau. Wate olive monamonana ma vaia ma ma nae au Bethlehem ma Jesse ma inanai. Natunatuna awariei gulau a vinei.”

² Wate Samuel i paribelei, “Menanare ana naenei? Saul riwana ina nonori ma ina viraġeniu.”

BADA i riwa, “Cow ġaubona ma vinimavoei ma ma nae da ma riwa, ‘Tau a nei viturana pulona ana apui BADA awarina.’”

³ Jesse ma raūgorei viturana pulona aubaina ma ana viatataiem aiwai ma kaei, rava ana viatataiem ma buloi Tau aubaiu."

⁴ BADA Samuel i ririwei nanare i kaei. Samuel au Bethlehem i āeta ma taun babadai ana sisisi i nebelei. Ma i paridadanei, "Ana nuaubam u nei bo?"

⁵ Samuel i paribelei, "Ee! A nei da pulo ana apui BADA awarina. Anatapumi ona vokaukauana-melemi ma tana nae pulo aubaina. Ma Jesse natunatuna maiteni i viaianini ma i paritawanei da i nae pulo apuna aubaina."

⁶ Maranai taui i āeta ma Samuel Jesse ana natuevou Eliab i 'nanai ma ana au nota i riwa i pa, "Wei teverana e maimairi BADA au naona lamna anina ana vinevine."

⁷ Wate BADA Samuel i riwei, "Tau ravana a geduaiei, ega inanana bo ana manawa ma notanotai. BADA aiwai e inainanai, rava ega ita inananai. Rava tupua e inainanai wate Tau nuapou a inainanai."

¹⁰ Nanare da natunatuna anatapui 7 i nei, ma Samuel i riwa, "BADA ega aiai ita vinei."

¹¹ Ma Jesse i paridadanei, "Natunatum anatapui weka bo?"

Jesse i riwa, "Natu umau e mamae wate tauna sipu e paipaini." Samuel Jesse i riwei, "Riwa ma paritawanei da ina āetai da tana am."

¹² Ma Jesse riwa i paritawanei da i nei. Tauna i tupua karawata, tevera inanana aiaina ma matana namanamarana. BADA Samuel i riwei, "Wei tauna! Ma nae ma au kolana olive monamonana ma waagi."

¹³ Anina ma Samuel olive monamonana i vaia ma David au kolana i waagi, kampa taui au matai, ma nai au marana da i nene BADA ana Arua Vivivireina David maiteni i mae. Ma Samuel i nae au Ramah.

¹⁴ Ma BADA Aruana Saul i opu-tawanei ma BADA arua apoapoei i paritawanei i rui au orana da i virovorovoi.

David marina Gulau Saul ana sorodia.

18

Saul David i unurei

⁵ Saul, David āavia au anatapuna i paripari-tawanei ma i kaukauana-kauei ma āavia i vovovaiubai ma lamna aubaina i terei da ai sorodia ai bida āeāena. Ma wei kauana patara ma sorodia babadai i vinuaiae.

⁶ David oroto Philistieī āeāena ma inanana vi'nirovorovona i viraēeni ma i nenememei ma waivine taon anatapuiei i nei ma ketaketara ma gita i vikalokaloei ma i arara ma gulau Saul i nebelei.

⁷ Waivine i vikalokalo ma i welawela i pa;

"Saul āavia tausan i vunu
ma David tausan dam viriviri i vunu."

⁸ Wei welana Saul i vimeji-kauei ma ana au nota i pa, "Taui David e vovoepaepai ma e ririwa da tauna rava tausan dam viriviri i vunu ma tau tausan ava." Ma marina ina terei ai gulau.

⁹ Ma lamna aubaina tauna David i unurana-kauei ma i 'nana-vaitetei.

Wei au marana Saul David i vivigavie i goei da ita viraēeni. Saul natuna Jonathan, David i vibenabenamei. Lamna aubaina i rovorovo-nae ma i rauraugovaāga-nae.

21

Wei marana au murina Saul David i vigavie i goei da ita viraēeni. Saul natuna - Jonathan David i vibenabenamei ma David i ruba au dobu āela da Saul ita raugeāgei.

Ahimelek David i voagui

¹ David i nae au Nob da Pirisi pulo tauapuna Ahimelek ita inanai. Tauna ana rovona i opu da David i viegualaei, ma i riwa, “Aiwai aubaina u nei, ma am rava mepa?”

² David pirisi Ahimelek i paribei i pa, “Gulau Saul nola tagogi aubaina i paritawaneu wate wenanare i riweu, ‘Ega aiai ina aramanei aiwai a kaukauei.’ Au sorodia a riwei da e paipainiu.

³ Awarim lam da uta vereu? Palawa apuapunana 5 ma vereu bo aiwai ġelauna kampa.”

⁴ Wate pirisi i riwa, “Awariai ega palawa ota ita mamae, wate vovivirana BADA awarina. Wei palawana ma vaia mepa da am sorodia aupom biaġa ega waivine maiteni ita viawawana.”

⁵ David i paribelei, Riwa kaua tauai ega waivine maiteni ata matamatave, maranai a opuopu ġavia aubaina au nelara e ujiuji. Amadodo lamna gulau ana nola a kaukauei ma wei nolana aubaina a vokaukaua kaua.

⁶ Nai marana palawa waduboi i votawanaei ma palawa voui i terei BADA au naona au tempol. Kampa ega lam ġelauna ita mamae ma pirisi palawa vovivirana David i verei.

Anina ma David rava i tama-naiei ma nai au dobuna i raugovaġa nae ma i terei ai bada. Maranai Saul i nonori da pirisi ġegetelarana Ahimelech David i voagui, Tauna pulo tauapui pirisi i vunu-pai ma Abiathar lawalawaina i voterei, matauna i ruba govaġa da David awarina i ġeta. Maranai dobuġela ai sorodia Israel i viġavie, lamna David ana sorodia maiteni taui i viġavie ma Israel i gagaloei. Saul ana sorodia maiteni dobuna i naeni ma David i baiei da ita viraġeni, wate ega ita nelaġai. Mara tagogi David Saul ita viraġeni wate lamna ega ita kauai aubaina tauna God ana vinevine. Wate Saul amapo i ġoie da David ina viraġeni.

31

Saul ana iraġe

¹ Mai Philistia mai Israel i viġavie i au ola Gilboa ma taui mai Israel i virubai ma maġamaġaui i viraġeni.

² Mai Philistia Saul ma natunatuna i viaġaġei da natunatuna Jonathan, Abinadab ma Malki-Shua i viraġeni.

³ Ĝavia i potopoto kaua Saul au ririvana ma ġavia ana piduei Saul i tonai ma i vikero-kauei.

⁴ Ma Saul ana apia tauavaraina i riwei, “Am sodei ma viraġenu. Ega ata ġoie da Philistia-eteni ina vijibogiu ma ina virageniu.”

Wate tauna i rovo da viraġenana i kauana-avei. Ma Saul ana sod i lavui da au manawana i tonei ma au tepana i peu da i ’raġe.

⁵ Maranai ana apia tauavaraina wei i ’nanai ma tauna nanare ana sod au tepana i peu ma gulau au ririvana i ’raġe.

2 Samuel

Samuel **ana buka viruaina Pariverena**

Wei bukana lamna David ana vibadana marana e ririweta. Kapita 1 da au 4 e ririweta da David menanarena Judah au rauanaägei lamna ava i vibadei. Ma kapita 5-24 Israel au lavaratei maiteni i vibadei. Wei girumana e ririweta da menanare David ana ġavia Israel au orana ma dobu ġelauei i viġaviana-nei ma e viviatataieta menanare David God nuanuana i vaia ma i vitumağanei, wate maiteni ana ġo'apoapoe ma ana ġokokokara ġelau i viatataieta. Tauta ta inanai menanare God David i kovoġi maranai ana ġoa i apoapoei, wate maiteni ta inanai menanare David i rupena-nei ma God tauna ana ġo'apoapoe i notatawanei. David piripiri maġamağau i nelāgai maranai Israel i vibadei wate God tauna i gagaloei ma parivainuağana awarina ma ana epaepaia awarii i vojjini.

Vinevinei

David mai Israel ai gulau (5:1-4)

God ana parivainuağana bagibagina David awarina (7:1-5, 8-17)

David Bathsheba maiteni i matave (11:1-17, 26-27)

Peroveta Nathan ana pariverena (12:1-25)

5

David mai Israel ma Judah ai gulau

¹ Israel dam damai i nei David awarina au Hebron ma i pa, “Tauta tara tagogi

² Au naona maranai Saul ata gulau, tam sorodia u rauetaraveni ma o viġavia.

—Ma BADA i riwem, ‘Tam au dam Israel ma paini me sipu taupaini ai sipu e paipaini ma aubaii ma vibada.’

³ Maranai dam babadai i ġeta gulau David awarina au Hebron, David parivainuağana bagibagina taui maiteni i kauei BADA au matana. Ma olive monamonanei David i buloi da Israel ai gulau.

⁴ ⁵ David ana madeğä 30 ma i vigulau ma i vibada da madeğä 40 i kwa.

Ma David ana sorodia i egari ma Jerusalem mai Jebu awariei i vaia. Kampa David ana gulau numana i voai. Anina ma rava i tami ma i nae ma God ana parivainuağana bokisina i vaia ma i naei au Jerusalem ma kampa au numagara i terei.

7

BADA parivainuağana i kauei David maiteni

¹ Ma BADA David i gagaloei ma nanare ana ġavia anatapui i vovaiubai. Ma ana nuaubana i mae.

² Ma David peroveta Nathan i riwei i pa, “Tau numa vigulauna, ai cedei voavoana a maemaeni wate God ana parivainuağana bokisina au numa gara e mamae.”

³ Nathan i paribelei, “Aiwei e notanotaia ma kauei aubaina BADA i mae-ratuim.”

⁴ Wate lamna waguvvaraina BADA Nathan i riwei i pa,

⁵ “Ma nae ma au taunola David ma riwei ma pa, BADA wei e ririwei ‘Eġa tam numa ma voai da Tau au animae.’”

⁸ BADA i riwa me, i pa, “Au taunola David ma riwei, ‘BADA VIVIREWAPANA KAUCAUANA wei i riwei:

Tam au naona ravarava ota sipu u paipaini au wapu, wate Tau a terepaim da mai Israel ai bada.

⁵ 5:4: 1Ki 2:11

⁹ Mepa u nenenana, Tau tam a mae-ratuim ma au matam am ġavia anatapui a pupunapai. Ma marina wavam ana voepai, me rava wavai naenaei au dobu.

¹⁰⁻¹¹ Ma au rava Israel dobu ana verei da ina raunuma ma ana nuaubai ina mae. Au naona i vivikareiana da marina babada a terei da mai Israel ita vibadei, wate rava apoapoei taui i viġaviei ma marina amapo ega ina kauana-melei. TAU BADA a ririwem da am epaepaia ana vimaġai ma tam ma am epaepaia ona viviglau.

¹² [◊]Ma am epaia tagogi ana vinei, tam natuoim tagogi da ina vigulau maranai tam am mara damona ina ġetai da amamam ma votagoi. Ma tauna ana kaei da ina vibada ġaġaena,

¹³ ma ega aiai ana vigulau ina vaitawanei. Ma tauna tempol ina voai Tau aubaiu,

¹⁴ Tau ina viamaneu ma tauna ana vinatunei. Ma maranai i kauana-boai, ana kovogħi me ama natuna e kovokovoġi nanare.

¹⁵ Wate eġa melanai au nuavaina awarina ana vaitawanei me Saul awarina a vaitawanei, tauna ana vigulau a vaitawanei ma epaiana tam a terem.

¹⁶ Am numa ravai reregħana eġa melanai ina kwa ma am epaepaia ina vigulau ma ina vibada nonoa.”

¹⁷ Ma BADA aiwai Nathan ana au rauboni i riwei anatapuna David i pariverei.

11

David turana awana i kwalei

¹ Omra e tomtom maranaina gulagulau e opuopu ġavia aubaina. David sorodia ai bada Joab ma Israel ana sorodia i paritawanei da mai Ammon ai sorodia ita vipupui. Ma ai taon Rabbah etanaina i matave-potai da ravai eġa ita rui bo ita opu, David eġa ita nae ma au Jerusalem i mae.

David ma Bathsheba

²⁻⁴ Mara tagogi aubigai David i matave-vomairi ma ana au poewa vatavatarana i babbara-nae. Ma i 'nana damana da wavyne i 'nanai i toatoa, i oġaoġa-melei aubaina marina ana nawaravi doriani i kwa, wavyne inanana aiai kaukauana anina ma David, rava i paritawanei da ita aramanei tauna aiai. Ravana i ġeta memei ma i pariverei i pa, “Wavyne wavyana Bathsheba, Eliam natuna ma Uriah Hitti ei awana.” Ma David ana taunola i paritawanei da wavinena i neiai awarina ma tauna maiteni i matave ma i nae me au numa.

⁵ Wavinena i duama ma riwa i paritawanei David awarina i pa, “Tau a duama.”

⁶ David riwa i paritawanei Joab awarina i pa, “Uriah Hitti ei ma paritawanei awariu.”

Ma Uriah i paritawanei David awarina.

⁷ Maranai i ġeta David awarina ma David tauna i paridadanei, “Joab ana sorodia maiteni menanare, anina bo eġa? Ma ġavia menanare?”

⁸ Ma David Uriah i riwei, “Ma nae au numa ma ma vilauvitau.”

Ma Uriah gulau ana numa i opu-tawanei da i nae ma au murina David ana pulo i paritawanei Uriah ana au numa.

⁹ Wate Uriah eġa ita nae ana au numa, ma kampa ana au metaeta ana bada ana taunola maiteni i vimatave lana.

¹⁰ Ma taui David i riwei, “Uriah eġa ita nae au numa.” David Uriah i riwei, “Tam u vaġavaġai da u nei. Aiwai aubaina eġa uta nae am au numa?”

¹¹ Uriah David i riwei i pa, “Parivainuġana bokisina, mai Israel ma Judah ai sorodia au numa gara e matamatave. Au bada Joab ana sorodia maiteni au wapu i rauġaravu, wei lamna aubaina eġa ata nae au numa da ata am ma ata uma ma awau maiteni ata matave. Lamna eġa ana kaei, eġateni!”

¹² Anina ma David Uriah i riwei, “Weka ma mae amadodo ma au maratom ana paritawana-melem.”

Uriah au Jerusalem i mae da au pom ġela.

¹³ Ma David Uriah i rauğorei da maiteni i am ma i viuma-buai. Wate waguvvarai Uriah i opu David ana taunola awarii da ana au aravi i matave; ega ita nae ana au numa.

¹⁴ Ma ubaubanaina David pepa i girumi ma i paritawanei Joab awarina.

¹⁵ Pepa au orana i giruma i pa, “Mepa ġavia potopotona kampa Uriah ma terei ma am sorodia ma tere-opunei da tauna ava ina mae ma ina kero ma ina iraġe.”

¹⁶ Joab Rabbah taona i vivineneġanei da i aramanei mepa ġavia i virewapano kaua ma kampa Uriah i terei.

¹⁷ Ġavia taonei i opui ma Joab ana sorodia maiteni i viġavia ma David ana sorodia ġelaui i viraġeni. Taui Uriah oroto Hitti ei maiteni i viraġeni.

²⁶ Ma Uriah awana riwana i vaia da awana Uriah i 'raġe ma i touei ma i moguei.

²⁷ Maranai i mogu-vorovei David rava i paritawanei da i neiae ana au numa da awana ġelauna, ma tauna David natuna orotona i ġuni. Wate David aiwai i kauei, BADA ega ita vinuaiaeie.

12

Peroveta Nathan David i eni

¹ [✳]Anina ma BADA peroveta Nathan i paritawanei David awarina ma i riwei i pa, “Nelara ruaġa au taon tagogina i mae, oroto tagogi manemanena ma maumaurana ma gelauna molamolakana.

² Ravana manemanena awarina sipu ma bulumakau maġamaġaui.

³ Wate ravana molamolakana sipu natuna wavinena i gimarai, ma natunatuna maiteni i ġamoi da i rata, molamolakana ana sipu tagotago. Ana lam momoġina sipu i aniani ma waira ana au kelaka i umaumai ma au arona i matamatave, wei lamna me tauna natuna guguinina.

⁴ —Marina taomana i nei oroto manemanena ana au numa, ma oroto manemanena ega ita ġoei da ana sipu bo bulumakau ita vunui da ana taomana ana lam ita vokaukauei. Ega, tauna oroto molamolakana ana sipu natuna wavinena i vunui ma i vitavi ma ana taomana i verei.”

⁵ Nai maranaina David i meji guratana ma Nathan awarina i ġaiawa, “BADA lawalawaina wavanei a ririwa da aiai wei kauana i kauei anina ina iraġe!

⁶ Kaua apoapoe kaukauana i kauei lamna aubaina sipu ġaubona 4, orotona molamolakana ina verei.”

⁷ Anina ma Nathan David i riwei, “Tam nai ravana! Wei lamna aiwai BADA Israel ana God i riwei, ‘A vinem da Israel ana gulau ma Saul au urana a vaitawanem.

⁸ Ma am bada Saul ana vibadana ma ana buderi a vere-tawanem ma awawana au uram a terei. Ma nanare a terem da Israel ma Judah u vibadei. Mepa da wei anatapui i muomuo ġuratana awarim, tagotagogina au tepana ata viaitepatepani.

⁹ Aiwai aubaina riwau bagibagina u rau-aġaġaie? Aiwai aubaina wei kauana apoapoena u kauei? Uriah Hitti ei sodei u piägi; awana mai Ammon ai sodei u viraġeni. Ma awana u vaia da awam.

¹⁰ U rau-aġaġaieu ma Uriah awana u vaia da awam lamna aubaina am au numa viġaiġaiawa ina mae-nonoa’.

¹¹ —BADA wei e ririwei, ‘Tau aburuna ava da apoapoena ana neiae am au numa. Au matam awawam ana vaia ma oroto au ririvam ana verei. Ma tauna awawam maiteni ina matave, patara au matai.

¹² Tam u kauana-ġovaġei wate tau madeġai ana kauei, mai Israel au matai.”

[✳] **12:1:** Psa 51

¹³ David Nathan i riwei, “Tau, BADA awarina a kauana-boai!”

Nathan, David i riwei, “Ee wate God am apoapoe e vaivai-tawanei. Tam ega ma irage.

¹⁴ Wate kaua apoapoena u kauei ma lamnei BADA u vijiboغا-kauei lamna aubaina natum ina irage.”

¹⁵ Nathan i nae ana au numa. Ma BADA doria i paritawanei David ma Uriah awana, natui awarina ma i doria kaua.

¹⁶ David i raupari guratana God awarina natuna aubaina. Am i voterei ma i rui ana au numa ma au debidebi i matamatatave.

¹⁷ Ana numa babadai i nei awarina, da au debidebi ita voepai ma maiteni ita am, wate i geduai.

¹⁸ Aupom 7 au murina tevera i 'rage ma ana numa babadai i rovo da David ega ita pariverei. Taui ava i babani vivira i pa, “Maranai tevera lawalawaina David ega ita rautaniغانeta ma marina menanare tana riwanei da natuna i 'rage? Mepa da ina viapoapoena-melei!”

¹⁹ David i 'nanai ana taunola i pari-ararava ma i aramanei da natuna i 'rage.

Ma i paridadana, “Tevera i 'rage bo?” Ma taui i paribelei, “Ee tauna i 'rage.”

²⁰ Anina ma David debidebiei i vomairi ma i toa ma i vigara ma monamona gabugabui i toai ma i nae au numa gara da i voepaepa. Ma i nae me au numa ma lam i vibagei da i neiai ma i am.

²¹ Ana numa babadai i baiei ma i riwa, “Maranai tevera lawalawaina, tam u uji ma u mogu, ma tevera i 'rage, tam u vomairi da e amam!”

²² David i paribelana, “Ee tau a uji ma a mogu maranai natu lawalawaina. A notai da BADA ina rau-nuapoapoeleu ma natu ina lawana.

²³ Wate marina i 'rage aiwai aubaina ana u uji? Ana neiana-meleai bo? Amapo ana nae awarina wate tauna ega ina nei awariu.”

²⁴ Anina ma David awana Bathsheba i vinuaubai ma maiteni i matave. Ma tevera orotona i گuni ma David i گorei Solomon. BADA tevera nuanuana i vaia,

²⁵ ma lamna aubaina BADA peroveta Nathan i paritawanei da tevera wavana i گorei Jedidiah*.

* **12:25:** Wei anona Bada ana nuavainana

1 Kings Gulagulau Naona

Pariverena

Wei bukana ana ġuta tonuġa, ġuta tagogi (Kapita 1-2) lamna gulau David ana iraġe i bababaniei ma natuna Solomon tauna ana gabu i viaia da i vigulau. Ĝuta viruaina (Kapita 3-11) Solomon ana vibada mai Israel awari lamna e vivieġeta ma menanare ana vibada nai au dobuna i tua-nae ma i rata. Ma maiteni e ririweta da tauna menanarena God ana tempol i voanei au Jerusalem. Ma ġuta damona (Kapita 12-22) e ririweta da menanare mai Israel i kai da navanava ruaġa, Israel ana dam ma Judah ana dam. Ma dam tagotagogi ava ai gulau i mae. Wei bukana lamna nai gulaui ai virarautua e bababaniei ma e viviatataieta da metaui gulaui Bada riwana i votaġotaġoi me David i kauei nanare, ma metaui gulaui Bada i mae-puputei ma god ġelaui i raudunelei.

Wei bukana au orana.

Gulau David i'raġe ma natuna Solomon i vigulau (2:10-12)

Solomon God i vibaġai da nualaula ma nota aiaina ita verei (9:3-5, 7-4, 16-18)

Solomon ana vibada i tua nae (4:20-21, 25)

Solomon God ana tempol i voai ma i raupariei (5:1-6, 6:1-7, 11-14, 8:1, 3-6, 10-11, 22-23, 27-30, 41-43)

Mai Sheba ai gulau wavinena Solomon i raugenari (10:1-9)

Solomon God i mae-puputei (11:1-5, 7-13, 26-33, 35, 40)

Solomon i'raġe ma natuna Rehoboam gabu i vaini (11:42-43)

Rava i kai da dam ruaġa, Israel ma Judah (12:1-20)

Israel ai Gulau Ahab God i mae-puputei ma god ġelaui i raudunelei (16:30-33)

Peroveta Elijah kaiababa ma natuna orotona i voagui (17:1, 8-16, 17-24)

Bada Baal ana peroveta i vovaiubai au ola Kamel (18:1-2, 17-46, 19:1-21)

2

David i'raġe

10-11 ⋈ David Israel i vibadei madeġa 40; au Hebron madeġa 7 ma au Jerusalem madeġa 33. David ana mara i kwa ma au Jerusalem au kokoaga noinoina au ririvai i vimataveni.

12 Ma Solomon amana ana gabu i vaia da Israel ai gulau ma God i kauei da ana vibada i virewapana.

3

Solomon nuaulaula i vibaġei

3 Solomon, BADA nuanuana i vaia ma lamna aubaina amana David ana tarawatu i vojjijina-kauei. Wate kaua tagogi i kaukauana-boai lamna pulo i apuapu labalababai nai dobuna ravai ai pulo ai au aniamapuna.*

4 Wei lamna pulo aniapuna gabuna, wavana naenaena i mae au Gibeon. Solomon i nae weka da ġamoġamo 1,000 i apu-tapui BADA awarina.

5 Waguvara tagogi BADA, Solomon ana au rauboni i riwei i pa, “Aiwai e ġoegħoei, ma vibaġei ma ana verem?”

7 Solomon i paribelei, “BADA au God, tam u tereu da amau a raviepaiai da gulau, wate tau tevera ota ma eġa ata aramanei menanare ana vibadanei.

8 Ma tau weka am rava u vinevineia au poui, taui i maġa dewadewa da eġa aniavana.

* 2:10-11: 2Sa 5:4-5 * 3:3: Eng. High places Weka ola muomuou au tepai pulo aniapuna i voa-naiei Canaan

⁹ Ega aiai ainelana tagotagogina am rava, u vinevineia ina vibadei. Lamna aubaina nuaulula ma vereu da ana aramanei metauna aiaina ma metauna apoapoena.”

¹⁰ BADA i vinuaiai da Solomon nuaulula i vibāgei.

¹¹ Ma Solomon i riwei, “Tam ega lawana manamanaina bo mane, uta vibāgei bo uta vibāgaiu da am gavia ata virāgeni. Ega! Tam u vibāgaiu nuaulula aubaina da au rava ma vibadana-kauei.

¹² Aiwai u vibāgei ana verem! Nota aiaina ma nuaulula ana verem, ega me aiai gelauna au naona nanare bo aiai gelauna muriai ina vaia nanare.

¹³ Avena da mane ma vipurapura ma wavam vimae-̄gaeḡenana aubaina, ega uta vibāgei, wate ana verem, da am au lawana ega aiai gulauna am vigulau ina votani.

¹⁴ Ma mepa da ma rautanīganeu ma au tarawatu ma voteletelei me amam David i kaukauei nanare, tam am lawana ina manawa.”

Solomon ana nuaulula i viēgai

¹⁶ Muriai etanai waivinei ruāga i ḡeta gulau awarina da tauna ai ḡaiawa ita okei.

¹⁷ Wavine tagogi i riwa, “Au bada tauai airuāga ai numa tagogi. Ma tau tevera orotona a vinatunei au numa, maranai noi wavinena kampa.

¹⁸ Ma aupom tonūga au murina wavine viruaina nanare tevera orotona i vinatunei. Ega aiai gelauna au numa anina airuāga ava.

¹⁹ —Ma waguvara tagogi wavine natuna i matave-jijini da i ’rāge.

²⁰ Ma waguvarai au pouna i vomairi, ma natu au ririvau i matamatave i vaia. Tauna natuna irairāgena au ririvau i vimataveni ma tau natu lawalawaina i vaia da au ririvana.

²¹ Ubaubanai a vomairi da natu ata vīgūgi, lamna a baei da natu i ’rairāgena. Ma mara i tom kaua ma ata inana-kauei lamna ega tau natu.”

²² Wate wavinena gelauna i riwa, “Ega! Tau natu lawalawaina; tam natum irairāgena.”

Ma wavine au naona i vinatuna i riwa bagibagi i pa, “Tevera irairāgena lamna tam natum ma lawalawaina lamna tau natu! Ma nanare airuāga i vīgēgæe.”

²³ Anina ma gulau Solomon i riwa, “Wei tauna e ririwa, ‘Tau natu lawalawaina ma tam natum irairāgena.’ Ma noi tauna e ririwa, ‘Ega! Tam natum irairāgena ma tau lawalawaina.’”

²⁴ Ma gulau i riwa, “Sod ona neiai.” Ma i neiai gulau awarina.

²⁵ Ma i ēgara, “Tevera lawalawaina au pouna ona viailarāgi da navanava tagogi wavine tagogi ma navanava gelauna wavine gelauna.”

²⁶ Tevera lawalawaina alo oina, nuanuana i bola-kauei ma gulau i riwei, “Au gulau a vivibāgaim da tevera lawalawaina noi wavinena ma verei! Ega ma virāgeni!”

Wate wavinena gelauna i riwa, “Ega tam bo tau teverana tana vaia. Tevera au pouna ma viailarāgi!”

²⁷ Anina ma gulau ana paribelana i tere-̄gairei i pa, “Ega tevera ona virāgeni ma wavine au naona i vivinatuna ona verei, tauna tevera alo oina.”

²⁸ Maranai mai Israel Solomon ana etara riwana i nonori, marina taui Solomon ina vivirei, ma i aramanei da God, Solomon nuaulula i verei da lawana ina tere-vaijimani.

4

Solomon i vibada kaua

²⁰ Mai Judah ma mai Israel ai patara i māga dewadewa me bubu au gera. Taui ai lam ma ai uma tagotagogina ma i vinuaiai kaua.

21 Ma Solomon dobuna anatapuna i vibadei. Ana parata au waira Euphrates i vikarei da i ġaira au Philistia ma kampa da i ġaira Egypt ana au parata. Wei ravai tax i vivimaiei gulau Solomon awarina ma i voteletelei maranai lawalawaina.

25 Maranai Solomon i vibada mai Judah ma Israel ana nuaubai i mae, ai nuabola eġa aiwai. Au lavaratei Dan ana dam ai au dobu i vikarei da i ġaira au Beersheba au rauanaġei, numa nununai ravai anatapui ai numa ma ai wapu i mae.

5

Solomon Tempol voana aubaina i vokaukaua

1 Maranai David maemaeninai, tura-kauana lamna Gulau Hiram, Tyre ai gulau. Maranai gulau Hiram riwana i vaia da Solomon i vigulau au Israel, amana David epaiana, Tauna ana taunola i paritawanei da gulau vouna i viegualaei.

2 Ma gulau Solomon wei riwana i paritawanei gulau Hiram awarina i pa:

3 Tam u aramanei da amau dam maġamaġau i ririvaiai i mae-kwaviviroi ma maiteni i viġaiġaċċawa nonoa. Ma lamna aubaina eġa tagotagogina da tempol ita voai Bada ana God, viborumana aubaina. Wate i vivipaipai da au naona Bada ana aguei ana ġavia ita vipupui.

4 Wate marina Bada nuauba i vereu. Au ġavia ma au nuabola eġa.

5 [✳]A vinua-notanota da tempol ana voai, Bada God viborumana ma vimea-ġaeġaenana aubaina. Me Bada amau i ririwei nanare maranai i riwa i pa, “Natum orotona ana terei gulau, am au gabu, ma tauna numa ina voai tau viborumau aubaina.”

6 Lamna aubaina am taunola ma paritawanei au ola Lebanon, da aubaiu ai bagibagi cedar ina tarai. Tam am nelara ai tarana i aramana-kauei. Tau au nelara ana paritawanei da ina tara agui. Am nelara ana vimaiei, biaġa e vivibaġei nanare ana vimaia.

Anina ma gulau Solomon ai cedar i vimaiei. Ma mai Israel nelara 30,000 i vaia ma i voagui da ai ma purapura ġelaui numavoa aubaina i vivanei au Jerusalem.

Solomon wate nanare nelara 150,000 i terei da i nola, wei ravai ai nola da ġaima ina wamawamai ma ina boribori numa voa aubaina.

6

Solomon tempoli voai

1 Solomon mai Israel i vibadei da madeġa tonuġa ma au vi-4-na, nawaravi au viruaina e ġoreġorei Ziv, tauna BADA ana tempol voana i vikarei. Wei lamna madeġa 480 i kwa maranai mai Israel, Egypt i opu-tawanei.

7 Ĝaima ġaegħaei numa voana aubaina anatapui au weia i ġarai ma kampa i bori-naiei, da eġa irama bo aniambori gugurai numavoa gabuna ita vitaniġa-potai.

11 Ma BADA Solomon i riwei,

12 “Wei Tempolna voana aubaina ana riwem, mepa da riwau ma rautaniġanei, ma au tarawatu anatapui ma votaġoġi, ma aiwai a ririwem ma kaukauei, Tau aiwai amam David a parivainuāġani ana kauei aubaim.

13 Ma tau au rava mai Israel maiteni ana mae, ma eġa melanai ana netawanei.”

14 Anina ma Solomon tempol i voa-pai.

[✳] **5:5:** 2Sa 7:12-13

8

BADA ana Parivainuaḡana bokisina i ruiei au tempol

¹ BADA ana parivainuaḡana bokisina au Zion, David ana taon* ita vaia da ita neiai au Tempol. Gulau Solomon, Israel babadai ma dam nununai babadai anatapui i ġoreiai awarina au Jerusalem.

³ Maranai Israel babadai i ġetai, pirisi parivainuaḡana bokisina i voepai.

⁴ Pirisi ma Levi ana dam ravai parivainuaḡana bokisina ma numa gara ma ana purapura vivivirei i avara-naiei au Tempol.

⁵ Gulau Solomon ma mai Israel anatapui parivainuaḡana bokisina au naona; sipu da bulumakau i vunuvunu-naiei, ġamoġamo i maġa guratana da iavana i kauana-avei.

⁶ Ma pirisi parivainuaḡana bokisina i ruiei tempol au orana da ana au gabu vivivira dewadewana cherub† ruāga papei au gabaurina i vikialai.

¹⁰ *Maranai pirisi gabu vivivireina i opu-tawanei, bau potopotona i ġairai, ma ana boruma numana i purui.

¹¹ Pirisi eġa tagotagogina da ai nola ita kaei aubaina bau potopotona; BADA ana boruma, tempol i vioai.

Solomon Israel aubaina i raupari

²² Ma Solomon pulo aniapuna au naona i mairi, ma au murina Israel patarana. Urana i voepai au mara,

²³ ma i raupari i pa, “Oo BADA, Israel ana God, eġa mepa God ġelauna me tam nanare, au tepana au mara bo au gabaura au dobu! Tam am parivainuaḡana anatapuna e kaukauei, ma mara nonoa am rava nuanuai e vaivaia maranai orai taputapunei e votaġotaġoim.

²⁷ —Wate amapo God au dobu ina mae bo eġa? Eġateni! Mara, ma nanare mara ġedewadewa eġa tagotagogina da tauna ina vojijini. Wei tempolna a voavoia lamna anina bo eġa?

²⁸ —Wate au pari ma nonori. BADA au God, tau am taunola ma aiwai amadodo a vivibaġei ma vereu.

²⁹ Am tempol ma inana-vaitetei, marai ma waguvvarai, wei gabuna aubaina u riwa u pa, ‘Tau wavau kampa.’ Lamna aubaina au pari weka ana pariparitawanei ma i rautaniġanei.

³⁰ Au pari ma nanare am rava mai Israel ai pari ma nonori, maranai naoi i terei weka ma i raupari. Au mara ai pari ma nonori ma ai apoapoe ma nota-tawanei.

⁴¹⁻⁴² —Ma maranai jentail aueia maemaei, riwam ma am rewapani ma kaua ġaeġaei u kaukaueia riwai ina nonori; ma ina nei da ina vimae-ġaeġaenim. Ma am numa au naona ina mairi ma ina raupari

⁴³ am au animae au mara, ai pari ma nonori ma ai ġoana ma kaei. Ma jentail wavam ina aramanei ma ina vimae-ġaeġaenim me am rava oina mai Israel. Ma jentail ina aramanei da wei tempolna a voai. Tam vimae-ġaeġaenam aubaina.”

10

Sheba ai Gulau wavinena Solomon i raugenari

* **8:1:** Zion lamna melagai aburuna, Jerusalem taon garina au orana. † **8:6:** Cherubwei purapurai lawalawai wate ruāga ai Olivei i tai ma i vimairini (4 mtr) ma papei i terei da numa au giana da già ġelauna i tonei. * **8:10:** Exo 40:34-35

¹ Solomon ana vigulau wavana naenaena ma lamnei Bada i vimea-ḡaeḡaeni. Ma Sheba ai gulau wavinena, wei riwana i nonori ma i ġei au Jerusalem da paridadana piripirinei Solomon ana nuaulaula ita raudadani.

² Wavine ana taunola ma kamel maḡamaḡaui ai pulo i vigerui ma ana borui i derirui. Taui ai pulo lam tauvidagiai, ġaima maiai ġaegħaei ma gold ġaegħaena. Wavine i nei Solomon awarina ma kaua maḡamaḡaui i vinua-notenotei Solomon i paridadanei.

³ Solomon ana paridadana anatapuna i paribelei, kampa eġa aiwai tagogi ita piripiri guratana awarina.

⁴ Sheba ai gulau i aramanei da Solomon nuanuana i ulaula kaua ma; i 'nanai ana gulau-numana, vigulauna i voai,

⁵ lam au keparepa, ana gabemani babadai ai gara, ana wine taupainii, ma pulo i apuapui Bada ana au tempol. Ma wavine ana nota i kwa.

⁶ Ma Solomon i riwei, "Am kaua anatapuna ma am nuaulaula au au dobu a nononoria lamna anatapuna riwa kaua!

⁷ Au naona eġa ata vitumaġanei wate marina a nei da matauei a inanai da a vitumaġana. Ma a inanai da aiwai a nononoria lamna eġa. Tam am vigulau i rata dewadewa.

⁸ Am taunola* i vinuaiai kaua! Am gabemani babadai au naom e maimairi marana patapatai ma am nuaulaula e rautaniġanei.

⁹ Bada am God ana voepaepai, i vinuaiaiem ma i terem Israel ai gulau. Bada ana nuavaina maemaena mai Israel aubai i terem gulau, da riwa kauai ma kaua jijimaninei ma vibada."

¹³ Solomon, Sheba ai gulau aiwai anatapuna i rarau-oġarei ma i vivibaġei, i verei, wate ġelaui i vereoi. Anina ma gulau wavinena i wanavira-melei ana au dobu ana taubagibagi maiteni.

11

Solomon Awawana

¹ *Gulau Solomon, Egypt ai gulau* natuna i ravaġi ma nanare jentail waivinei i ravaġanaiei, ġelaui mai Moab, mai Ammon, mai Edom, mai Sidon ma, mai Hitti.

² *Au naona BADA mai Israel i riwana-guratei i pa, "Jentail waivinei eġa ona ravaġi aubaina taui nuanuami ina vovirai da ai god ona voepaepai." Wate Solomon nai eġa ita rautaniġanei, ma awawana nuanuai i vai-kauei.

³ Tauna awawana 700, anatapui gulagulau natunatui, wate awawana ġelaui 300 lamna me ana taunola. Taui Solomon ana vitumaġana BADA awarina i vikwakoi.

⁴ Maranai Solomon i magura, awawana ana nota i virai da god ġelaui i votaġotāgoi, ma eġa BADA awarina ita vipatutu me amana David.

⁵ Tauna mai Sidon ai god wavinena Ashtoreth, ma mai Ammon ai god apoapoe kaukauana Milkom* i viviborumei.

⁷ Au Ola Olive au Jerusalem kampa Solomon voepaepa gabuna i voai mai Moab ai god apoapoe kaukauana, Chemosh aubaina ma ġelauna mai Ammon ai god apoapoe kaukauana, Molek aubaina.

⁸ Voepaepa gabui wenanare i voanaiei awawana anatapui aubaii da taui weka incense ma ai pulo ita apuapui ai god awarii.

⁹⁻¹⁰ Maraotai BADA, Solomon awarina mara ruāġa i eġa ma i riwana-guratei da god ġelaui viborumai ina voterei. Wate tauna eġa ita voteletelei, ma Israel ai God viborumana i voterei. Lamna aubaina BADA amlona i ġaigai kaua Solomon awarina.

* **10:8:** Giruma ġelaui e ririwa *awawana* * **11:1:** Deu 17:17 * **11:1:** Pharaoh * **11:2:** Deu 7:3-4 † **11:5:** Hebrew *Milkom* wate giruma ravai maḡamaḡaui e notanotai da wei lamna mai Ammon ai god wavana ġelauna Molek

¹¹ Ma i riwei i pa, “Wei kauai i visina-viraviraim ma au parivainuağana bagibagina ma au tarawatu eğä uta votağotağoi, lamna aubaina vibada au uram ana vaitawanei ma am taunola tagogi ana verei.

¹² Wate amam David notanei wei eğä ana kuae maranai tam lawalawaim. Wate natum au urana ana vaitawanei.”

Jeroboam ma Solomon ai virarautua

²⁶ Solomon ana gabemani taunoleina wavana Jeroboam maiteni gulau Solomon i viğavie. Tauna Nebath natuna, ana taon Zeredah au Ephraim, ma alona kaiababa wavana Zeruah.

²⁷ Jeroboam ana virarautua wenanare: Solomon ana taunola doa i taratarai da gwagwa i purupurui ma Jerusalem taon garina ġaimei gavogavoi i vopotapota-naiei.

²⁸ Jeroboam oroto araramanina ma maranai Solomon i 'nanai da tauna i nola kaua, ma i terei da Joseph noinooi dam Ephraim ma Manasseh, ai taunola i vibadei.

²⁹ Mara tagogi, Jeroboam Jerusalem i voterei da i nena ma au mutulua peroveta Shilohei wavana Ahijah maiteni airuağā ava i vinenebelana, Jeroboam kwama vouna i oteoteni.

³⁰ Ahijah, Jeroboam ana kwama vouna i vojjini ma i sikanaiei da 12.

³¹ Ma i riwei, “Wei garai sikasikai 10 ma vaia aubaim, BADA Israel ana God e ririwa, ‘Tau Israel ana vibadana Solomon au urana ana sikatawanei ma ana dam 10 au uram ana terei.’

³²⁻³³ Solomon Tau i geduaieu ma mai Sidon ai god wavinena, Ashtoreth, Moab ai god, Chemosh ma mai Ammon ai god, Milkom i vovoepaepai ma eğä au iviu ita babara bo ita kauana-kauei au matau bo riwau bo au tarawatu ita votağotağoi me amana David i kaukauei nanare. Wate au taunola David ma Jerusalem notaiei, Jerusalem a vinei da Tau ġariuei, lamna aubaina Solomon dam tagogi ana verei da ina vibadei.

³⁵ –‘Wate Solomon natuna au urana Israel ana dam 10‡ ana verem.’

⁴⁰ Solomon i ġoei da Jeroboam ita virağeni, wate tauna i ruba au Egypt, ai gulau Shishak awarina ma kampa i mae da Solomon i 'rağe.

⁴² Solomon au Israel i vigulau da madeğā 40 i kwa.

12

Rehoboam

¹ Mai Israel anatapui i nae au Shekem ma i vipaipai da Rehoboam ita nei ma ita terei ai gulau.

² Maranai au Egypt, Nebath natuna Jeroboam, wei riwana i nonori ma Egypt i voterei ma i naeme. (Tauna au naona Solomon i rovoei da kampa i ruba nae.)

³ Ma Israel babadai riwa i paritawanei da Jeroboam i nei ma anatapui i nae Rehoboam awarina ma i riwei, i pa,

⁴ “Amam nola vitaikaukauai au tepaiai i terei, wate ai vita marina uta votelateli, ma ana vitaunolem.”

⁵ Rehoboam i paribelei i pa, “Ona nae ma aupom vitonuina ona nememei ma ana paribelemi.” Ma rava i vilamonei.

‡ 11:35: Dam ruağā Judah ma Benjamin i voterei

⁶ Ma gulau Rehoboam, dogadogara awari vinuaterena i vaia, taui amana Solomon ana taunola maranai lawalawaininai. I paridadanei i pa, “Wei ravai menanarena ana paribelana-nei?”

⁷ Taui i paribelei i pa, “Mepa da u ġoei da rava ma voagui, ai vibaġa ma vianinei, ma taui aubaim ina vitaunola nonoa.”

⁸ Wate Rehoboam dogodogara ai vinuaterena i geduaiei ma i nae ana kimta awarii, maiteni i rata tagogi, ma marina tauna e vivitaunolei

⁹ Tauna i paridadana, “Ami nota aiwai? Menanare tana kauanei, wei ravai e ririwa da ai vita tana viaburui?”

¹⁰ Ma ana kimta i paribelei i pa, “Nai ravai awarim i ririwa, ‘Amam vita ġaeġaena i vereverelai marina ai vita ma viaburui.’ Wenanare ma riwei, ‘Tau vita ġaeġaena ana veremi eġa me amau!’

¹¹ Amau vita ġaeġaena i veremi wate tau ġaeġaeotana ana terei au tepana! Tauna kwapuei i ravimi wate tau ġorogorova donadonanei ana kwapuimi.”

¹² Aupom tonuġa au murina i riwa nanare Jeroboam ana babada maiteni i nememei Rehoboam awarina.

¹³ Gulau Rehoboam dogadogara ai vinuaterena eġa ita vaia ma pona bagibaginei rava awari i babani.

¹⁴ Tauna ana kimta ai vinuaterena i rautaniġanei ma nanare i riwa, “Amau vita ġaeġaena i veremi; wate tau ana viaitepatepani. Amau i ravimi wate tau ġorogorova donadonanei opimi ana sikai.”

¹⁵ Au naona God ana peroveta Ahijah, Shilohei aiwai Nebath natuna Jeroboam i pariverei marina anona i tupua. Gulau rava ai vinuaterena eġa nonorana ita ġoei, wate lamna BADA i kaukauei da aiwai peroveta i ririwei nanare ina tupua*.

¹⁶ Maranai Israel patarana i 'nanai da gulau taui ai babani i parivirevire, ma gulau i riwei i pa:

“Tauta eġa Jesse natuna David ana damei!

Eġa ana dam ravai!

Oo Israel ona naeme me ami au numa

Oo David am dam oina ma inanai!”

Anina ma mai Israel i nae ai au numa.

¹⁷ Wate Rehoboam mai Israel au Judah maemaei i vibadei.

¹⁸ Adoniram, mai Israel anatapui ai taunola i vibadei. Gulau Rehoboam, Adoniram i paritawanei au Israel da ai taunola ita neiai au Jerusalem wate taui ġaimei i viraurauei da i viraġeni. Gulau Rehoboam laġilaġina ana chariot i gerui ma i nae me au Jerusalem.

¹⁹ Ma wei marana da i nae mai Israel David ana dam ma ai vigulau i geduaiei ma i parivirevirei.

²⁰ Maranai mai Israel anatapui i aramanei da Jeroboam Egyptei i nememei, taui riwa i paritawanei da i nei awarii ma i terei Israel dam anatapuna ai gulau. Dam tagogiava, Judah ava, i mae David maiteni.

Jeroboam bulumakau goldei i kaei

²⁵ Ma ġavia rovona aubaina Jeroboam Shekem taon ġaimei i gari kwaviviroi ma kampa i mae. Wei lamna dobu violaolana, dam Ephraim ai dobu. Muriai i nae ma nanare Penuel taon i gari-kwaviviroi.

* **12:15:** ...da vigulau Solomon natnatuna awariei ina vaitawanei

26-27 Mara tagogi gulau Jeroboam wenanare i vinua-notanota, “Mai Israel anatapui e ġegae au Jerusalem da au tempol pulo e apuapui BADA awarina. Ma mepa da nuuanuai ina virai ma ina audamana Judah gulauna Rehoboam awarina amapo tau ina virāgeniu.” Ma wei vigulauna ina nae me David ana epaepaia awarii.

28 [◊]Ma ana dogadogara maiteni i babani da i vinua-terenei ma bulumakau ruaġa goldei i kauei ma ana rava i riwei, “Jerusalem ġaena i vinigarigari, Oo Israel wei ami god, tauna Egyptei tere-opunemi.”

29 Ma bulumakau goldei tagogi au Bethel ma ġelauna au Dan i terei.[†]

30 Wei lamnei i ġo'apoapoe; aubaina rava ġelaui uama ġaegħaena i naeni da au Dan da burumakauna i voepaepai.

31 Jeroboam maiteni voepaepa gabui ma pulo aniapuni i voanaiei ola au tepai ma rava labalababa eġa mai Levi i vinei da pirisi, pulo tauapuna.

Rehoboam au Judah i vigulau, ma i vigulau da madeġa 17 i kwa. Maranai tauna gulau i maemae, mai Judah god morumorui i raraudunelei. Ma mai Egypt i nei da Judah i viġavie i ma ai tempol purapurai maiai ġaegħei ma gulau ana numa purapurai maiai ġaegħei anatapui i pupuni da i vivanei.

Rehoboam ma Jeroboam i viġaiġaiawa nonoa. Maranai Rehoboam i 'raġe, natuna Abijah au Judah i vigulau madeġa tonuġa i kwa. Tauna maiteni Jeroboam i viġavie. Maranai Abijah i 'raġe, natuna Asa au Judah i vigulau da madeġa 41 i kwa. Tauna gulau aiaina, ma God i raudunelei ma mai Judah ai god morumorui i veparipariei. Tauna mara nonoa mai Israel ai gulau Baasha maiteni i viġaiġaiawa. Maranai Asa i 'raġe natuna Jehoshaphat i vigulau mai Judah awari.

Au Israel Jeroboam natuna Nadad lamna gulau apoapoena, ma nanare aiavoi da tauna au murina i vivulgulau anatapui gulau apoapoei. Nadab mai Israel i vibadei da madeġa ruaġa i kwa ma Baasha tauna i viraġeni, ma Jeroboam ana dam mamae-terenanai maiteni. Wate rava wvana Baasha i vigulau da madeġa 24 i kwa ma i 'raġe. Ma natuna Elah i vigulau da Israel i vibadei da madeġa ruaġa i kwa ma ana sorodia badana tagogi, wvana Zimri, tauna i viraġeni ma i terepa-melei da i vigulau. Wate wiki tagogi au murina mai Israel ai sorodia Omri i terei da gulau, anina ma Zimri i viraġena-melei. Omri i vigulau da madeġa 12 i kwa, anina ma natuna Ahab tauna Israel ana gulau ma i mae da madeġa 22 i kwa.

16

Israel ana Gulau Ahab

30 Omri natuna Ahab, ana ġo'apoapoe i rata guratana BADA awarina eġa me gulau anatapui au naona i vivibada nanare.

31 Tauna i notai da lamna kaua labalababa da i ġo'apoapoe me Nebath natuna Jeroboam i kaukauei nanare. Wate tauna i kauana-guratei maranai mai Sidon ai Gulau Ethbaal natuna Jezebel i ravaġi ma i vikarei da ai god Baal i raudunelei.

32 Ma Baal ana voepaepa gabuna pulo tauapuna au Samaria i voai ma au orana pulo aniapuna i voai.

33 Ahab god wavinena Asherah kokoitauna i vituramairini*. Ma kaua maġamaġau i kauai da BADA, mai Israel ai God ita viamloġaiġaini, me mai Israel ai gulau au naona i kaukauei nanare.

* **12:28:** Exo 32:4 † **12:29:** Mai Israel ai nota da Dan ma Bethel lamna dobu vivivireii. Bethel lamna au Israel (dam 10) au laubadei ma lamna 16 kilometer ota Jerusalem au kolana. Wei eġa uama, ma wei lamna Jerusalem e teretere-ġairei ma rava e ririwei da au Bethel ina voepaepa. Dan lamna Israel au kolana au lavaratei. * **16:33:** Asherah lamna god wavinena, Baal awana; mai Canaan, mai Egypt ma Phonisia anatapui wei godna e viviborumei.

17

Elijah ma Ahab

¹ Peroveta Tishbelei wavana Elijah* ana dobu Tishbe au Gilead, Ahab i riwei, “Riwa kaua! BADA Israel ana God lawalawaina, ma tauna a vivilaragei. Wavanei a riwa da turuvani ega ina peu ma garewa ega ina atuna madega biaga da tau ana riwa da nanare.[†]”

Ma nanare i mae. Madega biaga garewa ega ita atuna, marapoi i getai ma ega lam.

⁸ Ma BADA Elijah i riwei

⁹ “Lagilagina ma nae au taon Zarephath, Sidon au geregerena[‡] ma kampa ma mae. Kampa kaiababa e mamae, a riwei da ina viambagibagim.”

¹⁰ Ma Elijah i nae au Zarephath. Maranai i getai taon ana au anirui, ma kaiababa i 'nanai ai i gunaguna, ma i riwei, “A vivibagaim da waira aburuna uta neiae da ata uma!”

¹¹ Ma i nenea vainana aubaina ma orotona i garara me i pa, “Ma palawa apuapunana aburuna maiteni uta neiae.”

¹² Kaiababa i paribelana i pa, “Riwa kaua! Am BADA God lawalawaina ma wavanei a ririwa, tau awariu ega palawa apuapunana. Awariu palawa aburu kaimojina ma monamona aburuna. Ai a gunaguna da ana nae au numa ma lam damona ana vitavi da natu maiteni ana am ma au murina ana raumolaiga da ana irage.”

¹³⁻¹⁴ Wate Elijah kaiababa i riwei, “Ega ma vinuabola! BADA Israel ana God e ririwa, ‘Am palawa abomana ega ma monamona wagina ega ina kwakwava ma BADA garewa ina paritawaneiae da wapu ina gogo me!’ Anina ma nae au numa ma u ririwa nanare ma kaei, wate au naona palawa aburuna ma apui aubaiu. Ma mae-terenana ma apui aubaimi.”

¹⁵ I nae ma menanare Elijah i ririwei, nanare i kaei. Ma awari lam i mae da aupom biaga i kwa.

¹⁶ Ma me BADA Elijah i parivainuagani nanare palawa au aboma ega ita kwa ma monamona au wagi ega ita kwa.

¹⁷ Muriai kaiababa natuna i doria ma ana doria i vovoguratei anina ma i 'raige.

¹⁸ Ma wavine Elijah awarina i riwa, i pa, “God ana taunola, Aiwai aubaina wei u kaei awariu? U nei weka da au go'apoapoe uta viegai ma natu uta vi'raigene bo?” §

¹⁹ Elijah i paribelei i pa, “Natum ma vereu.” Elijah taubeu, alona au urana i vaia ma i avara-ägei au vatavatara mepa i mamae lana ma ana au animatave i vimataveni.

²⁰ Anina ma ponana i rata ma i raupari BADA awarina, “Oo BADA au God, aiwai aubaina kaua apoapoe kaukauana u kaei kaiababa awarina? Tauna i taravainiu da ana au numa a mamae, ma u kaei da natuna i 'raige?”

²¹ Anina ma Elijah i taduru ma mara tonuga taubeu au tepana i matave ma ponana i rata ma i raupari BADA awarina i pa, “Oo BADA au God, A vibaagaim da tevera ana lawana ma veremeleil!”

²² BADA Elijah ana pari i nonori ma tevera lavutu i vikarei ma i lawana.

²³ Elijah tevera i voepai ma i avara gairei alona awarina ma i riwei, “Ma inanai natum lawalawaina.”

* **17:1:** Elijah anona BADA lamna God. † **17:1:** Mai Canaan e vivitumaigan da ai god Baal garewa e vivibadei, wate maraiga god gelauna wavana Mot anona **iraige**tauna Baal i viraigeni. Mepa da Baal i lawana me, lamna tauna dobu ina vituvanei. Lamna aubaina, Elijah Baal i vimarumarui ma i ririwa da tauna God lawalawaina awarina i vitaunola, ma God garewa ma irage i vibadei, muriai tana inanai maranai ina vomairi da kaiababa natuna ina vilawana-melei ‡ **17:9:** BADA Elijah i paritawanei au Sidon - kampa rava Baal i raudunelana-guratei. Wei lamna Ahab poiana orotona Ethbaal ana gabu, ma wei au marana, Elijah Ahab i raraugovaigei. § **17:18:** Nai marana rava i vitumaigan da doria ma irage lamna God ana kovoiga go'apoapoe aubaina. Kaiababa i vitumaigan da Elijah tauna ana au numa i mamae ma lamna BADA matana i taini awarina ma lamna i kaei da natuna orotona i 'raige.

²⁴ Wavine i riwa, “Marina aramana-kauei da tam God ana taunola, ma BADA ana riwa gamomei e opuopu lamna riwa kaua!”

18

Elijah ma Baal ana peroveta

¹⁻² Madega tonuuga garewa ega ma gomara gaeagaena i mae. Madega au vitonuina BADA Elijah i riwei, I pa, “Ma nae gulau Ahab ma inanai. Ma tau garewa ana paritawaneiai.” Ma Elijah i nae da gulau Ahab ita inanai.

¹⁷ Maranai tauna Elijah i 'nanai ma i riwa, “Wei tam bo, mai Israel rauagai amai?”

¹⁸ Elijah i paribelei, “Tau ega ata rauagai au Jerusalem, wate tam, ma amam ana numa ravai maiteni o rauagai. Taumi BADA ana tarawatu o geduaiei, ma Baal kokoitaui o viviborumei.”

¹⁹ Marina mai Israel anatapui ma gorei da ina nae au ola Carmel ina nebeleu. Baal ana peroveta 450 ma Asherah god wavinena ana peroveta 400 Jezebel ana au aboma e amam, anataputapui ma neiai.

²⁰ Ma Ahab mai Israel anatapui ma Baal ana peroveta i gorei da au ola Carmel ina vinenebelana.

²¹ Elijah patara au naoi i mairi ma i riwei, “Wei vinua-raagaraai mara aiwai ina kwa, ona vinuanaina nae ma ona vianuanaina nei, metauna notana ona vaia? Mepa da BADA God, tauna ona raudunelei. Mepa da Baal god, tauna ona raudunelei.” Wate rava ega aiwai ita riwei.

²² Ma Elijah taui awarii i riwa, “BADA ana peroveta anina tau a mamae. Wate Baal ana peroveta 450.*

²³ Aubaita bull ruaga ona neiai, ma taui ai sia ina rautani ma ina bori muomuo i ma ai au tepana ina terei, wate ega ina ravivoai. Ma tau nanare ana kauei.

²⁴ Ma taumi ona raupari ami god awarina, ma tau ana raupari BADA awarina. Metauna godna ai araratanei i paribelana tauna God ririwa kauana!” Ma rava anatapui i vianina.

²⁵ Elijah Baal ana peroveta i riwei, “Taumi o maga aubaina ona vinao, Bull tagogi ona vinei ma ona vokaukauei. Ami god awarina ona raupari ma ega ai ona ravivoai.”

²⁶ Ma taui ai bull i vaia ma i vokaukauei. Anina ma Baal awarina i raupari, ubaubanai i vikarei da i raviaubenai. Taui i garagarara, “Oo Baal, ma paribelei!” Ma pulo aniapuna i arara kwaviviroi, Wate ega paribelana; ega aiai ita paribelei.

²⁷ Aubenai Elijah i vikarei da i vimarumarui i pa, “Ona raupari guratana! Tauna god! Mepa da e rarauboni bo i nae au ririva bo e vaagavaagai bo e matamatave! Ona ravidagudagui!”

²⁸ Ma taui garara i voguraguratei ma me ai au kaua nanare, naipie i aierei tupuai i boribori-melei ma tara i toitoi.

²⁹ Taui i garagarara da i garagarara da aubigai pulo apuna ana mara. Wate amapo da ega paribelana, ega aiai ita paribelei, ega aiwai ita nonori.

³⁰ Ma Elijah rava i riwei, “Ona nei awariu.” Ma anatapui i nei ma Elijah i mae-kwaviviroi, tauna BADA ana pulo aniapuna i voavoa-melei.

³¹ ³¹ Elijah gaima 12 i vaia, gaima tagogi da Israel ana dam tagogi aubaina. Wava Israel BADA taui noii Jacob i verei.

³² Ma gaimanei pulo aniapuna i voa-melei BADA viborumana aubaina. Ma au adana doba i garai da waira ana ruva 14 Ltr nanare ina vojjini.

* **18:22:** Elijah ana babani lamna gulau wavinena Jezebel e ririwei, tauna i goei da God ana peroveta anatapuna ina virageni. Ahab ana taunola Obadiah i voagu da God ana peroveta gelauui au guba i tere-govaagi ma waira ma lam i vereverei wate ega tata aramanei biaaga lawalawai e mamae. ³¹ **18:31:** Gen 35:10

³³ Pulo aniapuna au tepana ai i vatari, bull i bori-naiei ma siana ai au tepana i terei. Ma i riwa, “Nau 4 ġaeġaei waira ona vioai, ma sia ma ai au tepana ona iwaġi.”

³⁴ Ma nanare i kuae, ma i riwei, “Ona kauana-melei.” Ma nanare i kuae. Ma i riwei, “Mara vitonuina ona kauana-melei.” Ma nanare mara vitonuina i kuae.

³⁵ Waira i toi ġaira da dogo maiteni i vioai.

³⁶ Ma aubigai polo apuna ana mara i ġetai, Elijah i babara-ġae polo aniapuna au ririvana ma i raupari i pa, “Oo BADA, Abraham, Isaac ma Jacob ai God, amadodo rava ma viataiae da tam God au Israel ma tau am taunola, ma anatapuna u ririwei a kuae.

³⁷ BADA ma paribelev, Oo BADA ma paribelev da rava ina aramei da tam, au BADA, tam anina God, ma marina rava orai e taitaina-melei awarim.”

³⁸ Maratagogi BADA ana ai marei i ġairai ma polo bull, ai, ġaima ma doa i aragibui. Ma waira i 'waiwaġia i ġuġuva-pai.

³⁹ Maranai rava wei i 'nanai taui i mae-ġaira au doa da i matave-taitaina ma i garara BADA awarina, “BADA anina God! BADA ainelana anina God!”

⁴⁰ Ma Elijah rava i egari, “Baal ana peroveta ona vojjini; Eġa tagogi ona voterei da ina ruba!” Peroveta anatapui i vojjini ma Elijah taui i riwei da i ġairei au Kishon gau-gaubana ma anatapui i viraġeni.

⁴¹ Ma Elijah gulau Ahab i riwei, “Ma nae da ma am ma garewa ġaġaena gugurana a nononor.”

⁴² Ma Ahab i nae da ita am ma Elijah i ġae ola Carmel au tepana, ma i mae-ġaira au doa ma kolana au ae-tutuna ma i raupari.

⁴³ Ma ana taunola i riwei, “Ma nae ma au bogei ma inana.” Ana taunola i nae da i nememei Elijah awarina ma i riwei, “Eġa aiwai ata inanai.” Anatapuna mara 7 i paritawanei da inana.

⁴⁴ Ma mara vi-7-na i nememei ma i riwa, “Apau aburuna ana rata me oroto urana a inanai bogei i ġeġae.”

Ma Elijah i riwa, “Ma nae ma Ahab ma riwei, ‘Am chariot ma gerui ma ma ġaira muriai da garewa ina rautomenim.’”

⁴⁵ Ma aburuna ava ma lada i ġei ma dobu i waguvarei ma ivena i ruba ma garewa ġaġae otana i toi. Ahab ana chariot i gerui ma i ruba au Jesreel.

⁴⁶ Ma BADA ana rewapani rui Elijah awarina; ma ana gara giana i taini da ana au jigoragi i raġita-jijini ma i lavui da Ahab i votani da i aīgeta au Jesreel.

19

Elijah i ruba govaġa au Sinai

¹ Ma Ahab awana Jezebel i vibenabenamei, aiwai anatapuna Elijah i kaukauei ma menanarena Baal ana peroveta anatapui i vununaiei.

² Ma Jezebel taupariverena i paritawanei Elijah awarina ma i pa, “Wenanarena marana au maratom, tau ana viraġenim me au peroveta u viraġenanei nanare. Mepa da wenanare eġa ana kuae, a raraupari da god ina kovoġa-kaueu bo ina viraġeniu.”

³ Elijah i rovo ma ana lawana aubaina i ruba. I nae au Beersheba au Judah, ma kampa ana taunola i voterei.

⁴ [✳] Ma tauna ainelana i nae aupom au mutulua, ma i ġeta ai *brum* au ġouna ma i kiala ma i raupari da ita iraġe. I riwa i pa, “BADA, tau malau a vai-avei. Au lawana ma vaitawanei marina, tau irairaġeu, me noinou.”

⁵ Ma i mae-ġaera ai *brum* au karea ma i matave. Ma maratagogi BADA ana anela Elijah i vodadani ma i riwa, “Ma vomairi, ma am.”

⁶ I 'nana viravira ma i matamatave lana au kolanei palawa apuapunana ma waira aniuma. I am ma i uma ma i matave me.

⁷ BADA ana anela i nememei, i vodadani ma i riwei, "Ma vomairi ma ma am aubaina am vāgai ina manawa guratana."

⁸ Elijah i vomairi da i am ma lamnei rewapania i vaia da ina babara aupom 40 ma maratom 40 da au Sinai*, BADA ana au ola i āgeta.

⁹ Ma kampa i āgeta au guba ma i matave. Wate BADA i riwa, "Elijah weka aiwai e kaukauei?"

BADA Elijah awarina i āgeta

¹⁰ Elijah i paribelei, "Oo BADA vivirewapana kaukauam, Tau mara nonoa tam a viborumem - tam ainelam. Mai Israel am parivainuāgana bagibagina i viaigai, am pulo aniapuna i viairikarikai, ma am peroveta i virāgena-pai, tau ainelau i votereu, ma marina i āgoei da tau maiteni ina virāgeniu!"

¹¹ BADA i riwa, "Ma opu au ola ma au naoi ma mairi."

Ma Elijah kampa i maimairi ma labu āgaēgaena olana i ravi, da i gunevi, wate bada āga nai kojikojirana au orana. Ive au murina lolo, wate BADA āga nai lolona au orana.

¹² Lolo au murina ai araratana, wate BADA āga nai aina au orana. Ma ai au murina pariatarava jinajinana i nonori.

¹³ Maranai Elijah wei i nonori ana kwama i vaia da naona i puruit[†] ma i opu guba au naona i mairi. Ma pona i riwa, "Elijah weka aiwai e kaukauei?"

¹⁴ I paribelei, "Oo BADA God, vivirewapana kaukauam, mara nonoa tam ainelam aubaim a vivilarāga. Wate Israel ravai am parivainuāgana bagibagina i geduaiei, am pulo aniapuna i rikanaie, ma am peroveta anatapui i virāgeni. Tau ainelau a mamae. Ma marina i āgoei da tau maiteni ina virāgeniu."

¹⁵ BADA i riwa, "Meiei e nenei nanare ma nae me, ma ma-rui au mutulua Damaskas, maranai u āgeta au taon, Hasael ma buloi, mai Syria ai gulau;

¹⁶ Nimshi natuna Jehu ma buloi Israel ai gulau, ma Shaphat natuna Elisha, ana taon Abel-Mehola ma buloi peroveta da am gabu ina vaia.

¹⁷ Aiavoi da Hasael i rovoei da e rubaruba, Jehu taui ina virāgeni ma aiavoi da Jehu i rovoei da e rubaruba, Elisha taui ina virāgeni!‡

¹⁸ Wate mai Israel ai māga 7,000 āga melanai Baal ita raudunelei bo kokoitaui ita vigia-lagolagonei, ina lawana!"

BADA Elisha i kwatuei

¹⁹ Ma Elijah i nae da Shaphat natuna Elisha i viaroni doa i uauatai, bulumakau 12 ruaruāgei ava rāgirāgitai aniuata i taitaini ma i uauata. § Elisha ana bulumakau, au murioina i nolanola. Elijah i āgaira awarina ma ana kwama i votawanei ma Elisha i vioteni.*

²⁰ Elisha bulumakau i votere-tawanei ma Elijah i rubei, ma i riwa, "Au naona ma votereu da ana nae amau ma alou ana inanai ma ana vigia-lagolagonei ma tana nae."

Elijah i paribelei, "Anina ma nae wate aiwai a kaei awarim ma vinuanotenotei!"

²¹ Ma Elisha i nae da ana bulumakau ruāgai i virāgeni, pawe bulumakau au uai i viaigaigai da ai i viviri da sia i apui ma rava i verei da i am. Anina ma i opu da Elijah i votagotagoi.

* **19:8:** Sinai wavana āgelauna lamna Horeb Weka BADA i viatataiana-melei mai Israel awarii ma ana tarawatu i verei. (Exo 19:20) † **19:13:** Mai Israel i vitumāgana da āga aiai BADA ita inanai ma lawalawaina ita mae. (Exo 3:6) ‡ **19:17:** BADA ana rava ina kovogī ana parivainuāgana bagibagina i gai aubaina. § **19:19:** Mai Israel burumakauei ipa iramei e taitaini da e uauata. * **19:19:** Wei lamna mataira da Elisha Elijah ana gabu i vaia da peroveta.

2 King Gulagulau Viruaina

Pariverena

Gulagulau ai buka viruaina lamna mai Israel e bababaniei. Gulau David ana vibadana au murina, aiwai i tupua lamna wei bukai ruaāga gulagulau naona ma viruaina e ririweta. Gulagulau bukana naona e ririweta David au murina Solomon menanarena da i vigulau.

Solomon i'raāge ma au murina Israel i kai da baba ruaāga. Dobuna au rauanaāgei i īgorei Judah ma au lavaratei i īgorei Israel. Maranai mai Judah ma mai Israel gulagulaui, God i voteletelei lamna nuauba i mae. Wate maraāgela gulagulaui God i rawaāgaiāgei ma god īgelaui i raudunelei. Anina ma nuabola i tupua.

Maranai mai Israel God votelatelana i voterei, Tauna peroveta i paritawanei awari. Ma Gulagulau bukana viruaina au orana lamna peroveta wavana naenaena Elisha. Tauna God ana rewapanei kaua īgaeāgei i kaukauei, ma rava awari i jimajima da ita mae-tavirei God awarina.

Elisha i'raāge ma au murina, gulagulau maāgamaāgai i apoapoe kaua. Anina ma God ana rava i kovoāgi ma lamnei ai īgavia taui i vovaiubai ma i pani ma i naiei. Au naona mai Israel awari i tupua ma muriai mai Judah awari i tupua. God ana rava mai Judah eāga ita vianinei da ita nae me ai au dobu da madeāga 70 i kwa.

Virarautua rereāgana

Israel i kai da Vibadana ruaāga, Israel ma Judah 1:1–17:41

Peroveta Elijah ana virarautua 1:1–13:20

Judah gulagulaui ma Israel gulagulaui ai virarautua 8:16–17:4

Assyria gulauna Samaria i vovaiubai ma Israel i pupuna-naiei ma ana vibadana i kwa 17:5-40

Judah gulagulaui ai virarautua 18:1–21:26

Gulau Hezekiah ana au vibada i raukarei ma i nae da gulau Josiah ana au vibada 18:1–21:26

Judah gulagulau damona ai virarautua 23:31–24:20

Babilon gulauna Jerusalem i vovaiubai da Judah ana vibadana i vikwai 25:1-30.

2

Elijah i īgaiēi au mara

¹ Ma Mara i īgetai da BADA Elijah labuei ita īgaiēi au mara. Elijah ma Elisha Gilgal i voterei ma i nenaē.

² Ma Elijah, Elisha i riwei i pa, “Weka ma mae ma BADA i riweu da ana nae au Bethel.”

Wate Elisha i paribelei, “Riwa kaua da BADA lawalawaina ma nanare tam lawalawaim, tau nanare eāga melanai ana voterem.” Anina ma airuaāga i īgaira au Bethel.

³ God ana peroveta borui au Bethel maemaei i opui Elisha awarina ma i riwei i pa, “Tam u aramanei da BADA am bada amadodo awarim ina vaitawanei?”

Elisha i paribelei, “Ee a 'ramanei, wate lamna eāga ona babaniei.”

⁴ Ma Elijah, Elisha i riwei, “Weka ma mae, BADA i riweu da ana nae au Jeriko.”

Wate Elisha i riwa, “Riwa kaua da BADA lawalawaina ma nanare tam lawalawaim, tau nanare eāga melanai ana voterem.” Anina ma taui i nae au Jeriko.

⁵ Ma God ana peroveta borui kampa au Jeriko maemaei i opui ma Elisha i nebelei ma i riwei, “Tam u aramanei bo da BADA am bada amadodo awarim ina vaitawanei?”

Elisha i paribelei, “Ee a 'ramanei, wate lamna eāga ona babaniei.”

⁶ Ma Elijah i riwei, “Weka ma mae, BADA e paripari-tawaneu au Waira Jordan.”

Wate Elisha i paribelei i pa, "Riwa kaua da BADA lawalawaina ma nanare tam lawalawaim, tau nanare ega melanai ana voterem." Ma airuaaga i babara nae.

⁷ God ana peroveta 50 tauui votagotaigoi, ma au muri i tumairi maranai Elijah ma Elisha Waira Jordan au adana i tumairi.

⁸ Elijah ana kwama i votawanei ma i piri ma lamnei waira tepana i ravi. Da i vilamonei au oienai ma au kelakelauna ma tauui au pouna au alalana i babara damana.

⁹ Maranai au baba gelauna i geta Elijah, Elisha i riwei, "Ma riweu aiwai ana kaeui aubaim muriai da ina gaeiu."

Ma Elisha i paribelei, "Tau am gabu ana vaia da peroveta ai bada lamna aubaina a goei da am rewapana gaegaena, ma viaitepatepani ma ma veredamanue."

¹⁰ Elijah i riwa, "Lamna kaua piripirina e vivibaigei, wate mepa da u inanai ina gaiigaieu, lamna u vivibaigei u vaia ma ega, lamna ega."

¹¹ Ma airuaaga i bababara ma i vibababani ma hosi araratana, chariot araratana i taina getei ma tauui i ravigori. Ma Elijah ma Elisha au poui i ruba ma BADA Elijah labuei i gaei au mara.

¹² Elisha wei i 'nanai ma i garara, "Amau! Amau! Mai Israel taugagaloaina vivirepana! Tam u nae!" Ma Elijah ega ita inana-melei. Nuanuana i bola-kauei ma ana kwama au pouna i sikai.

¹³ Ma Elisha i nae ma Elijah ana kwama au doa i vivipeunia, maranai i gaiigaiei au mara, i voepai ma i nae me waira au adana.

¹⁴ Ma kwamana i peupeu i vaia ma waira tepana i ravi ma i riwa, "BADA Elijah ana God mepa?" Maranai waira i ravi, waira i vilamonei ma au pouna au alalana i babara damana.

¹⁵ Jeriko ai peroveta boruna 50 au weia ma i 'nanai aiwai i tupua ma i riwa, "Elijah ana rewapana i damana Elisha awarina." Ma i nae da ita nebelei ma i mae-gaira au doa ma i raudune.

¹⁶ Ma i riwa i pa, "Tauai rewapana 50, ma paritawanelai da am bada ana baiei. Mepa da BADA Aruana, Elijah i voepai da mepa au ola bo au gaugauba i teretawanei."

Elisha i paribelei, "Ega! Ega ona nae."

¹⁷ Wate tauui i voiigirigiri da tauna i vinimala da i paritawanei i pa, "Anina ona nae." Wate tauui 50 aupom tonuaga i baia ma ega ita nelaaga.

¹⁸ Maranai tauui i nememei au Jeriko, Elisha tauui i riwei, "A riwemi da avena ota nae!"

4

Elisha wavine Shunemei i voagui

⁸ Mara tagogi Elisha i nae au Shunem taon. * Weka wavine manemanena i mae, ma Elisha i vibaaga-guratei da ita mae da ita am. Ma maranai Elisha wei au dobuna e vaavaagai, tauna weka i amam.

⁹ Wavine awana i riwei, "Aramanei da orotona weka e nenei lamna BADA ana peroveta vivivireina.

¹⁰ Ana numa aburuna au poewa[†] tana voai ma ani matave, kepakepa, ani kiala ma rampa tana terei au orana tauna aubaina. Ma kampa ina mae maranai e nenei."

¹¹ Mara tagogi Elisha i nei ma i gae ana au numa da i rauvirai.

¹⁴ Muriai Elisha ana taunola wavana Gehasi i paridadanei, "Aiwi ana kaeui wavinena aubaina."

Ma Gehasi i paribelei, "Tauna ega natuna orotona ma awana i magura."

* **4:8:** Shunem taun 50 Km da au Samaria taun. † **4:10:** Mai Israel ai poewa dabababai.

¹⁵ Ma Elisha i riwa, “Ma ġoreiai.” Ma Gehasi wavine i ġoreiai ma i nei da au metaeta i raumairiei.

¹⁶ [◇]Ma Elisha wavine i riwei, “Wenanare marana madeġa au ġelauna tam natum orotona ma ġuniġuni.”

Wavine i paribelei, “Eġa au bada. Tam peroveta ma tau am taunola, eġa ma morui!”

¹⁷ Wate wavine i raumanawa. Ma marana wenanare madeġana au ġelauna wavinena natuna orotona i ġuniġuni, Elisha i ririweia nanare.

Elisha rava 100 i viambagibagi

⁴² Mara ġelauna, oroto tagogi melagai Baal-Shalishahei i nei. Tauna nai madeġana witina naona i labai ma palawa i apui da iavana 20. Ma witi majiġai baikena maiteni i neiai da Elisha i verei. Elisha ana taunola i riwei, “Rava lam[‡] ma verei da ina am.”

⁴³ Ma ana taunola i garara, “Aiwal! Wei lam eġa tagotagogina da rava 100 tana viambagibagi?” Wate i paribelei i pa, “BADA i riwa da rava ma verei da ina am ma lam ina mae-terei.”

⁴⁴ Ma lam au naoi i terei ma taui i am ma lam i mae-terei, BADA i ririweia nanare.

5

Elisha Namaan i vilawani

¹ Namaan lamna mai Syria ai sorodia badana. BADA, Namaan awarina i mae ma lamnei ai ġavia i vovovai-ubai. Ma lamna aubaina ai gulau, tauna i vivirana-kauei ma i vitumaġanei. Namaan sorodia wavana naenaena wate doria lepera i vaia.

² Marana patapatai mai Syria i nenei au Israel i viviġavia. Mara tagogi tevera guguinina i pani da i naiei da ai bada Namaan awana i verei da ana taunola.

³ Mara tagogi guguinina ana bada wavinena i riwei, “Au bada, am bada uta riwanda-dadanei mepa da ita nae perovetana au Samaria maemaena awarina. Tauna ana doria ita inanai ma ita vilawani.”

⁹ Ma Namaan ana hosi ma chariot borui i nae ma Elisha ana au metaeta i raumairiei.

¹⁰ Wate Elisha taupariverena i paritawanei da i riwei i pa, “Ma nae da au waira Jordan ma oġa-melem mara seven ma lepera doriana ina voterem ma opim ina ai-me.”

¹¹ Wate Namaan amlona i ġaiġai kaua ma i riwa i pa, “Tau au nota ġaegħaena da peroveta ita opui da ita inanai da urana, opiu au tepana mataira ita kauei ma ana BADA God awarina ita raupari da ata lawana.

¹² Wate waira Amanah ma Pharpar au Syria i ai telera eġa me Israel wairai. Tau kampa ata toa ma ata lawana.” Ma Namaan i mae-tavirei ma ana amloġaġaina i nae.

¹³ Ana laralaraga i nae awarina ma i riwei, “Au bada mepa da ita riwem da aiwai piripirina uta kauei, lamna uta kauei tapa? Wei lamna kaua telatelana i ririwei nanare, ‘Ma toa ma ma lawana.’”

¹⁴ Ma Namaan i ġaira au waira Jordan ma mara seven waira au orana i ġaira, me peroveta i ririwei nanare. Ma opina i ai me da me tevera tupuana nanare ma lepera doriana i kwa.

¹⁵ Ma Namaan ana laralaraga maiteni i nae me Elisha awarina ma i riwa, “Marina aramanei da au dobu, god eġa ita mamae anina Israel ana God tauna ava; lamna aubaina au bada pulo a vereverem ma vaia.”

¹⁶ Wate Elisha i paribelei, “Riwa kaua da BADA a vivitaunolei lamna BADA lawalawaina, ma wavanei a ririwa tau eġa pulo ana vaia.” Ma Namaan i babani bagibagi da Elisha pulona ita vaia, wate tauna pulona i geduaie.

[◇] **4:16:** Gen 18:14 [‡] **4:42:** Peroveta ġelau Elisha maiteni i mamae, kampa gomara i peu ma rava i vinuapoapoe.

¹⁷ Ma Namaan i riwa, “Mepa da nanare lamna ma vianineu da donki ruaā ai vita ruvana Israel doana ana vigerui da ana naiei au numa. Ma marina da e nena, eā melanai pulo ana apui bo sia taputapuna ana apui god ġelaui awarii, anina BADA ainelana awarina.

¹⁸ Tau am taunola ma a ġoei da BADA au ġoa apoapoei ina nota-tawanei, kaua tagogi ava awarinei; maranai au gulau a ruiruiee ana au tempol ma tauna au urau e vovoijina ma maiteni a mamae-ġaira ma Syria ai god Rimmon a viviborumei.”

¹⁹ Elisha i riwa, “Ana nuubam ma nae.” Ma Namaan i nae.

Mai Israel ai gulau Ahab au 851 BC. i'raġe. Au murina gulagulau ġelaui i mae ma taui au Samaria i mae. Maranai Hoshea i vigulau. Au 724 BC. mai Assyria ai sorodia Israel i viġavie.

17

Samaria i peu

Mai Israel ai gulau damona lamna Hoshea. Tauna i mae gulau au Israel madeġa 9, wate Assyria ai gulau i pariparinīġaiei ma lamna aubaina i pani.

⁵⁻⁶ Assyria ai gulau Israel anatapuna i naeni, da i ġeta da Samaria taon I mae-kwaviviroi, ma i gudu-tomeni da madeġa tonuā i kwa. Maranai Hosea ana vigulau madeġana 9 i ġetai, Mai Assyria Samaria taon i ruini mai Israel i pupuna-naiei au Assyria. Ma au Halal, taon, waira Habor au ririvana ma mai Mede ai au taon nununai i verei da i raunuma.

⁷⁻⁸ Wei kovoġai i nei mai Israel awari aubaina taui god ġelaui i viviborumei. Taui ai ġoa apoapoe i rata kauaBADA ai God awarina, Wariaġa Tauna Egypt ai gulau Pharaoh au urana Israel i vai-tawanei ma aiaii i ravena-opunei. Mai Israel ai God eteni i pupuna-opunei ai kaua i votaġotagoi da i kaukauei ma kaua waduboi ġelaui Israel ai gulagulaui i kaukauei.

⁹⁻¹⁰ Mai Israel kaua apoapoei i kaukauei BADA ai God awarina ma BADA wei kauai eā ita vinuajiae. Taui voepaepa gabui i voanaiei god morumorui voepaepaei aubaina au taon nununai, melagai aburuoina da au taon ġaegaei. Ola muomuoi anatapui au tepai ma ai anatapui au ġoui gana vinualaulaui i terenaei ma Asherah ana tuatua ma kokoitaui i vituramairini.

BADA mai Israel ai ġoa apoapoe aubaina i viopuni

²⁴ Assyria ai gulau taon nununai ravai mai Babilon, Cuthah, Awa, Hamath ma Sepharvaim i vivaneiae da Samaria, ana au taon nununai kampa i terei da i mae. Taui mai Israel numa i ruba-tawanei i raunumei.

²⁵ Vouvounai wei ravai eā BADA ita viborumei, lamna aubaina lion ġelaui i paritawaneiae da rava i viviraġeni.

²⁶ Ma rava Assyria ai gulau ana riwa i paritawanei i pa, “Rava au Samaria u terenaei, dobuna Godna ana tarawatu eā ita aramanei. Lamna aubaina ma dobuna ana God, lion i paritawanei ma ravai e viviraġeni.”

²⁷ Ma mai Assyria ai gulau rava i egari, i pa, “Pirisi tagogi au Samaria o panipania, ona paritawana-melei ma, dobuna ana God, ana kaua ravai voui ina viararamani.”

²⁸ Anina ma pirisi tagogi au naona i naenaei au Assyria i neiana-melei da au Bethel i mae. Kampa rava i viararamani da BADA viborumei.

²⁹ Wate jentail ravai nununai ai god morumorui kokoitaui i kaukauei ma metauna au taona i mamae, kampa ola au tepai au naona mai Israel au Samaria ai voepaepa gabui i voavoailana, kampa i terenaei.

18

Hezekiah i mae mai Judah ai gulau

¹ Elah natuna Hosea i vigulau au Israel madeğä tonuğä i kwa. Wei maranaina au Judah Hezekiah, Ahaz natuna i vigulau.

² Tauna ana madeğä 25 ma i vibada au Jerusalem da madeğä 29 i kwa. Alona Abi, Zekariah natuna.

³ Tauna kaua aiaii avai i kaukauei BADA awarina me noina David nanare.

⁴ [◊]Ma god morumorui ai ani voepaepa gabui anatapui i votawatawanei. Ma kokoitau i viairikarikai ma Asherah tuatuana i taratuituina-naiei. Ma wariağä Moses mota bronzei, kokoitaui i kauei, i viviborumei. Hezekiah motana kokoitauna maiteni i viaigimagimai. (Mai Israel motana i ġorei Nehushtan.)

⁵ Hezekiah BADA, Israel ana God i vitumağanana-kauei. Eğä gulau ġelauna au Judah nanare me tauna, ma eğä aiai ġelauna nanare au naona i mae bo muriae i mae.

⁶ I vipatutu BADA awarina au anatapuna ma i vovoguratei da God ana tarawatu Moses i vereverei anatapuna i vovotağotağoi.

⁷ BADA tauna awarina i mae ma ana nola anatapuna i davudavu. Tauna Assyria ai gulau i parivireirei ma eğä aubaina ita vilaraga.

⁸ Ma mai Philistia anatapui i vovaiubai, melağai da taon ġaimei garigarina anatapuna i pupuni da au Gaza i ġeta.

Maranai Hezekiah i'raġe, Manasseh amana i raviepaiai da i vigulau.

21

Manasseh i vigulau au Judah

¹ Manasseh ana madeğä 12 ma i vigulau au Jerusalem, ma i vibada madeğä 55. Tauna alona Hephisibah.

² Wariağä BADA eteni ravai i virubai ai kaua vinuamedamedai aubaina maranai mai Israel i ruirui au Canaan. Manasseh wei ravai ai kaua i votağotağoi da i kaukauei ma ana ġoa apoapoe i rata BADA au matana,

³ Manasseh ola muomuoi au tepai god morumorui awari voepaepa gabui amana i viairikarikai, i voa-melei. Ma nanare pulo aniapuna i voanaiei Baal awarina, ma Asherah tuatuana i tonanaiei me Israel ana gulau Ahab. Manasseh wate nanare ubona i viviborumei.

⁴ [◊]Tauna god morumorui ai pulo aniapuna i voanaiei BADA ana tempol au orana, wei gabuna aubaina BADA i riwa i pa, “Wavau au tempol ina mae.”

⁵ Tempol au metaetana, gabu garigarina au orana Pulo aniapui ruağä i voai ubona god aubaii.

⁶ Manasseh natuna orotona ai au araratana i apui ana pulo,* ma parauma ma baravu ma gweri da ginauri ravai i rautaniğanei. Kaua mağamağäui apoapoe kaukauai i kauei ma BADA amlona i ġaiğai kaua.

¹⁰ Ma lamna aubaina BADA ana peroveta awariei i babani i pa,

¹¹ “Gulau Manasseh kaua mağamağäui vinuamedamedai i kaukauei, ma tauna i apoapoe kaua eğä me mai Amori, taui wei dobuna i maeni muriae da mai Israel. Ai kokoitau miramirai awariei mai Judah i raveni da i ġo’apoapoe.

¹² Lamna aubaina BADA Israel ana God wenanare e ririwa, ‘Kovoğä ġaeğaeotana ana neiae Judah ma Jerusalem awarii da maranai rava anatapui riwana taniğiae ina nonori ma orai ina aeupai.

* ^{18:4:} Num 21:9 ^{◊ 21:4:} 2Sa 7:13 * ^{21:6:} I apui mai Canaan ai god Molek awarina.

¹³ Ruvana tagoginei Samaria a kovoḡi ma ruvana tagoginei Jerusalem ma Israel ai gulau Ahab ana epaepaia maiteni a kovoḡi. Jerusalem ravai ana amaga-tawanei, me aboma ita amamaḡi, ma i vitaragabubui.

¹⁴⁻¹⁵ Au rava i ḡo'apoapoe awariu, maranai noinooii Egypt i opu-tawanei da marina. Wei e viviamloḡaiḡainiu. Ma rava mamae-terenai ana inana-tawanei, ma ana veredamanei ḡavia awarii ma taui ina vovaiubai ma ai purapura ina kwalei."

¹⁶ Manasseh mai Judah i raveni da god morumorui i viborumei ma BADA i vijibog; wate ega lamna ava ma rava aiaii i viraḡena labalababai da tara i kororo da Jerusalem etanaina i vioai au giana da au giana:

¹⁸ Manasseh i'raḡe ma ana numa au ririvana dobu wavana Uzza ana au wapu i doboi, Ma natuna Amon ana gabu i vaia da i vigulau.

Amon i vigulau au Judah

¹⁹ Amon ana madeḡa 22 ma i vigulau. Ma i vibada madeḡa ruaḡa au Jerusalem. Tauna alona Meshulemeth, oroto Jotbahei wavana Harus natuna

²⁰ Tauna ana ḡo'apoapoe, i rata kaua BADA awarina me amana nanare.

²¹ Amana i ḡovaivaitei ma god morumorui i viborumei.

²² Tauna noinooii ai God, BADA i rawaḡaiḡaiei ma ana tarawatu ega ita votaḡotaḡoi.

²³ Ana gabemani babadai Gulau Amon i viogei da ana au gulau numana i viraḡeni.

²⁴ Wate mai Judah, rava gulau Amon viraḡenana i viogatarei anatapui i viviraḡena-naiei ma natuna Josiah i terei da i vigulau.

22

Josiah i vigulau au Judah

¹ Josiah ana madeḡa 8 maranai i vigulau au Judah ma i vibada au Jerusalem madeḡa 31. Tauna alona Jedidah, oroto Boskathei Adaiah natuna.

² Tauna BADA au matana aiwai ana tapuna i kauana-kauei ma noina David au ivina i tua ma BADA ana tarawatu ana tapuna i votaḡotaḡo-kauei.

Josiah nelara ḡelaui i terei da BADA ana tempol i voavoa-virai lamna maranaina Moses ana tarawatu au buka i girugirumi i nelagai da i neiai Josiah awarina.

¹¹ Maranai gulau i nonori aiwai Tarawatu au bukana i girumi, ma ana gara i viaisikasikai.

¹² Ma gulau Josiah ana taunola pirisi Hilkiah, Saphan natuna Ahikam, Micaiah natuna Akbor, Shaphan gulau ana taugiruma ma Asaiah gulau ana tauvinuaterena i riwei i pa,

¹³ "Noinoita wei bukana riwana ega ita votaḡotaḡoi, ma aiwai i ririwei ega ita votaḡotaḡoi, lamna aubaina BADA amlona i ḡaigai awarita. Lamna aubaina ona nae au tempol ma BADA awarina ona raupari tau ma wei dobuna ravai aubaii ma Judah ravai ḡelaui aubai. Ma ona paridadana wei au bukana aiwai i girumi."

Josiah ana taunola babadai i nae BADA ana peroveta tagogi awarina. Wei perovetana lamna wavine ma riwa i paritawanei i nae me gulau awarina.

¹⁶⁻¹⁷ BADA wenanare i riwa, "Tau wei dobuna ma dobuna taumaenina ana kovaḡa kauei." I girugirumia nanare, ma lamna gulau awarimi i 'avi, BADA wenanare i riwa, "Tau i geduaieu ma god ḡelaui i viviborumei ma lamna i viamloḡaiḡainiu. Jerusalem awarina orau amapo da e ararai ma amapo ega ina dauva."

¹⁸ Wate ona naeme Judah gulauna, i paritawanemi awarina da ona riwei, "BADA Israel ana God e ririwa da

¹⁹ Maranai u nonori menanare Jerusalem ma taumaenina ana kovoğanei. Tam u rupena ma u vilamolamona tau BADA awariu, am gara u viaisikasikai ma u tou, Tau ana kauei da ina apoapoe kaua, rava ma dobu ana kovoğī da eğā aiai wei doana ina maeni.

²⁰ Ma kovoğana a neneiai au Jerusalem eğā ina nei da am irağe au murina. Ana voterem da ana nuaubam ma irağe."

Ma wei pariverena i naiei ma gulau i riwei. Josiah god morumorui viborumai i viğaei.

23

Josiah i parivainuağana da ina votelatela

¹ Gulau Josiah babada anatapui au Judah ma Jerusalem i ǵoreiai.

² Ma pirisi ma peroveta ma rava molamolakana da manemanena, anatapui i ǵae BADA ana au tempol. Kampa gulau parivainuağana bagibagina bukana tempol au orana i nenelağai i iava-tapui awarii.

³ Gulau ana au gabu i mairi tempol tuatuana au naona ma BADA maiteni parivainuağana bagibagina i ravivouni da tauna BADA ana tarawatu ma ana riwa bagibagina orana ma aruana taputapunei ina vojjini, i ririwei nanare au bukana. Ma rava anatapui nanare i parivainuağana.

⁴ [✳] Ma gulau, pirisi ǵetelarana Hilkiah, ana pirisi babadai ma tempol taupainii i egari da BADA ana tempol au orana aiwaiei Baal ma god wavinena Asherah ma ubona godna morumorui i viviborumei anatapui ita opunieiai. Gulau wei purapurai anatapui i naiei da gaugauba Kidron au ririvana i apu-naiei, ma lapukarei i vivanei au Bethel.

Anina ma Josiah mai Judah ma mai Israel ai dobu i naeni ma mepa rava kokoitau i raraudunelei ola muomuoi au tepai anatapui i pupuni ma pirisi kokoitau taurauduneleina anatapui i virağeni.

Ma gulagulau aiavoi Josiah i votağotağoi taui BADA eğā ita vivirei ma ai ǵoa i apoapoei BADA awarina.

2 Chronicles Vinolanola Viruaina

Pariverena

Wei bukai Chronicles 1 ma 2 virarautuana tagogina Samuel 1 & 2 ma gulagulau ai au buka 1 & 2 e mamae. Chronicles 1, gulau David e virarautuei ma ana oga tempol au Jerusalem aubaina. David nola ogana pirisi i verei. Tauna i ġoei da rava anatapui BADA ina viborumana-kauei. Chronicles Viruaina mai Israel ai gulagulau ai nola i babaniei, menanare Solomon ana taunola BADA ana tempol i voai au Jerusalem. Solomon iraġe ma au murina menanare ana dobu i kai da ruaġa. Chronicles 2, gulagulau ruaġa ai kaua e bababaniei. Gulau ġelaui aiai taui BADA i viviborumei wate gulau maġamaġaui i apoapoe kaua. Taui eġa BADA ana tarawatu ita votaġotaġoi. Taui god morumorui i votaġotaġoi. Wei gulaui nuabola ai rava i verei. Ma BADA ai ġavia i vianinei da i nei ma dobui ruaġai i viġavie i da i pupuni. Ma muriai BADA Judah mamae terenai i neiana-meleiai.

36

Judah e vovoapoapoe

¹⁴ Ma pirisi ai babada ma rava anataputapui, BADA ana parivainuaġana bagibagina eġa ita vojijini ma jentail au ririvai maemaei ai kaua apoapoei kaukauai ma ai bua i ġovaivaitei. Ma lamnei BADA ana Tempol vivivireina au Jerusalem i vimiramirai.

¹⁵ Mai Judah ġoġoġai ai God BADA, ana rava ma ana tempol nuanuana i bolai ma lamna aubaina ana peroveta nununai i paripari-tawanei da rava ai ġoa apoapoe ita rupeni.

¹⁶ Wate taui God ana peroveta i vijiboġi ma eġa ita vivrei ma au damona BADA ana amloġaiġai i rata guratana da menanare ita viubanei.

Mai Babilon Jerusalem i vipupui

¹⁷ Anina ma BADA mai Babilon ai gulau i paritawanei da Jerusalem i vipupui. Ai sorodia nelara voui tempol au orana i viraġena-naiei. Taui mai Judea eġa ita rau-nuapoapoelei ma waivine ma laraga ma rava magumaguri ma doridoriai. BADA mai Judea anatapui i verenei Babilon ai gulau Nebuchadnezzar au urana.

¹⁸ Tauna Tempol ana purapura ġaegħaei da muomuo i mane anatapui i pupuna-naiei. Gulau ana gabemani babadai ai numa i viairikarikai ma mane ma purapura i pupuna-naiei au Babilon.

¹⁹ Ma God ana Tempoli apui ma Jerusalem garina i viairikarikai; ma gulau ana numa ma numa ġelaui anatapui ma purapura mae-terenana anatapui i viairikarikai ma i apu-naiei, eġa aiwai ita mae.

²⁰ Ma aiavoi lawalawaii i mamae, anatapui i paninaiei au Babilon da i vitaunola. Ma muriai mai Persia nai dobunaBabilon i pupuni ma i vibadei.

²¹ Mai Israel ai doa ipipipie i taui madeġa au vi-7-na ai doana eġa lauvitau ita verei, lamna aubaina i kovōgi, da i pupuna-naiei au Babylon da madeġa 70 i kwa. BADA ana peroveta Jeremiah i ririweia nanare i tupua.

²² Au Persia gulau Sairas ana vibada madeġana tagogi, ma BADA ana peroveta Jeremiah aiwai i ririweia marina i tupua, Persia ai gulau orana i ravi-dagudagui da i giruma ma i vibabarai ana au vigulau au anatapuna.

²³ Mai Persia ai gulau Sairas, wei i riwei,

“BADA, Aidamo ana God, dobu anatapuna vibadana au urau i terei. Ma i vineu da ana Tempol au Jerusalem, Judah au paratana ana voa-melei. Ma taumi aiavoi BADA

ana rava, o ūgoēgoei da ona nae me kampa, lamna anina da ona nae. Ma BADA ami God
ina gagaloemi."

Ezra

Pariverena

Wei bukana Ezra e ririweta da menanare mai Judea au Babilon i mae ma ġelaui i naeme ai au dobu au Jerusalem da BADA ana Tempol ina voa-melei.

3

Pulo aniapuna i voa-melei

¹ Mai Israel ai au dobu i mae nawaravi ^vi⁷ⁿa ma marina taui anatapui i netagogiai au Jerusalem.

² Nai maranai Josadak natuna Jeshua ana rava pirisi ġelaui maiteni, ma Shealtiel natuna Zerubabel ana dam ravai maiteni; pulo aniapuna i voai Israel ana God awarina. Me God ana peroveta Moses, ana Tarawatu i ririweia nanare.

³ Avena da taui nai dobuna taumaeni i rovorovoei; wate pulo aniapuna ana au gabu wadubona i voai. Ma i vikarei da ubaubanai ma aubigai patapatana pulo i apuapui BADA awarina.

Tempol i voa-melei

⁷ Gulau Sairas i riwa da wenanare ita kuae. Taui mane ġaima taubori ma kamda ravai ita verei. Ma lam, wain ma oil mai Sidon ma mai Tyre ita verei da ai cedar au Lebanon bogei ita towana-neiai au Joppa.

⁸ Ma Madęga viruaina nawaravina au viruaina Zerubabel ma Jeshua ma varevarei (pirisi ma mai Levi ma rava ġelaui maiteni i vivipanipani i nememei au Jerusalem) ma BADA ana Tempol voana i vikarei. Ma Levi ana damei nelara ai madęga 20 da nore i ġeġae i terei da nola i vibadei.

Rava i nola da God ana Tempol i voa-melei madęga 21 au orana.

6

Tempol i viaianini

¹⁶ Anina ma Mai Israel piripirisi ma dam Levi ravai ma rava anatapui panipaniei i nenememei ana nuaiaji God ana Tempol i vovivirei God voepaepana aubaina.

Nehemiah

Pariverena

Nehemiah Wei au bukana e ririweta, menanare mai Judea ġelaui au Babilon i mamae, i naeme ai au dobu Jerusalem da garina ina voai-melei.

8

Ezra tarawatu bukana-rava awari i 'avi

¹ Rava anatapui Jerusalem ana au anirui e ġoreġorei Samaim,* i vitagogie. Ma taui tarawatu badana Ezra i riwei da Moses ana tarawatu bukana ita neiai, wei tarawatuna BADA mai Israel i verevereria.

² Ma aupom naona au nawaravi au vi-7-na, pulo tauapuna pirisi Ezra tarawatu bukana i neiai patarana i vitagogieina awari, nelarai ma waivinei ma roaroa awari metaui da iava i aramanei.

³ Ma Ezra au deba i mairi ma ponana ġaegħenei bukana i 'avi rava awarii, maratomtomai i vikarei da aubenai ma anatapui i rautaniġana kaua.

⁵ Ezra vatara au tepana i mairi rava au matai ma maranai buka i votawanei, rava anatapui i vomaimairi.

⁶ Anina ma Ezra BADA God ġaegħena i voepaepai; ma rava urai i voepai ma i paribelei i pa, “Amen, Amen!” Ma i raudune au doa ma BADA i voepaepai.

⁸ Ma Levi ana dam ravai, bukana rava awari i 'avi ma i viararamani† da taui riwana anona i aramanei.

⁹ Anina ma Gavena Nehemiah, ma pirisi, taugiruma Ezra ma dam Levi ravai, rava awari i viararamana. Marina rava awarii i riwa i pa, “Wei marana tana vovaivirei BADA ata God awarina. Lamna aubaina eġa ona vinuabola ma ona tou.”

¹⁰ Ma Nehemiah i riwa, “Ona nae ami au numa ma ona am kaua ma ona uma-kaua ma rava eġa ita lauvoa, ona taraiġuei. Wei marana lamna mara vivivireina BADA awarina. Lamna aubaina BADA ina vinuainimi, eġa ona vinuabola, aubaina BADA ana nuaiai awarimi lamna ami rewapani!”

* **8:1:** Wei metaetana lamna Jerusalem garina ana anirui tagogi e ġoreġorei Samaim wate ata ponei Waira. Wei aniruina lamna waira dogona au ġereġerena au maramatanei. † **8:8:** Bible pona Hebrewi i girumi ma wei ravai pona arama i aramanei lamna aubaina viararamana maiteni i kaukauei.

Job

Pariverena

Rava jijimanina tagogi vinuabola apoapoei mağamağau i nenelağai lamna au bukana e vivirarautuei. Job ana nota ma ana rava ai nota wei nuabolai awari lamna e viviatataieta. Ana rava e notanotai da Job kaua apoapoei i kauei aubaina God, tauna e kovokovoği. Job i aramanei da wei eğä riwa kaua. Tauna, God i vivitumağanei, wate i ġoeğoei da ita aramanei aiwai aubaina wei nuabolana e tuputupua. God, Job ana vinuapoapoe anona eğä ita vieğei, wate God ana rewapana ma ana nuaulaula i rata guratana au baina rava eğä tagotagogina da ina aramanei aiwai e viviatataieta. Maranai i aramanei da God ana rewapana ma ana nuaulaula i rata guratana, tauna God vitaraviravirana i voterei ma i voepaepai. Wei virarautuana au damona God Job i vilawani ma natunatuna i vimağai ma i vimaura-melei. God Job ana rava tonuğä i ena-guratei aubaina taui eğä ita aramana-kauei aiwai i latolatoni ma Job i vinuapoapoe.

Job ana virarautua

¹ Oroto wavana Job au Uz i mae. Tauna rava jijimana kaukauana ma ġo'apoapoei i geduaiei. Tauna God i vivirei ma ġoa aiaii ava i kaukauei.

² Tauna natunatuna nelarai 7 ma waivinei tonuğä,

³ ma ana sipu 7,000; kamel 3,000; uata bullna 1,000 ma donkey waivinei 500 ma ana taunola mağamağau. Ma i vipurapura ma i maura kaua eğä aiai ġelauna nanare nai au dobuna, au maramatanei.

⁴ Ai mara i tereterei nanare Job natunatuna nelarai nununai ai au numa i toretorela, ma varevarei ma novunovui i rauğoreiai ma anatapui i amam ma i umauma gogona.

⁵ Aupom biağä nanare torela au murina, Job ubaubanai boibogi ina vovomairi ma natunatuna nununai ina rauğoreiai ma epaiai ġamoğamo taputapuna ina apuapui BADA awarina da natunatuna ina viaiaini. Tauna i notanota da, “Mepa da roaroa i kauana-boai ma au orai God i parivaiapoapoeni.”

Satan Job ana tumağana i raudadani

⁶ Marina mara i ġeta da anela au mara i ġeta BADA awarina ma tauviwavu - Satan taui i votağoi da i ġeta.

⁷ BADA Satan i paridadanei, “Tam meiei e nenei?”

Satan i paribelei i pa, “Tau were ma nare a nenei, dobū a tetetei.”

⁸ Ma BADA i paridadana, “Au taunola Job u inanai bo eğä? Tauna rava aiaii kaukauana, eğä aiai ġelauna au dobū nanare. Tauna rava jijimanina ma patupatutuna. E vivivireiu ma e paipaina-melei da eğä kaua apoapoe ita kaukauei.”

⁹ Satan i paribelei, “Tam Job e paipaina-kauei lamna aubaina e voepaepaim!

¹⁰ Marana patapatai tauna ana numa ravai ma ana purapura e gagagaloei, ma anata-puna uranei e vovodadani e viaiaini, ma bulumakau u verei da wapuna i oai.

¹¹ Wate uram ma viloloi ma anatapuna ġarinei ma vaitawanei, ma au matam ina parivai apoapoenim.”

¹² BADA i riwa i pa, “Anina, ana purapura anatapuna au uram a tereterei, wate eğä tupuana aiwaina ma vodadani.” Ma Satan BADA i netawanei.

¹³ Mara tagogi, Job natunatuna nelarai ma waivinei i toretorela, tuai ana au numa,

¹⁴ ma taupariverena i ġeta Job awarina ma i riwei i pa, “Am taunola burumakauei doa i uauatai ma au ġereğerei donkey modu i amam,

¹⁵ ma mai Sabea i ruba-ḡairai ma ḡamōgamo anatapui i kwalei, am taunola anatapui i viraḡena-naiei, ma tau ainelau a ruba da ata pariverem."

¹⁶ I bababani ma taupariverena ḡelauna i ḡetai ma i riwa, "Namanamara marei i ḡairai da sипу ma taupainii i viraḡena-pai, ma tau ainelau a rubai da ata paripariverem!"

¹⁷ Ravana i bababani ma taupariverena ḡelauna i ruba ḡetai ma i riwa, "Mai Caldia boru tonuḡa ana melaḡina i ḡairai ma am kamel i viaḡaḡana-naiei ma taupainii i viraḡena-pai, tau ainelau a ruba da ata paripariverem!"

¹⁸ Amapo i bababani ma wate taupariverena ḡelauna i ruba ḡetai ma i riwa, "Natunatum nelarai ma waivinei, natuevou ana au numa i toretorela,

¹⁹ ma maratagogi kojikojira mutuluei i opui ma numa i vipeuni au tepai ma anatapui i viaijiji, tau ainelau a ruba da ata pariverem!"

²⁰ Anina ma Job i vomairi ma ana kwama i sikai. Kolana i ḡari ma i peu ḡaira au doa ma BADA i voepaepai.

²¹ Ma i riwa,
"Ana kovakovau a nei;
ana kovakovau ana nae.
BADA i verena ma i vai-melei;

BADA wavana ana voepaepai ma ana viborumei."

²² Wei anatapuna au orana, Job eḡa ḡo'apoapoe aiwaina ita kauei bo God ita viwavui.

2

Satan Job i raudadana-melei

¹ Mara ḡelauna, anela au mara i ḡeta me, BADA awarina ma tauviwavuna - Satan taui i votaḡoi.

² Ma BADA Satan i paridadanei, "Tam meiei e nenei?"

Satan i paribelei i pa, "Tau were ma nare a nena ma a nenei, dobu a tetetei."

³ Ma BADA i paridadana, "Au taunola Job u inanai bo eḡa? Tauna rava aiaii kaukauana eḡa aiai ḡelauna au dobu nanare. Tauna rava jijimanina ma patupatutuna. Ma e vivivireiu ma ḡo'apoapoe e gedugedaiei. Ana lawana anina jijimanina e maemaeni avena da orau u taini da a kovoḡa labalababai."

⁴ Tauviwawu BADA i paribelei, "Tauna ana lawana ava e vinuabolei, me rava ana pura-pura anatapuna ina verenei da eḡa ina kero.

⁵ Wate uram ma viloloi ma tupuana ma ḡelamina ma ravi, ma au matam ina parivai-apoapoenim!"

⁶ BADA i riwei, "Anina, tauna au uram a tereterei wate eḡa ma viraḡeni."

⁷ Ma Satan BADA i netawanei ma i nae da Job kero apoapoei i verei, au loulouna da i ḡaira au ae lapalapana.

⁸ Ma Job nau gebona i vaia da kerona i kakakaroi ma au lapukare i kiakiala.

⁹ Awana Job i riwei i pa, "Amapo da am lawana jijimanina ma vovoijiji bo? God ma parivai-apoapoeni ma ma iraḡe!"

¹⁰ Wate Job i paribelei i pa, "Tam opaopam! Eḡa nanare ma babani. Tauta God kaua maḡamaḡau ma aiaii e verevereta, ma apoapoei e paripari-tawaneiai, maiteni tana vaia."

Wei kauai maḡamaḡau apoapoe Job awarina i tupua, wate tauna ana babani awarinei eḡa ḡo'apoapoe ita kauei.

Job ana rava i nei da i raugenari

¹¹ Maranai ana rava tonuḡa riwana i vaia da Job wenanare ma menanare i vinu'apoapoenei, taui i vitagogiei ma i nae Job ita raugenari ma ita vinuaubai. Taui wavai Eliphias tauna Temanei, Bildad tauna Shuahei ma Zophar tauna Naamah ei.

¹² Taui tapunei Job i 'nanai ma i vinuuanainei da lamna Job. Maranai i 'nana-kauei. Taui i vitouana, ma ai kwama i viaisikasikai ma pokau au tepai i tawatawanei.

¹³ Ma aupom ma waguvarai 7 taui au doa i vikiakialei, Job i mae-vererei. Ma i 'nanai da ana nuabola i rata guratana ma gamoi i pota ma i kiala genuatau.

3

Job ana tupua marana i parivaiapoapoeni.

¹ Wiki tagogi au murina Job gamona i laġi ma ana tupua marana i parivaiapoapoeni.

² I pa,

³ Au tupua marana ma boai,
ma waguvaraina i vinolanola da tevera orotona i tupua.

⁴ Nai marana ina waguvarei!
Ma God au aidamo wei marana ina nota-tawanei,
ma au tepana eġa ina rarana.

⁵ Waguvara ma gimtona potopotona wei marana ina vibadei;
ma lada marana ina purui
ma gimtona lalalaina ina purui.

⁶ Gimtona nai waguvaraina ina viamoai
wei marana eġa ma iava-melei;
madeġana bo nawaravina.

⁷ Nai waguvaraina eġa aiai ina tupua,
ma eġa nuaiai gararana ina nonori.

⁸ Vijiboga amamai,
mepa da ai vijiboga boga bariawana ina vidagui;
taui wei marana ina vijibogħi.

⁹ Maratomtom ubonana ina ġuvai
ma mara karena ina paina-avei
ma madeġa vuduna eġa ina inanai.

¹⁰ Aubaina taui manawa metaetana eġa ita gudui
ma vita maġamaġau i vereu.

¹¹ Airake, boibogħi ita gomuiu!
Bo ata i 'raġe maranai a tuputupua.

¹² Aiwai aubaina au arona i vimataveniu
ma ġugħunei i viġuġui?

¹³ Maranaina a tupua, matau ita pota;
ma ata matave ma ata vilauvitau.

4

Eliphas i babani

¹ Ma Eliphas rava Temanei Job i paribelei i pa,

² Job eġa amlom ina ġaiġai ma ana babani,
tau ata genuana ava, ana babani!

³ Rava maġamaġau u viararamani
ma ġokkokkarai u vovaivirewapani.

⁴ Riwan, rava peupeui u duġui,
ma ae tutui viviarai u duġui.

⁵ Wate marina nuabola i nei awarim, ma am nota i peu
i vodadanim ma u rovo-kaua.

⁶ Am vitumaḡana God awarina,
ma am lawana jijimanina.
Lamna, am rewapana, tapa?

⁷ Ma tumairi ma ma vinua notanota!
Rava jijimani e irairaḡe bo?
Mara aiwai rava jijimani i kero ma i'raḡe?

⁸ A inanai rava ḡoa apoapoe i paewi
ma nuabola i tuarui.

Job ana rava amapo da i ririwa-ḡirigiri da tauna kaua apoapoei i kauei aubaina wei nu-abolana e nenelagai. Wate Job e ririwa da tauna eḡa aiwai apoapoena ita kauei.

38

BADA Job i paribelei

¹ Ma BADA labu au orana ma Job i paribelei, i pa,

² “Tam aiai e bababani labalababa,
ma au nuaulaula e paripari-virevirei?

³ Ma mairi jijimana me oroto,
ana vitaravirevirem
ma ma paribeleu!

⁴ Tam mepa maranai dobu tuatuana i tonei?
Ma riweu, mepa da u aramanei?

⁵ Aiai dobu ana manawa ma ana dabora i terei?
U aramanei tapa? Ma aiai i ruvai?

⁶ Aiwai dobu tuatuana e vovoijini?
Ma aiai dobu tuatuana i tonei,

⁷ maranai maratomtom ubonai i wela tagogi,
ma BADA ana anela ana morelanai i voepaepa ma i vigaragaraei?

⁸ Aiai boga ana au parata i terei
maranai boga manawana ana goba i wanaiwaḡi?”

40

¹ Ma BADA Job i riwei i pa,

² “Tam, God Vivirewapana Kaukauana e viviwavui;
Aiai God e viviwavui, ina paribelei.”

³ Anina ma Job BADA i paribelei,

⁴ “Tau rava labalababa, menanare ana paribelananem?
Gamou ina pota.

⁵ Boibogī a babani guratana.
Eḡa aiwai ġelauna ana latoni.”

42

Job i babani me

¹ Ma Job i babani me, i pa

² “Tau a aramanei da tam aiwai anatapuna e kaukauei;
Eḡa aiai am oga ina viḡaei.

³☆U paridadaneu, ‘Tam aiai e bababani labalababa,
ma au nuaulaula e pari-virevirei?’
Riwa kaua am boruma vivinualaulaunana ega ata aramanei,
da a vogana guratana.”

⁴☆“U riweu, ‘Ma rautaniāgana, ma ana babani,
Ana paridadanem ma tam ma paribeleu.’

⁵Tanigau ava riwam i nonori
Wate marina matau i ’nanaim.

⁶A viminala, ma au lapukare ma au debidebi ana kiala.
A ruperupena ma a mae-tavireu awarim ma au go’apoapoe ma nota-tawanei.”

Damona

⁷BADA i babani vorovei Job awarina ma marina Eliphas rava Temanei awarina ina pa,
“Amlou i gaiāgai awarim am rava ruaāga maiteni, taumi ega riwa kaua ota babaniei me
Job nanare.

⁸Lamna aubaina, bull 7 ma sipu ororotoi 7 ona vaia ma ona nae au taunola
Job awarina ma siai taputapuna ona apui awariu. Tauna aubaimi ina raupari ma ana
pari ana nonori da ega ana viminalaimi ami kaua apoapoei aubaina. Taumi ega riwa kaua
ota babaniei me au taunola Job nanare.”

⁹Anina ma Eliphas, Bildad ma Zophar BADA aiwai i ririweia nanare i kauei, ma BADA
Job ana pari i nonori.

¹⁰☆Ma maranai Job i raupari-vorovei, BADA ana maura i veremelei ma raviai-tepatepani.

¹¹Varevareina ma novunovuna ma ana rava waduwaduboi i nei ana au numa ma
maiteni i am ma i uma gogona. Ma Job i vinuaubai aubaina BADA vita gaegena Job i verei.
Ma taui anatapui kampa i gegeta mane ma loji goldei Job i verei.

¹²BADA, Job i viaiaina-kauei ega me au naonei. Awarina sipu 14,000; kamel 6,000; uata
bullna 2,000 ma donki waivine 1,000.

¹³Ma nanare, natunatuna nelarai seven ma waivinei tonuā.

¹⁴Natuna wavinena magurina wavana Jemimah*, ma keikeina wavana Keziah† ma
vitonuina Keren-Hapuk. ‡

¹⁵Job natunatuna guguinii inanai i ai dewadewa ega me guguini gelaui nai au dobuna.
Ma Job natunatuna nelarai ma waivinei ai buder i terei da anatapui ruvana tagogina
ina vaia.

¹⁶Job i mae madega 140 gelauna; da googoāgana ma nonoina da i nae kimta au
vi-4-nainanai.

¹⁷Anina ma i magura kaua ma i’rage.

* 42:3: Job 38:2 † 42:4: Job 38:3 † 42:10: Job 1:1-3 * 42:14: Heb. wei wavana anona **Gabubu** † 42:14:
Heb. wei wavana anona **Cassia**. bo **kaidara talana**. ‡ 42:14: Heb. wei wavana anona **mata penitana**.

Psalm Wela ma Pari

Pariverena

Mara manamanaina i netawanana rava mağamağau taputapunei ava wela ma pari i girumi wei au bukana. Mai Israel wei welai ma pari i tami ma i teretagogiei da lamnei God i viviborumei.

Wei au bukana wela ma pari tapuna ma tapuna. Ĝelaui God e viviborumei ma e vovoepaepai ma ana iviaiai aubaina e viviegualauei. Ĝelaui e vivibağā agu ma gagalo aubaina, bo notatawanana aubaina. Wela au ĝelaui, rava e raraupari ai gulau aubaina ma god e vivibağai da ai ġavia ita kovoği. Ma wela au ĝelaui tauamgiruma ana apoapoe ma ana nuabola aubaii God awarina i beubeura.

Ma marağela Iesu riwa wei au parii i vaia da i viararamana. Kerisiana wei welai ma parii i welewelei ai au viboruma ma i jimajima.

Wela vinevinei

Psalm 1, 10, 23, 27, 34, 51, 67, 90, 95, 1-11, 100, 103, 110, 103, 110, 119, 9-16 ma 139.

Buka Tagogi

1

Nuaiāii ririwa-kauana

¹ Rava viaiainana, lamna eğā ġo'apoapoe ravai ita votağotağoi,
ma ponai eğā ita rarautaniğanei;
ma vivijiboğai eğā awarii ita kiakiala.

² Wate BADA ana tarawatu i vinuaiaiei,
aupom ma marai e notanota-vaitetei.

³ [◇]Tauna me ai, waira au adana gogogona,
ana au mara e rarauan;
ma rugurugui eğā ita poipoi.

Wei ravanana, aiwai anatapuna e kaukauana-kauei.

⁴ Wate ġo'apoapoe ravai eğā nanare!

Taui me rugurugu, ive i kapupuana-naiei;

⁵ Lamna aubaina ġo'apoapoe taukauei BADA ana au etera ita mairi ava,
ma nanare ġoa apoapoei ta kaei rava jijimani ai au dam ita mae ava.

⁶ BADA ġoa aiaii ravai e rarauetaraveni ma e paipaini;
wate ġo'apoapoe ai etanai au damona, pupui.

23

*Bada taupainiu**

David ana wela

¹ BADA taupainiu
ma eğā aiwai ana voladägei.

² Gidagida majimajığai au tepana i vimataveniu,
ma i raveniu waira au raraunairina au adana.

³ Au rewapani e raviravivouni
ma wavana aiaina aubaina etanai jijimaninei i raveniu.

⁴ Avena da gwagwa waguwaguvareina ana naeni,
wate eğā aiwai apoapoeni ana rovoei.

* 1:3: Jer 17:8 * 23:: Taupainiu me sipu taupainina.

Aubaina tam au ririvau da am kwapuei ma jīgonei e gagagaloeu ma e vivinuaubaiu.

5 Aubaiu torela e vokaukauei au ġavia au naoi.

Oilei kolau u volaġolaġoi da tam u vinuavaineu,
ma au kelaka i oa-karagelai.

6 Ee! Riwa kaua da am iviaiai ma am raunuapoapoe maemae nonoana awariu ina mae,
da au mara au damona.

Ma BADA ana au numa ana mae-nonoa.

27

Voepaepa parina

David ana wela

1 BADA au lalalaina ma au tauvilawana,
aiwai ana rovoe!

BADA au taugagagalo
aiwai ana rovoe!

2 Maranai ġo'apoapoei ravaii i ġetai
da ita vunui,

au ġavia
aei ina pakana-melei da ina peu.

3 Avena da sorodia borui ina mae-gariġuruviu,
tau eġa ana rovo dadana.

Maranai au ġavia i vomairi,
tau anina da God ana vivitumaġanei.

4 Kaua tagogi ava aubaina a vivibaġa.

Au ġoana ġaeġaena da,
BADA ana au numa, boruborumana ana mae,
ma ana voepaepai. Au lawana au anatapuna.

5 Nuabola au marana
ina tereġaġariu.

Ana gabu au vivivireina, ina teregovaġiu.

Ma ola au tepana ina tereu
da ġavia eġa ina vodadanu.

6 Ma au ġavia i garigari kwaipipiniu, ana tuvaidoedoei.

Da au tempol ana morelanau pulo ana apui BADA awarina.

Ana vinuaiai ma welei ma arei ma ana voepaepai.

7 BADA ma rautaniġaneu maranai awarim a kwatukwatu,
ma raunu'apoapoleu ma ma paribelevu.

8 Au orau u riwa, u pa, "Ma nei da ma rauduneleu."
Tau a paribelem a pa, "BADA a nenei."

9 Eġa ma raugovaġeu,
eġa awariu ma ġaiawa.

Am taunola eġa ma inana geduaiei,
au anatapuna tam, au tauagu.

Eġa ma netawaneu,
au God, tam au tauvilawana.

10 Avena da amau ma alou ita teretawaneu,
wate BADA ina paina-kaueu.

11 BADA, ma viararamaniu da am ġoana ana kuae.
Ma etanai au ġadaġadarana ma taravainiu aubaina au ġavia i maġa

12 Taui moruei ma parivairovorovoei e vunuvunuiu.
Lamna aubaina, eġa ma teretawaneu awarri

13 A 'ramanei da BADA ana viaiaina ana inanai,

weka lawalawai ai au dobu.
¹⁴ BADA ma vitumaḡanei,
 da ma virewapana ma tepam ina tora.
 Anina BADA ma vitumaḡanei!

34

BADA ma viborumei

- 1 BADA ana vimaegaeḡaeni marana patapatai,
 ma ana viborumana-nonoei.
- 2 Orau taputapunei BADA ana voepaepai;
 Vilamolamonai riwau ina nonori ma ina vinuaiai.
- 3 Ona nei ata BADA tana vimaegaeḡaeni
 wavana tana voepae-gogonei.
- 4 A raupari BADA awarina ma i paribelev,
 awariu rovo anatapui i vaitawanei.
- 5 Aiavoi awarina e inainana,
 taui naoi ina ravidalai
 ma ega melanai ina vitepa-ubaubai.
- 6 Au nota i kwa da a ḡorei, ma i nonori
 ma nuabola au orau i vaitawanei.
- 7 Aiai da BADA e vivivirana-kauei,
 ana anela taui e inana-vaitetei, ma e vivilawani.
- 8 Taumi ona raudadani ma ona aramanei da BADA i aii.
 Taui BADA au ḡouna maemae nuaiai ḡaeḡaena awari.
- 9 Taumi vivitumaḡanami ega aiwai ona voladaḡei.
 Lamna aubaina, BADA ona vivirei.
- 10 Lion ḡauboi mara ḡela am e irairage,
 wate aiavoi da BADA awarina e vitumaḡana ega ina voladaḡa.
- 11 Natunatu, ona nei, ona rautaniḡana,
 ma ana viararamanimi da BADA ona vivirei.
- 12 Taumi o ḡoei da ami lawana ina aii
 ma ina manawa bo?
- 13 Nanare, lamna menami ona paina-melei da ega babani apoapoe bo moru ona babaniei.
- 14 Ȇoa apoapoe ona geduaiei ma kaua aiaii ona kaukauei,
 ma ona voguratei da nuauba lawanana ona maeni.
- 15 BADA, matana Ȇoa aiaii ravai awari e tereterei,
 ma tanigana e tonetonei mepa da agu e toutouei.
- 16 Wate tauna Ȇo'apoapoei ravai e mamae-puputei
 taui ina irage ma rava nuanuai ina vuru.
- 17 Rava jijimanii agu aubaina e vivigore BADA awarina
 tauna e rarautaniḡana ma ai vita e vaivaitawanei.
- 18 Tauna rava peupeui, rovorovoi, ma vinuabolai e vivilawani,
 tauna rava orana i peu kaua e vovoepai.
- 19 Rava jijimanii ai nuabola i maḡa
 wate BADA taui e vovoagui ai au nuabola.
- 20 E inainana-vaitetei da ega gelamina tagogi ina wanagai.
- 21 Ȇoa apoapoe ravai ai apoapoe ina vunumelei,
 ma aiavoi da Ȇoa aiaii ravai e gedugeduaiei, ina kovoḡi.

²² BADA ana taunola e gagagaloei,
aiai da e nenei BADA au ġouna, kovoġa ina vorei.

51

David ana rupena

Mara tagogi, Gulau David ana taunola Uriah awana Bathsheba i tavimatanei da maiteni i matave.

¹ Oo God, ma raunu'apoapoeleu. Tam nuavaina maemae-nonoana amai.

Tam raraunuapoapoei amai
au ġo'apoapoe ma notatawanei.

² Au rauaġaiġai ma oġai
ma au ġo'apoapoe ma oġa-tawanei.

³ Au rauaġaiġai a aramanei
marana patapatai a notanotai.

⁴ Kaua apoapoei a kuae.
Tam ainelam awarim Ĝoa apoapoei a kuae,
ma am viwavu lamna riwa kaua.
Amapo anina da ma kovoġiu.

⁵ Tau rauaġaiġai, melamelaei da marina
Au manawa da marina tau ġo'apoapoe taukaueina.

⁶ Wate tam u ġoei da riwa kaua au ora-dewadewau ina mae.
E viviararamaniu da nuaulaula orau ina oai.

⁷ Au ġo'apoapoei ma oġa-tawanei,
ma oġaiu da ana arapoira da gonu rovena arapoirana ana ġetawanei.

⁸ Ma riweu da au ġo'apoapoe u nota-tawanei
da ana vinuaiai ma ana morelana
avena *da gelamiu u viaigaigai, marina ana vinuaiai.

⁹ Au go'apoapoe ma inana-tawanei
ma au apoapoe mirai ma boai.

¹⁰ Oo God nuanua ma ravivouni
da ana vipatutu kaua awarim.

¹¹ Eġa au naom ma tawana-opuneu
ma awariu eġa Aruam Vivivireina ma vaitawanei.

¹² Vilawana nuaiaina ma ravivouni me au naona nanare
aruau ma viaiaini da ana voteletelem.

¹³ Lamnei, ġo'apoapoei taukauei am kaua ana viararamani,
da ina mae-tavirei awarim.

¹⁴ Oo God, vi'raġena vitana awariu ma vaitawanei,
da am kaua jijimanii ana welei.

¹⁵ Oo Bada ipiriū ma votawanei da gamou ina vimaeġgaenim.

¹⁶ Au pulo, ġamoġamo ata apui awarim,
wate tam pulo apuapunana eġa uta vinuaiaiei.

¹⁷ Bada, pulo e ġoegħoei lamna vilamolamona.
BADA, eġa au vilamolamona ma au rupena ma geduaiei!

¹⁸ Am nuavaina Jerusalem ma viaiaini,
ma ana gari ma voa-melei.

¹⁹ Anina ma ai pulo nota aiainei ina vikarena-melei da ina kaukauei ma ma vinuaiaiei.
Taui pulo tapuna ma tapuna ina apui awarim.

Bull maġamaġau am au aniamapu ina apuapui.

* ^{51:8:} Au vinuabola lamna me gelamiu wanagaina

67*Viegualau welana*

- ¹ Oo God ma raunu'apoapoelelai ma ma viaiainiai,
ma naom weka ma tereiai da ma voaguiai!
- ² Da au dobu am kaua ina aramanei,
da rava anatapui au dobu ina aramanei da tam ai tauvilawana.
- ³ Rava ina voepaepaim Oo God,
rava anatapui ina vimaegaēgaenim.
- ⁴ Rava anatapui au dobu ina vinuaiai ma ana morelanai ina wela,
aubaina tam rava anatapui au dobu, kaua jijimaninei e vivibadei
ma e paipaini.
- ⁵ Rava ina voepaepaim Oo God.
Rava anatapui ina voepaepaim.
- ⁶ Anina ma doa maura āgaēgaena ina vereta
ma God ina viaiaina-kaueta
- ⁷ Riwa kaua, God ina viaiainita
ma rava anatapui au dobu tauna ina vivirei.

90*God ana taunola Moses ana pari*

- ¹ Bada ai animaē
kimta wariāga da marina.
- ² Tam God maemae nonoana
muriaē da ola
ma dobu uta kuaēi.
- ³ Tam rava e ririwei da e vipokau, ma e ririwei,
“Rava ona wanaviraimi”
- ⁴ Tam awarim madēga 1,000 lamna me aupom tagogi, i tupo kaua
me raviravi, āga ita manawa dadana.
- ⁵ Rava ai lawana e vaivaitawanana lāgilāginei me rauboni damona.
Taui me modu, ubaubanai e raraupairei,
- ⁶ da e rarata ma e talatalai,
wate aubigai e āgivīgivi.
- ⁷ Nanare am meji tauai e lagulaguriai ma
maranai e āgaiāawa tauai a rovorovo kaua.
- ⁸ Ai āgo'apoapoe anatapui au naom u lavaei,
ai āgo'apoapoe govagovāgana, wate anatapuna e inainanai.
- ⁹ Am meji ai lawana i vitupoi,
ma ai madēga lāgilāgina e kwakwa, a lavutu-tawanana.
- ¹⁰ Madēga 70 i vereta da tana maē,
mepa da tana virewapana lamna 80;
Wate wei lamna nuabola ava ina vereta,
āga tana mae-pora ma tana nae.
- ¹¹ Āga aiai am āgaiāawa malana ita vai-kauei.
Mepa da am āgaiāawa ata aramana-kauei, lamna tauai ata vivirana-kauem.
- ¹² Ma nanare, ma viaramaniai da ai lawana i tupo kaua,
ma lamna aubaina awarim nuaulaula ana vaia.
- ¹³ Oo BADA! Ma nememei awariai.
Ma mae-tavirem, ma vinuabolelai, tauai am taunola.
- ¹⁴ Ubaubanai marana patapatai am nuavaina maemaena ma verelai,

da ana morelanai ana logoiai ma ai au mara anatapuna ana vinuaiai.

¹⁵ Madēga biāga u kovōgai, nuaiai ma verelai
da madēgana biāga a vinuapoapoe ina kovōgi.

¹⁶ Tauai am taunola, am nola vivirewapanana ma viatataielai.
Ma natunatuiai am boruma ma viatataiei.

¹⁷ Ma Bada ata God ana vianina ina viatataieti
ma ina kaei da aiwai anatapuna ta kaukauei anona ina tupua.
Nanare ai nola ma viuai.

91

God ata rawena

¹ Aiai ravana e nenea Aidamo Telarana awarina agu aubaina,
lamna Vivirewapanana Kaukauana au ririvana ina mae.

² BADA au God awarina ana riwa ana pa, “Tam au anigagalo ma au tauvīgavia.
Tam au God, a vivitumāganem.”

³ Aubaina tauna, āgavia ana waro govagovāgai
ma numa raraubabu awarinei ina gagaloemi.

⁴ Tauna papenenei ina terēgoāgimi ma papena au gabaurina ina gagaloemi;
ana vipatutu, am rawena ma am anigagalo.

⁵ Wagvara kauai vi’ni-rovorovoi ēga ona rovoei,
bo āgavia madēgai e vivīgavia,

⁶ bo numa raraubabu wagvara e vivīgavia,
bo doria madēgai e vivīgava.

⁷ Avena da rava tausan au ririvam i peu,
bo ten tausan au oiem i peu;
wate tam ita vodadana-avem.

⁸ Matamiei ona inana ma ona inanai
āgo’apoapoe ravai ai kovōga.

⁹ Aubaina BADA o vaia ami rawena; Āgetelarana ami taugagalo.
¹⁰ Ēga aiwai apoapoena awarimi ina tupua bo au numa ina āgeta.

¹¹ God ana anela ina terei da ina painimi
ma ina gagaloemi ami au babara.

¹² Taui uraie i ina voepaim
da aem ēga āgaima au tepana ma rauei.

¹³ Taumi lion ma mota ona vovaiubai,
lion āgaīgaiawai ma mota viviwiawai ona tugwadagwadai.

¹⁴ God i riwa i pa, “Aiai nuuanau e vaivainonoei, ana vilawani;
ma ana gagaloei, aubaina i aramana-kauei.

¹⁵ Maranai i kwatu awariu, ana paribelei.
Tau kampa ai au nuabola,
ana taravaini ma ana voepaepai.

¹⁶ Ai lawana ana vimanaini,
ma au vilawana mamae-nonoana ana viatataiei.”

95

BADA tana welei

¹ Ona nei! Tana wela BADA awarina.
Ana nuaiaita tana wela God ata tauvilawana vivirewapanana awarina.

² Tana nei au naona ma tana viegualauei
ma welei tana voepaepai.

³ Aubaina BADA lamna God virewapanana kaukauna,

ma god anatapui e inainana-ǵairei.
⁴ Dobu anatapuna au urana,
 guba ǵaeǵaei doa au orana da ola ǵaeǵaei au tepai.
⁵ Boga tauna ǵarinei, tauna i kauei
 ma nanare tauna uranei dobu alalana i tere-kauei.
⁶ Ona nei ma tana raudune ma tana vimaeḡaeǵaeni,
 ae tututa tana tapeǵaroei taukaueta BADA awarina.
⁷ Aubaina tauna ata God.
 Tauta natunatuna. Ana sipu ma e ǵamoǵamoita ana au wapu.

Mepa da ponana o nonori amadodo,
⁸ E riwei i pa “Eǵa orami ona gudui me amamami au Meribah;
 me au mutulua au Massah.
⁹ Kampa amamami i 'nanai, kauababai a kauei
 wate eǵa ita vitumaǵaneu, ma i raudadaniu.
¹⁰ Madeǵa 40 wei kimtana awari amlou i ǵaiǵai ma a riwa,
 ‘Wei ravai orai i bagibagi ǵaǵa!
 Eǵa ita rarautaniǵaneu.’
¹¹ Ana mejiu a parivainuaǵani,
 ‘Gabu a vokaukauei ami lauvitau aubaina wate kampa eǵa melanai ona rui.”

100

Voepaepa welana

¹ Rava anatapumi au dobu ona logoimi BADA awarina!
² Ana nuaiaimi BADA ona voepaepaei,
 ona nei au naona ma ona welei.
³ Ona aramanei da BADA anina God.
 Tauna i kaueta.
 Ma tauta tauna ǵarinei. Tauta tauna natunatuna. God ana sipu ma e gagaloeta me
 sipu taupainina.
⁴ Ana welami ana au gari ona rui ma voepaepami
 ana au aniviboru ona rui,
 ma ona vimaeḡaeǵaeni.
⁵ Aubaina BADA i aii;
 natunatuna e vivinuavaina-nonoei,
 ana vipatutu e mamae-nonoa, kimta au anatapui.

103

BADA ana nuavaina

David i girumi

¹ Orau taputapunei BADA ana voepaepai.
 Wavana vivivireina ana voepaepai.
² Orau taputapunei BADA ana voepaepai,
 kaua aiaii i kauei aubaiu eǵa nuanuau ina vuru.
³ Au ǵo'apoapoe anatapui e notanota-tawanei,
 ma doria awarinei e vivilawaniu.
⁴ Ata iraǵe ma i sinaepaiu
 ma nuavainei ma raunuapoapoelei e vivigulaueu.
⁵ Au lawana au anatapuna

* 95:8: Exo 17:1-7; Num 20:2-13

purapura aiaii avai i verevereu, au vilaraga marana i raviravivouni me *manubada.

⁶ BADA ana kaua anatapuna jijimanina.

⁷ Ana oga Moses i viatataiei,
ma mai Israel BADA ana kaua vivirewapanai i 'nanai.

⁸ BADA raraunuapoapoena ma ivina aiaina,
Ega lagilagina amlona ita voigaigai. Ana nuavaina maemae-nonoana.

⁹ Ega mara nonoa ina enita,
ma ana amloigaigai ega ita mamae-nonoa.

¹⁰ Anina da ita kovaiga-kaueta,
wate i raunu'apoapoeleta da kovoiga ega gaeigaena ita verevereta.

¹¹ Dobu weka ma mara nore au tepadewadewana.
Nanare, BADA ana nuavaina i rata guratana taui da BADA e vivivrei awarii.

¹² Mepa madega e gogolana da mepa e gaigairalana, lamna uama,
ma nanare ata go'apoapoe vinimalana e vaivaitawana-naiei aueia.

¹³ Me ama natunatuna e raraunuapoapoelei,
nanare BADA natunatuna e raraunuapoapoelei.

¹⁴ Aubaina i aramanei da tauta pokaei i kaueta.

¹⁵ Ata mara au dobu lamna me modu.
Ta gogogo ma ta rarata me berana moduei;

¹⁶ Anina ma ive i uvena-kapupuei,
ega ita mamae, ana gabu i kwakwava.

¹⁷ Taui da BADA e voepaepai ana nuavaina maemae-nonoana
awarii ma nanare noinooi ma ai epaepaia awarii

¹⁸ taui aiavoi da ana parivainuaiana bagibagina e vovoijini
ma ana patupatutui tarawatu e vovoijini.

¹⁹ BADA ana vigulau anikialana au mara i terei,
ma kampa ana vigulau e vivibadei.

²⁰ BADA ana anela, vivirewapanami,
BADA riwana o rarautaniiganei ma o kaukauei,
BADA ona voepaepai.

²¹ Anina BADA ana anela marei,
BADA ona voepaepai taumi ana taunola ma ana goana anatapuna o kaukauei.

²² Taumi anatapumi BADA uranei i kaei, ana au vigulau maemaei, BADA ona voepaepai.
Tau nanare orau taputapunei BADA ana voepaepai.

110

Gulauna vinevinena

David ana wela

¹ [✡]BADA au bada wenanare i riwei,
“Au oieu ma kiala

da am gavia
au ae karem ana terei da ma tuvaidoedoei.”

² BADA, am gabemani vivirewapanana Zion *ana parata ina viratai,
da am gavia ma vibadei.

³ Am laraga ana nuaii ina verena-melei da ina visorodia,
ma ona gae BADA ana ola au tepana viigavia aubaina,
ma ami rewapanana ina ravivouni ubaubanai patapatana me ubaubanai turuvanina.

⁴ BADA i parivainuaiganim ma ega nuanuana ina virai;

* **103:5:** Manubada tawarana waduboi e peupeu ma vouii e gogogo. Me manubada tawarana voui e gogogo nanare tam au lawana e raviravivouni. ✡ **110:1:** Mrk 12:36; Act 2:34-35 * **110:2:** Jerusalem wavana gelauna.

“Tam pirisi maemae nonoana me Melkisedek.”

- 5 BADA au oiem e maimairi da e paipainim;
tauna gulagulau ina piāgi maranai amlona ina īgaiāgi.
- 6 Dobu nununai ai īgoa apoapoe ina kovoīgi,
ma taubeu dobuna ina vioai
ma dobu gulagulaui anatapui kolai ina viaigwadagwadai.
- 7 Wate au etanai au vuvura ina uma
ma rewapana ina verei ma ina vovaiuba.

119

BADA ana tarawatu boruborumana

- 9 Rava vouna menanare lawana aiaina ina maeni?
Tauna riwamei ina paina-melei.
- 10 Lamna aubaina a baibaiem orau taputapunei;
ēga ma votereu da riwam ana geduaiei.
- 11 Riwam a iaiaivi ma au nuanuau a tereterei,
da eēga īgo'apoapoei awarim ana kuae.
- 12 BADA, a voepaepaim!
Am tarawatu ma viararamaniu.
- 13 Ipiriuei ana bababani ma
am tarawatu anatapui u vereverei ana jime.
- 14 Am tarawatu votelatelana a vinuaianana-kauei,
ēga me vipurapura bo vimane.
- 15 Riwam ana iavi
ma ana vinuanotenotei.
- 16 Am tarawatu a vinuaianina-kauei,
ēga riwam ana voteretawanei.

139

Bada anatapuna i aramanei.

David ana wela

- 1 BADA orau u inanai ma au kaua anatapui u aramanei.
- 2 U aramanei mara aiwai a kiala ma a vomairi.
Avena au uama wate au nota e araramanei.
- 3 E inainanai maranai a babara bo au numa a vivilauvitau.
Anatapuna a kaukauei e araramanei.
- 4 Muriai da ata babani tam e araramanei aiwai ana latoni.
- 5 Tam e garigari-kwaipipiniu,
ma uram virewapananei e paipainiu.
- 6 Lamna riwa kauana, awariu i aii kaua
ma i īge-dewadewa da kolau i kwauna-kauei.
- 7 Mepa ana nae da Aruam ana raugovaāgi?
Mepa ana ruba da ana raugovaāgem?
- 8 Ata īgæ au mara da tam kampa;
mepa da i 'rairaāgi ai au dobu ata rauviraiu, tam kampa.
- 9 Mepa da ana lave nae au maramatanei,
bo mepa madeāga e neneulai,
- 10 avena kampa ma uram ina raveniu,
ma am rewapana ina painiu.
- 11 Mepa da ana riwa, “Gimtona ina tereāgoāgiu
ma lalalaina ina gimtona.”
- 12 Wate avena da gimtonana amapo eēga ana raugovaāgem.

Tam awarim gimtona ina rarana me marai, aubaina tam awarim gimtona ma lalalaina lamna tagogina.

¹³ Tam tupuau anatapuna u voai da alou au manawana u teretagogieu.

¹⁴ A viviegualuem aubaina tam am nuavainei ma am borumei u voa-kaueu! Am rauāgaroāgo i aii,

A voepaepaim aubaina a aramana-kauei.

¹⁵ Tam u vivineneāganeu maranai a tuputupua au govagovaāgana, alou au manawana, tam ainelam anatapuna u aramanei.

¹⁶ Tam u inanaiu muriai da a tupua.

Aupom biaāga u vereu da ana mae

lamna au buka u girumi,

muriai da aupom naona i āgotai.

¹⁷ God! I piripiri guratana da am nota ana aramanei.

Am nota kolau i kwauni, eāga aiwai āelaunei am kaua ana aramanei.

¹⁸ I maāga guratana eāga me bubu, iavana ana kauana-avei, avena da ata iava-pai, tau amapo da tam ana vivinuanainem.

¹⁹ Oo God! A āgoei da āgo'apoapoei ravai uta viraāgeni.

Tauviraāgena uta viaāgāgei da eāga ina nei awariu.

²⁰ Aubaina e vivijibōgim, ma wavam eāga ita vivivirei.

²¹ BADA, rava e gedugeduaiem, tau ravai a gedugeduaiem.
Taui eāga ita voteletelem lamna aubaina taui au āgavia.

²² Taui a geduaiana-kauei, anina taui au āgavia.

²³ Ma tuvirevireu, ma orau ma inana-pai.

Ma raudadaniu da nuanuau ma aramanei.

²⁴ Mepa da āgoa apoapoe au orau, ma viatataieu, ma ma raveniu etanai e nenaue au lawana maemae-nonoana awarina.

Proverbs Nuaulaula Riwai

Pariverena

Wei au bukana awanaina maǵamaǵaui, ma God ana rava e viviararamani da ina mae-kaua. Gulau Solomon maǵamaǵaui i girumi ma rava ǵelaui ruaǵa ota i girumi. Oroto e ǵoreǵorei Agur ǵelaui i girumi ma gulau Lemuel ǵelaui i girumi.

Viararamana ǵaeǵaena tagogi wei au girumana lamna nuaulaula anatapui pulo Godei. Rava nuanuaulaulana au naona God ina vivirei.

Mara au anatapuna ata au animae wei nuaulaulauna e vovoaguita, au melagai, au gabemani ma au nola.

Ma maiteni wei girumana e viviararamanita da lawana aiaina tata maeni, ma kaua aiiai tata kaukauei. Ma avena tata gogulagulau ma tata nola guratana ma ivita ita ai molamolakai awari.

Vinuaterena etana

- ⁷ BADA vivirana, lamna aramana karena,
Wate opaopai, nuaulaula ma aramana e gedugeduaiei.
- ⁸ Natu, amam ma alom ai vinuaterena anatapui ma voteletelei.
- ⁹ Ai vinuaterena lamna me kunuteia au kolam,
bo gadogado au uam
da inanam ina ai.

5

Wavine matana maǵamaǵauna ma vorei

- ⁸ Wavine matana maǵamaǵauna ma ruba-tawanei!
Eǵa ma nae dadana ana au metaeta!
- ⁹ Mepa da nanare lamna rava eǵa ina vivivirem.
Tam am vilaraga ma am lawana aiaina ma vitupoi.
- ²¹ BADA rava ai kaua anatapui e inainanai,
Metauna etanaina e vaivaia, tauna kampa da e inana-vaitetem.
- ²² Taniǵapota ravana ana ǵo'apoapoelei ina waro-melei.
Ana ǵo'apoapoe tauna ina tupajijini.
- ²³ Tauna opaopana ma eǵa ita paina-melei,
Ana kaua opaopai aubaii i'raǵe.

6

Amam ma alom ai vinuaterenana

- ²⁰ Natu, amam ma alom ai vinuaterena anatapui ma voteletelei.
- ²¹ Ma vojijina-kauei au nuanuam; marana patapatai au uam ma gadoi.
- ²² Maranai e bababara, ai vinuaterena am etanai ina rauǵadaǵadari.
Maranai e matamatave, ai vinuaterena ina matave-painim.
Maranai u vomairi, ai vinuaterena awarim ina babani.
- ²³ Aubaina wei tarawatui lamna rampa.
Wei viararamana lamna ravilala, etanaina e lalalai.
Nuaterena bagibagina lamna lawana aiaina etanaina.

- ²⁴ Taui ina aguim da wavine matai mağamağau i ma vorei,
ma wavine tavitavinena ana gwalameru.
- ²⁵ Eğä wavinena inana aiaina ma erawai.
Eğä! Ma voterei da matanei oram ina taini da ina waroim.

8

- BADA nuaulaula i terei
Nuaulaula e ririwa,*
- ²² “Au karea, BADA tau i tereu.
Muriai da aiwai ġelaui i kauei.
- ²³ Tau kampa au kare oina,
muriai da dobu.
- ²⁴ Tau a tupua muriai da BADA gabinou i kauei,
muriai da waira vuvura i kwakwa-ğetai.
- ²⁵ Tau a tupua muriai da ola,
muriai da ola muomuoi ai au gabu i terei, tau kampa.
- ²⁶ Muriai da dobu bo wapu
bo doa pokauna.
- ²⁷ Tau kampa maranai mara ana au gabu i terei,
maranai parata i taini da mara au tepana ma boga au gabaura.
- ²⁸ Maranai apau i terei au mara
ma vuvura doa au orana i votawanei.
- ²⁹ Tau kampa, ma boga ana parata i terei
ma i egari da nai paratana eğä ina rağoni.
Tau kampa, maranai dobu oğona i tonana-naiei.
- ³⁰ Nai marana tau BADA au ririvana a mamae me tauvioga,
marana patapatai a vinuaiaini ma tau a vinuaiai.
- ³¹ A vinuaiai kaua maranai dobu i kaukaueia a inanai,
a vinuaiai kaua maranai rava a inanai.”

9

- Nuaulaula ma opa*
- ¹ Nuaulaula ana numa i voai
tuatua ġaeğae 7 i tai ana numa aubaina.
- ² Torela ġaeğäena i apui,
sia i api ma wain aiaii i'wağı ma kepakepa i vokaukauei,
- ³ ma ana taunola ġelaui i paritawanei,
au deba da i viğoreğore,
- ⁴ i riwa i pa, “Taumi eğä notanota kauami ona nei!”
Ma opaopai i riwei,
- ⁵ “Ona nei au lam ona ani
ma wine a viravirai ona umai.
- ⁶ Ami lawana opaopai ona voterei
ma ona lawana,
ma aramana lawanana ona maeni.”

13

- ¹ Tevera nuaulaulana Amana ana vinuaterena e nonori,
wate tevera maeğaeğäena vinuaterena e gedugeduaiei.

⁴ Mata-galagalawana purapura e raurauogarei ega ina vaia,
wate egoegolana ana goana aiwai anatapui ina vaia.

²⁴ Aiai natuna ora-potapotana ega ita kwapukwapui, lamna natuna nuanuana ega
ita vaivaia.
Wate aiai da natuna nuanuana e vaivaia lamna ina viararamani.

17

²¹ Ama tevera opaopana i vinatunei lamna nuabola ava e vivitupui,
laragana amana awarina ega nuaiai.

20

⁴ Rava mata galagalawana e paepaewa labalababa, ega iri ita votagotaigoi;
tuaruta ana mara e baibaia ma ega aiwai.

22

⁶ Natunatumi lawana aiaina ona viararamani, da maranai i vorata,
nai lawanana ega ina voterei.

23

¹³ Natum e viviorapota ega ma inana-tawanei,
boreborelei u kwapui Amapo ega ma virageni.

¹⁴ U raukwapui
lamna irage awarinei u gagaloei.

24

³⁰ Rava mata-galagalawana ana wapu adanei a nae,
ravana opaopana ana grape wapuna au ririvana.

³¹ A inanai da modu i gogo-nae,
ma donadona wapuna i vioai.
Ma ana gari, i wanarikarikai.

³² Lamna a inanai ma a vinua-notanotei.
A tuvirevirei ma wei i viararamaniu.

³³ Matam ma potai, ma rauviraim.
Wapu nolana avena, uram au nuanuam ma terei ma ma matave.

³⁴ Ma gomara ina ravim me taudanene;
anatapuna ina pupuni.

26

¹³ Rava mata-galagalawana e ririwa, “Gamogom gaiawaiwana au doa! Gamogom
gaiawaiwana au etanai!”

¹⁵ Mata-galagalawana lam au urana e vaivaiaia

wate ēga ina voepai au gamona.

29

- ³ Aiai ravana nuaulaula i āoana-guratei, nuaiai āgaeāena amana e vereverei.
Wate aiai da etanai waivinei maiteni e nene lamna ana mane ma ana purapura
anatapuna e vikalokaloei.
- ¹⁵ Kwahu ma nuaterena riwai, natum nuaulaula e vereverei.
Wate tevera ēga viararamanana, alona e vivitepaubaubai.
- ¹⁷ Natunatumu ona vinuaterenei, da mara nonoa awarim nuauba;
ma oram ina vinuaiaini.

31

Wavine aiaii kaukauana

- ¹⁰ Mepa nanare wavine aiaina ma egoegolana uta nelāgai?
Wavinena i vinualaulauna kaua ēga me āgaima lebalebarina maiana āgaeāena.
- ¹¹ Oroto awana i vitumāganei,
ma ēga aiwai ina voladā̄gei.
- ¹² Wavine, kaua aiaii ma ēga kaua apoapoe ita neneiai awana awarina
ana lawana au anatapuna.
- ¹³ Wavine sипу aparana ma waiape i vaia
ma i vinuaiai da ina raūgarōgaro.
- ¹⁹ Wavine sипу aparana ma waiape ina metani
ma gara ina āgaūgauri.
- ²⁰ Ana numa ma orana i votawanei
molamolakai ma vovoladāgai awarii.
- ³⁰ Erawa lamna kaua morumoruna
ma inanana aiaina ina amo;
wate wavine BADA e vivivirei, rava tauna ina voepaepai.
³¹ Wavinena ina voepaepai aubaina i kauana-kauei.
Rava anatapui, wei wavinena ona voepaepai.

Ecclesiastes Tauviararamana

Pariverena

Aiai da wei bukana i giruma lamna ega wvana tata aramanei. Wate rava gelaui e ririwa da gulau Solomon i girumi. Ma aiai i girumi lamna anina da rava araramana. E ririwa da wvana lamna *tauviararamana*. Aubaina purapura vopiripirii e bababaniei. Rava ma'gama'gai God ega ita aramanei aubaina da i goei da ina baiei da aiwai e tuputupua. Wate anona ega ita nenele'gai. Tauviararamana wei ravai ai nota e ririweta. Mara gelauna rava aiwai i kaukauei lamna ega anoi Ma e ririweta da wei kauai lamna me ive tata viaga'gei. Rava i nela'gai da lawana wei au dobuna lamna anona ega aiwai.

Tauviararamana ana giu

- 1 Wei lamna tauviararamana, David natuna, mai Israel ai gulau ana viararamana;
- 2 Tauviararamana i riwa, "Anona ega!
Anatapuna kwakwavina!"
- 3 Ma nolanola da ma magura ma anona aiwai?
- 4 Kimta e nenei ma e nena,
wate dobu maemaena e mamae.
- 5 Made'ga e gogogo ma e arearere,
ma e wanawanavirai da ina vikarena-melei.
- 6 Kariwabu e gota'gota,
rauana'ga e opuopu,
e kwavikwaviviro
ma e wanawanavirai da ina vikarena-melei.
- 7 Waira anatapui au boga e opuopu,
wate boga ega ita oaoai.
Waira matanei,
e gaigairai ma e nena me au matana.
- 8 Kaua anatapuna i vi'nigarigari,
menanare tana riwa nei?
Matata ega melanai ina inana iaua;
Tani'gata ega melanai ina nonora iaua.
- 9 Aiwai waria'ga i tupua ina tupua me,
aiwai waria'ga i kauei ina kauana-melei.
Ega aiwai, kaua vouna wei au dobuna!
- 10 E ririwa, "Ona inanai! Wei kaua vouna."
Wate ega! Wei kaua maemaena;
waria'gana, muriai da ta tupua.
- 11 Kaua waria'ga i tuputupua, ega aiai ita notanotai.
Ma kaua marina da muriai e tuputupua, ega aiai ina notai.

Nuaulaula anona ega

- 12 Tau lamna tauviararamana ma Israel ai gulau au Jerusalem.
- 13 Orau a terei da aiwai anatapuna au dobu e tuputupua, nuaulaulei ana girumi. Ma a aramanei da God vita gae'grena rava i verei.
- 14 Aiwai e tuputupua au dobu a vinua-notenotei ma a inanai da;
anatapui anona ega, kwakwavina. Ive ava ta viviaga'gei.
- 15 Aiwai barabarai amapo ega ma vojijimana-melei,
aiwai awarim ega, lamna menanare ma iavanei.
- 16 Au oraup a riwa, "Tau a nuaulaula guratana,

ēga me aiai ġelauna au Jerusalem i vivigulau nanare.

A 'ramanei nuaulaula aiwai ma aramana aiwai.

¹⁷ A ġoei da ata aramana-kauei nuaulaula aiwai ma bua ma opa aiwai.

Wate a aramanei da wei lamna me ive a viviāgāgei.

¹⁸ Aubaina au nualaula e rarata, mae-boaboa e rarata
au aramana e rarata, au nuabola e rarata."

2

Vinuaiaiana-melana lamna anona ēga.

¹ A vinotanota a pa, "Abeka nuaiai ana baiei, ana raudadani, da i aii bo ēga." Wate a nelāgai da wei lamna kwakwavina.

² Lamna aubaina a riwa da kaka labalababa ma erawa lamna bua. Ma erawana aiwai aiaina e vereverem?

³ Nuaulaula a ġoana-guratei, ma a ġoei da wine ata umai da orau ita telatela ma kaua opaopai ata kauei, da ata aramanei metauna i aii rava au dobu awari, maranai mara tupona ava au dobu e mamae.

⁴ Kaua ġaeġaei a vikarei, au numa ġaeġaei a voa-naiei ma grape wapui a paewi.

⁵ Wapu da peipei a kauei ma ai uauai tapuna ma tapuna a paewi.

⁶ Dogo a ġarai da garewa ma wapaketa i vojjini, lamnei wei wapui a vivituvanei.

⁷ Awariu taunola au numa tuputupuai, ma taunola maġamaġau i nelarai ma waivinei a gimarai. Au bulumakau ma sипу i maġa guratana ēga me aiai ġelauna au naona au Jerusalem nanare.

⁸ Awariu gold ma silver gaegaena ma nanare dobūgela gulaui ai via. Tauwela nelarai ma waivinei a vimaiei ma guguini inanai aiaii a vivaneiai au numa, au ani vieraerawa. Aiwai a ġoeġoei ana tapuna awariu.

⁹ Tau a maura ma a vipurapura kaua ēga me aiai ġelauna au Jerusalem nanare. Ma wei anatapuna au orana au nuaulaula i mae-kaua.

¹⁰ Aiwai a inanai ma a rauoġarei a vaia,

anatapuna a notai da ita vinuaiainiu.

Au nola anatapui a kauana-kauei,

ma nuaiaina lamna au nola maiana.

¹¹ Anina ma aiwai anatapuna a voavoai ma a polepolei, a vinua-notenotei

ma a aramanei da wei anatapui lamna anona ēga,

lamna me ive ata viviāgāgei wei au dobuna

amapo ēga aiwai tana vaia.

Nualaula i aii ēga me bua

¹² Nuaulaula, bua ma opa anoi a vinua-notenotei.

Gulau ana raviepaia, aiwai ġelauna ina kauei?

¹³ Ma aramanei da nuaulaula i aii kaua ēga me opa,

ma lalalaina i aii kaua ēga me gimtona.

¹⁴ Rava nuaulaulana matana au kolana e mamae
wate opaopana waguwaguvareina e bababara.

Ma aramanei da ravai ruāgai ai damona tagogi.

¹⁵ A vinua-notanota a pa, "Tau ma opaopana ai damona tagogina.

Au nuaulaula aiwai ġelauna ina vereu?"

Au nota a pa, "Wei maiteni anona ēga."

¹⁶ Rava nuanuaulaulai lamna me rava opaopai

amapo nai ravaii nuanuata ina vuru.

Kapore! Rava nuaulaulauna ma rava opaopana e irairāġe.

¹⁷ Tau lawana a geduaiei, au dobu aiwai anatapuna ta kaukauei iniviara ava e verevereta. Anatapuna kwakwavina, me ive taviviagāgei.

Bagibagi īaeġaena eġa anona

¹⁸ Anatapuna au dobu a polepolei a geduaiei, aubaina nai ana voterei, da rava au muriu e nenei aubaii.

¹⁹ Ma aiai i aramanei da tauna rava nuaulaulauna bo rava opaopana? Wate tauna aiwai a polepolei ma au aramanei a vitupui ina vaia. Wei anona eġa.

²⁰ Au bagibagi anatapuna wei au dobuna a notai ma orau i peu.

²¹ Aubaina rava ana nuaulaulei ma ana aramanei i nola kaua, da i maura ma anata-punana ina voterei da rava gelauna, eġa taunoleina ina vaia.

²² Marana patapatai nola ma nuabola inina e viviarei au dobu ma aiwai ina vitupui?

²³ Tauna ana nola da iniviara ma nuabola; waguvvarai maiteni eġa ita matamatave. Wei maiteni eġa anona.

²⁴ I aii da rava ita am ma ita uma ma ana nola ita vinuaiae, ma a inanai da vinuaiae lamna God uranei.

²⁵ Aubaina God eġa. Lamna eġa am ma eġa nuaiae.

²⁶ Aiai God e vivinuaiaeini, God tauna nuaulaula, aramana ma nuaiae, e vereverei. Wate ġoġa apoapoe ravana ana nola i verei da mane ma maura īaeġaena ina vitupui, Wate God nai maurana ina vaivaitawanei ma aiai e vivinuaiaeini ina verei. Ĝoa apoapoe taukauei ai nola lamna kwakwavina, me ive i taviviagāgei!

3

Aiwei anatapui ai au mara e tuputupua

¹ Mara ma iri i terei da aiwei anatapui au dobu ai au mara e tuputupua.

² Vinatuna ana mara ma iraġe ana mara paewa ana mara ma tuaruta ana mara.

³ Viraġena ana mara ma vilawana ana mara, amrika ana mara ma voa ana mara.

⁴ Tou ana mara ma kaka ana mara, mogu ana mara ma ara ana mara.

⁵ Ĝaima viorerena ana mara ma tama melanana ana mara, taragwaba ana mara ma eġa taragwaba ana mara.

⁶ Baia ana mara, ma baia voterena ana mara, ma purapura vojijinana ana mara ma purapura vineboana ana mara.

⁷ Sika ana mara ma popo ana mara, genuana ana mara ma babani ana mara.

⁸ Nuavaina ana mara ma ġoāgħi ana mara viġaigħiwa ana mara ma nuauba ana mara.

4

⁹ Rava ruaġa i aii eġa me rava tagogi, aubaina taui ina viagu vivira ma maura ina nelāġi.

¹⁰ Mepa da tagogi ina peu, turana e mamae da ina voepai. Wate tam ainelam ma u peu lamna i apoapoe kaua, aubaina kampa eġa aiai da ina voagħim.

¹¹ Ma nanare mepa da rava ruaġa i matave tagogi, taui eġa inii ina ubauba. Rava tagogi menanare ainela ina vibolabola-melei?

12 Am ġavia, ainelam ina viġaviem ma ina vovaiubaim, wate maranai taumi ruaġami e viviġaviem amapo ona vobelei.

Ma rava tonuġa i virewapana kaua me ġurava barawa tonuġei metametanana.
Wei ġuravana viaituinana ma kauana-avei.

5

10 Aiavoi mane nuanuai e vaivaia eġa melanai nuanuai ina rauei;
aiavoi e ġoegoei da ina vipurapura;
taui eġa melanai ai rauoġara anatapuna ina vaia.
A inanai da wei anona eġa.

11 Maranai am maura e rarata,
lamna maranai patara e ġeġetai da e amam vereverem.

Wate wei maurana aiwai aiaina e vereverem?
Eġa aiwai, anina e viatataim da tam maumauram, wate rava ġelauna am maura
ina tawanei aubaim.

12 Taunola e amam kaua bo eġa,
wate e matamatave kaua.
Mane ravana eġa nanare, tauna ana maura e notanota-maratomei.

13 Au dobu kaua apoapoe kaukauana a inanai;
Mane ma purapura ravana ana maura au anara e tereterei muriai aubaina. Wate
wei lamnei, ana nuabola ġaeġaena i tuarui.

14 Ana mane ma ana maura i kauana
labalababai ma anatapuna i vine-boai.
Natuna eġa ana buderi ita terei.

15 [✳]Menanarena dobuna ta ruinei
nanarena tana nae me, kovakovata ma ana ura kwakwavita.
Amapo eġa ata purapura, ta vopolepolei tana vinimavoei.

7

15 Au lawana kwakwavina au orana kaua ruaġa a inanai;
Rava aiaina BADA ana nola e kaukauei i'rāġe laġilaġina
ma ġo'apoapoe taukaueina God ana tarawatu e viviaigai wate ana lawana i manawa.

16 Lamna aubaina eġa ma viġoġa aiaina guratana bo ma vinuaulaula guratana,
mepa da ma virāġena-melem.

17 Wate nanare, eġa ma vitaniġapota guratana
ma eġa ma opa;
eġa ita ai da ma iraġe muriai da am mara.

18 I aii mepa da wei riwai bagibagina ma nonori
Aiai God e vivivirei lamna ina paina-melei
da wei kauai ruaġai eġa ina kauei.

19 Rava nualaulana tagogi rewapani ġaeġaena ina verei
eġa me gulagulau 10 au taon.

20 Riwa kaua! Weka au dobu eġa aiai tagogi kaua aiai ava taukaueina.
Ma eġa ġo'apoapoe ita kaukauei.

[✳] 5:15: Job 1:21

8

¹⁶ A ġoei da nuanuau ita ulaula lamna aubaina rava ai mae au dobu a inanai, ma lamnei a aramanei da marai ma waguvarei eġa matave kaua.

¹⁷ God aiwai i kaukauei eġa ata aramana dadanei. Ma voguratei da ma nelaġai, wate amapo eġa ma aramanei. Nuaulaulai e ririwa da i aramanei, wate eġateni dadana.

11*Ami au vilaraga ona vinuaiai*

⁹ Laralaraga, ami vilaraga ona vinuaiae.

Nuanuami ina morelana ami au vilaraga.

Orami ma matami ana rauoġara ona kauie.

Wate ona aramanei da aiwai o kaukauei

God ina etaremi, anatapuna aubaina.

¹⁰ Lamna aubaina nuabola au murimi ona terei ma tupuami ona paina-melei, aubaina amapo eġa ona vilaraga nonoa.

12

¹ Ami au vilaraga, taukauemi eġa nuanuami ina vuru, muriai da nuabola ona nelaġai;

maranai magura i tuġereġerei,
ma ona riwa, “Lawana marina eġa ita ai!”

² Lamna maranai madęga, nawaravi ma ubona ina ġuvai,
ma apau ina nememei da mara ina ġuva-nonoei.

³ Anina ma nimami, taugagaloemi ina sisi
aemi marina vivirewapanana ina vokokokara.

Ivomi ina viruġa da ami lam eġa ona uta gwadagwadai,
matami ina vinawanawa da eġa ona inana kaua.

⁴ Taniġami ina pota da gugura au etanai eġa ona nonori,
kiu ina logologoi ina ravidagudaguimi wate ai wela anatapui ina amo.

⁵ Taukauemi ona vinuanotenotei:
Maranai aidamo ona gagatei ma babara ona rovoei,
maranai kora ina tonaimi me rei talana,
ma tam ma gwaġa-nae me kapau e gwaġagwaġa-nae iraġe aubaina.
Erawa ma morelana anatapui ina kwa. Tauta kokoġa ta tuġereġerei ma tou
ina vikarei au doa.

⁶ Taukauemi ona vinuanotei,
muriai da lavutu ġuravana ina wanautuini,
bo nau goldei ina wanawamai
ma reduġoru ina wanakabakabari.

⁷ Ma tupuami ina naeme au doa
ma aruami ina naeme God, tauverena awarina.

⁸ Tauviararamana i riwa, “Anona eġa! Anona eġa!
Anatapuna anona eġa.”

Damona, God ma vivrei ma riwana ma voteletelei

⁹ Tauviararamana nuanuana i ulaula kaua, ma aiwai i aramanei rava i viararamani. Riwa nuaulaulai maġamaġaui i 'avi ma i girumei ma i rereġa-kauei.

¹⁰ Tauna riwa vinuaubana i baiei ma aiwai i girumi lamna jijimanina ma ririwa-kauana.

11 Tauviararamana riwai lamna me kwapu ma riwa nuaaululai i gam me tutu, nuan-uam ita tonatonai. Wei anatapuna BADA i vereta.

12 Anina natu, ma aramanei da kaua ġelaui ma inana-kauei. Buka girumai eġa ina kwa ma giruma ġiriġiri i vinigarigari.

13 Wei anatapui au murina.

Riwa tagogiava ma aramanei:

God ma vivirei ma ponana ma voteletelei.

Wei lamna aubaina rava i vitupui.

14 God ata kaua anatapui govagovaġai,
aiaii bo apoapoe, ina kovoġi.

Peroveta Isaiah ana buka

Pariverena

Wei bukana lamna peroveta ġaeġaena au Jerusalem i mae tana riwa 750 BC. nanarena, wavana Isaiah. Bukana iavana tonuġa:

Kapita 1-39 e ririweta da mai Assyria ai gulau ma ai sorodia vivirewapanai dam ġelaui Israel ma Judah au ririvai i vipupuni. Gulagulau Israel ma Judah i vibadei.

Kapita 40-55 lamna mai Babylon ai gulau mai Judah i vipupui ma i pupuna-naiei da au Babylon. Perovetana i vinuaubai ma i riwei da God ina naiana-melei ma lawana vouna ina verei.

Kapita 56-66 lamna mai Judah i nememei au Jerusalem. Ma perovetana God ana ogatara Jerusalem ravai aubaii e bababaniei.

2

BADA ana ola

¹ God ana pariverena, Judah ma Jerusalem aubaii wenanare, Isaiah - Amoz natuna i verei.

² Mara au murina,
ola mepa tempol marina e maimairi, ina mae-nonoa.
Ina ġetelara kaua eġa, me ola ġelaui.
Dam nununai patarai ina taini kampa da ina voepaepa.

³ Dam patarai ina nei ma ina riwa,
“Ona nei, tana ġae BADA ana au ola,
Jacob ana God ana au numa.
Weka ana kaua ina viararamanita
da au ivina tana babara.
Aubaina BADA Riwana au Zion da ina opu,
BADA ana tarawatu Jerusalemei ina opu.

⁴ Tauna dam ġaeġae ai viġaiġaiawa ina rauetarei,
ma ina kovoġa.
Ai sod ina guda-virai da ipa uata,
ma ai pawasi ina guda-virai da naipi ai raġaraġai kosii aubaii.
Dam damaï eġa ina viġaiġaiawa vivira me,
bo ina vokaukaua, ġavia aubaina.

⁵ Ona nei Israel natunatui, BADA ana au ravilala au ivina tana babara.”

5

BADA ana grape wapuna welana.

¹ [◊]Ona rautaniġana ma au nuavainana ana wela ana ravi.
Au nuavainana ana grape wapuna i paewi,
doa au maumaurana, ola au barana.

² I auni ma ġaima i viopuni ma i gari
ma grape ġorōġorovai aiaii, avavai, i paewi.
Violaġa numana i voai
ma nanare wine anigudana i bori au kira.

[◊] **5:1:** Mrk 12:1

Anina ma i vipaipai da grape uena aiaii ita verei,
Wate grape anatapui i vigora.

³ Marina taumi Mai Jerusalem ma Mai Judah,
Tau ma au grape wapuna ona babinie!

⁴ Aiwai ġelauna ega ata kaei au wapu?
Anatapuna a kauana-paiei!

A notai da grape uena aiaii ita vereu wate vivigorai i vereu.

⁵ Marina ana riwem,
wenanare ana kaei au wapu awarina.

Garina ana viairikarikai da ġamogamo ina rui
Ma wapuna ina ġara-viravirai.

⁶ Ana voterei da modu ura gogoi ina vinelana
ma ega aiai grape ina taragadagadari
bo modu ina tuparaguragui.

Modu ma donadona, wapuna ina puru-pai.
Apau ana egari da ega kampa garewa ina atuna.

⁷ BADA Vivirewapana Kaukauana
ana grape wapuna lamna, Israel
ma grape ġorōgorovana ae tuġuna e rerereġi
lamna ana dam mai Judah,

I notanotai da lawana aiaina ita maeni
wate i 'nanai da tara i vitoini;
kaua jijimanina ita nelagai
wate viġaiġaiawa gararai i nonori.

6

BADA Isaiah i ġorei da ina viperoveta.

¹ Madeġana gulau Uziah i 'raġe, tau Bada a inanai. Tauna ana au anikiala, au aidamo telarana i kiakiala ma ana gara adana tempol i vioai.

² Au ririvana lamna Seraph ruāga. Tagotagogi ava papei six; papena ruāgei naoi i purui, ruāgei aei i purui ma ruāgei, i lavelave.

³ Ma tauiava i viġoreġore vivira;
“Vivivirem, vivivirem, vivivirem tam BADA, Vivirewapana;
Dobu anatapuna am boruma i oai.”

⁴ Ponai gugurana tempol tuatuana i gui ma bau tempol i vioai.

⁵ Ma a riwa, “Aio! A kauana-boai! Babani apoapoei gamou i vimiramirai, ma rava gamoi miramirai au poui a mamae, wate matauei gulau, Bada vivirewapana kaukauana a inanai.”

⁶ Ma seraph tagogi incense aniapuna au tepana ai moniana i kavini ma i lavenei awariu.

⁷ Ma ai monianei gamou i vodadani ma i riwa, “Ma inanai, wei ipirim i vodadani; am apoapoe vinimalana i vaitawanei ma am ġo'apoapoe i notatawanei.”

⁸ Anina ma BADA ponana a nonori i riwa i pa, “Aiai ana paritawanei? Aiai aubaita ina nae?”

Ma a riwa a pa, “Tau weka. Ma paritawaneu!”

7

Immanuel ana mataira.

¹⁰ Muriai, BADA, gulau Ahaz i riwana-melei i pa,

¹¹ “BADA am God ma vibāgai da mataira piripirina, doa au ipu dewadewana, irairaḡei ai au animae bo mara au tepa dewadewana, ina viatataiem.”

¹² Wate Ahaz i paribelei, “Tau eḡa Bada ana vibāgai mataira aubaina. Eḡa ata ḡoei da Bada ana raudadani.”

¹³ Ma Isaiah i riwa i pa, “Gulau David ana epaepaia, ona rautanīgana kaua! Taumi ami orapotei rava orai o vivibadoi ma marina o ḡoei da kauana tagogina ona kuae Bada awarina bo?

¹⁴ Lamna aubaina Bada ainelana mataira ina viatataiem: Matatapu ina duama ma tevera orotona ina ḡuni ma ina viwavai Immanuel.” Wei anona God tauta maiteni.

9

Awarita tevera i tupua

¹ Taui i vivinu'apoapoe, ai vinuapoapoe ina kwa. Rorova dobu Zebulun ma dobu Naphtali i kwalai* ma i vini malamalai, wate muriai dobuna ina viboruma-kauei. Galili, jentail ai dobu, au boga Mediteranean ina vikarei da maramatanei ina nae da waira Jordan au baba ḡelauna.

² Taui waguwaguvareina taubabarai
lalaina ḡaeḡaena i 'nanai;

Taui gimtona taumaenina[†]
awarii lalalaina i lalai.

³ Tam ai dam u vimaḡai
ma ai nuaiai u viratai;
am viturana i vinuaiae;
me tuaruta au marana e vivinuaiai,
me sorodia e vivinuaiai,
maranai, ḡavia purapurai i tuarui, e ḡutaḡutai.

⁶ Aubaina, awarita tevera i tupua!

Tevera orotona i vereta!

Tauna ina vibada.

Tauna ina ḡorei:

Tauvinuaterena Aiaii telarana, God Vivirewapanana;

Amata Maemae Nonoana; Nuauba Badana.

⁷ Ana vigulau ma ana nuauiba ina tua,
eḡa damona ita mamae.

Noina Gulau David ana au vigulau gabuna ina kiala,
ma nuavainei ma jijimaninei ina vibada kaua;
Ina mae-nonoa, marina da mara au damona.

BADA VIVIVIREWAPANA KAUCAUANA

ana nuavainei wei anatapuna ina kuae!

11

David ana epaia

¹ Me ai tuḡutuḡu ita nabinabi

Mara e nenei maranai Jesse ana damei gulau ina nei.

* **9:1:** I pupuna-naiei au Assyria i vianipani † **9:2:** Iraḡe paratana

- ² Ma BADA Aruana tauna au tepana ina rauei da:
 Nuaulaula ma aramana ġaeġaena ina verei,
 ana oġa tara aiaina ma tepe tora ina verei, da ana rava ina paina-kauei.
 BADA ina aramaniei ma ina vivirei.
- ³ Bada votelatelana, lamna ana nuaiā ġaeġaena,
 ma eġa kaua tepana inanana bo viarautu awarinei, ina kovoġimi;
- ⁴ Tauna molamolakai ina rauetarana-kauei,
 ma vivinuapoapoe au dobu aubaii ina mairi.
- Ma gamona bolabolana dobu ina kovoġi,
 ma ponanei ġo'apoapoe ravai ina viraġeni.
- ⁵ Tauna kaua jijimanina ina vijiġoratei
 ma patutu ina vitairoroei.
- ⁶ Nanare auou moduei sipu natuna maiteni ina mae,
 ma leopard gote ġaubona au ririvana ina matave,
 nanare cow ma lion natunatui ina laba-tagogi;
 ma tevera ina viġamoġamo.
- ⁷ Bulumakau ma bear ina am tagogi,
 natunatui ina matave tagogi,
 ma lion gidagida ina ani me bulumakau.
- ⁸ Tevera daradarana mota ana au nibo ina vikalokalo
 Ee! Ma tevera edaedana mota aiara ana au nibo, urana ina tereġairei.
- ⁹ Au Zion, au ola vivivireina eġa aiwai ina vikeroi bo ina viapoapoeni.
 Aubaina BADA aramanana
 dobu ina vioai, me waira boga e vivioai.
- ¹⁰ Nai maranaina gulau vouna, Jesse ana damei,
 ina vomairi da ina vimataira dobu au ana tapuna.
 Dam ġaeġaei anatapui ina deri ġeta awarina, ana au animae boruborumana.

35

Etanai Vivivireina

- ¹ Mutulua ma dobu poipoina ina vinuaiai,
 dobu dariġaġa ina vinuaiai ma ina talai!
- ² Berana ina numoi,
 ma ina vinuaiai ma ina logologoi!
 Inanana i vinualaulauna me Lebanon olai
 ma ana maura me Carmel olana ma Sharon wapuna.
- Kampa BADA ana boruma rava ina viatataiemi,
 BADA ana vigulau ina inanai.
- ³ Ura vogarigarii ona vovaibagi,
 ae tutu gwaġagwaġana ona vovaibagi;
- ⁴ Rava rovorovoi ona riwei,
 “Eġa ona rovo! Ona virewapan!
- Ona inana! God ana mejina e nenei;
 da ami ġavia ina vipupui.”
- ⁵ Ma mata potapotai ina inana
 ma taniġa potapotai ina nonora
- ⁶ Gwaġagwaġai ina viauauepa me deer, ma gumgum ana morelanai ina vigaragararei.
 Waira au dobu dariġaġa ina wanaiwaġi,

ma vuvura ina raupaipairei.
⁷ Doa paipairana ina vitopa
 vuvura ina raupaipairei
 au dobu dariāga,
 modu ma gonu ina gogo labalababa auou moduei ana au animae.
⁸ Ma kampa etanai ġaeġaena e ġoreġorei *Etanai vivivireina*, ina mae.
 Etanaina lamna taui God ana babara e nenaeni, taui ava aubaii,
 Rava orai miramirai eġa ina babarani.
 Bubuai weka eġa ina babara dadana.*
⁹ Eġa lion bo raviuru kampa ina babara.
 Eġa ġamoġamo ġaiġaiawai kampa ina mae
 BADA rava i vivilawania,
 taui ava kampa ina babara.
¹⁰ BADA aiavoi i gimara-melei wenanare ina nememei
 ana welawelai ina rui au Zion
 Nuaiai maemaena ina vikunuteiei,
 nuaiai ma morelana ġaeġaena ina peu au tepai,
 nuabola ma iniviara ina amoa.

40

God ana rava ina vinuaubai.

¹ Ami God e ririwa, “Au rava, ona vinuaubai!
 Nuauba riwai ona riwei.”
² Riwa egolanei mai Jerusalem ona riwei
 ona riwei da ai vinuapoapoe marana i kwa,
 ai ġo'apoapoe i nota-tawanei.
 BADA ai ġo'apoapoe i vimaiei mara ruaġa.

³ ♦ Rava e viġoreġore;
 “BADA ana aninae au mutulua ona vokaukaei!
 Etanai jijimanina ata God aubaina au mutulua ona kaei.
⁴ Gwagwa ona dobo-naiei,
 ma ola anatapui ona ġara tawatawanei
 doana anatapuna ona vimataveni,
 ona ġara-labogħi.
⁵ BADA ana boruma ina vieġai,
 ma rava anatapui ina inanai.
 Lamna BADA gamonei i riwa!”

⁹ Zion, tam pariverena aiaina e garagararei.
 Ma ġae ola ġaeġaena au tepana
 ma ponam ġaeġaenei,
 pariverena aiaina ma raugugulei
 ma eġa ma rovo!
 Taon ġaeġaei Judah au paratana ma pariverei,
 “Ami God e nenei!”
¹⁰ Ona inana BADA God ana rewapanana
 e nenei da ina vibadeta.
 Ona inanai! Maiana, lamna rava i vivilawania, maiteni e nenei.

* **35:8:** Bo avena da ai nota i aburu, taui eġa ina kwako. ♦ **40:3:** Mrk 1:3

11 [✧]Ana rava ina ġamoi me sipu tauġamoina,
ana sipu natunatui au nuanuana ina raparapai.
ma tatauvao ina ravena-kauei.

42

BADA ana taunola.

1 [✧]BADA i riwa,
“Wei au taunola, a vinei,
a vovaivirewapani ma a vinuaiaiei.
Aruau au orana a terei
ma tauna lawana aiaina, ma kaua jijimanii ina neiai dobu au anatapuna.
2 Tauna eġa ina garara
bo ponana ina rata au deba.
3 Rava me gonu barabarana eġa ina gai,
bo rava me wiki tupona eġa ina boi.
Wate lawana aiaina ma kaua jijimanii ina neiai dobu anatapui awarii da ai lawana.
4 Eġa orana ina peu bo ina vokokokara,
lawana jijimanina ina terei au dobu;
bonabona ravai ueia nanare, e vivipaipai.”
6 [✧]“Tau BADA jijimaniu, a vinem ma ana vovaivirewapanim da lawana aiaina ma neiai;
ma ana raunimavoaim ma ana gagaloem.
Tamei, parivainuaġana bagibagina rava anatapui au dobu maiteni ana kauei,
ma vilalalaina jentail awari.
7 Ma mata-potapotai matai ma vikalai;
ma ravai au panipani numana;
nai taui gimtona maemaei ma tereopunei.”

49

BADA ana taunola

3 BADA i riweu i pa,
“Israel tam au taunola ma tamei au boruma ana vieġai.”
5 Au manawa ma BADA i vineu da ana taunola;
da ana rava mai Israel kwakokwakoi ana neiana-melei awarina.
BADA i vimaeġaegħen;
Tauna au rewapana.
6 [✧]I riweu “Au Taunola,
Jacob ana dam ma voepana-melei ma
mai Israel kwakokwakoi ma neiana-melei; lamna nola aburuna.
Wate nola ġaegħena a vereverem;
lalalaina ma naiei jentail awarii
ma lawana mamae-nonoana ma naiei da dobu au gia dewadewana ina ġeta.”
14 Wate mai Jerusalem i riwa,
“BADA i netawaneta! Tauta nuanuana i vuru”
15 Ma Bada i paribelei,
“Moina! Tatauvao natuna melamelana au ġuġuna, nuanuana ina vuru bo;

bo natuna i ġuniġunia nuanuana ina vuru
 Mepa da alo nuanuana ina vuru,
 wate tau, eġa nuanuau ina vuru!”
 16 Jerusalem eġa melanai nuanuau ina vuru
 Ona inanai! Wavami, au ura lapalapau a rurui.

50

BADA ana taunola patupatutuna.

⁴ BADA God i viararamaniu aiwai ana latoni,
 da ġokokokarai ma peupeui ana vovairewapani.
 Ubaubanai patapatai e ravidagudaguiu,
 ma taniġau a tonetonei da
 ana rautaniġanana ma ana viararamana kaua.
⁵ BADA God aramana i vereu
 ma eġa ata parīgaiei bo ata mae-puputei.
⁶ ☩ Uporau a verei da i kwapu-kauei,
 ma a voterei da mutuorou i amui.
 Eġa naou ata govaġi maranai i vinimalamalaiu
 ma naou i ova.
⁷ Wate BADA God au muriu e maimairi,
 lamna aubaina eġa ita vitepaubaubaiu.
 A vokaukaua da ana nebelei,
 aramanei da eġa ina vinimalamalaiu.
⁸ God au ririvau, ma ina vitaubabani aubaiu.
 Tauna ina riwemi da tau eġa aiwai ata kauana-boai.
 Aiai ina viwavui?
 Tana nae tana etara
 Au ġavia mepa, taumi ona nei?
⁹ Anina BADA tauoina e gagagaloeiu,
 Aiai ina riwei da tau a kauana-boai?
 Taui anatapui ina gumaga me gara wadubona.
 Komaġana ina ambaubauni.

52

BADA ana vilawana e nenei

⁷ I ai ġaġa, taupariverena a inanai olei e taġotaġonai.
 Riwa Aiaina e jimejimei:
 nuauba ma nuaiaii riwai
 ma BADA ana vilawana.
 Ma Zion i riwei, “Ami God e vivibada.”
⁸ Ona rautaniġana! Ami tauvineneġana e vigaragararei;
 ana morelanai e logologoi;
 Taui mataiei BADA i ’nanai
 e nenememei au Zion.
⁹ Jerusalem wanarikarikana,
 ana morelanami ona wela-gogona BADA awarina.
 Tauna ana rava i vinuaubai,
 ma ana melagai Jerusalem, i vai-melei.
¹⁰ Dobu anatapui au matai

◊ 50:6: Mrk 14:65

ana rewapanā vivivireina e viviēgai.
 Rava anatapūi au dobu
 BADA ana vilawana, ina inanai.

Taunola ana vinuapoapoe ma ana boruma.

- ¹³ BADA i riwa, “Au taunola ana nola ina kauana-kauei!
 Rava tauna ina voepai au tepa dewadewana.
- ¹⁴ Au naona rava māgamāgau i tauna i ’nanai
 ma i virovoroovoanei.
 I vunu-kauei ma i vitaratarai;
 da inanana ēga me rava.
- ¹⁵ Wate marina dobu patarai ina ravīgori
 ma gulagulau gamoi i pota tauna voepaepa aubaina.
 Ēga ita pariverei,
 marina mataiei ina inanai,
 ma aiwai ēga ita nonori, ina aramanei.”

53

- ¹ “Aiai wei pariverenana ita vitumāganei?
 BADA aiai awarii ana rewapanā i viatataiei?”
- ² God au matana, i rata me ai-nabina,
 me aiwarama au kemara e gogogolana.
 Ēga ita tupua karawata bo vigulauna,
 ēga aiwaina vinualaulaunana da tata rauōgarei.
- ³ Ta inana geduaiei ma ta inana-tawanei,
 iniviara ma vinuapoapoe malana i vaia,
 ta raugovāgei,
 ta mae-puputei ma ta riwa da tauna rava labalababa.
- ⁴ Tauna, ata nuabola kovōgana i vaia
 ma ata iniviara i avarai.
 Wate ta notai da
 ana āgo’apoapoe aubaina, God i kovōgi.
- ⁵ Ata kaua apoapoe aubaina i vitonei,
 ata āgo’apoapoe aubaina i vikeroi.
 Kovōganei, nuauba i vereta;
 kwapi keronei i vilawanita.
- ⁶ Anataputa me sipu kwakokwakona,
 ana nuaita ma ata āgoanei ta mamae;
 wate ata āgo’apoapoe kovōgana, BADA tauna i viavarai.
- ⁷ [✉]Au taunola i rauviapoapelana-kauei,
 wate i volāgota;
 ēga aiwai ita latoni.
 I taravaina-naiei virāgenana aubaina me sipu āgaubona.
 Me sipu ana genuguanana e nenaе aparabori aubaina ēga aiwai ita latoni.
- ⁸ I pani ma i naiei
 ma ēga aiai tauna ita vinuabolei,
 ēga ana epaepaia ma ina irāge.
 Ana lawana au pouna i kwa labalababa.
 Ana rava oina ai āgo’apoapoe aubaina i’rāge.

[✉] 53:7: Act 8:32-33

⁹ Tauna ēga morumoruna bo āgaiawana.

Wate taui i āgoei da danedanei maiteni ita doboi,
ma purapura ravana ana au kokoāga i vimataveni.

¹⁰ Maranai ana lawana i puloei ata āgo'apoapoe aubaina.

Lamna, BADA ana āgoana da tauna ita vunu-boai ma iniviara āgaeāena ita vaia.
Ma ana epaepaia ina māga guratana
ma ana lawana ina manawa.
Ma taunei, BADA ana āgoana ina kauana-paiei.

¹¹ Ana nola anona ina inanai ma ina vinuaiae
da ana nuabola ēga kwakwavina.

Bada i riwa, "Au taunola patupatutuna a vinuaiae,
rava māgamāgaui ai kovoāga i avarai
ma lamnei taui ana āgorei Rava-Jijimanii."

¹² [◇] Ma lamna aubaina ana vimaēgaaeni, tauna rava āgaeāena.

Ma ana au gabu ana terei
rava āgaaeī ma virewapanai maiteni
ma ana maia ina āgutai.
Aubaina ana nuaina anā lawana i verenei.
Tauna ora-potapotai maiteni i'raāge,
ma āgo'apoapoe ravai māgamāgaui aubai i mairi."

54

BADA ana nuavaina Zion aubaina.

⁴ Ēga ona rovo aubaina ēga ina vitepa-ubaubaimi.
Tepami ina tora, ēga ina vinimalamalaimi.

Ami laraga kauai nunuami ina vuru.
Ami vikaiababa nuabolana ina amoa.

⁵ Aubaina, taukauem lamna awam,
wavana BADA Vivirewapani Kaukauana.

Israel ana God Vivivireina am taugimaramelana,
Tauna dobu anatapuna ai God.

⁶ Israel, tam me wavine tavine vouvou
ma awam i geduaiem ma u vinuabola kaua.

Wate BADA ina āgore-melem awarina ma ina pa,

⁷ "A voterem mara aburuna,
wate raunuapoapoe āgaaeī ana vaimelem.

⁸ Au meji i rata kaua da a mae-puputem mara aburuna.
Wate au nuavaina mamae-nonoanei,
ana raunuapoapoelem."

BADA taugimaramelana i riwa me,

⁹ [◇] "Awariu, wei me Noah ana au mara,
maranai parivainuaāgana bagibagina a kaei
da ēga melanai wairei dobu ana purui-melei.
Marina, nanare parivainuaāgana bagibaginei a ririwem
da ēga melana amlou ina āgaiāgi da ana kovoāgi.

¹⁰ Ola ina vidagu
ma ina amoā.

Wate, au nuavaina mamae-nonoana,

ma au nuauba mamae-nonoana tam awarimi ina mae-nonoa.”
 BADA tauraunu’apoapoeleme i riwa.

55

*Nuarelanami ona nei
 BADA i riwa i pa,*

¹ “Ona nei, nuanuarelanami! Waira wei!
 Awarimi mane ega ona nei ona gimara ma ona am!

Ona nei, wine ma mereki ona gimarai
 maiana ega, ona vaioi.

² Aiwai aubaina lam apoapoei awari mane e tawatawanei.

Aiwai aubaina e nolanola labalababa.

Ona rautaniaga kaua ma ona am-iua,
 ma lam aiaii dagidagiaii ona vinuaiaiei.

³ [☆]Taniaga ona toneiai ma ona nei awariu
 ona rautaniaga da ona lawana.

Au parivainuaaga mamae-nonoana ana kauei tam maiteni.
 Ma viaiaina David a parivainuaaga ana verem.”

⁶ “BADA ona baiei da ona nelaaga,
 marina au geregere, ona vibaaga.

⁷ Goa apoapoe ravai, ami lawana apoapoei ona geduaiei
 ma nuanuami ona virai.

Ee! Ma ona wanavirai BADA awarina da ina raunu’apoapoelemei
 ma ami go’apoapoe ina notatawanei.”

⁸ BADA i riwa, “Au nota ega me ami nota nanare,
 ma au kaua tapuna, ega ami kaua nanare.”

⁹ Mara i getelara ega me dobu
 ma nanare au kaua i getera ega me ami kaua.
 Ma nanare au nota i getelara ega me ami nota nanare.

¹⁰ Garewa ma turuvani marei e peupeu
 ega kwakwavina ina naeme au mara,
 wate dobu ina viutuvanei
 da lam ina gogo,
 da pei ina vereta, paewa aubaina
 ma lam, aniam.

¹¹ Ma wenanare riwau gamouei e opuopu;
 ega kwakwavina ina nememei awariu
 da aiwai a pariparitawanei ina kauei;
 au goana anatapuna ina vikwai.

56

Lawana rava anatapui aubaii

¹ BADA wei e ririwei:

“Aburuna ava, ana nei da ana vilawanimi

[☆] 55:3: Act 13:34

ma au viaiaina ana viegai.

Lamna aubaina, kaua aiaii
ma jijimanii ona kaukauei.”

⁶ “Mai jentail, aiai da tau i vituraneu
ma i vitaunoleu, ma wavaau
i vinuavainei ma i vimaegaeäeniu.
Au Sabate i vivirei,
ma au parivainuaägana bagibagina e vovoijina-kauei.

⁷ ♦Taui ana nejai au ola vivivireina - Zion
ma nuaiai ana verei au parinumana.

Ma ai pulo e apuapui awariu ana vianinei.
Anina ma rava, au tempol ina górei pari numana,
dam anatapui au dobu aubaii.”

58

Uji ririwa kauana.

BADA uji ririwa kauana e bababaniei:

⁷ “Am-irairaägei lam ona taraiğuei,
ma ami numa ona votawanei,
nelabalabai ma vinuapoapoe awarii.

Kovakovai gara ona vioteni,
ma taraoim ega ona inana-tawanei.”

⁸ “Maranaina, au viaiaina ina ravilalaimi me maratomtom madeägana,
ma ami doria laägilägina ana vilawani.

Au naomi ana nae da ami aninae ana vovaijjimani,
ma murimiei, au boruma ina gagaloemi.

⁹ Nai maranaina ona viäore ma TAU BADA, ana paribelemi.
Agu ona gararei ma ana riwa, ‘Tau weka.’

“Ega rava, vita ona verei, ega ona viwawuwavu
ma ega babani morumorui ona kaukauei.

¹⁰ Maranai am-irairaägei o viambagibagi,
gókokokarai o vovoagui.

Lamnei, ami lalalaina gimtona ina lalai,
ina ravilalai me aubenai madeägana.”

61

Riwana Aiaina molamolakai aubai

BADA ana taunola e ririwa:

¹ “BADA God, aruana i vereu.

I vineu ma i paritawaneu da:

Riwana Aiaina ata naiei molamolakai awari
ma vinuanuabolai ana vinuabai.

Ma panipani ana pariverei da deriei ina viopuni.

² I paritawaneu da rava ata pariverei,
da mara i turiai maranai BADA ana rava ina vilawani

♦ 56:7: Mrk 11:17

ma ana ġavia ina kovogī.
 Ma i paritawaneu da vinuabolai ana vinuaubai.
³ Da taui e mogumogu au ola Zion,
 nuaiai ina vikunateiei ma eġa ina vidolodolo.
 Nuaiai logologona ma eġa tou.
 Taui ina vinuaiai ma eġa ina vinuabola.
 Ai kaua jijimanina aubaina ina ġorei BADA ana labarava ai jijimanina
 da tauna ina vimaegħaġaeni.”

⁶ “Ma taumi ina ġoremi BADA ana pirisi.
 Ina ġoremi, God ana taunola.
 Taumi dobu ġelaui ai maura ona ani
 ma ona vigulagulauei.”

BADA i riwa

⁸ “Aubaina Tau, kaua aiaii a ġoeġoei,
 danene ma ġo'apoapoe a gedugeduaiei.
 Au rava ai vinuapoapoe aubaina ana vimaiana-kauei;
 au parivainuāgħana bagibagina mamae-nonoana maiteni ana kauei.
⁹ Dam anatapui, am epaepaia ina aramanei
 ma e inainana ġaei.”
 Ma ina pa,
 “BADA i viaiaina-kauei.”

Zion i riwa

¹⁰ BADA awarina a vivinuaiai kaua
 ma Aruu God awarina i vinuaiai kaua.
 Aubaina vilawana garanei i vigaraiu
 Ma jijimana vianei ma garanei i vioteniu.
 Me tavitavinevou orotona e vivigarai nanare bo
 me wavine tavitavinevou ana viana e tavitavine.
¹¹ Me doa, pei e vivigogoi ma debagau lam e verevereta,
 nanare BADA God, rava e teretere-vaijijimani
 au dobu da tauna ina voepaepae.

64

Pari agu aubaina

⁴ Oo Bada wariaġa da marina, eġa aiai god ġelaui ponana ita nonori, ita inanai, bo
 ita aramana dadanei.
 Anina Tam ainelam.
 Taui da e vivipaipaiem e vovoagui.
⁵ Tam kaua aiaii ravai e vovoagui,
 am tarawatu e vovojiji.
 Wate maranai ta ġo'apoapoe ġirigiri
 tam amlom e voġaigħi.
 Aiwai aubaina ma vilawania?
⁶ Anatapuiai a ġo'apoapoe,
 Au matam, ai kaua jijimanii anatapui miramirai me gara wadubona.
 Anataputa ta poipoi me ai-rugurugu,
 Ata ġo'apoapoe e kapupuana-naieta.
⁷ Ma eġa aiai wavam ita voepaepai

bo ita voguratei da naom ita inanai.
Lamna aubaina tam u netawanelai
da ai ġo'apoapoei e vunuvunuiai.

- ⁸ Wate BADA, tam amaiai.
Tauai dogodogo ma tam nau tauvoaina.
Tam anatapuiai uramei u rauğaroğaroelai.
- ⁹ Lamna aubaina, eğä ma meji guratana awariai.
Ma eğä ai ġo'apoapoe ma nota-nonoei.
Ma i 'nanaiai, anatapuiai tam natunatum.

Peroveta Jeremiah ana buka

Pariverena

Jeremiah lamna peroveta wavana naenaena au Jerusalem, ma BADA riwana i raugugulei ana rava awari. Tauna riwa bagibaginei ana rava i ririwei menanare God taui ina kovoğanei, aubaina Tauna i mae-puputei ma god ġelaui i votaġoġoi.

Bada Jeremiah i ġorei

⁴ BADA i riweu i pa:

⁵ “A vinem, muriai da alom au manawana a teretagogiem.

Muriai da uta tupua, A tereriem,
rava anatapui ai peroveta.”

⁶ A paribelei, “Oo BADA God, tau tevera ota, ma babani eġa ata aramanei.”

⁷ BADA i riweu, “Eġa ma riwa, ‘Tau tevera ota.’ Ma nae mepa a pariparitawanem, ma aiwai a ririwem taui ma pariverei.

⁸ Eġa ma rovoei aubaina Tau a paritawanem. Tau tam maiteni ana mae da ana gagaloem. Tau BADA a babani.”

⁹ Anina ma BADA urana i viloloi da ipiriu i tapedadani ma i riweu,
“Marina riwau au gamom a terei.

¹⁰ Ma aramana-kauei da marina rewapania a vereverem,
da dobu anatapui ai gulagulau ai kovoġa ma vinolenolei wenanare,
Gelaui ma orumi, ma viairikarikai,
ma vovaiubai ma vipupui.
Gelaui ma voepai ma ma paewi.”

¹⁷ “Ma vokaukaua Jeremiah! Ma vomairi ma aiwai anatapuna a riwem ravai ma pariverei.
Eġa ravai ma rovoei, bo au matai, ana virorovoim.

¹⁸ Amadodo a vovaivirewapanim me
melagai vivirewapanana, tuatuana ma garina iramei voavoana. Tam ma mairi
ma eġa maiJudah ma ai gulagulau, ai gabemani ravai, ai pirisi ma dobuna ravai
ina tereġairem.

¹⁹ Taui ina viġġaviem wate ina kauana-avei.
Aubaina tau tam maiteni, ma ana gagaloem. Tau BADA a babani!”

6

Bada i riwa,

¹³ “Rava anatapui, ġaeġaei da muomuoi,
e ġoeġoei da moruei mane ina kaeui;
peroveta da pirisi anatapui nanare
rava e morumorui.

¹⁴ Taui, au rava kerdi ġaeġaei
e bunabunamai apamina me kero aburuna.
E ririwa da aiwai anatapuna anina,
Wate eġa anina!”

17

BADA ona-vitumaḡanei

⁵ BADA e ririwa,

“Aiavoi da ai vitumaḡana rava ota awarii e tereterei,
ma ai rewapanā e vitumatumāḡaneiei;
ma e gedugeduaieu,
ana parivaiapoapoeni.

⁶ Taui me, ai podapodai au dobu dariḡaḡa
eḡa aiwai aiaina ita inainanai.

Taui dobu au paipairana ina mae, ai ma modu eḡa,
me au dobu au vivibogana ita mamae kampa eḡa rava ita mamae.”

⁷ “Wate aiavoi awariu e vivipatutu ma e vivitumaḡana da
BADA ai tepamairi, taui ana viaiaini.

⁸ [✧]Taui me ai, vuvura au adana i paewi,
ma warami i ḡaira waira au orana.

Eḡa marapoi ina rovoei,
ma rūgurugui majimajīḡai ina maimairi.

Ma marapoi ana au mara,
eḡa ua ita vovoterei.”

⁹ “Rava nuapoui lamna morumoru kauana, i apoapoe kaua,
aiai i aramana-kauei, da ina vilawani.

¹⁰ Tau BADA rava nuapouii
a tuvirevirei ma kaua govagovaḡai au orai a inana-pai.

Rava anatapui ai kaua ana inanai.
ma ai kaua awarinei ana puloi.”

20

Jeremiah ana beura

BADA i riwa

⁵ Tau, Jerusalem ma ai mane ma ai maura ma aiwai anatapui polapolai i toitoiei
ana veredamanei ai ḡavia awarii. Ina nei ma Judah, ai gulagulau ai purapura maiai ḡaeḡaei
maiteni ina pupuna-naiei au Babilon.

Jeremiah i riwa,

⁷ Oo BADA! u gwala-kaueu da a viperoveta
ma a voterem da u kauei.

Tam u virewapana guratana da
u tereḡaireiu.

Marina tau rava ai anivinama.

Rava anatapui e vivinameu, marai ma waguvvarai.

⁸ Maranai a paripariverena,
Riwa ana nuaii e rubaruba-opu.

“Viḡaiḡaiawa! Pupu e nenei!”

BADA ana pariverena aubaina, vinama ava a nenelaḡai.

⁹ Mepa da ana geduai ma wavana eḡa ana latoni bo wavanei ana jima
Lamna maranaina riwam lamna me ai araratana,
orau e ararai.

[✧] **17:8:** Psa 1:3

Amapo ēga ana vojjina-guratei. Amapo ēga!
10 A nonori patara e viviarautueu.
 Au āgavia i māga kaua,
 ma e vinenēganeu da ana neboa,
 ma ina viwavuiu ina pa,
 “mepa da i jima boa, ina waro-melei ma tauta ata biwa tana vaia.”

11 Wate BADA tau maiteni
 me tauvīgavia vivirewapania kaukauana.
 Lamna aubaina au āgavia ēga ina terēgaireu.
 Taui ina vunu-aveu ma ina vinīmala kaua.
 Ina vinīmalana-nonoei ma ēga nuanuai ina vuru.

12 “Oo BADA Vivirewapanam! Tam rava jijimanii e raraudadani,
 ma ai nota ma orai e araramanei.
 Au vita au uram a terei
 ma ana inanaim, au āgavia ma kovōgi.

13 Ona wela BADA awarina.
 Ona voepaepai.
 Maranai Rava vivirewapanai, gwāgagwāgai e rarau-iviapoapoelei,
 lamna BADA ana rewapanai taui ina gagaloei.”

23

BADA Gulau vouna ina vinei mamae-terenai aubaii

1 BADA e ririwa, “Au rava ai babada nuabola āgaēena ina nelāgai! Taui sipu taupaini apoapoei. I vipaipai-boa da sipu i vidabararai.”
2 Lamna aubaina BADA, Israel ana God, wenanare Israel babadai awari e ririwa, “Taumi ami kauelei au sipu o vidabararai ma o vilamolamonei. Ēga ota vipaipai kaua. Lamna kauai apoapoei aubaina ana kovōgimi.
3 Anina ma Tau au sipu āgelaui a virubai au dobūgela, ana neiana-melei ai au gari. Wei mamae-terenai ina vinatuna ma ina māga guratana.
4 Taupainii rava kaua ana tere-naiei da ina vīgamōgamo kaua ma ēga ina rovo me bo orai ina sisi. Ēga tagogi ina kwako. Tau BADA a riwa.”

5 [☆]BADA e ririwa
 “Mara vouna e nenei maranai gulau ana terei David ana damei.
 Wei gulauna ina vibada kaua ma kaua aiainei ma jijimaninei dobu anatapuna ina vibadei.
 Nota aiainei Judah ravai ina rauetaraveni ma
Israel ravai au nuauba ina mae.
6 Wei maranaina mai Judah, ina vilawani
 ma Israel ana nuaubai ina mae.
 Ma wavana ina āgorei, BADA Tauterevaijijimanita.”

31

BADA Israel ina vaimelei.

7 BADA i riwa:
 “Ana nuaiaimi ona wela Jacob ana dam aubaina
 ponami ona voepai dam vigulauna aubaii.
 Ona voepaepa, ona jima ma ona riwa,

[☆] 23:5: Jer 33:14-16

'God, am rava mai Israel mamae-terenai ma vilawani!'

⁸ Au kariwabuei au rava ana neiana-melei, dobu au giana da au giana anatapui.

Maiteni mata-potapotai ma sigesigei, duaduamai ma tautauvaoi.
Dam patara ġaeġaena ina nememei.

⁹ Ana rupenai ma ana toutoui agu aubaina, ana neiana-melei, Waira adanei ana taravainiai, etanai abuabunei da eġa ina peu.

Tau Israel amana,
Ephraim au natuevou."

Parivainuaġana bagibagina vouna.

³¹ ✽BADA e ririwa i pa, "Mara e nenei maranai parivainuaġana bagibagina vouna ana kauei mai Israel ma Judah maiteni.

³² Wei lamna eġa me noinoi maiteni a kauei nanare; maranai a raunimavoai ma Egyptei a taravaina-opunei. Aubaina au parivainuaġana i viaigai avena da nuanuai a vaia me oroto awana nuanuana e vaivaia.

³³ Wei parivainuaġanana mai Israel maiteni ana kauei nai marana au murina." BADA e ririwa, "Au tarawatu ai au nota ana terei ma au nuanuai ana girumi. Wei ina terekuei da Tau ai God ma taui au rava.

³⁴ Ma eġa ai rava ina viararamana-melei bo riwa vivira, 'BADA ona aramanei!' Aubaina au aburuna da au magurina anatapui ina aramaneu. Tau ai ġo'apoapoe ana nota-tawanei ma eġa ana nota-melei." BADA e ririwa.

33

Nuauba parivai-nuaġanana

¹⁴ ✽BADA i riwa, "Mara e nenei maranai au parivainuaġana bagibagina mai Israel ma mai Judah maiteni a kaukaueia anona ina tupua.

¹⁵ Nai maranaina, rava kaua David ana damei ina nei;
Ma Tauna kaua aiaii ma jijimanii ina kauei au dobu.

¹⁶ Nai au marana
Judah ina vilawani ma
Jerusalem ana nuaubana ina mae.
Wei melagaina ina ġorei, *BADA Tauterevaijijimanita.*"

38

Jeremiah waira dogona au orana.

⁴ Babadai, gulau Zedekiah i riwei, "Wei ravanana Jeremiah tana virāgeni. Ana babaniei, sorodia ruaġauta lawalawai ma rava ġelaui e viviorabadoi. Tauna eġa rava ita vovoagi wate e viviorabadoi."

⁵ Gulau i paribelei, "Tauna au urami, ami ġoana nanare ona kauei. Tau eġa ana viġaemi."

✽ 31:31: Mrk 14:24 ✽ 33:14: Jer 23:5-6

⁶ Ma Jeremiah i vaia ma i tere-ḡairei gulau natuna Malkijah, ana au dogo, wei lamna gulau ana sorodia ai au potuma au ririvana. Ma ḡuravei Jeremiah i tere-ḡairei au *dogo. Au orana dogodogo ava, ma Jeremiah i monu ḡaira da i mairi dogodogo orana.

* **38:6:** Wei lamna wapaketa dogona, viutuvana aubaina.

Lamentation Mogu Jerusalem aubaina

Pariverena

Wei bukana e ririweta da au 586 B. C mai Israel i vinuapoapoe kaua maranai ai ġavia i nei da Jerusalem i pupuni ma rava ma purapura aiaii i vaia da i naiei. Tauta eġa tata aramana-kauei aiai wei bukana i girumi wate rava ġelaui e notanotai da augunai Jeremiah wei bukana i girumi.

Jerusalem ana nuabola

¹ Kapore! Zion wariaġa am patara i rata ġaġa, marina u kwakwawa.

Dam patarai ai voepaepa, marina i vikaiababa.

Wariaġa dobuġela gulagulaui ai voepaepa. Tauna i 'nana ġaei.

Marina i vitaunola.

² E toutou maratom,

jirigwegwena au navanavana e toitoi.

Ana nuavainana maġamaġaui i ruba-tomana, eġa aiai da ina vinuaubai.

Ana rava* anatapui i mae-puputei ma i viġavie.

³ Judah i pani ma i pupuna-naiei.

Au dobu ġela i vivipanipani,
e rarau-iviapoapoelei,

i vitaomana au dobuġela.

Ġavia i mae-kwaviviroi,
menanare ina onaġganei?

⁴ Zion etanaina e mogumogu

eġa aiai kampa ita nenaе torela aubaina.

Ana anirui i kwakwawa,

Pirisi e gunugunura,

ana guguini e vivitouana;

Nuapouna i wanagwadgwadai.

⁵ Ana ġavia i vibada,

au urai e mamae.

BADA nuabola ġaeġaena i neiai Zion awarina

aubaina ai ġo'apoapoe i rata.

Natunatui i paninaiei aueia, ai ġavia au mataii.

⁶ Kapore wariaġa Zion na!

Wavana naenaena, vinualaulaunana marina mepa?

Marina, Zion ana babada lamna me

deer, nuanuai i arelei ma i raumolaġau ma lam i baiana-avei.

Inina i garigari

ma eġa tagotagogina da ai ġavia ina rubatawanei.

⁷ Zion i kwakwawa, ravana eġa.

* **1:2:** Ana eririam lamna wapu god Baal ma Aserah ma mai Judah maġamaġaui wei god i voepaepai. Ana rava lamna tauviġavia mai Egypt ma nanare maiteni i viturana ma maranai ġavia i ġetai tau i viruberubei.

Ana maura, wadubona e vinuanotenotei.
 Maranai ana rava i peu ai āgavia au urai, eāga aiai ita nei da ita rauagui.
 Ana āgavia Zion ana peu i 'nanai ma i vinamei.

3

- ¹⁹ BADA, A tenam nae, eāga matave kaua, iniviara maiteni,
 a vinuapoapoe kaua, notana i viāgora kaua.
- ²⁰ A notanota-maelei
 ma au orau a toutou.
- ²¹ Wate BADA a vinua-notenotei ma orau e vovovaivirewapani. Lamnei a vitumaāgana:
- ²² da BADA ana nuavaina mamae-nonoana.
 Ma ana raunuapoapoe eāga ina kwa.
- ²³ Ubaubanai, e raviravivouni;
 am vipatutu i rata kaua.
- ²⁴ A ririwana-meleu, BADA au buderi lamna a vivitumaāganem.
- ²⁵ Taui daBADA e vivitumaāganei ma e baibaiei, ina viaiaini.
- ²⁶ I ai da tana volaāgota ma BADA tana paini da ina vilawanita.
- ²⁷ I aii da vilamolamona ma nola ma aramanei. Am au vilaraga,
- ²⁸ maranai BADA e viviaramanita,
 ma mae genuatau.
- ²⁹ Tana mae-āgaira au debidebi,
 mepa da agu ina nei.
- ³⁰ Navanavami ona verei da ina ravi, ma ina vijibogimi.
 Wate eāga ona vobelei aubaina.
- ³¹ Bada eāga ina geduaiana-nonoeta.
- ³² Avena da maraāgela nuabola e neineiai, wate ana raunua apoapoe i rata kaua.
 Aubaina ana nuavaina i rata kaua, eāga damona.
- ³³ Wate wei kauai eāga ita vinuaiaeie.

Peroveta Ezekiel ana buka

Pariverena

Ezekiel mai Jew au Babilon i vibanipani awari i babani. Tauna mara nonoa vivirarautua vinualaulaunai ma awanainei ana babani i tereterei.

Tauna rava ai riwa vouna i verei da ina vipaipai ma ai bada ina terepa-melei.

God mai Israel dobu au gia dewadewana anatapui ina neiana-meleiana da ai au dobu oina ina terei.

2

God Ezekiel i vinei ana peroveta

¹ Bada ana boruma a inanai ma au doa a peu. Ma a nonori pona i riweu, i pa, “Rava ota natuna, ma vomairi ma awarim ana babani.”

² I bababani ma God aruana au orau i rui ma i voepai ma a nonori awariu i bababani.

³ I riwa, “Rava ota natuna, a pariparitawanem dam paripariviravirai mai Israel awarii. Amamai maiteni ega ita voteleteleu ma awariu i pariviravira da marina.

⁴ Rava paripariviravirai ma orai badobadoi ma ega ita vivivireu. A pariparitawanem da ma riwei, ‘Wei Bada riwana.’

⁵ Taui paripariviravirai ma ina rautaniganem bo ega lamna avena, wate ina aramanei da peroveta i getai awarii.”

17

God Israel ina ravivouni

²² Bada God wenanare i riwa, “Tau ai cedar manamanaina nuanuana ana vogai da ana paewi. Raiana au tepadewadewana nabina ana gai da ola manamanaina au tepana ana paewi.

²³ Israel ola au tepai ana paewi, ina raianai ma ina raunumo, ai gulauna. Kiu tapuna ma tapuna au raianai ina raunoiai ma au goi ina viagoi.

²⁴ Ai anatapui nai au dobuna ina aramanei da tau BADA, ai manamanaii ana taragai ma ai tupotupoii ana voepai. Ma ai majimajigana ana vipoini ma ai poina ina raurugu ma ina rata, Tau BADA a babani, ma aiwai a riwei nanare ana kaei.”

33

God Ezekiel i vinei da tauvinenegeana.

BADA i riwa:

⁷ “Rava ota natuna, Tau a vinem tauvinenegeana dam Israel aubai; riwa a vereverem ma nonori ma babani bagibaginei ma riwei.

⁸ Maranai go'apoapoe ravana a ririwei, ‘Tam, go'apoapoe ravana, amapo ma i 'raige.' Ma ravana ega uta pariverei da ana go'apoapoe ita voterei, ma ina irage. Marina ana irage au uram a tereterei.

⁹ Wate mepa da go'apoapoe ravana u riwei da ana lawana ita virai ma ega ana lawana ita virai, ana goa apoe ina iragelei, ma tam am lawana ina mae.”

34

BADA tauvipaipai aiaina

¹¹ Bada God wenanare e ririwa, “Tau ainelau au sipu ana baiei ma ana īamoi.

¹² Sipu taupainina, ana sipu kwakokwakoi e baibaei da e nenemeleiai. Nanare tau, au sipu e kwakokwako-nae. Ana nelaīai ma ana neiana-melei, maranaina dobu i waguvarei ma i gimtonei.*

¹⁵ —Tau ainelau au sipu ana īamoi ma ana terei da ina matave kaua, Tau BADA God a babani.

¹⁶ Tau kwakokwakoi ma nelabalababai ana baiei, ma ana neiana-melei. Ma kerou ana bunamai ma īkokokarai ana vovaivirewapani. Wate dododoi ma virewapanai ana pupuni. Jijimaninei au sipu ana īamoi.

¹⁷ —Taumi au sipu Tau BADA God a ririwana-kauemi da taumi tagotagogi ava ana rauetaremi. Aiaii ma apoapoei ana vilamonei, sipu ma gote ana vilamonei.”

36

BADA ana rava ina ravivouni

¹⁶ BADA i riweu, i pa,

¹⁷ “Rava ota natuna, maranai Israel ai au dobu i mamae, taui ai kaua apoapoenei ai dobu i vimirai. Tau au matau lamna i vimira-melei me wavine ana nawaravi e vaivaia.

¹⁸ Marina, au meji ana iwaīa-tawanei awarii aubaina taui tara i vitoini au dobu, ma nanare kokoitauei dobu i viapoapoeni.

¹⁹ A vidabararai ma a vilamolamonei au dobu īgela, ai īgo'apoapoei ma ai kaua awariei a kovōgi.

²⁰ Wate metauna au dobuna i rui taui wavau vivivireina i vijiboīi, aubaina nai dobuna ravai e ririwa, ‘Wei lamna BADA ana rava wate ana dobu i opu-tawanei.’

²¹ A īgoei da au rava au wava vivivireina ita vimaēīgaēīaeni, wate noi rava mai Israel dobu anatapui i naeni ma i vitepaubaubai.

²² —Lamna aubaina, marina dam Israel ma pariverei, Bada God wei i riwei, ‘Tau a neineiana-melei, eīa tam am kaua aiaina aubaina. Tau a kaukauei wavau vivivireina aubaina, taumi wavau o viapoapena-naie jentail ai au dobu.

²³ Ana viatataiemi da wavau, īgetelarana ma vivivireina. Wavau taumi dobu au anatapuna o vitepaubaubai. Taumie i dobu ana viatataiei da tau vivivireu

²⁴ aubaina dobudobuai ana taravainimi ma ana neiana-melei, ami au dobu.’

²⁵ —Wairei ana vitoaimi da ona aii, ami mira ma kokoitau viborumai mirana ina oīatawanei.

²⁶ Ma nuanuami vouna, ma aruami vouna ana veremi. Nuanuami badobadoi ana votawanei ma aiaina ana terei.

²⁷ Ma Aruau au oram ana terei da au tarawatu ma au viararamana ona votāīotaīgoi.”

37

BADA gelama ina ravivouni

¹ BADA i raunimavoai ma aruanei i naieu da gwagwa īgēīaena au poune i tereu, rava gelamii gwagwanana i oai.

² Gwagwanana a naeni ma a inanai da gelama i maīa guratana ma i poi.

³ I paridadaneu, “Rava ota natuna, amapo wei gelamii ina virava me bo eīa?” A paribelei, “Oo! Bada God, tam ainelam u aramanai.”

⁴ Ma i riweu, “Riwauei gelama ma riwei, ‘Gelama poii, BADA riwana ona nonori.’”

⁵ Bada God wenanare gelama i riwei, “Lavutu au orami ana terei ma ona lawana me!”

* ^{34:12:} Wei lamna awanaina maranai mai Babilon Israel ina pupuna-naie au 587 B.C.

⁶ Vioa ma warowaro ana veremi, ma opi da gelama ina purui. Ma lavutu ana veremi da ma lawana. Kampa ma aramanei da Tau BADA.”

⁷ I ririweu nanare a babani, a vikarei da a bababani ma dobuna ura ketarana i nae da dobuna i oai, gelama anatapui i vitagogiei.

⁸ A inainana ma warowaro ma vioa gelama au tepana i ampasi ma au tepai opi i tupua da i purui, wate awari ega lavutu.

⁹ Ma i riweu i pa, “Rava ota natuna, Bada God riwanei ive ma riwei, ‘Bada God e ririwa, ive meiei da meiei e uveuvena, au orami lavutu ina opui ma taubeu patarai e matamatave ona uveni da ina lawana me.’

¹⁰ Ma i riweu nanare a babani, ma lavutu ravai tupuai i ruini. Anatapui i lawana ma i mairi sorodia boruna gaegaena.

¹¹ I riwa me, “Rava ota natuna, mai Israel lamna me wei gelamii. Taui e ririwa i pa, ‘Tauta gelama poi ava ma ata tuma gana i kwa, ata dam i kwa.’

¹² Lamna aubaina ma riwana-melei, Bada God wenanare e ririwa, ‘Ona inana! Ami kokoaga ana votawanei ma ana voepaemi ma ana neiana-melei aimi au Israel.’

¹³ Au rava! Maranai wei i tupua, ona aramanei da Tau BADA.

¹⁴ Ma Aruau au orami ana terei ma ona lawana ma ana neiana-melei aimi ami au dobu oina. Maranaina, ona aramanei da Tau BADA. Ee! A ririweia; ana kauei.”

Peroveta Daniel ana buka

Pariverena

Daniel tauna laraga maranaina i naiei au Babilon da i vипанипани. Ma maranai i vomagura tauna i terei da gabemani ai bada گaeگaena. Tauna ana au lawana i vipatutu ma God i votetelei.

Ana vipatutu awarinei God nuaulaula i verei, ma tauna tagotagogina da rava ai rauboni anona ina vieگai ma kaua aiwai amapo ina tupua e vivieگai.

7

Daniel ana rauboni

¹³ [❖]Waguvarai inana a inanai, ma kaua aiwai a inanai me Rava Natuna apau oraninei i nenei, ma i taravaina-naieiMAEMAE NONOANA awarina.

¹⁴ MAEMAE NONOANA vibadana ma rewapana ma vимaeگaeگaena, tauna i verei da ina vibada, da dam anatapui ma dobu anatapui ai ponei ina voepaepai ma ina voteletelei. Ma ana rewapana ina mae-nonoa, ma ana vigulau vibadana eگa ina kwa.

12

Mara au damona

¹ [❖]Ma nai maranaina anela vivrewapanana Michael, Israel ana taugagalo, ina eگa. Amapo nuabola گaeگae otana ina nei, eگa melanai nanare tata inainanai, au karea da marina. Wate wei au marana rava aiavoi da wavai au buka i girugirumia ina lawana.

² Maگamaگaui irairaگei ina vomairi me, ma ina nae, گelaui au lawana maemae nonana ma گelaui vinimala maemae-nonoana.

³ Rava nuaulaulaui ina lalai me mara madeگana. Ma taui maگamaگaui e raveraveni da lawana jijimanii e maemaeni, ina lalai me ubona.

Peroveta Hosea ana buka

Pariverena

Hosea God ana peroveta, tauna mai Israel awari God riwana i jimei. God i riwa da taui ina kovoġi ma ai dam ina pupuni aubaina taui tauna i geduaiei ma god morumorui i voepaepai ma ai kaua apoapoe i votaġotagoi.

Hosea awana tauna i voterei ma nelara ġelaui maiteni i nena. Wate tauna awana nuanuana i vaini ma i baiei ma i taravaina-meleiai ana au numa. Wei bukana e viviatataiet da nanare tagogina avena da mai Israel ai God i geduaiei tauna anina da taui nuanuai i vaia ma i parivainuaġana da taui ina neiana-meleiai awarina.

11

God, Israel nuanuana i vaia

¹ Bada Hosea i riwei, i pa, “Maranai Israel ana au vitevera, a vinuavainei ma Egyptei a ġore-opunei.

² Wate a viġoreġgore
ma tauna amapo da i nenetawaneu.
Tauna ana pulo i apuapui Baal awarina,
ma dajj ġabuġabui, i apuapui kokoitau ġelaui awarii.”

Peroveta Amos ana buka

Pariverena

Amos taon au aburuna i mae Bethlehem au ririvana, au Judah maranai God tauna i kwatuei ana peroveta. Tauna God riwana mai Israel i riwei da God, ai kaua apoapoei aubaii ina kovoḡi. Wei ravai God eḡa ita vimaegaeḡaeni ma eḡa ita ririwa kaua, i morumoru ma molamolakai awarii kaua apoapoei i kaukauei.

Ma maiteni Amos God ana parivainuaḡana taui i verei da amapo tauna Israel ana gabemani ina ravivouni, Jerusalem ina voa-melei ma gulau David ana tupua rereḡa ravai dobuna ina vibadana-melei ma ana nuaubai ina mae.

8

Tou ḡaeḡaena e nenei

- ⁴ Ona rautaniḡana! Taumi voladaḡai o kwalekwalei
ma molamolakai o tugwadagwadai.
- ⁵ O ririwa, nawaravi vouna torelana ina kwa laḡilaḡina
ma Sabate ina kwa.
Ma witi tana gimarei,
witi ruva aburuna tana terei ma maiana tana ḡaiḡaiei
ma sikere morumorunei tana gimagimarei.
- ⁶ Witi loḡilōji o tami da witi o tavipotoi ma o gimarei
ma lamnei, molamolakai o gimarai ami taunola.
Taui maiai me busi, maiana aburuna.
- ⁷ BADA parivainuaḡana-bagibagina, ana wava i kauei,
nai wavana mai Israel e vimaegaeḡae,
I pa, “Ami ḡo’apoapoei eḡa melanai nuanuau ina vuru.”

Peroveta Jonah ana buka

Pariverena

God ana peroveta Jonah i kwatuei da au Niniveh ita raugugula. Wate tauna ega ita goei da ana dobu ravai ai gavia wariagana awarii ita raugugula.

God i rauagaiagaiei ma iana tauna i lawani. Au murina, i nae au Niniveh ma i nelaagi da mai Israel ai gavia, God riwana i votetelei.

Jonah BADA i rauagaiagaiei

¹ Mara tagogi BADA, Amitai natuna Jonah i riwei,

² “Ma vomairi ma nae au taon gaeagaena Niniveh. Ma riwei, da ai go’apoapoei a inanai da i rata kaua ma lamna aubaina ana kovoagi.”

³ Wate Jonah, BADA i voterei ma etanai gelauna i vaia ma ina ruba gaira au Joppa. Ma kampa waga i nenea au Tarshish i nelaagi. I vimaia ma i geru da ita nae. I notai daBADA ita ruba govaagei.

⁴ Wate BADA kojikojira gaeagaena i paritawanei da waga ita viairikarikai.

⁵ Waga ravai ai lawana aubaina i rovo-kaukaua ma ai god awarii i tou agu aubaina, ma purapura au boga i viorereni da waga ita telatela. Wate Jonah waga au orana i raunuavuru.

⁶ Kapena i gaira awarina ma i eni i pa, “Mara i apoapoe gaga ma e matamatave! Ma vomairi, ma tou am god awarina da ina voaguita. Mepa da ina raunu’apoapoeleta da ega tana irage.”

⁷ Waga ravai i babani vivira i pa, “Gaima tana vikalokaloei da tana aramanei aiai ana wavu.” Kalona i kaei ma wavuna Jonah awarina i peu

⁸ Ma taui Jonah i paridadanei, “Aiwai aubaina kojikojira awarita i peu? Tam aiai? Tam am nola aiwai, tam meiei?”

⁹ Jonah taui i paribelei i pa, “Tau Hebrewei ma tau BADA, Mara ana God a voepaepai, Tauna boga ma doa i kaei.”

¹⁰ Waga ravai i rovo kaukaua ma i vigaragararei, “Aiwai aubaina lamna u kaei!” Jonah boibogi i viega da tauna BADA i rovoei da i rubaruba.

¹¹ Mara i apoapoe kaua ma taui Jonah i vitaravireirei, “Aiwai tana kaei da kojikojira ina kwa?”

¹² Jonah i riwa, “Ona tawaneu au boga ma ive ina raumairie. Aramanei da tau au kaelei wei ivena i vomairi.”

¹³ Wate waga ravai i lare-guratana da waga ita gairei au gera, wate ega tagotagogina, kojikojira i voguratei.

¹⁴ Anina ma taui anatapui i tou Jonah ana God awarina i pa, “Oo BADA! ega ma voterelai da wei ravana ana go’apoe aubaina, ana i’raage, ma ega tarana wavuna ana avarai!”

¹⁵ Ma Jonah i voijini ma i tawana-opunei au boga ma maratagogi kojikojira i wanatuini ma daumora i matave.

¹⁶ Ma ravai i rovoana-kaei da pulo i apui BADA awarina ma i parivainuaGANI da tauna ina vivirei.

¹⁷ Wate BADA iana gaeagaena i paritawanei da Jonah i lawani. Ma Jonah iana au manawana i mae aupom ma waguvara tonuaga.

2*Jonah ana pari*

¹ Jonah iana au manawana ma i raupari BADA, ana God awarina.

² I pa,

“Au nuabola au orana a tou BADA awarina,
ma i paribeleu.

Irairāgei, ai au dobu

ma agu a gararei

ma au tou u nonori.

³ Au gabinou u tawana ġaireu,
boga au gabaura dewadewana.

Boga i kwaviviroiu.

Rabamam ġaeġaei i viaimonumonui.

⁴ Oo BADA! A notai da tau u tereopuneu,
ma a notai da eġa melanai am tempol vivireina ana inana-melei.”

⁵ “Boga i puruiu
lavutui i tupo
ma aragoma kolau i pani.

⁶ A monu ġaira ola au kare dewadewana,
a vianipani nai au dobuna,
dobuna metaetana guduguduna maemaena.

Wate tam BADA au God, u vilawaniu.

Lawalawaiu gabinouei u sinaepaiu,

⁷ Malana a vaia au lawana i opuopu,
ma BADA a raupari awarim,
am au tempol, ma u nonoriu.

⁸ Taui kokoitau labalababa e viviborumei,
am nuavaina mamae-nonoana i geduaiei.

⁹ Wate tau ana welem, ana voepaepaim
ma au pulo ana apui awarim.
Au parivainuaġa awarim ana kauei
lawana maemae nonoana BADEI e nenei.”

¹⁰ Ma BADA iana i egari da Jonah i medana-tawanei au gera.

3*Jonah i nae au Niniveh*

¹ Ma BADA i babani me Jonah awarina,

² I pa, “Ma nae taon ġaegħena vinualaulaunana Niniveh ma au riwa a vereverem
ma pariverei.”

³ Jonah, BADA riwana i voteletelei ma i nae au Niniveh. Niniveh lamna taon ġaegħae
otana ma aupom tonuġa i vaia da i verautuini.

⁴ Jonah i vikarei nai au taona ma aupom tagogi i babara ma i jima i pa, “Aupom 40
ina kwa ma Niniveh ina pupu.”

⁵ Mai Niniveh BADA riwana i vitumaġħanei ma i vioga da anatapui magurina da abu-
ruoina i vianina tagogi da ina uji ma uji garana i oteni da ina vimataira.

⁶ Maranai Niniveh ana gulau wei riwana i nonori, tauna ana anikiala i opu-tawanei ma
ana gulau garana i ġiġi. Uji garana i oteni ma au lapukare i kiala.

⁷ Ma mai Niniveh awarii wei vinolanolana bagibagina i paritawanei tauna au wavanei. Wenanare i riwa:

Ega rava bo bulumakau bo sipu, aiwai ina ani bo ina umai.

⁸ Ma gamogamo ma rava uji garana ina oteni ma ina raupari guratana BADA awarina. Ma kaua apoapoe ma goagai ina geduaiei.

⁹ Aiai i aramanei? Mepa da God nuanuana ina amviravira ma nuavainei ana meji ina vojjini da ega ina pupunita.

¹⁰ Maranai God inanai aiwai i kaukauei ma menanare ai kaua apoapoe i geduaiei, Tauna nuanuana i virai ma ega ita pupuni.

4

Jonah ana gaiawa ma BADA ana nuavaina

¹ Wate Jonah wei ogana ega ita goei ma amlona i gaigai kaua.

² *Ma i raupari BADA awarina, i pa, "BADA a notai da amapo nanare ita tupua muriai da au melagai ata opu-tawanei. A ramanei da tam God raunuapoapoem ma iviaiam, ega lagilagina amlom ita vogaiigai ma am nuavaina maemae-nonoana. Tam ega am goana da goapoapoe ravai ma pupuni wate ma tere-kauei. Lamna aubaina a ruba nae au Tarshish.

³ *Ma marina BADA, au lawana ma vaitawanei, i ai da ata irage ma avena ata mae!"

⁴ Wate BADA i paribelei, i pa, "Tam aiwai e gaigaiawei?"

⁵ Jonah i opu melagai au metaetana, au maramatanei. Kampa gou i voepai ma au gabaurina i kiala ma i vipaipai da BADA aiwai ita kauai nai taona awarina.

⁶ Ma BADA gorogorova i vigogoi da i tuageta Jonah au tepana da ana gou. Ma Jonah wei i vinuaiaina-kauei.

⁷ Wate ubaubana boibogi aupom gela, BADA motamota i paritawanei da gorogorovana i ani da irage.

⁸ Maranai madega i gogo, God ive maramatanei i paritawanei. Ma madega Jonah kolana i rarani da i gokokokara. I goei da ita irage ma i riwa, "Irage i aii, ega me lawana."

⁹ Wate God Jonah i paridadanei, "Am nola aiwai da amlom i gaigai kaua wei gorogorovana awarina?"

Jonah i paribelei, "Amlo i gaigai kaua da a goei ana irage."

¹⁰ BADA i riwa, "Wei gorogorovana u vivinuabolei lamna ega tam uta kauai bo uta paini. Tauna wagavarai i gogo ma wagavarai irage."

¹¹ Wate nai taon gaegeaena Niniveh ma ana patara 120,000, taui gimtona taumaenina ma ai gamogamo magamaagai. Wei taona a vinuabolei tapa?"

Peroveta Micah ana buka

Pariverena

Wei bukana, Micah mai Israel e ririwei da God taui awari amlona i ġaiġai. Tauna amlonia i ġaiġai aubaina eġa ita votelatelei. Lamna aubaina ai ġavia ina voterei da ina viġavie.

Wate nanare BADA ana parivainuaġana i jimej. BADA i parivainuana da au damona ana rava ina vilawani.

5

Gulau meiei ina nei

¹ Sorodia ona vomair! Ona vokaukau!
 Gavia Jerusalem i matave kwaipipini.

Israel ana gulau ina kwapui, jiġonei navanavana ina kwapui.

² Tam, Bethlehem Ephrathah,
 melaġai aburu oina dam Judah au orai.

Wate awarimiei, Israel ai gulau ina opu.

Tauna wariġana,
 au karena da marina.

³ BADA mai Israel i voterei ai ġavia au urai,
 da wavine marina au manawa, tevera orotona ina ġuni.

Ma ai rava ġelaui a tuvai-opunei,
 ina nememei ai au gana au Israel.

⁴ Tauna BADA ana rewapanei, ina mairi ma ana sipu ina raveni,
 ana vinualaulaunei ma BADA wavana ġaeġaenei.

Rava anatapui au dobu, Tauna ina vivirana-kauei
 ma lamna aubaina taui kampa ina mae-kaua.

Peroveta Zechariah ana buka

Pariverena

Mai Jew ai ġavia i nei ma taui i pupuna-naiei au Babilon. Ma madeġa 70 au murina Babilon ai gulau mai Jew i voterei da i naeme au Israel tempol voamelana aubaina. Zechariah maiteni i nae. BADA Zechariah i riwei da mai Israel wenanare ina pariverei, “Ona mae-taviremi awariu ma ana maetavireu awarimi.”

Zechariah turana peroveta Haggai maiteni i nola tagogi nai au marana.

9

Zion ana gulau e nenei

⁹ BADA i riwa, “Ona morelana Zion
Ona logoimi Jerusalem,

ona inana! Ami gulau e nenei awarim.

Orana Jijimanina ma ana ġavia i vovaiubai.

Ana volaġotana donkey e gerugerui,
donkey ġaubona i gerui.

¹⁰ Dam Ephraim awarii Chariot ina vaitawanei,
ma Jerusalem awari ġavia horse ina vaitawanei.

Ma viġavia ana pidu ina gai.

Tauna rom ina neiai.

Ma ana vibada boga i taġoni da au boga ġela,
au waira Euphrates da dobu augia dewadewana.”

12

Tauna i tonatonai ana mogu.

¹⁰ Tau-Bada, David ana epaepaia ma mai Jerusalem awarii, raunuapoapoe ma rupena aruana ana iwagi. Taui ina taepai ma i tonatonai ina inanai, ma ina touei ma ina moguei me rava natuna tagotago i'rāġe; me natuevouna ina irairāġe.

¹¹ Nai marana, tou ma tarakwatu au Jerusalem ina rata kaua me au Hadad-Rimmon au wapuna, au Meggido maranai gulau Josiah i viraġeni.

13

¹ BADA Virewapana Kaukauana i riwa i pa, “Mara ina ġetai maranai vuvura ina votawanei au Jerusalem. David ana epaepaia ma mai Jerusalem anatapui ina nei ma ai ġo'apoapoe ma ai mira ina oġa-tawanei.”

Mark Riwana Aiaina, Mark i girugirumia

Pariverena

Wei lamna God Natuna Iesu Keriso Messiah Riwana Aiaina karena. Rava wei bukana i girumi, wavana ega ita riweta. Wate tauviararamana e ririwa da Mark i girumi. Mark, lamna ega Apasol, wate tauviararamana maagmaagaui i notai da tauna, Peter maiteni au Rome i mae. Ma Peter, Iesu ana kaua ma ana viararamana maagmaagaui Mark i riwei. Anina ma Mark wei riwana i girumi da tauvitumaaga au Rome ita aramanei, Iesu aiwai i kaei.

Riwa karea i girugirumia e viviegeta da wei lamna Iesu Keriso Messiah God Natuna Riwana Aiaina. Aubaina, wei au bukana ta inainai Iesu awarina rewapana da kaua maagmaagaui ita kaei. Wei kauai tana inanai maranai: e viviararamana; ma arua-apoapoei e viviagaagana-opunei; ma rava doridoriai e vivilawani; ma go'apoapoe e notanota tawanei. Mark, Iesu ana nola ma ana kaua i girumi ma ega ana viararamana ita giruma-guratei. Mark i viegeta menanare Iesu au korosi i 'rage da rava anatapui ita vilawanai ma God menanare, Iesu iraaglei i vovaimairini.

John Taubabataito, Iesu ana aninae i vovokaukauei (Matthew 3:1-12; Luke 3:1-18; John 1:19-28)

¹ Wei lamna Iesu Keriso Messiah God natuna Riwana Aiaina karea.

² Wariaaga peroveta Isaiah i girugirumia nanare:

*"Ona rautaniaga! Au peroveta au naom ana paritawanei
da am aninae ina vokaukauei."*

(Malakai 3:1)

³ [☆]*"Peroveta au mutulua e vivigorego:*

*"Taumi BADA ana aninae ona vokaukauei,
ana eta ona vovai-jijimani!"*

(Isaiah 40:3)

⁴ Ma taupariverena John i nei au mutulua da rava i bababataitoi ma God riwana i jimejime i pa, "Ami go'apoapoe ona voterei, ma ona mae-taviremi God awarina ma ami go'apoapoe ina nota-tawanei ma ana babataitoimi."

⁵ Ma rava anatapui Judea au paratana ma au Jerusalem i nae da John ita rautaniaga. Maranai ai go'apoapoe i rupeni, John, tau i babataitoi au waira Jordan.

⁶ Ma John, kamel aparana metametanana i oteoteni ma ana tairoro gamogamo opina. Ana lam kapau ma manigewa.

⁷ Ma tauna, rava i ririwei i pa, "Rava au muriu e nenei i getelara, ega me tau. Ega tagotagogiu da ana ae uma guravana ana rupeni.

⁸ Tau wairei a babataitoimi, wate tauna, Arua Vivivireinei ina babataitoimi."

John, Iesu i bababataitoi (Matthew 3:13-17; Luke 3:21-22)

⁹ Lamna maranaina Iesu, Nasaret, Galili i netawanei ma i nei ma John au waira Jordan, tauna i bababataitoi.

¹⁰ Ma maranai Iesu wairei i gegetai, i 'nana da mara i wanatawanei ma Arua Vivivireina me gabubu i gairai.

¹¹ [☆]Ma God ponana marei i opu ma i riwa i pa, "Tam, tau natu au nuavaina ma u vinuaianiu."

Satan, Iesu i raelari (Matthew 4:1-11; Luke 4:1-13)

[☆] **1:3:** Isa 40:3 [☆] **1:11:** Gen 22:2; Isa 42:1; Mrk 9:7

¹² Ma lamna au murina God Aruana Vivivireina Iesu i paritawanana-opunei au mutulua.

¹³ Ma au pom 40 au mutulua i mae. Ma Satan, tauna i raelari. Ġamogamo ġaiġaiawai nai au dobuna i mamae ma God ana anela marei tauna i paini.

*Iesu, lebalebaġai ruāġa ma ruāġa i raukwatuei
(Matthew 4:12-22)*

¹⁴ Ma gulau Herod, John i pani. Ma muriai Iesu i nae au Galili da rava awarii God Riwana Aiaina i jimei.

¹⁵ Ma Iesu i ririwa i pa, “God ana mara vinevinena i ġetai. God ana vibadana vouna rava aubai, lamna i turiai. Ami ġo’apoapoena ona rupeni ma ona mae-tavirem ma Riwana Aiaina ona vitumaġanei!”

¹⁶ Mara tagogi Iesu Galili topana au gerana i bababara nae. Ma lebalebaġai ruāġa i ’nanai, Simon* ma ana tevera Andrew au topa i raraugida.

¹⁷ Iesu i riwei i pa, “Ona nei ma ona votaġotaġoiu. Ma me marina iana o tutuarui; nanare, ana viararamanimi da rava ona tuarui da ina vitumaġaneu!”

¹⁸ Ma maratogogi ai agida i voterei ma Iesu i votaġotaġoi.

¹⁹ Ma taui au gera i verau-nae. Iesu, Zebedi natunatuna i ’nanai, James ma John ai au waga ai agida wanawanarorona i vokaukauei.

²⁰ Ma maratogogi taui i ġorei, “Taumi ona nei ma ona votaġotaġoiu!” Ma taui amai Zebedi† ana taunola maiteni i voterei ma Iesu i votaġotaġoi.

*Iesu, arua-apoapoena rava awarina i viaġaġana-opunei
(Luke 4:31-37)*

²¹ Iesu ana Tauvotaġotaġo maiteni i nae au Capeniam.[‡] Ma au Sabat, Iesu i rui au pari numana ma God Riwana Aiaina, viararamanana i vikarei.

²² Tauna ana rewapanana i viararamana eġa me mai Jew ai tarawatu babadai § nanare. Ma taurautaniġana ana viararamana i baiei.

²³ Maranai Iesu pari au numana i viviararamana ma oroto arua-apoapoena orana i ruiruinia i garara

²⁴ i pa, “Iesu Nasaretei, aiwai e ġoegħoei awariai. Tam weka u nei da ma viapoapoenai bo? Tau a aramanei tam aiai. Tam Vivivirem Godei!”

²⁵ Ma Iesu riwa bagibaginei i riwei i pa, “Ma genuana! Nai orotona ma opu-tawanei!”

²⁶ Ma arua-apoapoena orotona i viaikwajie i ponana i rata, i garara ma i opu-tawanei.

²⁷ Ma rava anatapui i bana-kauei ma taui ava i vitarapiri, “Wei aiwai? Wei viararamana vouna ma ana rewapanana maiteni! Wei ravana awarina rewapanana e mamae da arua-apoapoena i riwei ma tauna i vovoteletelei!”

²⁸ Iesu nolana, maratogogi i tua Galili au anatapuna.

*Iesu, rava maġamaġaui i vilawani
(Matthew 8:14-17; Luke 4:38-41)*

²⁹ Nai marana pari numana i opu-tawanei ma ana tauvotaġotaġo maiteni i nae Simon ma Andrew ai au numa. James ma John maiteni i nae.

³⁰ Simon poiana wavinena ini ġuġurana ana au animatave i matamatave ma maranai Iesu i ġeta ma numa ravai, tauna i pariverei.

³¹ Tauna i nae wavine awarina, nimana i vojjini ma i voagui da i vomairi. Lamna maranaina, ini ġuġurana i voterei ma wavinena, taui i paini.

* ^{1:16:} Wavana ġelauna Peter † ^{1:20:} Eng. Zebedi. ‡ ^{1:21:} Eng. Capernaum. § ^{1:22:} Wariaġa BADA, ana Tarawatu Moses i verei mai Israel aubai.

³² Ma au bigai madeğä i neulai au murina, rava, ai rava doridoriai ma aiavoi arua-apoapoei au orai maemae, i neiai Iesu awarina.*

³³ Ma rava anatapui nai au melagaina i vitagogiei numa au metaetana.

³⁴ Ma Iesu, mağamağauai ai doria nununai i vilawani ma arua-apoapoe mağamağauai rava awari i viağagana-opunei. Ma arua-apoapoena i aramanei da tauna anina God natuna ma lamna aubaina taui i viğaei da i genuana.†

*Iesu au Galili i raugugula nae
(Luke 4:42-44)*

³⁵ Ubaubanai boibogi, Iesu i vomairi ma numa i opu-tawanei ma i nae gabu au genugen-uanana. Ma kampa, God awarina i raupari.

³⁶ Muriai, Simon ana rava maiteni i nae da i baiei.

³⁷ Ma maranai Iesu i nelağai, ma i riwei i pa, “Rava anatapui e baibaiem.”

³⁸ Iesu i paribelei i pa, “Tana nae taon ġelaui au ġereğere, ma kampa maiteni God Riwana Aiaina ana raugugulei. Tau wei lamna aubaina a nei.”

³⁹ Ma Galili au anatapuna i naeni ma pari au numai i raraugugula ma arua-apoapoei i viopuni.

*Iesu, oroto opi doriana i vilawani
(Matthew 8:1-4; Luke 5:12-16)*

⁴⁰ Anina ma rava awarina opi doriana, i nei Iesu awarina ma au naona i peu ma i raudune ma agu i vibağei i pa, “Mepa da ma ġoei, anina da ma viaiainiu.‡”

⁴¹ Ma Iesu nuabola orana i oai ma urana i viloloi da i vodadani ma i riwa i pa, “Anina a ġoeğoei, ma aiil!”

⁴² Ma maratogogi opi-doriana, oroto i voterei ma tauna i aii me.

⁴³ Anina ma Iesu i riwana-guratei i pa,

⁴⁴ “Tam ma nae! Aiwai i tuputupua awarim, eğä rava ma vieğei! Ma jijimanina ma nae pirisi pulo tau apuna awarina ma vietataiana-melem ma viaiaina pulona Moses i ririweia ma kaeui da ina vimataira taui awari! Pirisi pulo tauapuina ana vianina ina verei da tam u lawana.”

⁴⁵ Wate orotona i nae ma aiwai awarina i tuputupua lamna melagai au anatapuna i babaniana-naiei. Ma lamna aubaina Iesu melagai anatapui i vorei ma mepa eğä rava ita mamaelana kampa i nae. Wate rava mepa maemaei i nei Iesu awarina.

2

*Iesu, oroto gwağagwağana i vilawani
(Matthew 9:1-8; Luke 5:17-26)*

¹ Iesu ana tauvotağotağ maiteni i wanavira-melei au Capeniam. Ma au pom ruağä au murina, rava nolana i nonori da tauna i nememei au melagai.

² Ma rava mağamağauai i vitagogiei au numa. Patara i rata guratana da numa i oai ma metaeta maiteni i mae-potai. Iesu, God riwana i raraugugulei.

³ Nelara ruağä ma ruağä, oroto gwağagwağana rasirasiei i avarai da i neiai Iesu awarina.

* **1:32:** *Madeğä ina neulai au murina* anona lauvitau ana mara damona. Mai Jew ai lauvitau ana mara au Friday madeğä e neneulai au murina e vivikarei da Saturday madeğä e neneulai au murina e vorovorovei. † **1:34:** Iesu i aramanei, mepa da ita kaeui da arua-apoapoei ita riwa da tauna Keriso; lamna rava tauna ita egari da sorodia ita vibadei ma ta viğavia, me taui e vivinua-notenotei nanare. Jhn 6:15 ma inanai. ‡ **1:40:** Mai Jew ai Tarawatu e ririwa da rava lepeleperai, taui miramirai me dobu ġela ravai - *Jentail*. Mai Jew amapo nai ravai eğä ina vodadani. Rava miramirai eğä maiteni ina vitaparoro bo au melagai ina mae. Lamna aubaina mepa da rava miramirana i lawana, tauna ina ai-me, God tauna ina vaimelei ma rava maiteni ina mae ma ina taparoro.

⁴ Rava i māga guratana ma ēga tagotagogina da ita neiai Iesu awarina, lamna aubaina da tetelei i am̄gaena da au poewa ma gavogavo i bauni ma kampa gwāgagwāgana ana rasirasina i tere-̄gairei Iesu au naona.

⁵ Ma Iesu, nai ravai i 'nanai da ai vitumāgana i rata, lamna aubaina gwāgagwāgana i riwei i pa, "Natu, am̄ ̄go'apoapoei, a nota-tawanei."

⁶ Anina mai Jew ai tarawatu babadai ̄gelaui kampa i kiakiala, au orai i vinua-notanota i pa,

⁷ "God ainelana ̄go'apoapoei e notanota tawanei. Aiwai aubaina wei ravana nanare e bababani? Tauna, God e vivijibōgi ma e ririwa da tauna, God nanare."

⁸ Maratagogi, Iesu Aruanei ai nota i vaia ma i riwei i pa, "Aiwai aubaina wei kauai o vivinua-notenotei?"

⁹ Metauna i telatela: ̄gwāgagwāgana ata riwei, 'Am̄ ̄go'apoapoe a nota-tawanei.' Bo ata riwei, 'Ma vomairi, am animatave ma vaia ma ma babara?"

¹⁰ A ̄goei da taumi ona aramanei da Rava Natuna au dobu ana rewapana e mamae da rava ai ̄go'apoapoe ina nota-tawanei ma ina vilawani." Ma gwāgagwāgana i riwei i pa

¹¹ "A riwem, ma vomairi, am animatave ma vaia ma ma nae au numa!"

¹² Orotona i vomairi ma maratagogi aravi i vaia ma i babara nae. Ma patara i raraubiga, i bana-kauei ma God i voepaepai ma i ririwa, "Tauai ēga melanai kaua wenanare ata inanai!"

Iesu, Levi i kwatuei

(Matthew 9:9-13; Luke 5:27-32)

¹³ Iesu, Capeniam i voterei ma Galili topana au gerana i bababara ana tauvotāgotāgo maiteni. Ma patara i nei awarina ma tauna God riwana viararamanana i vikarei.

¹⁴ Ma i verau-nae aburuna ma Apicus* natuna Levi i 'nanai, ana bagibagi au gabuna i kiakiala ma tax i tamitami Rome gabemanina aubaina. Iesu i riwei i pa, "Ma votāgotāgoi!" Levi i vomairi ma i votāgotāgoi.

¹⁵ Tax tautami ma ̄go'apoapoei ravai māgamāgau, Iesu ma ana tauvotāgotāgo i votāgotāgoi. Ma anatapui, Levi ana au numa i kiala gogona ma i amam.[†]

¹⁶ Tarawatu Babadai ̄gelaui lamna Pharisi, ma taui i 'nanai da Iesu tax tautami ma ̄go'apoapoe ravai maiteni i amam. Anina ma Iesu ana tauvotāgotāgo i riwei i pa, "Aiwai aubaina Iesu tax tautami ma ̄go'apoapoei ravai maiteni e amam?"

¹⁷ Ma maranai Iesu wei riwana i nononori ma taui i riwei i pa, "Rava lawalawai, doketa ēga ita ̄goēgoe ma rava doridoriai, doketa e ̄goēgoe. Tau a nei ̄go'apoapoei ravai aubai ma ēga rava jijimani aubai."

Uji vitaraviravirana

(Matthew 9:14-17; Luke 5:33-39)

¹⁸ Mara tagogi, John Taubabataito ma Pharisi ai tauvotāgotāgo i ujiuji. Ma rava ̄gelaui i nei Iesu awarina ma i vitara-virevirei, "Aiwai aubaina John Taubabataito ma Pharisi ai tauvotāgotāgo e ujiuji, wate tam am tauvotāgotāgo ēga ita ujiuji?"

¹⁹ Iesu i paribelei i pa, "Taumi o notanotai da taui aiavoi i raukwatuei tavine ana au torela, ina mae lota bo? Ēgateni kaua! Maranai tavitavine vou orotona, taui maiteni e mamae, taui ēga ina uji.

²⁰ Wate mara ina ̄geta maranai tavitavine vou orotona ina vaitawanei ma lamna maranaina ana rava ina uji."

²¹ Ma riwa e mamae, "Tau kaua vouna a neiai ēga me taumi ami kaua wadubona nanare. Ēga aiai ravana, gara vounai gara au wadubona ina popo-ratui da gavogavo ina vopotai. Mepa da nanare lamna, gara vounai gara wadubona ina roroi ma gavogavo ina rata.

* ^{2:14:} Eng. *Alphaeus*. † ^{2:15:} Moses, BADA ana Tarawatu i girumi ma mai Pharisi wei Tarawatuna i votāgotāgo-kauei. Ma taui kaua waduboi amamai ̄garie maiteni i vovoteletelei ma i riwa da aiavoi Tarawatu ēga ita voteletelei lamna taui rava apoapoei, ̄go'apoapoei tau kauai.

²² Ma nanare, ega aiai *wine* vouna ina vaini da *wine* aniterenana wadubona gamogamo opinei au orana ina iwaigi. Mepa da ina kauaei, lamna *wine* vouna ina dodo ma *wine* aniterenana wadubona ina viairoroi ma *wine* ma aniterenana ina wanabauni[‡]. Wate *wine* vouna, anina da *wine* aniterenana vouna au orana ina iwaigi.”

Iesu ana riwa Sabat aubaina
(Matthew 12:1-8; Luke 6:1-5)

²³ Mara tagogi au Sabat, Iesu ana tauvotagota maiteni, *witi* wapuna au orana i nenea. Ma ana tauvotagota witi rovei i vaini ma i amam.

²⁴ Pharisi gelaui i 'nanai wei kauana i kaukauei ma taui Iesu i riwei, “Ma inanai, ata Tarawatu e mamae da Sabat, lamna lauvitau ana mara. Aiwai aubaina taui e vovobagibagi?”

²⁵ Iesu i paribelei i pa, “Me peroveta i girugirimia nanare. David ana tauvotagota maiteni am-iraige ma aiwai i kauaei? Taumi o iavi ma aiwai aubaina anona, ega ota vinuanotenotei?

²⁶ [◊]Pirisi Gegetelarana Abiathar ana au mara, David, God ana au numa i rui ma palawa vovivirana i vaia ma gelaui ana tauvotagota maiteni i verei da i ani. Moses ana Tarawatu e mamae da pirisi ava palawana e aniani.”

²⁷ Ma Iesu ana riwa au damona i riwa i pa, “God, Sabat i kauaei da rava voaguna aubaina ma ega rava ita kauaei Sabat voaguna aubaina.

²⁸ Ona vinuanotenotei, tau Rava Natuna, lamna aubaina tau anina Sabat badana.”

3

Iesu, Orotu urana irairaigena i vilawani
(Matthew 12:9-14; Luke 6:6-11)

¹ Mara gelauna au Sabat, Iesu i naeme au pari numana ma oroto urana irairaigena i 'nanai kampa i kiakiala.

² Ma Pharisi gelaui i goei da aiwaiei Iesu ita viwavui. Lamna aubaina i 'nana-tagota goi da oroto ita vilawani bo ega au Sabat.

³ Ma Iesu, orotona i riwei, “Ma nei, au naoi ma mairil!”

⁴ Ma Iesu, ravai i vitara-vireirei i pa, “Sabat au marana, metauna i aii: Aiaina tana kauaei bo apoapoena? Tana vilawana bo tana viraigena? Tarawatu aiwai i riwei?” Ma anatapui i genuana.

⁵ Iesu ana amlogaigaina i 'nana viravira ma i 'nanai da taui orai i bado ma nuanuana i bola-kauei. Ma orotona i riwei i pa, “Uram ma viloloi!” Ma i viloloi ma i lawana.

⁶ Ma Pharisi maratagogi i opu ma i nae Herod ana rava awarii* ma ai oga i tarai da Iesu mena ita viraigenanei.

Iesu, Patara awari i babani

⁷⁻⁸ Iesu ana tauvotagota maiteni, taui i netawanei ma i nae au gera da ita vilauvitau; ma mai Galili patara gaegaena i votagota. Rava magamaagaui, Iesu aiwai i kaukaueia nolana i nonori ma mai Galili ma Judea, Jerusalem taon, Idumea ma taon gelaui waira Jordan taon au babagelauna, Taia taon ma Sidon taon,[†] taui anatapui i nei Iesu awarina.

⁹⁻¹⁰ [◊]Iesu, rava magamaagaui i vilawani. Ma lamna aubaina doridoriai magamaagaui i viviamduu ma i goei da tauna ita vodadani. Lamna aubaina ana tauvotagota i riwei da waga i vokaukauei.

[‡] **2:22:** Wine e tuputupua ma puropurona wine ana aniterenana ina viaisikasikai [◊] **2:26:** 1Sa 21:1-6 ^{*} **3:6:** Herod ana rava anona lamna mai Jew ai boru, taui aiavoi Rome gabemanina i vovoagui. Taui ai bada wavalatona Herod Antipas. Mai Jew magamaagaui ma mai Pharisi maiteni, i notai da Herod ana rava taui tauvibenabenam ai rava au oienaa awarii. [†] **3:7-8:** Eng. *Tyre & Sidon*. Wei ravana ega mai Jew. [◊] **3:9-10:** Mrk 4:1

¹¹ Maranai, arua-apoapoei rava au orai maemaei, Iesu i 'nanai ma au naona i peu ma i garara, "Tam God Natuna!"

¹² Ma Iesu taui i viḡaei da avena ita vieḡa da tauna aiai.

Iesu ana Apasol 12 i vinei

(Matthew 10:1-4; Luke 6:12-16)

¹³ Anina ma Iesu i ġae au ola ma ana ġoanei nanare, rava i kwatuei da awarina i ġei.

¹⁴ Tauna, nelara 12 i vinei da maiteni ita mae ma muriaeit paritawanei da ita raugugula. Ma i ġorei *Apasol*.

¹⁵ Ma i vovai-virewapani da arua-apoapoei rava au orai ina viopuni.

¹⁶ Taui i vinevinei 12 ai wava wenanare,

Simon i ġoreġoreia Peter‡

¹⁷ ma Zebedi§ natuna James ma ana tevera John i ġorei Boaneges, anona waiparara natunatuna,

¹⁸ Andrew,

Philip,

Batolomeo,*

Matthew,

Thomas,

James, tauna Apius† natuna,

Thadeus,‡

Simon, tauna Ununurana,§

¹⁹ ma Judas Iskariotei; * tauna, Iesu tauvibenabenameina.

Rava i riwa da arua-apoapoei Iesu e vivibadei.

(Matthew 12:22-32; Luke 11:14-23; 12:10)

²⁰ Ma Iesu ana tauvotaġo maiteni i rui au numa. Ma patara i rieiai da taui eġa tagotagogina da ita am.

²¹ Ma Iesu ana numa ravai nolana i nonori ma i riwa i pa, "Tauna i bua." Lamna aubaina i nei da ina taravaini.

²² Tarawatu babadai ġelaui Jerusalemei i nei ma i riwa i pa, "Arua-apoapoei, ai bada Bielsibul,† Iesu au orana i rui ma lamnei arua-apoapoei e viviopuni."

²³ Lamna aubaina Iesu, wei Babadai i ġorei ma awanainei i pa, "Satan amapo Satan eġa ina viopuni.

²⁴ Mepa da dobu ravai ina viġavia vivira, lamna dobuna ita mae ava.

²⁵ Ma nanare dam ina viġavia vivira, nai damna ita mae ava.

²⁶ Ma Satan ita vomairi ma ita viġaviana-melei, amapo ita mae ava.

²⁷ Taudanene amapo eġa rava virewapanana ana au numa ina danene, eġa da au naona ravane ġuravei ina raġini ma muriaeit ina danene.

²⁸ Riwa kaua a ririwemi da God ami ġo'apoapoei ma ami vijiboġa anatapui ina nota-tawanei.

²⁹ Wate aiai da Arua Vivivireina e vivijibogħi, God, nai ravana ana ġo'apoapoei eġa melanai ina nota-tawanei ma ana ġo'apoapoei ina mae-nonoa."

³⁰ Iesu wenanare i babani, aubaina rava ġelaui e ririwa, "Iesu au orana arua-apoapoei e mamae."‡

‡ **3:16:** Anona Ġaima. § **3:17:** Eng. *Zebedi*. * **3:18:** Eng. *Batolomeo*. † **3:18:** Eng. *Alphaeus*. ‡ **3:18:** Wavana ġelauna Judas - Luk 6:16 § **3:18:** Anona lamna taui mai Jew ma taui Rome e viviġavie. * **3:19:** Iskariot, lamna Judas ana melagai wavana da auna lamna Iskariotei. † **3:22:** Eng. *Beelzebub*. Anona lamna, *nabugara ai bada*. ‡ **3:30:** Tarawatu tau girumi i parivajjigei aubaina taui e ririwa da Arua Vivivireina ana nola lamna baravu da parauma. BADA eġa melanai ai ġo'apoapoei ina nota-tawanei.

Iesu ana dam oina
(Matthew 12:46-50; Luke 8:19-21)

³¹ Iesu alona ma varevareina i nei ma au doa i maimairi ma riwa i paritawanei Iesu awarina da ita nei.

³² Ma patara Iesu i kiala kwaviviroi, ma taupariverena i riwei i pa, “Alom ma novunovum ma varevareim au doa ma e ġoeġoem.”

³³ Iesu i paribelei i pa, “Aiai alou ma aiavoi varevareiu?”

³⁴ Anina ma taui i kiakiala i ’nanai ma i riwa i pa, “Ona inana! Wei taui alou ma varevareiu.

³⁵ Aiai God ana ġoana e kaukauei, tauna alou ma novu ma vareiu.”

4

Doa tapuna ma tapuna ai awanaina
(Matthew 13:1-9; Luke 8:4-8)

¹ Iesu, giu i raukarena-melei Galili topana au adana. Ma patara i riei da ita rautaniġanei. Ma patara i rata, da tauna au waga i geru ma i kiala ma waga i dudui da i viraupu au topei ma patara au gera i mae.

² Ma kaua maġamaġaui awanainei i giu ma i viaramana i pa,

³ “Ona rautaniġana! Taupaewa, ana wapu i vokaukauei ma pei i ravi awawari.

⁴ Pei ġelaui au eta i peu. Ma kiu i ġeta ma i ani.

⁵ Ma pei ġelaui doa au ġaigaimana i peu, doa au avavana. Ma lamna aubaina maratagogi i gogo.

⁶ Wate maranai madeġa i rarani, maratagogi i poi, anona warami eġa ita ġaira guratana doa au orana.

⁷ Pei ġelaui, modu donadonai au poui i peu. Ma modu donadonai i gogo ma pei i gogogo i lavani, ma eġa ita ua.

⁸ Ma pei ġelaui doa au aiaina i peu ma i gogo kaua ma i ua, ġelaui 30, ġelaui 60 ma ġelaui 100.”

⁹ Ma Iesu i riwa i pa, “Mepa da taniġami e mamae, riwa ona nonori!”

Aiwai aubaina Iesu awanainei i babani
(Matthew 13:10-17; Luke 8:9-10)

¹⁰ Maranai Iesu ainelana i mamae ma ana tauvotaġotaġo 12 ma taurautaniġana ġelaui i ġeta ma Iesu i vibaġai da awanaina anona ita riwei.

¹¹ Ma Iesu i paribelei i pa, “God ana vigulau ana kaua mamae govaġana; taumi i vieġemi ma rava au tano maemaei, taui aiwai anatapui awanainei e paripari-verei.

¹² Lamna ana kaei da wariaġa peroveta aiwai i girugirumia ina tupua:

‘Taui ina inana ma eġa ita inainanai.

Taui e rarautaniġana ma eġa ita araramanei;
 ma lamna aubaina taui eġa ita nenei God awarina
 da ai ġo'apoapoe ita notatawanei.’

(Isaiah 6:9-10)

Doa tapuna ma tapuna anoi.
(Matthew 13:18-23; Luke 8:11-15)

¹³ Anina ma Iesu i riwei i pa, “Wei awanainei a babani ma anona eġa ota aramananei bo? Ma awanaina ġelaui menanare ona aramananei?

¹⁴ Taupaewa, God riwana, rava anatapui e paripari-verei.

¹⁵ Rava ġelaui orai i bagibagi me etanai. Riwa au tepana e raurauei, wate maratagogi Satan e nenei da riwa rava au orai e vaivai-tawanei.

¹⁶ Ma rava ġelaui orai me doa viġaġaimana. Taui, riwa i nonori ma maratagogi ana nuaiaii riwa e vaivaia.

¹⁷ Wate warami ega da ega ita mamae guratana. Ma maranai nuabola bo rau-ivapoapoe e nenei taui awari, aubaina taui ai tuma'gana God awarina e tereterei. Taui maratagogi e peupeu.

¹⁸ Rava gelaui orai me pei, modu donadonai au orai e gogolana. Taui anina riwa e nononori.

¹⁹ Wate lawana ai nuabola ma mane ai nuavainana ma kaua gelaui ai au nuaiai e ruirui ma God riwana e lavalavani da ega ita uaua.

²⁰ Ma gelaui, taui me pei doa au aiaina i peu. Taui, lamna anina riwa e nononori ma e vaivai-kauei ma e uaua: gelaui 30 ma gelaui 60 ma gelaui 100."

²¹ Iesu i riwei i pa, "Rava, ega rampa ita neineiai da iriga au gabaurina ita tereterei bo vatarau gabaurina ta pa? Rampa ana au anikiala e tereterei ta pa?

²² Kaua mamae gova'gai, anataputapui a viegai ma kaua govagova'gai nanarena ana viegai.

²³ Mepa da tani'gami e mamae, riwa ona nonori!"

²⁴ Iesu i riwa i pa, "Aiwai o nononoria ona rautani'ganana-kauei, ruva o ruveruveia, God nanare awarimi ina ruvai ma gelauna ina tavipotoi.

²⁵ Lamna aubaina, mepa da riwau ona aramanei, tau gelauna ma gelauna ana veremi. Ma taui ega ita aramanei, lamna aiwai aburuna i nononoria, ina vine-boai."

Pei gogogona ana awanaina.

²⁶ Iesu e ririwa i pa, "God ana vigulau me rava, *witi* peina au doa ita ravi-awawari.

²⁷ Ma waguvvara e matamatave ma maratom e vovomairi ma pei e gogogo ma e rarata. Wate aiwaiei e gogogo, tauna e vivinuanainei.

²⁸ Doa ana nuaina, pei me *witi* e vivigogoi ma e uaua. Au naona e raraupairei ma muriae e roverove ma muriae anona e magumagura au tapina.

²⁹ Maranai i magura, rava petona e raraukarei. Tuaruta marana i getai."

Pei aburuoina ana awanaina

(Matthew 13:31-32, 34; Luke 13:18-19)

³⁰ Iesu i riwa i pa, "God ana vigulau aiwaiei ana parivai-patepatei bo aiwai awanainei ana pariveremi?

³¹ Wenanare, wei aina peina, lamna me gaga peina, pei aburuoina au dobu ma au doa i paewi.

³² Ma peina i gogo ma i rata da ai muomuoi i getawanei ma ra'garagai gae'gae i terei ma au gou'i, kiu ai no'gi ita voai."

³³ Ma Iesu, awanaina ma'gama'gauai, rava au matai i raugugulei da taui ai rau-tani'gana ana au ruva nanare.

³⁴ Awanainei, rava awari i giugiu, wate ana tauvota'gota'go ava awari kaua anatapui i viviegai.

Iesu, kojikojira i ravi-daumorai

(Matthew 8:23-27; Luke 8:22-25)

³⁵ Nai aubigaina Iesu, ana tauvota'gota'go i riwei i pa, "Tana damana topa au baba gelauna."

³⁶ Anina ma taui patara i voterei. Ma anatapui Iesu, maiteni au waga i geru ma i damana, waga gelaui maiteni.

³⁷⁻³⁸ Iesu, waga au murina unutana i terei ma i raunuavuru. Ma kojikojira gae'gaea i tupua ma rabama, waga au tepana i raurauei ma waira, waga i oaoai. Ma ana tauvota'gota'go, tauna i ravi-dagudagui ma i riwei i pa, "Taugiu, nuanuam e bolabolai bo ega da tana irage?"

³⁹ Ma tauna i vomairi ma ive i vi'gaei ma i riwei i pa, "Ma genuana!" Ma rabama i riwei i pa, "Ma mae-genuatau!" Ma ive i wanatuini ma daumora gae'gaea i matave.

40 Iesu ana tauvotaḡotaḡo i riwei i pa, “Aiwai aubaina o rovorovo? Taumi amapo da eḡa ota vitumaḡana!”

41 Ma taui i rovo kaua ma i riwa vivira i pa, “Wei aiai ravana da ive ma rabama tauna e vovoteletelei?”

5

Iesu, arua-apoapoenā orotona awarina i viaḡaḡana-ōpunei.
(Matthew 8:28-34; Luke 8:26-39)

1 Iesu ana tauvotaḡotaḡo maiteni Galili topana au baba ġelauna i ḡeta, mai Geresa ai au dobu.

2 Wei au dobuna, arua-apoapoenā orotona au orana maemaena.

3-5 Eḡa aiai tagotagogina da ita vovaiubai. Mara maḡamaḡauna, aena ma urana seinei i pani. Wate wei i viaituituini, ma eḡa tagotagogina da seinei ita pani. Marai ma waguvarai i nene-labalababa ma i garagarara ma ḡaimei tupuana i boribori-melei ma au kokoaga ma au ola i raunuma.

6 Maranai Iesu wagei i opuopu, arua-apoapoei orotona i ruiuinia, aueia Iesu i 'nanai ma kokoagei i ruba ma Iesu au naona i mae-peu ma i raudune.

7-8 Iesu, ravana i riwei i pa, “Arua-apoapoenā, wei orotona ma opu-tawanei!” Ma orotona, ponana au aidamo ma i garara, “Iesu, God Aidamo Telarana Natuna! Aiwai awariu e ḡoeḡoei? God wavanei a vivibaḡaim da eḡa ma kovogiu!”

9 Iesu, orotona i vitara-virevirei i pa, “Tam wavam aiai?”

I paribelei i pa, “Tauai a maḡa, aubaina tau wavau lamna Ġavia Patarana.”

10 Ma arua-apoapoei, Iesu i vibaḡa-guratei da avena nai dobunei ita viopuna-tawanei.

11 Ma poro boruna ḡaeḡaena au ḡereḡere ola au adana i labalaba.

12 Ma arua-apoapoei, Iesu i vibaḡai, “Ma paritawanelai poro au orai ana rui.”

13 Iesu i vianina. Ma arua-apoapoei, orotona i opu-tawanei ma poro au orai i rui. Poro boruna 2,000 nanare olei i ruba ḡaira da au topa i monu.

14 Ma poro taupainii i ruba nae au melagai ma au wapu; ma riwa i vibabarai. Ma rava i nei da ita inanai aiwai i tupua.

15 Ma maranai i nae Iesu awarina, orotona au naona arua-apoapoei patarai au orana i mamae; tauna i kiakiala, gara i oteni ma ana nota jijimanina. Ma taui i rovo kaua.

16 Ma aiwai i tupua orotona ma poro awari, taui i 'nainanaia, rava i riwana-naiei.

17 Ma dobuna ravai, Iesu i vibaḡai da dobuna ita oputawanei.

18 Iesu au waga i gerugeru ma orotona, Iesu i vibaḡai i pa, “Tau maiteni tana nae.”

19 Iesu i viḡaei ma i riwei i pa, “Ma naeme am au dam. Ma BADA kaua aiwai ḡaeḡaena i kaukaueia ma ana iviaiai tam awarim, taui ma pariverei.”

20 Ma anina orotona, Iesu i netawanei ma i nae au Dekapolis (*melagai 10*) da Iesu aiwai awarina i kaukaueia, rava i riwana-naiei. Ma taui anatapui i nononoria i baiei.

Iesu, Jairus natuna wavinena ma wavine doridorianā i vilawani.
(Matthew 9:18-26; Luke 8:40-56)

21 Iesu wagei i damana me topa au baba ġelauna. Maranai kampa i ḡeta ma topa au adana, ma patara i rieiai.

22 Pari numana badana wavana Jairus i nei weka ma maranai Iesu i 'nanai, tauna Iesu au aena i mae-peu

23 ma i vibaḡa-guratei i pa, “Natu guguinina e irairaḡe. Ma nei ma uram au inina ma terei ma ina lawana.”

24 Anina ma Jairus, Iesu maiteni i nae ma patarana i mae gariḡuruvi ma i votaḡotaḡoi.

25 Wavine tagogi kampa patarana au orana awarina tara-doriana i mae da madeḡa 12 i kwa.

²⁶ Ana mane anataputapuna, dokedoketa ma ġamaġau i awarii i tawanei ma eġa tagotagogina ita vilawani ma amapo da ana doria i rarata.

²⁷⁻²⁸ Tauna, Iesu nolana ma ana babani i nonori ma au orana i vinua-notanota i pa, "Mepa da ana gara ava ana vodadani ma ana lawana." Ma tauna, Iesu murinei i nei ma ana gara i vodadani.

²⁹ Maratagogi, tara-doriana i wanatuini ma malana i vaia da i lawana.

³⁰ Nai maranaina, Iesu malana i vaia da ana rewapani i opu-tawanei ma i mae-tavirei patara au poui ma i riwa i pa, "Aiai au gara i vodadani?"

³¹ Ana tauvotaġo, tauna i riwei, "Ma inanai, patara i mae gariġuruvim! Ma menanare da u riwa 'Aiai i vodadani?'

³² Wate Iesu i 'nana viravira da ita inanai aiai i vodadani.

³³ Wavine i rovo kaua ma i sisisi, wate i aramanei aiwai awarina i tupua ma i nei ma Iesu au naona i raupari ma aiwai anatapui i vieġei.

³⁴ Anina ma Iesu, wavine i riwei i pa, "Natu, am tumaġana i vilawanim. Am doria i kwa, ana nuaubam ma nae!"

³⁵ Maranai i bababani ma rava ġelaui Jairus ana numei i nei ma i riwei i pa, "Natum ana mara i kwa. Eġa Taugiu ma visina-viravirai."

³⁶ Iesu ai babani i nonora-tawanei ma Jairus i riwei i pa, "Eġa ma rovo, ma vitumaġana!"

³⁷ Iesu, rava ġelaui i viġaei ma Peter ma James ma ana tevera John maiteni i nae.

³⁸ Ma Jairus ana au numa i ġeta ma Iesu, patara i 'nanai; i toutou ma i taratarakwatu

³⁹ ma i rui ma taui i riwei i pa, "Aiwai aubaina o taratara-kwatu ma o toutou? Tevera eġa ita iraġe, tauna e matamatave ota."

⁴⁰ Ma taui, Iesu i kakei, ma lamna aubaina rava i viopuni au doa ma tevera alona ma amana ma tauna ana tauvotaġo tonuġa maiteni i rui mepa tevera i matamatave lana.

⁴¹ Iesu, tevera nimana i vaia ma i riwei i pa, "*Talitha koum!*" wei anona, "Kukuma, ma vomairi!"

⁴² Maratagogi i vomairi ma babara i vikarei (Tauna ana madeġa 12). Ma taui i ba kaua.

⁴³ Iesu, taui i riwana-guratei da eġa aiai ita vieġei ma i riwa da ita viambagibagi.

6

Mai Nasaret, Iesu i parivirevirei

¹ Iesu ana tauvotaġo maiteni nai dobuna i netawanei ma i naeme ana au melagai.

² Ma Sabat marana i ġeta ma tauna giu i vikarei au pari numana. Ma rava ma ġamaġau i riei da i rautaniġanei. Taui anatapui i baiei ma i vitara-viravira vivira i pa, "Wei tauna nuaulaula ma aramanana mepa i vaia?" Ma, "Kaua aiwaieie kaukauei?"

³ Anina ma taui ava i babani vivira i pa, "Tauna tauvoa. Mary ana natuevou ma varevarena James, Joses, Judas ma Simon ma novunovui weka e mamae tauna bo?" Ma lamna aubaina mai Nasaret, Iesu i parivirevirei.

⁴ Iesu, taui i riwei i pa, "Perojeta dobu au ġelaui e vivivirei, wate ana au melagai, ana rava ma ana dam oina, eġa ita vivivirei."

⁵⁻⁶ Tauna i baiei da rava eġa tauna ita vitumaġanei. Ma eġa tagotagogina da kaua vivirepanai kampa ita kauei. Tauna urana, rava ruāġa ota doridoriai au tepai i terei ma i vilawani. Ma muriae, melagai nununai au ġereġerei i viararamana nae.

Iesu ana Apasol i paritawanei da ita viararamana

⁷ Ma Iesu, taui 12 i ġoreiħi ma ruaruāġei ava i paritawana-opunei ma rewapani i verei da arua-apoapoei ina viāġaġana-opunei.

⁸ Ma riwa bagibaginei i riwei i pa, "Ami au vaġai, eġa aiwai ona vaia anina jiġona ava; eġa lam, eġa autu bo mane au urami.

⁹ Ae uma ona oteni ma eġa kwama ġelauna ona vaia."

¹⁰ Ma i riwei i pa, “Metauna melagaina o ruiruiana ma i vianinemi. Numa tagoginina au orana ona mae da melagaina ona oputawanei.

¹¹ [✧]Mepa da au melagai o ġeta ma rava eġa ita vianinemi bo eġa ita rautaniġanemi. Nai melagaina ona oputawanei ma aemi pokauna ona rauabuabui da ina aramanei da taui ai wavu!”*

¹² Ma taui i opu ma rava awari i raugugula ma i riwei i pa, “Taumi ami ġo’apoapoei ona voterei ma ona mae-taviremi God awarina!”

¹³Taui, arua-apoapoei i viaġaġana-opunei. Ma rava doridoriai maġamaġau, olive oirana au kolai i buloi ma i vilawani.

John Taubabataito ana iraġe

¹⁴⁻¹⁶ [✧]Iesu nolana i nae da rava anatapui i aramanei ma tauna i babaniei. Ma rava ġelaui i ririwa i pa, “Tauna, kaua vivirewapanai e kaukauei, aubaina tauna John Taubabataito iraġelei i vomairi me.” Ĝelaui i ririwa i pa, “Tauna Elijah i nememei.” Ma ġelaui i ririwa i pa, “Tauna peroveta wariaġai nanare.” Ma gulau Herod,[†] nolana i nonori ma i riwa i pa, “Tau, John Taubabataito uana a borituini; marina i vomairi me.”

¹⁷⁻²⁰ John ana virarautua, lamna wenanare. Muriae da Iesu ana viararamana nolana ita vikarei. Herod, tuana Philip awana i kwalei ma i ravaġi. Wavinena wavana Herodias. Au murina John, Herod i riwana ġirigiriei i pa, “Tarawatu e mamae da eġa vareim awana ma kwalei.” Ma Herod, riwa i paritawanei da John i pani da panipani au numana i terei. Herod ana nuaiaina, John i rarautaniġanei. Wate nuantuana i raġaraġa.

Ma Herodias, John awarina amlona i ġaġiġi ma viraġenana i ġoei. Herod i aramanei da John, lamna rava jijimanina ma vivivireina ma i gagaloei. Herod, John i rovoei ma lamna aubaina wavinena eġa tagotagogina da aiwai ita kaei.

²¹ Ma wavine, gavogavo i ’nanai, maranai Herod ana tupua marana i ġeta ma torela i vokaukauei. Ma gabemani babadai ġaeġaei ma sorodia ai babada ġaeġaei ma Galili babadai i raukwatuei.

²² Ma Herodias natuna wavinena i nei ma i ara. Herod ma taui maiteni i amam i vinuaiaini. Ma gulau, guguini i riwei i pa, “Aiwai u ġoeġoeia ma vibaġai ma ana verem!”

²³ Ma i parivainuaġani i pa, “God au matana a ririwem da aiwai u vivibaġei ana verem da au vigulau navanavana au paratana.”

²⁴ Ma tevera wavinena i opu ma alona i paridadanei i pa, “Aiwai ana vibaġei?”

Ma i paribelei i pa, “John Taubabataito kolana.”

²⁵ Ma maratagogi i vipaparana ma gulau awarina i rui ma i vibaġai i pa, “A ġoeġoei da marina John Taubabataito kolana ma vereu au aboma!”

²⁶ Ma gulau nuantuana i bola-kauei. Wate parivainuaġana boibogo i kauei taui i amam au matai. Ma lamna aubaina guguini, aiwai i vivibaġei anina i vianinei.

²⁷ Ma tauviraġena i paritawanei ma i riwei da John kolana ita neiasi. Ma i nae panipani au numana ma John uana i borituini.

²⁸ Ma kolana au aboma i terei ma guguini i verei ma guguini, alona i verei.

²⁹ Ma John ana tauvotaġotaġo, nolana i nonori ma i nei ma taubeuna i vaia ma au kokoaga i vimataveni.

Iesu, nelara 5,000 i viambagibagi (Matthew 14:13-21; Luke 9:10-17; John 6:1-14)

* ^{6:11:} Act 13:51 * ^{6:11:} Wariaġa mai Jew, tauvaġai e nenememei au Israel. Taui au aei pokau e raraubuabui maranai Israel ana au parata e ġeġeta, lamna taui orai e viaiaini. Ma Iesu ana tauvotaġotaġo wei i kauei da melagai ravai ina notai, “Tauvotaġotaġo e ririwa da tauta orata apoapoeni me tauta eġa mai Jew.” * ^{6:14-16:} Mrk 8:28 † ^{6:14-16:} Herod Antipas, Galili ana Wavalatona.

³⁰ Apasol i ġeta memei ma aiwai anataputapuna i kaukauei ma i raraugugulei, Iesu i vieġei.

³¹ Lamna maranai, rava maġamaġaui i nenei ma i nenea da Iesu ana tauvotaġotaġo maiteni eġa gavogavo ita maemae da ita am. Lamna aubaina Iesu, taui i riwei i pa, “Taumi ava ona nei ma tana nae au mutulua da laumi ina tau mara aburuna.”

³² Ma anatapui wagei i nae au mutulua.

³³ Wate rava maġamaġaui i ’nanai i nenei ma i aramanei taui aiavoi. Ma melagai nununai anatapui geraei i ruba gogona da au dobuna i aīgeta.

³⁴ Maranai Iesu wagei i tuopu au gera ma patara ġaeġaena i ’nanai ma nuanuana i bokau. Taui me sипу ma eġa ai tauvipaipai. Ma Riwana Aiainā viararamanai i raukarei.

³⁵ Ma au biga e tuturiai ma ana tauvotaġotaġo i nei awarina ma i riwei i pa, “Wei mutulua ma madeġa e arearere.

³⁶ Rava ma paritawanei da ina nae au melagai ma au wapu au ġereġere da ai lam ina gimarai.”

³⁷ Wate Iesu i paribelei i pa, “Taumi ona viambagibagi!” Ma taui i paribelei i pa, “Mepa 200 denarii‡ tana vaia da wei patarana tana viambagibagi?”

³⁸ Ma Iesu i paridadanei i pa, “Palawa biaġa awarimi? Ona nae ma ona baiei!”

Maranai i nelaġai ma i riwa i pa, “Awariai, palawa five ma iana ruāga.”

³⁹ Anina ma Iesu, patara i riwei i pa, “Boru nununai, gidagida au majimajīgai ona kiala nae.”

⁴⁰ Ma taui ai au boru 50 da 100 nanare i kiala nae.

⁴¹ Ma Iesu, palawa five ma iana ruāga i vaia ma i ġoutata au mara ma God i viegualaei. Ma palawa i vogimagimai ma iana i ġutai da ana tauvotaġotaġo i verei ma taui, rava i verei.

⁴² Ma patara i am ma i am-iava.

⁴³ Ma ana tauvotaġotaġo, lam am tereterenai i tuarui da poa muomuoi 12 i vioai.

⁴⁴ Nelara 5,000 i viambagibagi.

*Iesu, waira au tepana i babara
(Matthew 14:22-33; John 6:15-21)*

⁴⁵ Anina ma Iesu, ana tauvotaġotaġo i egari da ita aidamana au Bethsaida.[§] Taui au waga i geru da i nenei ma tauna, patara i paritawanei.

⁴⁶ Patara i paritawanei ma tauna ava i ġae au ola da ita raupari.

⁴⁷ Ma waguvara ana tauvotaġotaġo au waga au topa ma Iesu au alala.

⁴⁸ Ma ana tauvotaġotaġo, lare i vovoguratei da ita ġota wate ive i viraumatamatani. Ma maratotom nanare, Iesu i nae awari. Tauna waira au tepana i bababara ma i ġoei da taui ita tutelarei.

⁴⁹⁻⁵⁰ Ma maranai taui, Iesu i ’nanai topa au tepana i bababara ma i notai da tauna konaġa ma i rovo kaukaua ma i vigaragararei. Ma maratagogi Iesu i riwa i pa, “Tepami ina tora! Tau, eġa ona rovo!”

⁵¹ Ma au waga i geru ma ive i wanatuini ma taui i bana-kauei.

⁵² Avena da kaua palawa awarina i kauei i ’nanai, wate ana rewapani eġa ita aramana-kauei. Taui orai i bado ma i vinuنانaina.

*Iesu, rava doridoriai maġamaġaui au Genesaret i vilawani
(Matthew 14:34-36)*

⁵³ Taui, topa i damani ma au Genesaret i ġota ma ai waga i raġini.

⁵⁴ Taui, waga i opūtawanei ma rava, Iesu i ’nanai ma maratagogi i aramanei da tauna.

⁵⁵ Iesu nolana, Galili provins anatapui i naeni ma i nonori da tauna mepa i mamae. Ma kampa, doridoriai rasirasie i vivaneiā.

‡ **6:37:** 200 denarii. Denarius tagogi lamna taubagibagi ai maia au pom tagogo nolana aubaina. § **6:45:** Eng. Bethsaida.

⁵⁶ Iesu mepa i nanelana, melagai ġaēgæi ma muomuoi ma wapu mepa rava e mamae lana. Ma rava, ai rava doridoriai nai au melagaina i neiai au deba. Ma i vibaġa, da doridoriai, Iesu ana gara adana ava ita vodadani. Ma aiavoi Iesu ana gara i vodadani i lawana.

7

*Amamami ai giu**(Matthew 15:1-9)*

¹⁻⁴ Pharisi ma Jew anatapui, magumagura ai giu maġamaġaui e notanota-jijini. Taui, ai aniuma ma ai aniam anatapui e oġaoġai lamnei taui e viaiaina-melei God au matana. Ma maranai au maket da e nenei, urai ina oġai ma ina am. Taui eġa ina am da au naona urai ina oġa kaei me ai magumagura ai giu nanare.

Maratagogi Pharisi ġelaui ma Tarawatu Babadai, Jerusalem ei i nei Iesu awarina da ita rautaniġanei. Ma taui i 'nanai da Iesu ana tauvotaġotaġo ġelaui, urai eġa ita oġai ma i amam.

⁵ Ma taui, Iesu i vitara-virevirei i pa, "Aiwai aubaina am Tauvotaġotaġo magumagura ai giu, eġa ita votaġotaġoi ma ana ura miramirai e amam?"

⁶ Ma Iesu i paribelei i pa, "Taumi morumorumi ma o vikaua-aiaina-melemi. God ana peroveta Isaiah i riwa kaua maranai i riwa, i pa:

'Wei ravai ipiriei e vovoepaepai,

wate nuanuai aeueia.

⁷ Taui rava ai giu e viviararamani.

Lamna aubaina ai voepaepa anona eġa.'

(Isaiah 29:13)

⁸ Taumi, God ana Tarawatu o teretere-tawanei ma ami giu o votaġotaġoi."

⁹ Ma i riwana-melei i pa, "Taumi o aramana kaua da God ana Tarawatu o gedugeduiaeie ma amamami ai giu o vovotaġotaġoi.

¹⁰ ☩God ana Tarawatu, Moses i girugirumia nanare: *Amam ma alom ma vivirei ma Aiai amana ma alona e enaena-boai, tauna ona virāgeni.*

¹¹ Wate taumi o viararamana da aiai awarina mane bo purapura, amana bo alona ita voagui ma ita riwei, 'Awariu e mamae da ata voaguim; wate lamna *Corban* - a tereriei pulo, God aubaina.'

¹² Wei viararamana, taui e viviġaei da amana ma alona ina voagui.

¹³ Ma wei taunei viararamana, rava awari o vividamani; ma God riwana o vivikwakwavi. Ma kaua maġamaġaui ġelaui maiteni o kaukauei."

*Metauna kauai, rava orai e vivimirai.**(Matthew 15:10-20)*

¹⁴ Iesu, patara i kwatuana-melei ma i riwei i pa, "Anatapumi ona rautaniġaneu ma aiwai a ririwemi ona aramanei.

¹⁵⁻¹⁶ Aiwai au tanoei au orami e ruirui, lamna eġa ita vivimiraimi ma aiwai da oramiei e opuopu, lamna e vivimiraimi God au matana."*

¹⁷ Anina Iesu, patara i voterei ma i rui au numa. Ma ana tauvotaġotaġo, i vitara-virevirei da wei awanainana anona aiwai.

¹⁸⁻¹⁹ Iesu i paribelei i pa, "Taumi maiteni eġa ota aramanei bo? Kaua aiwai au tano, rava au orai e ruirui amapo eġa ina vimirai. Anona lamna wei kauai, eġa ita ruirui rava au nuapouna, wate au manawana da e opuopu." (Wei riwanei Iesu, lam anatapui i viaiaini).

²⁰ Anina ma i riwa i pa, "Aiwai, rava oranei e opuopu; lamna, rava e vivimirai God au matana.

²¹ Anina rava nuanuanei vinuanotanota apoapoei e opuopu me: viawawana labal-ababa, danene, viraġena, awadanene,

* ^{7:10}: Exo 20:12; Exo 21:17 * ^{7:15-16}: Giruma ġelaui Mark uranei i girugirumia wei riwai wenanare e mamae, "Mepa da tanigami e mamae, ona rautaniġana."

²² ambo, rau-iviapoapoe, moru, erawa, unura, terevaideā, mae-āgaeā ma opa.
²³ Wei kauai apoapoei anatapui oranei e opuopu ma rava e vimiramirai."

Jentail wavine,[†] Iesu i vitumaāganei
(Matthew 15:21-28)

²⁴ Ma dobuna i voterei ma i nae Taia ana au parata. Ma i rui govaāga au numa ma ēga ita īgoei da rava ita aramanei da tauna kampa, wate ēga tagotagogina da ita raugovaāga.

²⁵⁻²⁶ Wavine tagogi, Iesu nolana i nonori ma i nei awarina. Tauna ēga Jew ma Jentail au Phonisia i tupua, Siria ana au parata. Arua-apoapoena, tauna natuna wavinena aburuna i ruini; ma alona i nae Iesu au naona i mae-peu ma ma i vibaāgai da arua-apoapoena ita viopuni.

²⁷ Iesu i aramanei da tauna Jentail; lamna aubaina i riwei i pa, "Ēga ita ai da roaroa ai lam ata vaia da auou ata verei da au naona roaroa ina am-iaua."[‡]

²⁸ Ma wavine i paribelei i pa, "Bada, aiwai u riwei; lamna riwa kaua. Wate auou, roaroa ai lam momoāgina, kepakepa au gabaurina e rauraua e aniani."

²⁹ Ma Iesu wei i riwei i pa, "U paribelana kaua, aubaina ma nae au numa. Arua-apoapoena natum i opu-tawanei."

³⁰ Ma wavine i naeme au numa. Natuna wavinena i 'nanai i matamatave, arua-apoapoena boibogī tevera i opu-tawanei.

Iesu, oroto taniāga-potapotana ma mena birebirena i vilawani

³¹ Iesu Taia ma Sidon ana parata i netawanei ma au babaāgela Dekapolis i verautuini ma i nae au Galili topana.

³² Oroto taniāgana potapotana ma menana birebirena i neiai Iesu awarina ma i vibaāgai da urana au inina ita terei da ita vilawani.

³³ Iesu, oroto i taravaina-opunei da taui ava ma ura-gigina, oroto au taniāgana i terei ma ura-gigina īgelauna i ovai ma menana i vodadani.

³⁴ Nuanuana i bolai ma i īgoutata au mara; i lavutu tawanana ma oroto i riwei i pa, "*Ephatha!*" Wei anona, "Ma wanatawanei!"

³⁵ Maratagogi taniāgana i wanatawanei ma menana i vidagudagu ma i babani kaua.

³⁶ Ma Iesu, taui i viāgai da aiwai i tuputupua, avena rava ita vieāgei. Iesu, rava i viāgai; wate taui ēga ita rautaniāgana ma riwa i vituai.

³⁷ Ma maranai ravai wei i nonori, taui i bana-kauei ma i riwa i pa, "Aiwai anatapui i kauana-kauei. Tauna, rava taniāga potapotai e vivilawani da e rarautaniāgana ma menabire-birei e bababani."

8

Iesu, rava 4,000 i viambagibagi
(Matthew 15:32-39)

¹ Nai maranai, patara īgaēaena i riana-melei. Patara ēga ai lam. Ma Iesu, ana tauvotaāgataāgo i kwatuei da i nei ma i riwei i pa,

² "Au pom tonuāga patara maiteni a mae ma ai lam ēga ma a rau-nuapoapoelei.

³ Taui īgelaui, uamei i nei. Mepa da ana am-iraāge ana paritawanei ai au numa, ma au etanai ina raumolaāgau."

⁴ Ma ana tauvotaāgataāgo i paribelei i pa, "Wei mutulua ma mepa lam tana vaia da wei patarana tana viambagibagi?"

⁵ Ma Iesu, taui i paridadanei i pa, "Awarimi palawa biaāga?"

Taui i riwa i pa, "seven."

[†] 7:23: Rava ēga mai Jew. [‡] 7:27: Riwa roaroa wei au awanaina lamna mai Jew. Taui e notanotai da taui i ai guratana ēga me rava īgelaui. Lamna aubaina taui dobu īgelaui ravai e īgoregorei auou.

⁶ Ma Iesu, patara i riwei da au doa i kiala. Ma palawa seven i vaia ma God i viegualauei ma i vogimagimai ma ana tauvotaḡotaḡo i verei da patara i verei.

⁷ Ma taui awari, iana muomuoi ruaḡa ota. Iesu i vaia; God i viegualauei ma ana tauvotaḡotaḡo i verei da patara i verei.

⁸ Taui anatapui i am da i am-iaua. Ma lam am tereterenai i tuarui da poa ġaeḡaei seven i vioai.

⁹ Rava 4,000 i viambagibagi. Ma muriai i paritawanei ai au numa.

Pharisi, God ana mataira i vibaḡei

(Matthew 15:39-16:4)

¹⁰ Maratagogi, Iesu ana tauvotaḡotaḡo maiteni au waga i geru ma i nae Damanuta ana au parata.

¹¹ Pharisi ġelaui i nei ma viparipariḡai i vikarei Iesu maiteni. Taui i ġoei da Iesu ita raudadani da mataira Godei ita viatataiei.

¹² Iesu, Aruanei i lavutu tawanana ma i riwa i pa, “Wei kimta voui, aiwai aubaina mataira e ġoeġoei? A ririwana-kauemi, amapo mataira eġa ona inanai.”

Iesu, ana tauvotaḡotaḡo I parivainotai

¹³ Anina ma Iesu, patara i netawanei ma ana tauvotaḡotaḡo maiteni au waga i geru me ma i damana Topa Galili au baba ġelauna.

¹⁴ Ma ana tauvotaḡotaḡo, nuanuai i vuru da ai palawa ita vaia ma palawa tagogi ava au waga i mamae.

¹⁵ Iesu, taui I parivainotai i pa, “Pharisi ma Herod ai giu ma ai viararamana morumoruna ona inana-kauei! Lamna me yist.*”

¹⁶ Ma taui i babani vivira i pa, “Tauta eġa ata palawa aubaina da e ririweta.”

¹⁷ Ma Iesu i aramanei ma taui i riwei, “Aiwai aubaina o bababani da taumi awarimi eġa palawa? Taumi amapo da eġa ota aramana ma o vivinuanaina? Orami i bado bo?

¹⁸ Matami e mamae ma eġa ota inainana. Ma tanigami e mamae ma eġa ota nonora. Ma o vinuanonata bo eġa?

¹⁹ Maranai palawa five a vogimagimai rava 5,000 aubaii, lam am tereterenai o tami da poa biaġa o vioai?”

Taui i paribelei, “Twelve.”

²⁰ “Ma maranai palawa seven a vogimagimai rava 4,000 aubaii, lam am tereterenai o tami da poa ġaeḡaei biaġa o vioai?”

Taui i paribelei, “Seven.”

²¹ Ma taui i riwei i pa, “Ma amapo da o vivinuanaina!”

Iesu, oroto mata apoapoena i vilawani au Bethsaida

²² Taui i nei au Bethsaida ma rava ġelaui, oroto matana apoapoena i neiai Iesu awarina ma i vibaġa-guratei da ita vodadani.

²³ Ma Iesu, oroto matana apoapoena i raunimavoai ma melagaiei i taravaina-opunei. Ma kampa matana i ovai ma urana au matana i terei ma i paridadanei, “Aiwai e inainanai bo eġa?”

²⁴ Ma i taepai ma i riwa, “Rava a inainanai ma taui me ai ita bababara.”

²⁵ Iesu, urana i tere-melei oroto au matana. Ma matana i wanatawanei da aiwai anata-puna i 'nana-kauei.

²⁶ Iesu, tauna i paritawanei ana au numa ma i riwei, “Eġa ma nae au melagai! Wate jijimanina ma nae au numa.”

*Peter i riwa da Iesu, tauna Keriso
(Matthew 16:13-16; Luke 9:18-20)*

* **8:15:** Yist mai Jew awarii awanainei lamna aiwai da apoapoe, mira bova e vivitua bo e vivimägħi. Weka Iesu mai Pharisee ma mai Herod ai lawana ma ai giu morumorui e babaniei, da eġa ina tua. **8:18:** Mrk 4:12

²⁷ Iesu, ana tauvotaḡotaḡo maiteni i nae melagaii Caesarea Philipai au ḡereḡerei. Maranai i nenaе ma Iesu, taui i paridadanei, “Rava e ririwa; tau aiai?”

²⁸ [✳]Ma taui i paribelei, “Ģelaui e ririwa da tam, John Taubabataito. Ma ġelaui Elijah. Ma ġelaui e ririwa da peroveta wariaḡana tagogi.”

²⁹ Ma Iesu, taui i paridadanei, “Wate taumi, mena o notanota-nei? O ririwa da tau aiai?”

Peter i paribelei, “Tam God ana Messiah - anona Keriso.”

³⁰ Iesu, taui i viḡaei da eḡa aiai ina riwei da tauna aiai.

Iesu ana iraḡe ma ana vomairi me i babaniei

(Matthew 16:21-23; Luke 9:21)

³¹ Ma Iesu i raukarei da ana tauvotaḡotaḡo i giuni i pa, “Rava Natuna ina vinuapoapoe kaua. Ma dogadogara, pirisi babadai ma tarawatu babadai, tauna ina pari-geduiaei ma ina viraḡeni. Ma au pom tonuḡa au murina ina vomairi me.”

³² Iesu jijimaninei wei kauai i bababaniei ma lamna aubaina Peter, tauna i taravaini au ririva ma enana i vikarei.

³³ Wate Iesu i mae-tavirei ma ana tauvotaḡotaḡo i ’nanai. Ma Peter i eni, i pa, “Satan ma nae au muriu! Tam am nota eḡa Godei ita nenei, eḡa da ravei.”

Iesu votaḡotaḡona anona

(Matthew 16:24-28; Luke 9:23-27)

³⁴ Ma Iesu, patara ma ana tauvotaḡotaḡo i raukwatuei ma i riwei, “Mepa da aiai ita votaḡotaḡoiu. Tauna ina boviana-melei ma ana korosi ina avarai ma ina votaḡotaḡoiu.”[†]

³⁵ Aiai ana lawana e tatajijini, ina vine-boai. Ma aiai da ana lawana i verenei; Tau ma Riwana Aiaina aubaina. Tauna ana lawana ina vaimelei.

³⁶ Ana aii bo anona aiwai, mepa da wei dobuna lawanana ma vigulauna ma vaipai ma am lawana maemae-nonoana ma vine-boai.

³⁷ Wate aiwaiei am lawana ma gimara-melei.

³⁸ Mepa da aiai: tau ma au viararamana ina vinimalei; ma i mae-puputeu; ma ana ḡoanei kaua apoapoe ina kaukauei. Rava Natuna, tauna ina vinimalei maranaina ina nememei; Amana ana au boruma anela vivivirei maiteni.”

9

¹ Ma Iesu, wenanare i riwei, “Taumi a ririwana-kauemi; rava ġelaumi weka o maimairi amapo eḡa ona iraḡe da God ana vigulau ona inanai ana rewapanana ina nei.”

Iesu inanana i virai

(Matthew 17:1-13; Luke 9:28-36)

² Au pom six muriai, Iesu, Peter, James ma John i taravaini. Ma taui ava i ḡae ola ḡaeḡaena au tepana. Ma kampa taui au matai, Iesu inanana i virai.

³ Ana gara i arapoina ma gamrina i vimata-kamokamota; eḡa me aiwai ġelauna au dobu nanare.

⁴ Ma kampa au matai, Elijah ma Moses i eḡa. Ma Iesu maiteni i bababani.

⁵ Ma Peter Iesu i riwei, “Tauviararamana, i aii da tauta weka. Ma vianinelai da numak-weta tonuḡa ana voai: tagogi tam aubaim, ġelauna Moses ma ġelauna Elijah aubaina!”

⁶ Ma taui i rovo kaua ma Peter eḡa ita aramanei da aiwai i latolatoni.

⁷ [✳]Anina ma apau i eḡa ma taui i purui. Ma pona apauei i opu ma i riwa i pa, “Wei Tau Natu au nuavainana, ona rautaniḡanei!”

⁸ Maratagogi taui i ’nana viravira ma eḡa aiai ġelauna ita inanai ma Iesu, tauna ava.

⁹ Ma maranai olei i ḡaiḡairai ma Iesu, taui i viḡaei da aiwai i ’nananaia eḡa ina vieḡai da au naona Rava Natuna iraḡelei ina vomairi me.

[✳] **8:28:** Mrk 6:14-15 [†] **8:34:** Wei lamna awanaina. Anona lamna Iesu ana tauvotaḡotaḡo anina vinimala ma apoapoei ina nelāḡai aubaina taui, tauna i votaḡotaḡoi. Tauna eḡa ita ririwa da ana tauvotaḡotaḡo au korosi ina iraḡe me tauna. [✳] **9:7:** Mrk 1:11

¹⁰ Ma taui, wei riwana i voteletelei ma i babani vivira i pa, “Iraägelei vomairi me anona aiwai?”

¹¹ Ma taui, i vitara-virevirei i pa, “Aiwai aubaina, tarawatu babadai e ririwa da Elijah au naona ina nei?”*

¹² Iesu i paribelei, “Riwa kaua Elijah au naona ina nei da aiwai anatapuna ina vokaukauei. Aubaina wariağā i girumi da Rava Natuna ina vinuapoapoe kaua ma ina inana-geduaiei.

¹³ Wate a ririwana-kauemi da Elijah anina i nei ma rava, ai ġoanei tauna i rau-iviapoapoelei me i girugirumia nanare.”†

Iesu, arua-apoapoena tevera orotona awarina i viopuni

(Matthew 17:14-21; Luke 9:37-43a)

¹⁴ Iesu ana tauvotağotağō tonuğā maiteni olei i ġaira memei ai rava awari ma patara ġaegħaena, taui i gariguruvu. Ma Jew ai tarawatu babadai, taui maiteni i vivitarapiri.

¹⁵ Maranai patara, Iesu i ’nanai. Taui orai i aeupai ma awarina i ruba ma i viegħualuei.

¹⁶ Iesu, taui i vitara-virevirei, “Aiwai o vitarapiriei?”

¹⁷ Orot tagogi patara au poui i paribelana, “Tauviararamana, arua-apoapoena natu orotona au orana e mamae ma i kaei da eġa ita bababani, lamna aubaina a neiai awarim.

¹⁸ Maranai ana doria e ururu-melei, lamna arua-apoapoena: tauna au doa e tawatawanei; gamona e vivipuropuro; ivona e utauta ġirigirie; ma inina e badobado. Am tauvotağotağō a vibağai da arua-apoapoena ita viopuni, wate eġa tagotagogina da ita kaei.”

¹⁹ Ma Iesu i paribelei, “Oo mara aiwai ona vitumaġana! Ta mae ġaġa ma ami vita ana ’vara ġagħalei? Tevera awariu ona neial!”

²⁰ Ma tevera i neiai Iesu awarina. Ma maranai arua-apoapoena, Iesu i ’nanai, maratagħi tevera i viaikwajiana-guratei da au doa i tonei ma i vitatauvira ma i vivipuropuro.

²¹ Iesu, tevera amana i vitara-virevirei, “Wei teverana ana doria mara aiwai i vikarei?”

I paribelei i pa, “Maranai aburunai.

²² Arua-apoapoena mara au anatapuna, tauna ai au araratana ma au waira e tawatawanei ma i ġoei da ita virägeni. Mepa da tam tagotagogina; ma raunu’apoapoelelai ma ma voagħi!”

²³ Iesu, tauna i riwei, “Menanare da u riwa, ‘Mepa da tam tagotagogina?’ Aiai ravana e vivitumaġana, God anatapuna ina kaei tauna aubaina.”

²⁴ Maratagħi tevera amana i garara, “A vitumaġana, wate au tumaġana eġa ita rata ma ma voagħi da ina rata!”

²⁵ Iesu i ’nana da patara i rierieiai awarri ma lamna aubaina arua-apoapoena i egari i pa, “Tam arua taniġa-potapotana ma gumgum. Tau a egaegarim da tevera ma opu-tawanei. Ma eġa melanai au orana ma rui me!”

²⁶ Ma arua i garara ma tevera i viaikwajiana-guratei ma i opu-tawanei. Ma tevera inanana me taubeu. Ma rava maġamaġaui kampa i riwa, “Tauna i’rāġel!”

²⁷ Ma Iesu, tauna urana i vojjini ma i sinaepai da i mairi.

²⁸ Muriai Iesu, ana tauvotağotağō maiteni i rui au numa. Ma maranai taui ava ma i paridadanei i pa, “Aiwai aubaina tauai eġa tagotagogina da arua-apoapoena ata viopuni?”

²⁹ Iesu, i riwa, “Arua-apoapoei me wenanare, pari ainelana ina viopuni.”

Iesu ana iraġe i babaniana-melei

(Matthew 17:22-23; Luke 9:43b-45)

* ^{9:11:} Mai Jew i vitumaġana da Elijah au naona ina nememei ma *Keriso* muriai ita nei. (Mal 3:1, 4:5-6). Ma taui eġa ita notai da Elijah rau-iviapoapoe ina nelaġi ana au nememei. † ^{9:13:} Iesu lamna John Taubabataito i babbanie i tauna Elijah (Mat 11:13-14, 17:10-13)

³⁰ Iesu, ana tauvotaḡotaḡo maiteni dobuna i netawanei ma Galili i verautuini. Iesu eḡa ita ġoei da rava ita aramanei da taui mepa.

³¹ Aubaina tauna, ana tauvotaḡotaḡo i viararamani i pa, “Taui Rava Natuna ina amverenei rava ġelaui au urai. Ma taui ina virāgeni. Wate au pom tonuḡa au murina ina vomairi me.”

³² Wate taui eḡa ita aramanei tauna aiwai i bababaniei. Ma pari-dadanana i rovoei.

Tauvotaḡotaḡo i vitarapiri vivira da aiai i ġetelara

(Matthew 18:1-5; Luke 9:46-48)

³³ Iesu ana tauvotaḡotaḡo maiteni i ġeta au Capeniam ma au numa i rui. Ma Iesu, taui i vitara-virevirei, “Au etanai aiwai o vitarapiriei?”

³⁴ Wate taui i genuana, aubaina au etanai taui i vitarapiri vivira da aiai i ġetelara.

³⁵ *Iesu i kiala ma Apasol 12 i raukwatuei awarina ma i riwei i pa, “Aiai e ġoeġoe da ina vibada. Tauna ina tereġairana-melei ma ina vimuri dewadewa ma ina vitaunola rava aubai.”

³⁶ Ma Iesu, tevera i vaia ma au poui i vimairini. Ma urana au jiġona i tere-taḡonei. Ma taui i riwei i pa,

³⁷ “Aiai ravana; tau wavauei, tevera wenanare i rauḡorei. Lamna tau maiteni e raraugoreiu. Ma aiai da tau e raraugoreiu. Lamna tauparitawaneu maiteni e raraugorei.”

Aiai eḡa ata ġavia, lamna turata

(Luke 9:49-50)

³⁸ Anina ma John, Iesu i riwei, “Tauviararamana! Tauai, oroto tagogi a inanai; tam wavamei arua-apoapoena i viviopuni ma tauna eḡa turata. Lamna aubaina a viġaei da eḡa ina kauana-melei.”

³⁹ Iesu i riwa, “Eḡa ona viġaei! Eḡa aiai au wavau kaua babai ina kauai ma muriae ina parivai-apoapoenu.

⁴⁰ Aiai ravana eḡa ata ġavia; lamna turata.

⁴¹ Tau a ririwana-kauemi. Mepa da aiai ravana, waira i veremi tau au wavau; aubaina taumi au Tauvotaḡotaḡo. Taui ai maia eḡa ina vine-boai.”

Ruelara babanina

(Matthew 18:6-9; Luke 17:1-2)

⁴² Aiai ravana i kauai da wei teverana ana tumaḡana Tau awariu i viapoapoeni da ġo’apoapoe i kauai. Lamna i ai da ġaima ġaeġena ravana au uatabana ina duri ma au boga ina tawanei aubaina God, tauna ina kovoġa-guratei. ⁴³⁻⁴⁴ Mepa da nimam i kauem da ġo’apoapoe u kauai. Ma bori-tawanei! I aii da nimam tagogjava ma lawana mamae-nonoana ma vaia. Ma eḡa ma kauai da nimam ruāġa aiaii ma ma nae ai au menamenana; mepa ai eḡa melanai ita bobo.‡

⁴⁵⁻⁴⁶ Mepa da aem i kauem da ġo’apoapoe u kauai. Ma bori-tawanei! I aii da sigesigem au lawana mamae-nonoana ma rui. Eḡa me aem ruāġa aiaii ma ai au menamenana ina tawanem.§

⁴⁷ Ma mepa da matam ina kauem da ġo’apoapoe u kauai. Ma vaitawanei! I aii da matam tagogi ma God ana vigulau ma rui. Eḡa me matam ruāġa ma ai au menamenana ina tawanem;

⁴⁸ dobuna motamotana eḡa ita irairaġe ma ai eḡa ita bobo.

⁴⁹ Au Tauvotaḡotaḡo anataputapui, ai araratanei ina bogai.

⁵⁰ “Nia i ai lam viaiainana aubaina. Ma mepa da i tomatoma, mena ma vidagiane. Nia au orami ina mae ma ona viturana vivira!”

◊ 9:35: Mrk 10:43-44 ‡ 9:43-44: Wariaġa nimaiei i giruma damanei taui riwana tagogina me vs 48. § 9:45-46: Wariaġa nimaiei i giruma damanei taui riwana tagogina me vs 48.

10

Iesu, tavine vilamonana i babaniei

¹ Ma Iesu, dobuna i netawanei ma i nae Judea ana paratana. Ma Waira Jordan i damani da au baba ġelauna. Patara ġaegaena i riana-melei. Ma Iesu i viaramana, me mara patapatana i kaukauei nanare.

² Ma Pharisi ġelaui i ġoei da tauna ita waroi. Ma lamna aubaina i vitara-virevirei, “Tarawatu e mamae bo eġa da rava, awana maiteni ita vilamonei?”

³ Ma Iesu i paribelei, “Moses ana Tarawatu aiwai e ririwei?”

⁴ Ma taui i riwa, “Moses ana Tarawatu e ririwa da oroto *vilamona pepana ina girumi ma awana ina verei. Ma taui ina vilamonei.*”

⁵ Iesu i paribelei, “Taumi orami i bada. Au baina Moses wei Tarawatuna i terei.

⁶ [◇]Wate ona notai da au karena, maranai God rava i kaei *ma tauna oroto ma wavine i kaei.*

⁷ [◇]*Ma lamna aubaina oroto amana ma alona ina netawanei*

⁸ *ma awana maiteni ina vitagogi* da taui eġa ruaga me au naona ma tupua tagogi.

⁹ God aiwai i vitagogie, eġa aiai ina vilamonei.”

¹⁰ Maranai taui i naeme au numa, ma tauvotaġotaġo, Iesu i vitara-virevirei wei kauai aubaii.

¹¹ Iesu i paribelei, “Mepa da oroto, awana i voterei. Ma wavine ġelauna i ravaġi. Lamna tauna, awana awarina i rauviapoapoe.

¹² Ma nanarena mepa da wavine, awana i voterei ma oroto ġelauna i ravaġi. Lamna awana, awarina i rauviapoapoe.”

Iesu, roaroa i viaaini

¹³ Rava ġelaui, roaroa i neiai Iesu awarina da urana au tepai ita terei. Ma ana tauvotaġotaġo, ravai i viġaei.

¹⁴ Maranai Iesu wei kauai i ’nanai. Ma ana tauvotaġotaġo i eni ma i riwa, “Roaroa ona voterei da awariu ina nei. Ma eġa ona viġaei. Au baina God ana vigulau, lamna rava wenanare aubai me wei roaroai.”

¹⁵ A ririwana-kauemi. Aiai, God ana vigulau eġa ina vaia me tevera aburuna nanare. Tauna, eġa God ana au vigulau ina rui.”

¹⁶ Ma roaroa i taravaini ma i rapai, urana au tepai i terei, i raupari ma i viaaini.

Purapura ravana

(Matthew 19:16-30; Luke 18:18-30)

¹⁷ Ma maranai Iesu i vomairi da i nene. Oroto i ruba ġeta ma au naona i raudune ma i riwa i pa, “Taugiu vinualaulaunam. Aiwai ana kaei da lawana maemae-nonoana ana vibuderiej?”

¹⁸ Ma Iesu i paribelei i pa, “Aiwai aubaina, tau u vikaua vinualaulauneu? God, tauna ava vinualaulaunana.

¹⁹ [◇]Tam, God ana Tarawatu u aramanei, *Eġa ma viragħena! Eġa ma awadanene! Eġa ma danene! Eġa ma viwavu-moru! Eġa ma amkwalakwala! Amam ma Alom ma vivirei!*”

²⁰ Ma tauna i riwei, “Taugiu! Maranai tau aburueu da amadodo, wei tarawatui anatapui a voteletelei.”

²¹ Iesu, tauna i ’nanai ma i vinuavainei ma i riwei, “Kaua tagogi e mamae eġa uta kaukauei. Ma nae ma am purapura anatapuna ma gimarei. Ma manena, rava molamolakai ma verei. Ma au mara God, tam ina vimaiem. Ma ma nei ma ma votaġotaġoiu!”

²² Ma maranai oroto wei riwana i nonori. Naona i peu ma ana nuabolana i nae; aubaina tauna, purapura ravana.

²³ Iesu i ’nana viravira ma ana tauvotaġotaġo awari i riwa, “I piripiri kaua da purapura ravana, God ana au vigulau ina rui.”

24 Tauvotaōtaō riwana i baiei maranai Iesu wenanare i babani. Ma Iesu i riwa me, “Natunatu! I piripiri kaua da purapura ravana,* God ana au vigulau ina rui.

25 I telatela kaua da ġamoġamo ġaeġaena wavana kamel, iġoma au gavogavona ina rui. Ma i piripiri guratana da purapura ravana, ana lawana God ina verei. Ma God, tauna ina vibadei.”

26 Taui i vinuanaina ma ai nota i kwa. Ma taui ava i babani vivira i pa, “Mepa da nanare; amapo aiai lawana mamae-nonoana ina vaia?”†

27 Iesu awarii i 'nana ma i riwei, “Rava awarii wei kauai i piripiri. Wate eġa God awarina. God awarina aiwai anatapuna i telatela kaua.”

28 Ma Peter i riwei, “Ma tauai menanare? Tauai ai purapura a voterei ma tam a votaōgoim.”‡

29 Iesu i paribelana, “A ririwana-kauemi. Aiai da ana numa bo varevareina bo novunovuna bo alona bo amana bo natunatuna bo ana wapu ina voterei ma tau ina votaōtaō; tau ma Riwana Aiaina aubaina.

30 Tauna ana maia ina rata kaua wei au dobuna. Tauna ana maia ina viaitepatepani da ana numa, varevareina, novunovuna, alona, natunatuna ma ana wapu, anatapui ina maġa. Rava ina rau-iviapoapoelem; aubaina tam, tau au Tauvotaōtaō da mara au murina tauna lawana mamae-nonoana ina vaia.

31 Wate maġamaġaui marina e vivinao; taui ina vimuri. Ma maġamaġaui da e vivimuri; ina vinao.”

Iesu ana iraġe babanina i vitonu
(Matthew 20:17-19; Luke 18:31-33)

32 Iesu, ana tauvotaōtaō maiteni i ġeġae au Jerusalem. Iesu, taui au naoi i nenea. Tauvotaōtaō i baiei. Ma rava ġelaui au muri i nenei i rovo kaua.§ Ma taui 12 i rauġorei au ririva ma i raukarei da kaua amapo da awarina ina tupua; taui i vieġei

33 I pa, “Ona inana, tauta ta ġeġae au Jerusalem. Ma Rava Natuna ina verenei pirisi babadai; ma tarawatu babadai awarii. Ma taui ana iraġe ina vianinei. Ma Mai Jentail ina verei.

34 Ma tauna ina vijiboġi ma ina ovai ma ina kwapui ma ina viraġeni. Au pom vitonuina ina vomairi me.”

James ma John ai vibagħa
(Matthew 20:20-28)

35 - Zebedi natunatuna James ma John i nei Iesu awarina ma i vibagħai i pa, “Tauviararama! Tauai ai ġoana a vivibagħei uta kauei.”

36 Iesu i riwa i pa, “Aiwai o ġoegħoei ana kauei aubaimi?”

37 Taui i paribelana, “Ma verelai da ana kiala, tagogi au oiem ma ġelauna au kelakelaum am au vigulau.”

38 Iesu i paribelei, “Taumi eġa ota aramanei aiwai o vivibagħei! Iniviara kelakana ana umai. Taumi tagotagogina da ona umai bo? Tagotagogina ona babataito me tau ina babataitoiū?”*

39 I paribelei, “Tauai tagotagogina!”

Iesu i riwei, “Iniviara kelakana anina ona umai ma ona iraġe me tau ana iraġe.

* **10:24:** Wei riwana buka ġelaui awarii e mamae ma ġelaui eġa *purapura ravana*. † **10:26:** Mai Jew i notai da rava vipuraprai lamna BADA ana verena ana nuavaina matairana, taui e notai da BADA, rava vipuraprai eġa ina gagħloei, tauna ravai ġelaui maiteni eġa ina gagħloei. ‡ **10:28:** Peter i ġoiei da ita aramanei da tauvotaōtaō ai au iraġe maiana aiwai, ina vaia. § **10:32:** Iesu i ġeġae au *Jerusalem* ma rava maġamaġaui i viġavie i lamna aubaina ana tauvotaōtaō i baiei da tauna tepana i tora da weka i nenea. Rava ġelaui i votaōtaō, taui i rovo kaua da aiwai awarina ina tupua maranai i ġeta au *Jerusalem*. * **10:38:** ...babataito me tau ina babataitoiū taui iniviara ma iraġe e babbanie, maranai Iesu au Gethsemani i raraupari muriai da ana iraġe tauna ana nuabolana kelaka i babaniei (Mrk 14:36). Iesu, James ma John i riwei da nuabola ina nelāġai.

⁴⁰ Wate tau au rewapanā ega ita mamae da ana veremi da mepa ona kiala au oieu bo au kelakelau. God, rava i vinevinei; taui ai gabu i vokaukauei."

⁴¹ Maranai Tauvotāgo 10 ġelaui, wei riwana i nonori. Taui James ma John awarii i ġaiawa.

⁴² Ma Iesu, taui anatapui i ġorei da awarina ma i riwei, "O aramanei da jentail ai babada, dobu ġela ravai jentail awarii e mamae-ġaeġae ma e rarau-iviapoapoelei. Wate taui ai babada ġaeġaei, ai rewapanā i ġetelera da ai rava e vibadebadei da ai ġoana e kaukauei.

⁴³ [◇]Wate au tauvotāgo ega nanare. Ega da aiai i ġoei da ina ġetelara taumi au poumi; tauna anina da ina vitaunola.

⁴⁴ Aiai i ġoei da ita vinao. Tauna ina vitaunola rava anatapui aubai.

⁴⁵ Ma nanare Rava Natuna ega ita nei da tauna, tana nolei. Wate ita vitaunola rava aubaii. Ma ana lawana ita verenei da rava maġamaġaui ai lawana ita gimara-melei."†

Iesu, rava mata-potapotana Batimeus i vilawani

(Luke 18:35-43)

⁴⁶ Ma taui i ġeta au Jeriko. Iesu, ana tauvotāgo, patara ġaegħena maiteni dobuna i opuopu-tawanei. Ma oroto mata-potapotana, wavana Batimeias, Timaeus natuna au etanai i kiakiala ma i viamgħimana.

⁴⁷ Maranai i nonori da tauna, Iesu Nasaretei; garara i raukarei i pa, "Iesu, tam David natuna! Ma raunu'apoapoeleu!"‡

⁴⁸ Rava maġamaġaui, tauna i rai ma i riwei da ita genuana. Wate tauna, garara i voguratei, "David Natuna! Ma raunu'apoapoeleu!"

⁴⁹ Iesu i tumairi ma i pa, "Ona ġoreiai!"

Anina taui, mata-potapotana i ġoreiai i pa, "Tepam ina tora ma ma vomairi! E ġoreġorem!"

⁵⁰ Tauna, ana puru i tawanei ma i vomairi laġilaġina ma i nei Iesu awarina.

⁵¹ Iesu i paridadana i pa, "Aiwai u ġoei ana kauei aubaim?"

Mata-potapotana i paribelei, "Tauviararamana! A ġoei da ana inana me."

⁵² Iesu i riwa, "Ma nae! Am tumaġana i vilawanim." Maratagogi tauna i 'nana me ma Iesu au eta i votāgo.

11

Iesu i rui au Jerusalem

(Matthew 21:1-11; Luke 19:28-40; John 12:12-19)

¹ Ma maranai Jerusalem i tuġereġerei ma i rui au Betphagi ma Bethani* au ola Olives. Ma ana tauvotāgo ruāga i paritawanei,

² ma i riwei i pa, "Ona nae au melagai au naomi. Maranai o ruirui, kampa donki natuna ġaubo, raġiraġitana ona nelāġai. Tauna ega aiai ita geru-dadanei. Ona rupeni ma ona neiai."†

³ Mepa da aiai ina paridadana, 'Aiwai aubaina wei o kaukauei?' Ona riwei, 'BADA e ġoegħei ma maratagogi ina paritawana-melei.'

⁴ Ma i nae ma donki ġaubona au doa au metaeta raġiraġitana i rupeni.

⁵ Rava ġelaui kampa i maimairi i paridadana i pa, "Aiwai o kaukauei donki ġaubona o ruperupeni?"

⁶ Ma i paribelei me Iesu i ririweia nanare ma taui i voterei da i nae.

* **10:43:** Mrk 9:35 † **10:45:** Iesu i vinuapoapoe ma iraġe aubaita me Isaiah i girugirumia nanare au Isa 52:13-53:12.

‡ **10:47:** Maranai oroto mata-potapotana Iesu i kwatuei David natuna ma mai Jew i aramanei Keriso - BADA ana vinevine i babaniei. Mai Jew i aramanei da Keriso ai wavalatona me David wariaġa nanare. Ma i nei da rava doridoriai ita vilawani me. (Sal 89:3-37 Isa 29:18-19 & 35:5-6 Jer 23:5-6 Ezk 34:23-24) * **11:1:** Eng. Bethphage & Bethani. † **11:2:** Mai Jew awari, donki lamna nola aubaina ma ega gulau ana anigeru. Donki i gerui lamna e ririweta da tauna gulau ana nuaubana ma vilamolamona i nei.

⁷ Taui *donki* i neiai Iesu awarina ma ai puru au uporana i tawana-epai ma au tepana Iesu i kiala.

⁸ Ma rava mağamağau, ai puru au eta i ebani ma ġelaui, ai rugurugu i taratarai i ebani.

⁹ Taui i vivinao ma taui au muri i nenei i garara:

“Hosanna!”[‡]

“Viviainana tauna BADA au wavana e nenei!”

¹⁰ “Viviainana amata David ana vigulau e nenei!”

“*Hosanna* au aidamo telarana!”

¹¹ Iesu i ġeta au Jerusalem ma i rui au Tempol ma anatapuna i tuvirevirei ma au i biga aubaina, i opu me au Bethani, taui 12 maiteni.

Iesu, damala aina i parivai-irairaġeni

(Matthew 21:18-19)

¹² Ma marana i tom, taui Bethani i opu-tawanei ma Iesu am-iraġe.

¹³ Au weia ma damala aina i 'nanai ana ruguruguna. Ma i nae da ita inanai da i ua bo eġa. Maranai kampa i ġeta, eġa aiwai ita nelaġai. Anina ai ruguruguna ava, aubaina eġa damala ana mara.

¹⁴ Iesu, damala aina i riwei i pa, “Eġa aiai amadodo ma amapo anom ina am-melei!” Ma ana tauvotaġotaġo i nonori aiwai i latoni.

Iesu, taugimara tempolei i viaġaġana-opunei

(Matthew 21:12-17; Luke 19:45-48; John 2:13-22)

¹⁵ Maranai taui i ġeta au Jerusalem, Iesu i rui Tempol garina au orana ma taugimara i viaġaġana-opunei, mane tauviraina[§] ai kepakepa ma gabubu taugimareina ai anikiala i vitauvirai.

¹⁶ Ma i viġaei da eġa aiai ana gimara Tempol au orana ita avarai-naiei.

¹⁷ [⊕]Ma rava i viararamani i pa, “I girugirumia nanare,

‘Au numa ina ġorei pari numana

dam anatapui au dobu aubai.’

Wate taumi o vovirai da kwalakwalai ai guba.”*

¹⁸ Pirisi Babadai ma tarawatu Babadai i nonori ma i ogei da ita viraġeni. Taui, Iesu i rovoei aubaina patara ana viararamana i baiei.

¹⁹ Ma au bigai Iesu ana rava, Jerusalem i opu-tawanei.

Damala aina i poi

(Matthew 21:20-22)

²⁰ Ma ubaubanai taui i nena ma damala aina i 'nanai anatapuna i poi.

²¹ Peter i notai ma i riwa “Tauviararamana ma inana! Damala aina u parivai-irairaġenia i poi.”

²² Iesu i paribeli, “God ona vitumaġanei!

²³ A ririwana-kauemi. Rava wei olana ita riwei, ‘Ma vomairi ma au boga ma tawanem!’ Ma nuanuana eġa ina raġaraġa ma ina vitumaġana da aiwai e ririweia, ina tupua.

²⁴ Lamna aubaina a ririwemi. Aiwai ami au pari o vibaġei, ona vitumaġana da taumi boibogħi o vaia ma ina viġarimie.

²⁵ Ma maranai e raraupari, au naona rava anatapui ai ġo'apoapoe awarim ma nota-tawanei. Ma nanare amam au mara am ġo'apoapoe ina nota-tawanei.”†

[‡] **11:9:** Lamna pona Aram anona *ma vilawaniai* ma muriae lamna viegualau ma vimea-ġaegħaena aubaina. [§] **11:15:** Mai Jew ai au nota da mai Rome ma mai Greek aruai mane au tepana i terei, wei mai Jew awari lamna god morumoruna. Mane tauviraina au Tempol mane dobu ġelaui i virai da Tempol mane wei lamna Jew tarawatu i vianinei gimara au Tempol aubaina (Exo 30.13). [⊕] **11:17:** Isa 56:7 ^{*} **11:17:** Iesu dobūgħela manena tauviraina ma gimara ravai i viwavui da taui pari numana i vovirai da amkwalakwalai ai guba, taui rava ai arua nolana e viviapoapoeni Jer 7:11-15. [†] **11:25:** Riwa wadubo nonoana uraiei i girugirumia vs 26 weka eġa ita mamae, *Mepa da rava ai apoapoei eġa ma nota-tawanei, amam au mara nanare am apoapoei eġa ina nota-tawanei.*

Jew babadai, Iesu ana vibadana i vitarapiriei
(Matthew 21:23-27; Luke 20:1-8)

²⁷ Taui i nememei au Jerusalem ma Tempol au orana i bababara. Ma Pirisi Babadai, Tarawatu Babadai ma dogadogara i nei Iesu awarina.

²⁸ Ma i paridadanei i pa, “Aiwai vibadanei wei kauai e kaukauei? Aiai vibadana i verem da wei kauai uta kuae?”

²⁹ Iesu i paribelei i pa, “Au vitaraviravira tagogi ana terei ma ona paribeieu. Ma ana riwemi; aiwai vibadanei wei kauai a kaukauei.”

³⁰ Aiai, John taubabataito vibadana i verei da rava ita babataitoi, God bo rava? Ona riweu!”

³¹ Taui i vitarapiri vivira, “Mepa da tana riwa, ‘Godei.’ Tauna ina riwa, ‘Ma aiwai aubaina ega ota vitumañganei?’

³² Wate ega tana riwa da, ‘Ravei.’ Taui rava i rovoei, aubaina rava anatapui, ai nota da John anina peroveta.

³³ Ma i paribelei, “Tauai ega ata aramanei.” Iesu i riwa, “Tau nanare ega ana riwemi aiwai vibadanei wei kauai a kaukauei.”

12

Tauipi ai awanaina

(Matthew 21:33-46; Luke 20:9-19)

¹ [☆]Iesu i vikarei ma awanainei awari i babani i pa, “Mara tagogi oroto, ana wapu i kuae ma grape i paewi* ma i gari ma grape anigudana ma violaña numana i voai. Ma tauipi ġelaui i verei da ita nolei taui anatapui aubai. Ma i vaġai au dobu ġela.

² Tuaruta ana mara i ġetai ma taniwaga, ana taunola i paritawanei tauipi awarri da ana ġuta ita vaia.

³ Wate tauipi, tauna i vojijini ma i kwapui ma kwakwavina i paritawanei.

⁴ Ma taniwaga, taunola ġelauna i paritawanei. Ma taui, kolana i viaibauni ma i vitepaubaubai.

⁵ Ma taunola ġelauna i paritawanei ma tauna i viraġeni ma i maġa ġelaui i paritawanei, ġelaui i kwapui ma ġelaui i viraġeni.

⁶ Ma tagogi ava e mamae da ina paritawanei. Lamna natuna orotona tagotago ana nuavainana. Ma tauna au murioina i paritawanei ma i pa, ‘Taui, natu ina vivrei.’

⁷ Wate taui, tauna i 'nanai ma i riwa vivira i pa, ‘Wei taniwaga natuna. Ona nei, tana viraġeni ma ana buder i na viġaritaieil’

⁸ Ma i vunui ma i viraġeni ma tupuana wapuei i tawanana-opunei.

⁹ —Wapu taniwagana marina aiwai ina kuae taui awarri? Tauna ina nei ma tauipi ina viraġeni ma grape wapuna ina veredamanei tauipi ġelaui awari.

¹⁰ Wei girumana o iavi bo ega?

‘Wei ġaimana, tauvoa i geduaiei,

wate muriai i nelaġai da tauna ġaima kaua.

¹¹ *Wei lamna, BADA ana kaua
ma inanana i vinualaulauna.*

(Psalm 118:22-23)

¹² Jew babadai i aramanei da awanaina lamna taui i bababaniei ma i ġoei da ita pani. Wate taui patara i rovoei, lamna aubaina Iesu i voterei ma i nae.

Caesar awarina tax tana terei bo ega?

(Matthew 22:15-22; Luke 20:20-26)

¹³ Ma Pharisi ġelaui ma Herod ana rava ġelaui i nae Iesu awarina da riwei ita waroi.

* ^{12:1:} Isa 5:1-2 * ^{12:1:} Parivainota wadubona, God au anatapuna Israel e bababaniei me tauna ana grape wapuna, me Isa 5:1-2.

¹⁴ Tau i nei ma i riwa, “Tauviararamana, tauai aramanei da tam rava jijimanim. Ma rava wawai naenaei ma rava labalababa ega uta vibainaenaei ma anatapui e vaivaia da tagogi. Wate tam God ana babani riwa kaeui e viararamani. Ma riwelai tax tana terei Rome gulauna wavana Caesar[†] awarina, i aii bo ega?”

¹⁵ Wate Iesu, ai moru i 'nana-bauni ma i riwei, “Aiwai aubaina o raudadaniu? Mani tagogi ona neiae da ana inanai!”

¹⁶ Denarius tagogi i neiae Iesu awarina ma tau i vitara-virevirei, “Wei aiai aruana ma wavana?”

I paribelei, “Caesar.”

¹⁷ Iesu i riwa, “Aiwai Caesar garinei, Caesar ona verei. Ma aiwai God garinei, God ona verei!” Ma tau i baiei.

*Sadusi gelaui, Iesu i vitara-virevirei irairaägelei vomairina aubaina
(Matthew 22:23-33; Luke 20:27-40)*

¹⁸ [¶]Mai Sadusi ai vitumağana da rava ega ita vovomairi-me maranai e irairaäge.[‡] Anina ma gelaui i nei Iesu awarina ma i paridadanei,

¹⁹ “Tauviararamana! God ana tarawatu, Moses wenanare i girumi: Mepa da oroto i'rage ma kaiababana i netawanei ma ega natunatui. Oroto vareina kaiababana ina ravağı ma roaroa ina ġuni vareina aubaina.

²⁰ Mara tagogi varevarei seven i mae. Ma natuevou i tavine ma ega natunatuna ma oroto i'rage.

²¹ Vareina viruaina kaiababa i ravağı ma tauna maiteni ega natuna ma i'rage. Ma nanare vareina vitonuina.

²² Ma nanare anatapui seven, wavinena i ravağı ma ega natunatui. Au muriai wavine i'rage.

²³ Anatapui seven, wavinena i ravağı. Vomairi me au marana, lamna aiai awana?”

²⁴ Iesu, tau i riwei, “Aiwai Moses i girumi ma God ana rewapani ega ota aramanei.

²⁵ Maranai tau i raägelei ina vomairi, tau i ega ina tavine bo ina vitavinei. Wate ina mae me anela au mara.

²⁶ [¶]Ma rava iraägelei ai vomairi babanina, Moses ana tarawatu ega ota iavi bo? Mepa ai i ararata lana, kampa God Moses i riwei: *Tau Abraham ana God ma Isaac ana God ma Jacob ana God.*

²⁷ Tauna ega rava irairaägei ai God, wate rava lawalawai ai God. Taumi o moru kaua![§]

Tarawatu ġeġetelarana

(Matthew 22:34-40; Luke 10:25-28)

²⁸ Ma tarawatu badana tagogi i nae ma ai vitarapiri i nonori. Ma i nonori da Iesu i babani kaua, lamna aubaina tauna i vitara-viravira, “God ana tarawatu metauna i ġetelara?”

²⁹ [¶]Iesu i paribelei, “Geġetelarana tagogi lamna wei: *Ona rautaniġana Israel!* BADA at God, tauna ava BADA.

³⁰ BADA ami God nuanuami ina vaia orami anatapunei ma aruami anatapunei ma ami nota anatapunei ma ami rewapani anatapunei!

³¹ [¶]Ma viruaina lamna wei: *Rava gelaui nuanuam ina vaia me tam nuanuam e vaivai-melei!* Wei tarawatui ruağa i ġetelara, ega me gelaui nanare.”

³² Tarawatu badana i riwa, “Tauviararamana u babani kaua! Riwa kaua u babaniei, BADA Tauna ava God ma ega mepa gelauna.

[†] **12:14:** Sisa. [¶] **12:18:** Act 23:8 [‡] **12:18:** *Sadusi* tau i gulagulau ma rava ġaeġaei mai Jew ai giu babadai tau i maiteni ega ita vitumağana da *anela* bo arua gelaui e mamae ma buka 5 i vinao, Moses i girugirumia, tau i lamna ava e vivitumağanei (Karena, Exodus, Leviticus, Numbers, Deuteronomy). Ma ega buka gelaui. Wate Moses ma BADA riwaiei tau i viatataie i da lawana e mamae iraäge au murina. [¶] **12:26:** Exo 3:6 [§] **12:27:** ...wate rava lawalawai ai God. Mepa da BADA i riwa da tauna Abraham ma Isaac ma Jacob ai God, tau i lawalawai maranai BADA, Moses awarina i babani. [¶] **12:29:** Deu 6:4-5 [¶] **12:31:** Lev 19:18

³³ Ma nuanuami ina vaia orami anatapunei ma ami nota anatapunei ma ami rewapana anatapunei. Ma, Rava turam nuanuam ina vaia me tam nuanuam e vaivai-melei. Wei tarawatui ruaġa lamna i ġetelera, eġa me pulo apuapunana bo pulo ġelaui.”

³⁴ Iesu i 'nanai da tauna i paribelana kaua ma i riwei, “Tam, God ana vigulau au ġereġerena e ġeġeta.” Ma eġa aiai tepana ita tora da Iesu ita vitara-viravirana-melei.

Keriso tauna aiai?

(Matthew 22:41-46; Luke 20:41-44)

³⁵ Maranai Iesu au Tempol i viararamana ma i vitara-viravira i pa, “Aiwai aubaina Tarawatu Babadai e ririwa da Keriso tauna David natuna?

³⁶ ♦ Arua Vivivireina, David nota i verei ma tauna i riwa:

‘MAMAE-NONOANA *au gulau i riwei,*

Au oieu ma kiala

da am ġavia

au ae karem da ma tuvaidoedoei,’

(Psalm 110:1)

³⁷ —David, tauoina wei gulauna i ġorei *bada*. Ma menanare da badana lamna, David natuna?” Patara ġaeġaena riwana i nonori ma i vinuaiai.

Iesu, Tarawatu Babadai ai kaua i babaniei

(Matthew 23:1-36; Luke 20:45-47)

³⁸ Ma Iesu, taui i viararamani i pa, “Tarawatu babadai ona rovoei. Ai gara manamanai ma e bababara næe au deba da raya taui e vivivirei.

³⁹ Taui anikiala vinevinei pari au numana ma au torela, gabu aiaii e vaivaia.

⁴⁰ Taui, kaikaiababa e morumorui ma ai numa e kwalekwalei, e morumorui ma e raraupari-vai-manamanawa. Taui ai kovoġa ina apoapoe guratana.”

Kaiababa ana pulo

(Luke 21:1-4)

⁴¹ Ma Iesu, pulo aniterenana au baba ġelauna i kiala ma rava i 'nananai mane i tereterei. Rava maġamaġaui vivimanei, mane maġamaġaui i terei.

⁴² Wate kaiababa molamolakana i nei ma mane muomuoi ruaġa i terei, ruvana i aburu kaua.

⁴³ Ana tauvotaġotaġo i ġorei ma i riwei, “Anina a ririwemi, wei kaiababa molamolakana i tere-guratei, eġa me taui ġelaui.

⁴⁴ Taui ġelaui ai maurei i verena, wate wei kaiababa molaka ma ġarinei anatapuna i terei, ana anilawana anatapuna.”

13

Iesu i riwa da rava God ana Tempol ina rikai

(Matthew 24:1-2; Luke 21:5-6)

¹ Iesu, Tempol i nene-tawanei ma ana tauvotaġotaġo tagogi i riwa, “Tauviararamana! Numa i viġulau ġaġa ma numa ġaimai i rata ġaġa.”

² Iesu i paribelei, “Wei numai ġaeġaei u inanai, eġa ġaimai tagogi, turana au tepana ina mae. Ĝaima anatapui ina rikai.”

Rava ina vinuapoapoe kaua. Iesu ana tauvotaġotaġo ina vipatutu

(Matthew 24:3-14; Luke 21:7-19)

³ Iesu i kiakiala au ola *Olives*, Tempol au navanavaġela ma Peter, James, John ma Andrew i nei ma i vitaraviravirana govaġei

⁴ i pa, “Ma riwelai mara aiwai wei kauai ina tupua? Ma aiwai ina vimataira da wei kauai anatapui ina tupua?”

⁵ Iesu, taui i riwei, “Ona inana kaua da eġa aiai ina terevaideġaimi!

⁶ Rava maḡamaḡaui, wavauei ina nei ma ina riwa, ‘Tau Keriso tauvilawana!’ Ma rava maḡamaḡaui ina terevaideḡai.

⁷ Ma maranai viḡavia ona nonori ma viḡavia aueia riwana ona nonori; eḡa ona rovo! Wei kauai anina da ina tupua, wate wei eḡa damona.

⁸ Dam, damai ina viḡavia vivira ma dobu, dobua ina viḡavia vivira. Ma lolo ma gomara dobu au anatapuna. Wei kauai, lamna me wavine ana iniviara e vivikarei maranai e vivinatuna.

⁹ —Ona inana kaua! Taumi ina panimi ma ina etaremi ma pari numana au orana ina kwapuimi. Ma gavena ma gugulau au naoi ona mairi, aubaina taumi o votaḡotaḡoiu. Ma taui awarri, Riwa Aiaina ona raugugulei.

¹⁰ Riwana Aiaina ona raugugulei rava anatapui awari ma muriai damona ina nei.

¹¹ Ma maranai i panimi ma i etaremi. Eḡa ona vinuabola da aiwai ona latoni. Aiwai riwana God i veremi, lamna ona latoni. Aiwai o latoni lamna eḡa taumi ota babani, wate Arua Vivivireina.

¹² Rava, vareina ina verenei da ina viraḡeni. Ma ama, natunatuna ina verenei da ina viraḡeni. Ma roaroa, amamai ma aloloi ina viḡaviei da ina iraḡe.

¹³ Rava anatapui ina geduaiemi tau aubaiu. Wate aiai da e maimairi-jijina da au damona, tauna ina lawana.”

Iniviara ġaeḡaena ana mara

(Matthew 24:15-28; Luke 21:20-24)

¹⁴ “Maranai ‘Kaua apoapoe kaukauana’* e maimairi mepa avena ita mairi. (Buka tauiavana wei ina aramanei anona aiwai). Taui aiavoi au Judea ina ruba laḡilaḡina au ola.

¹⁵ Aiai numa au tepana eḡa ina ġairā bo ina rui au numa da aiwai ina vaia.

¹⁶ Aiai au wapu eḡa ina naeme au numa da ana gara ina vaia.

¹⁷ Ma iniviara ġaeḡaena, waivine duaduamai ma taui da e viviḡuġu awari nai au marana!

¹⁸ God awarina ona raupari da wei kauai eḡa au bodu ina tupua.

¹⁹ [✡]Ma nai au marana amapo iniviara ġaeḡaena. Ma maranai God dobu i kauei, iniviara ġaeḡaena eḡa nanare ita tupua ma amapo eḡa nanare ina tupua me.

²⁰ Wate BADA nai marana ina vitupoi. Mepa da eḡa ina vitupoi, rava anatapui ina iraḡe. Wate rava, tauna ana vinevine ina vilawani lamna aubaina mara ina vitupoi.

²¹⁻²² —Muriai keriso tauvilawana morumorui ma peroveta morumorui ina nei ma mataira ma kaua babai ina kauei ma ina kauana dadanei da God ana vinevine maiteni ita terevaideḡai. Lamna aubaina mepa da aiai ina riwemi, ‘Ma inanai, Tauvilawana noi!’ bo ‘Tauna noi!’ Nai babanina eḡa ona vitumaḡanei!

²³ Ona inana kaua; anatapuna a riwana-nonoemil!”

Rava Natuna ana nei

(Matthew 24:29-31; Luke 21:25-28)

²⁴ Iesu wenanare i riwa, “Ma iniviara ġaeḡaena au murina.

Madeḡa eḡa ina rarana

ma nawaravi eḡa ina lalai.

(Isaiah 13:10)

²⁵ *Ma ubona marei ina peu*

ma rewapanana ġelaui au aidamo ina gui.

(Isaiah 34:4)

²⁶ [✡]—Nai maranaina, *Rava Natuna ana rewapanana ma ana borumana apauei ina nei.*

²⁷ Ma Tauna, ana anela ina paritawanei dobu au anatapuna da rava tauna ana vinevine ina tuarui dobu au damona da dobu ġela au damona.”

Damala ana awanaina

(Matthew 24:32-35; Luke 21:29-33)

* ^{13:14:} Eng. *Abomination of Desolation* Dan 9:27 11:31 & 12:11 [✡] ^{13:19:} Da 12:1 [✡] ^{13:26:} Da 7:13

²⁸ “Damala aina ana awanaina ona aramanei. Maranai ai e numonumoi, lamna ona aramanei da maura e tuturiai.

²⁹ Ma nanare, maranai wei kauai anatapui ina tuputupua, ona aramanei da Rava Natuna i turiai; au metaeta i ġetai.

³⁰ Anina a ririwemi da wei kauai au naona ina tupua ma muriae da rava marina lawalawai ina irāge.

³¹ Mara ma dobu ina amo. Wate riwau eġa ina amo.”

*Bada ainelana ana nei i aramanei
(Matthew 24:36-44)*

³² “Ma eġa aiai ita aramanei nai marana bo madeġa aiwai ina nei. Anela au mara eġa ita aramanei ma Natuna eġa ita aramanei. Amana, tauna ava i aramanei.

³³ Ona vineneġana ma matami ina kala!† Eġa ota aramanei mara aiwai, wei kauai ina tupua.

³⁴ Wei me rava ana numa i netawanei ma i vaġai. Ma ana taunola nununai i terei da ita vipaipai ma tagotagogi ava ai nola i verei da ita kauei. Ma tauvineneġana i riwei da ita vineneġana.

³⁵ Ona vineneġana! Eġa ota aramanei mara aiwai, numa taniwigana e nenei; mepa da au bigai bo au nubautuva bo maratomtomai bo ubaubanai.

³⁶ Ma eġa matamatavemi ina nelāgaimi.

³⁷ Aiwai riwana a ririwemi, riwana tagogina rava anatapui a riwei, ona vineneġana!”

14

*Jew ai babada, Iesu i ogei da ita viraġeni
(Matthew 26:1-5; Luke 22:1-2; John 11:45-53)*

¹ ✽ Au pom ruaġa muriae da Raġona ma Palawa Bagibagina torelai,* Pirisi babadai ma Tarawatu Babadai eta i baibaiei da menanare govagovaġanei Iesu ita vunui.

² Ma i riwa, “Au torela wei kauai eġa tana kauei, mepa da viġaiġaiawa ġaeġaena ina tupua.”

Wavine, daji ġabuġabuna Iesu au kolana i waġi

(Matthew 26:6-13; John 12:1-8)

³ Maranai Iesu au Bethani, Simon i ġoreġorei lepeleperana ana au numa i kiala ma i amam. Wavine, wagi wavana alabaster i voai ma i ġeta ma wagi uana i vogai ma daji ġabuġabuna, maiana ġaeġaena e ġoreġorei *nard*, Iesu au kolana i waġi.

⁴ Rava ġelaui kampa i mamae i ġaiawa ma i riwa, “Aiwai aubaina daji u vikalokaloei?

⁵ Wei dajina ita gimarei 300 *denarii* † ruvana ma manena molamolakai ita verei.” Ma taui, wavine i vienenei.

⁶ Wate Iesu i riwa, “Ona voterei! Aiwai aubaina o vinuabolai? Tauna, kaua aiaina awariu i kauei.

⁷ Molamolakai awarimi e mamae-nonoa ma ona ġoei ma taui ona voagui. Wate tau awarimi eġa ata mamae-nonoa.

⁸ Wavine ana nola i kauei. Tauna, dajiei tupuau i vokaukauana-nonoei vikokoaga aubaina.‡

⁹ A ririwana-kauemi, mepa Riwana Aiaina i raugugulei dobu au anatapui, wei wavinena aiwai i kaukauei ina babaniei, ma eġa nuuanuai ina vuru.”

¹⁰ Judas Iskariotei tauna Apasol tagogi, Pirisi Babadai awari i ġeta da Iesu ita vibenabenamei.

† **13:33:** Wedau *Evanelia* i girumi, *ma i raupari*, wate buka wadubo nonoana wei eġa ita mamae, Luk 21:16 kampa ona inanai da e mamae. ✽ **14:1:** Exo 12:1-27 * **14:1:** *Raġona* (*passover*) Exo 12:1 *Palawa eġa yist maiteni* (*Unleavened-Bread*) Exo 12:17 & 23:15 † **14:5:** Wei lamna me taubagibagi ana maia madeġa tagogi aubaina. ‡ **14:8:** Mai Jew ai kaua da taubeu dajiei e bulobuloi muriae au kokoaga e tereterei.

¹¹ Taui i vinuaiai kaua maranai wei i nonori ma Judas i parivainuaāgani da mane ita verei. Ma Judas i 'nana da mepa gavogavo ita inanai da Iesu ita amverenei.

Iesu ma Apasol, Raōona torelana i ani.

(Matthew 26:17-25; Luke 22:7-14, 21-23; John 13:21-30)

¹² Ma Palawa Bagibagina torela ina vikarei. Maranai sipu orotoi īgauboi e vunuvunu Raōona torelana aubaina. Tauvotaāgotaō, Iesu i paridadanei, "Mepa u īgoeāgoe Raōona torelana ana yokaukauei aubaim?"

¹³ Iesu, taui ruāga i riwei ma i paritawanei, "Ona nae au Jerusalem ma oroto, waira wagina e avavarai ona inanai ma ona votaāgotaōgi."

¹⁴ Au numana e ruiruiana, numa taniwagana ona riwei, 'Ai tauviararamana i riwa, "Numa yokaukauana mepa ma au Tauvotaāgotaōgi maiteni Raōona torelana ana ani?"

¹⁵ "Ma tauna, numa vatavatara ina viatataiemi i yokaukauana-nonoei ma kampa aubaita ona yokaukaua."

¹⁶ Tauvotaāgotaōgi i nae au Jerusalem ma i ririweia nanare i nelāgai ma Raōona torelana i yokaukauei.

¹⁷ Au i biga ma Iesu i nei Apasol maiteni.

¹⁸ Taui au kepakepa i amam ma Iesu i riwa, "Anina a ririwemi. Taumi tagogi ina vibenabenameu; tagogi weka maiteni amam."

¹⁹ Tauvotaāgotaōgi i vinuabola ma tagotagogi ava i pa, "Ēga tau tapa?"

²⁰ Iesu i paribelei, "Taumi tagogi weka palawa e vivigaloi au aboma tau maiteni.

²¹ Wariaāga i girugirumia nanare, Rava Natuna ina irāge. Wate aiai da Rava Natuna i vibenabenamei; tauna, kovoāga īgaēgaena ina vaia! I aii da alona avena ita vinatunei."

²² Maranai i amam ma Iesu palawa i vaia ma i viegualau, i vogimagimai ma Tauvotaāgotaōgi i verei ma i riwa, "Ona vaia; wei tupuau."

²³ Anina ma *wine* kelakana i vaia ma i viegualau ma i verei da anatapui i umei,

²⁴ ☲ "Wei tau tarau i toi rava maāgamaāgau aubai ma au parivainuaāgana bagibagina ina vovai-virewapani.

²⁵ Anina a ririwemi, *wine* ēga ana uma-melei da maranai God ana rava aubaii ana vigulau."

²⁶ Ma taui voepaepa welana i ravi ma i īgae au Ola *Olives*.

Peter, Iesu ina boviei

(Matthew 26:31-35; Luke 22:31-34; John 13:36-38)

²⁷ Iesu, taui i riwei "I girumi nanare,

God i riwa, 'Tauvīgamoāgamo ana virāgeni ma sipu ina vilamonei.'

(Zekariah 13:7)

Ma nanare anatapumi ona ruba-tawaneu.

²⁸ Wate au vomairi au murina ana aivinao au Galili."

²⁹ Peter i riwa, "Mepa da anatapui ina rubatawanem, wate ēga tau!"

³⁰ Iesu, Peter i riwei, "A ririwana-kauem da amadodo waguvvarai muriae da kokorereko ina tou mara ruāga; tam mara tonuāga ma bovieu."

³¹ Wate Peter, ponana i bagibagi ma i riwa, "Avena mepa da tau, tam maiteni ana irāge. Ēga melanai ana boviem!" Ma taui īgelaui riwana tagogina i latoni.

Iesu au Gethsemani i raraupari

(Matthew 26:36-46; Luke 22:39-46)

³² Ma au Gethsemani i īgeta ma Iesu, ana tauvotaāgotaōgi i riwei, "Weka ona kiala ma ana raupari."

³³ Ma Peter, James ma John i taravaini ma nuanuana i'raāge ma nuanuana i bola-kauei.

³⁴ Ma taui i riwei, "Au nuabola i rata kaua au orau da e vunuvunuui. Weka ona mae ma ona vineneāgana."

☞ 14:24: Exo 24:8; Jer 31:31-34

³⁵ Ma aburuna i verau-nae ma au doa i peu ma i raupari da mepa da tagotagogina, lamna wei marana apoapoena tauna ita netawanei.

³⁶ I riwa i pa, “*Abba* Amai! Aiwai anatapuna tagotagogina tam awarim. Wei kovōga kelakana ma vaitawanei. Wate ēga tau au āoana, wate tam am āoana.”

³⁷ Ma Iesu i nememei ma taui tonūga rarau-nuavurui i nelāgai. Ma Peter i riwei, “Simon!§ tam aiwai matavena? Mara aburuna uta vinenēgana bo ēga?”

³⁸ Ma Iesu, taui i riwei, “Ona vinenēgana ma ona raupari da ēga au raelara ona peul! Arua ē goēgoei, wate tupua i ākokokara.”

³⁹ Ma i naemei ma parina tagogina i raupariei.

⁴⁰ Maranai i nememei ma i nelāgai, i matamatave; taui, matai i vitai. Ma taui ēga ita aramanei aiwai ita riwei.

⁴¹ Mara vitonuina i nene-memei ma taui i riwei, “Taumi amapo ona matamatave ma laumi ina tautau? Anina! Mara i āgetai, ona inanai. Rava Natuna ina vibenabenamei āgōapoapoe ravai au urai.

⁴² Ona vomairi; tana nae; ona inana! Tauvibenabenameu e nenei!”

Iesu i pani

(Matthew 26:47-56; Luke 22:47-53; John 18:3-12)

⁴³ Iesu i bababani ma Judas, tauna ana Tauvotāgo tagogi i āgetai. Tauna, patara ana apiai maiteni i nei. Pirisi Babadai ma Tarawatu Babadai ma dogadogara, wei ravai i paritawaneiai.

⁴⁴ Muriai da Iesu awarina ita āgeta; Judas, patara ai mataira i verei, “Orotona ana vigia lāgolāgonei; nai tauna. Ona pani ma ona naiei ma ona inana-kauei!”

⁴⁵ Maranai Judas i āgeta ma i nae Iesu awarina ma i riwei, “Tauviararamana!” Ma i vigia lāgolāgonei.

⁴⁶ Ma taui, Iesu i vojjini ma i pani.

⁴⁷ Ma tagogi kampa i maimairi, ana sword i taina-lavui ma Pirisi āgēgetelarana ana taunola tanigana i borituini.

⁴⁸ Ma Iesu, taui i riwei, “Taumi ana apiami o nei da ota paniu bo, apamina tau amk-walakwalau?

⁴⁹ Marana patapatai taumi maiteni ta mamae au Tempol ma a viararamana ma ēga ota paniu. Ma i girugirumia nanare, ina tupua.”

⁵⁰ Ma Tauvotāgo anatapui, Iesu i voterei ma i ruba-tawanei.

⁵¹ Ma laraga tagogi, i vikareko ma Iesu i votāgo. Taui i āgoe da ita vojjini,

⁵² wate ana kareko i vojjini ma tauna ana kovakovana i ruba.

Taui, Iesu i etarei.

(Matthew 26:57-68; Luke 22:54-55, 63-71; John 18:13-14, 19-24)

⁵³ Ma taui, Iesu i naiei Pirisi Āgēgetelarana. Pirisi Babadai, dogadogara ma Tarawatu Babadai mepa i vitagegieiana.

⁵⁴ Ma Peter i votāgo da Pirisi Āgēgetelarana ana numa. Ma ana au debadeba, purusimani maiteni i kiala ma i vivairara.

⁵⁵ Pirisi Babadai ma mai Jew ai boru āgēgetelarana,* Iesu ana apoapoe i baiei da ita virāgeni; ma i baiana-avei.

⁵⁶ Matamata māgamāgai, Iesu i viwavu-morumoruei, wate ai viwavu taputapunei ava.

⁵⁷ Ma āgelaui i vomairi ma wei wavuna morumoruna i kauei Iesu awarina,

⁵⁸ “Tauai a nonori tauna i riwa, ‘Wei tempolna i voavoia. Tau ana rikai ma au pom tonūga au murina, Tempol āgelauna ana voai ma lamna ēga rava ita voai.”

⁵⁹ Wate nanare ai viwavu taputapunei ava.

§ 14:37: Au Mrk 3:16 *Simon* wavana i virai da *Peter*. * 14:55: Mai *Jew* ē goēgoei *Sanhedrin*.

⁶⁰ Pirisi ġeġetelarana i mairi taui au naoi ma Iesu i vitara-virevirei, “Wei ravai e viviwavuim ma eġa aiwai ma paribelei bo?”

⁶¹ Ma Iesu i genuana ma eġa ita paribelei.[†] Ma Pirisi ġeġetelarana i vitaraviravirana-melei, “Tam Keriso tauvilawana bo? Viviaiainana Natuna bo?”

⁶² [‡]Iesu i paribelana, “Tau tauna! Ma *Rava Natuna ona inanai, Vivirewapanana au oienina kiala ma mara ladanei ina nei.*

⁶³ Pirisi ġeġetelarana, amlona i ġaigai ma ana gara i sikai ma i riwa, “Aiwai aubaina matamata ġelaui tana ġoei?

⁶⁴ Taumi, vijiboġa o nonori ma ami nota aiwai?”

Taui anatapui i riwa, “Tauna ana ġo’apoapoe aubaina anina da ina iraġe!”

⁶⁵ Ma ġelaui i raukarei ma Iesu i ovai ma naona i purui; i raunavanavai ma i riwei, “Ma pariverelai, aiai i ravim!” Ma tauvipaipai, Iesu i vaia ma i vunui.

Peter, Iesu i boviei

(Matthew 26:69-75; Luke 22:56-62; John 18:15-18, 25-27)

⁶⁶ Ma Peter au gabaura i mamae ma Pirisi ġeġetelarana ana taunola guguini i ġetai.

⁶⁷ Maranai tauna, Peter i ’nanai i viviairara; ma i ’nana-tunutunui ma i riwa, “Tam maiteni Iesu Nasaretei, ana tauvotaġotago!”

⁶⁸ Wate tauna i bovi ma i riwa, “Eġa ata aramanei aiwai e bababaniei, a vinuanainei!” Ma i tuopu au metaeta ma [kokorerekko i tou[‡]].

⁶⁹ Taunola guguini, Peter i ’nanai ma i raukarena-melei ma rava au ġereġere i maimairi i riwei, “Wei ravana, taui tagogi!”

⁷⁰ Wate Peter i bovi me.

Mara aburuna muriai, taui au ġereġere i maimairi, Peter i riwana-melei, “Tam anina, taui tagogi; aubaina tam, Galilieei!”

⁷¹ Ma Peter i riwa, “God au matana, tau a ririwa kaua, ravana o ririweia a vivinuanainei!”

⁷² Maratagogi kokorerekko i tou mara viruaina ma Peter, Iesu riwana i notai - *Muriai da kokorerekko ina tou mara ruāga, tam mara tonuāga ma bovieu.* Ma Peter i vinuabola kaua ma i tou.

15

Iesu i taravaina-naiei Pilate au naona

(Matthew 27:1-2, 11-19; Luke 23:1-5; John 18:28-38)

¹ Ubaubanai boibogħi, pirisi babadai ma dogadogara ma tarawatu babadai anatapui i viboru* ma i vianina da Iesu i pani ma i veredamanei Pilate au urana.

² Pilate, Iesu i vitara-virevirei i pa, “Tam mai Jew ai gulau bo?” Iesu i paribelei i pa, “Anina e ririwa nanare.”

³ Pirisi Babadai e viviwavuim kaua maġamaġaui aubai.

⁴ Ma nanare Pilate, Iesu i vitaraviravirana-melei i pa, “Tam ma paribelana bo eġa? Ma nonori e viviwavuim kaua maġamaġaui aubai!”

⁵ Wate Iesu i genuana ma eġa ita paribelei. Ma Pilate i ba kaua.[†]

Iesu ana iraġe i vianinei

(Matthew 27:15-38; Luke 23:13-25; John 18:39-19:16)

⁶ Taui ai kaua maemaena da Raġona Torelana au marana, Pilate, panipani tagogi, rava ai ġoanei e ruperupeni ma e vovoterei da e nena.

⁷ Oroto tagogi wavana Barabas; tauna Rome gabemani i viġavie i ma i pani da panipani au numana i mamae. Ana rava maiteni tauviraġena.

[†] **14:61:** Isaiah i parivereta da Keriso ana au iraġe eġa ina gagaloana-melei. (Isa 53:7). [‡] **14:62:** Da 7:13 [‡] **14:68:** Wei riwana buka au wadubo nonoana eġa ita mamae. ^{*} **15:1:** Mrk 14:55 Sanhedrin [†] **15:5:** Mai Rome ai tarawatu e mamae da maranai i viwavuim ma tauetara eġa uta paribelei lamna tam anina wawu ma varai.

⁸ Ma patara i ġeta da Pilate ita vibaġai da panipani tagogi ita rupeni Raġona Torelana au marana.

⁹⁻¹⁰ Pilate i paribelei, “Taumi o ġoegħoei da mai Jew ai gulau ana rupeni aubaimi bo?” Pilate i aramanei da Pirisi Babadai, Iesu i unurei ma lamna aubaina Iesu i veredamanei tauna awarina.

¹¹ Wate Pirisi Babadai, patara i egari da Pilate, Barabas ita rupeni ma eġa Iesu.

¹² Pilate, patara i paridadana-melei i pa, “Tauna o ġoreġoreia mai Jew ai gulau mena ana kauanei?”

¹³ Taui i garara, “Ma tuparatui!”

¹⁴ Pilate i riwa, “Aiwai apoapoena i kauei?” Ma taui i garara guratana, “Ma tuparatui!”

¹⁵ Pilate i ġoei da patara ita vinuaubai ma Barabas i rupeni ma sorodia i egari da Iesu i kwapui da i vitaratarai ma i naei da ita tuparatui.

Sorodia, Iesu i vinamei

(Matthew 27:27-31; John 19:2-3)

¹⁶ Sorodia, Iesu i taravaina-ruiei Pilate ana au numa ma ai rava ġelaui i ġoreiai.

¹⁷ Ma gara lebalebarina[‡] [me gulau ana gara] Iesu i vioteni ma kunuteia ai donadonanei i viri da au kolana i terei.

¹⁸ Ma vinamana i raukarei ma i garara, “Equalau mai Jew ai gulau!”

¹⁹ Ma kolana gonuei i raviravi ma i ovaovai. Ma ae-tutuiei i mae-ġaira au doa ma i raudunelei ma i vivinamei.

²⁰ Ma i vijiboga vorovei ma gara lebalebarina i vogħiġi-tawanei ma ana gara i vioteni. Ma i taravaina-opunei da ita tuparatui.

Iesu i tuparatui

(Matthew 27:32-44; Luke 23:26-43; John 19:17-37)

²¹ Taui i nenea ma Simon i nelaġai, rava Sairinieſ (tauna Rufus ma Alexander amai). Simon wapuei i nenei. Ma sorodia, tauna i egari da Iesu ana korosi i avarai.

²² Taui, Iesu i naiei da gabu i ġoreġorei Golgotha, lamna anona unu gabuna.

²³ Sorodia, wine bunama myrrh maiteni i virai ma Iesu i veredadani, wate tauna i geduaiei.

²⁴ Ma Iesu i tuparatui ma ana gara, taui ava au orai i ġutai.*

²⁵ Ubaubanai 9 kilok nanare, Iesu i tuparatui.

²⁶ Aniviwavuna i girumi ma i tutui, “Mai Jew ai gulau.”

²⁷⁻²⁸ [†]Danedanenei ruāga, Iesu au ririvana i tuparatui; tagogi au oienā ma ġelauna au kelakelauna.[†]

²⁹ [‡]Taubabara, kolai i kwajikwajiei ma Iesu i vivinamei, “Na! Tam Tempol taurikaina ma au pom tonuġa ma voa-melei.

³⁰ Ma vilawana-melem ma korosiei ma ġairai!”

³¹ Ma nanare Pirisi Babadai ma Tarawatu Babadai maiteni, Iesu i vivinamei, “Rava ġelaui i vilawani, wate ainelana ita vilawana-melana-avei.

³² Keriso Tauvilawana, Israel ana gulau; marina korosiei ma ġairai ma tana inanai da tana vitumaġġanei!” Danedanenei i tupatuparatui maitenai, Iesu i vinamei.

Iesu ana iraġe

(Matthew 27:45-56; Luke 23:44-49; John 19:28-30)

³³ Ma au benai dobu anatapuna i waguvarei da 3 kilok au bigai.

³⁴ Lamna maranaina Iesu ponana i rata ma i kwatu, “*Eloi, Eloi, lama sabachthani?*” Lamna anona, “*Au God, au God aiwai aubaina u netawaneu?*”

[‡] **15:17:** Eng. *purple*. § **15:21:** Eng. *Cyrenian*. * **15:24:** Taui ġaima i tawanei me *dice* da aiai aiwai garana ita vaia.

[†] **15:27-28:** Isa 53:12 [†] **15:27-28:** Giruma ġelaui waduboi vs 28 e mamae *Ma aiwai i kaukaueia lamna peroveta i ririweia i tupua, Taui i 'nanai me taui ġo'apoapoe taukauei*. Isa 53:12 [‡] **15:29:** Mrk 14:58

³⁵ Ma rava ġelaui au ġereġere i maimairi i nonori ma i riwa, “Ona rautaniġanei, Elijah e kwatukwatuei!”

³⁶ Ma rava tagogi i ruba da gara ai au damona i pani ma au *wine* tomatomana i vigaloi ma i voepai Iesu au ipirina ma i riwa,[‡] “Ona vipaipai ma tana inanai mepa da Elijah ina nei da ina tereġairei.”

³⁷ Ma Iesu ponana i rata ma i kwatu ma i lavutu tawanana.

³⁸ Ma Tempol au orana anitereġaġara au pouna i wanasikai au tepana da i ġaira au doa.

³⁹ Ma *sorodia* ai bada, Iesu au naona i maimairi; i ’nanai da i lavutu tawanana ma i riwa, “Wei anina God Natuna.”

⁴⁰ Waivine ġelaui ueia i mae ma i raraubiga: Mary Magdalene ma Mary (James keikeina ma Joses[§] aloi) ma Salome.

⁴¹ Taui, Iesu i votaġotaġoi ma i vovoagui maranai au Galili i mamae ma waivine ġelaui maġamaġaui, tauna maiteni i ġeġae au Jerusalem, anatapui kampa.

Iesu i vikokoagei

(*Matthew 27:57-61; Luke 23:50-56; John 19:38-42*)

⁴²⁻⁴³ Ma au biga i tuturiae Joseph Arimatheaei* tauna rava ġaeġaena tagogi boru ġetelarana au orana. Tauna God ana vigulau ana nei i vipaipaiei. Ma vokaukaua marana (Lamna Sabat au naona)[†] ma Joseph ana tepatorana, Pilate awarina i rui ma Iesu taubeuna i vibagei.

⁴⁴ Pilate i baiei da Iesu boibogi i’raġe. Tauna, *sorodia* ai bada i kwatuei ma i vitaravirevirei da Iesu i’raġe bo eġa?

⁴⁵ Maranai *sorodia* ai bada i pariverei da anina riwa kaua. Ma Pilate, Joseph i riwei da Iesu tupuana i vaia.

⁴⁶ Joseph, gara maiana ġaeġaena i gimarai ma Iesu tupuana i tere-ġairei. Garei i umai ma au guba tupuana i vimataveni ma ġaima ġaeġaena i kaipeuri da kokoaga metaetana i vaitomeni.

⁴⁷ Mary Magdalene ma Mary - Joses alona i ’nanai mepa Iesu taubeuna i vimataveni.

16

Iesu i vomairi

¹ Ma Sabat au murina, Mary Magdalene ma Mary - James keikeina alona ma Salome, bunama ġabuġabui i gimarai da i naiei da Iesu tupuana ita buloi.*

² Ma Sunday ubaubanai boibogi maranai madeġa i gogogo, taui i nae au kokoaga.

³ Ma i nena ma i bababani, “Aiai aubaita ġaima kokoaga au metaetana ina kaipeurawanei?”

⁴ Maranai taui i taepai, i ’nanai da boibogi ġaima i kaipeura-tawanei - ġaima ġaeġae kaukauana.

⁵ Maranai i rui au guba ma oroto laragana ana gara ararapoirina i ’nanai au oienā.[†] Ma taui orai i aeupai.

⁶ OROTO laragana i riwa, “Eġa orami ina aeupai, taumi, Iesu Nasaretei o baibaiei bo? I tupatuparatuia; tauna i vomairi! Ona inana, tauna eġa weka! Taui weka taubeuna i vimataveni.

⁷[‡] Marina ona nae ma ana tauvotaġotaġo ona riwei, ma Peter eġa nuanuami ina vuru da

* **15:36:** Psa 69:21 peroveta i girumi da *Keriso* ita verei. § **15:40:** Au Mat 27:56, Matthew i girumi *Joseph* ma eġa Joses.

* **15:42-43:** Eng. *Arimathea*. † **15:42-43:** Mai Jew ai *Sabate*, madeġa e neneulai au Friday e vivikarei da madeġa e neneulai au Saturday e kwakwa. Mai Jew ai Tarawatu e ririwa da rava i’raġe lamna marana tagogina ina doboi. *Sabate* amadodo madeġa e neneulai ina vikarei lamna aubaina Joseph i volaġlaġina da Iesu taubeuna ita doboi. * **16:1:** Mai Jew ai kaua maemaena da taubeu monamonei ina buloi ma muriai ina doboi ma waivine i ġoei da wei kauai ita votaġotaġoi. † **16:5:** Tupua i vimataveni au oienā i kiakiala, ana gara ararapoirina. ♫ **16:7:** Mrk 14:28

Iesu e vivinao au Galili. Kampa ona inanai i ririwemi nanare.”

⁸ Taui i opu ma kokoagei i viruberubei ana ini sisisi ma ana rovoi. Taui i rovo kaua, lamna aubaina ega rava ita riwei.

Mark 16:9-20

Mark Riwana Aiaina damona lamna wariaga i vine-boai. Ma rava gelauna aiwai i notanotai nanare au vs 9 da 20 i girumi. Wei damonana weka i vikarei.

Iesu, Mary Magdalene awarina i ega

⁹ Iesu iraägelei i vomairi me au Sunday ubaubanai boibogi ma i ainae da Mary Magdalene awarina i ega. Maraotai Iesu, Mary awarina arua-apoapoei seven i viopuni.

¹⁰ Iesu, ana tauvotagotaogo i vivinuabola ma i toutou ma Mary i geta da i pariverei.

¹¹ Ma Mary i pariverei da Iesu i lawana me ma tauna matanei Iesu i 'nanai. Wate taui ega ita vitumañganei.

Iesu, tauvotagotaogo ruaga awari i ega

¹² Wei au murina Iesu inanana tapuna ma ana tauvotagotaogo ruaga awari i ega; maranai taui i nenaue au melagai.

¹³ Taui i naeme ma tauvotagotaogo gelaui i viegei. Wate taui nanare ega ita vitumañganei.

Iesu, Taui 11 awari i ega

¹⁴ Muriai taui 11 i amam ma Iesu awarii i ega. Ma i eni aubaina taui orai i bado ma ega ita vitumañgana maranai rava, i riwei da Tauna i vomairi me.

¹⁵ [✧]Iesu ana Apasol i riwei, “Ona nae dobu au anatapuna. Ma God Riwana Aiaina ona jimei rava anatapui awarii.

¹⁶ Aiai da i vitumañgana ma i babataito; tauna ina lawana. Ma aiai da ega ita vitumañgana ina kovoñgi.

¹⁷ Ma taui aiavoi da i vitumañgana, rewapania ina verei da kaua babai ina kauei. Ma arua-apoapoei ina viopuni ma pona tapunei ina babani.

¹⁸ Taui, mota uraiei ina vaia ma waiawa ina umai ma ega ina rauputei. Ma urai doridoriai au kolai ina terei ma ina lawana.”

God, Iesu i gaiei au Mara

¹⁹ [✧]BADA Iesu, awari i babani vorovei. Ma tauna i gaiei au mara ma God au oieni i kiala.

²⁰ Tauvotagotaogo i opu ma dobu au anatapuna i raraugugula. Ma BADA, taui i voagui ma kaua babai i kaukauei da tauvotagotaogo aiwai i bababaniei i vovai-virewapani.

Apasol ai kaua Pariverena

Luke ana buka i giruma vorovei ma muriai Apasol ai kaua bukana i girumi. Tauna ana ano ġaeġaena lamna i ġoei da rava ita vieġei da menanare Arua Vivivireina Iesu ana tauvotaġotago i rau-etalaveni da Riwana Aiaina ita vituai,

Au Jerusalem ma au Judea au anatapuna ma au Samaria ma dobu au gia dewadewana.

(1:8)

Kerisiana ai babara ma ai nola i babaniei. Mai Jew awarii i vikarei ma i nae da dobu anatapui i vitumaġana. Tauamgiruma ana nota ġaeġaena da wei bukana tauiavana ita pariverei da kerisiana avena Rome gabemanina ita viviġaviei. Kerisiana vitumaġanana lamna mai Jew ai vitumaġana e kaukauana-paiei. Wei bukana i ġutai da raġaraġana tonuġa, ma e viviatataieta da dobu au anatapuna Iesu Riwana Aiaina i jimei ma ekalesia i vitupui:

Iesu ana ġae au murina Ekalesia au Jerusalem ai nola i vikarei;

Palestine taun ġelaui awari i tua-nae;

Ma i tua-nae au Mediteranean da i nae au Rome paratana. Wei bukana ana kaua ġaeġaena lana Arua Vivivireina i nolanola, ma rewapani tauvitumaġana au Jerusalem i verei au Pentecost. Ma wei au bukana i vieġeta da Arua vivivireina mara nonoa agu ma rewapani ekalesia ma ai babada i verei ai au aninola au anatapuna. Wariaġa kerisiana ai pariverena i tere-tagogie i raugugula au maġamaġaui, ma kaua ma ai nola i kaukauei anatapui. Wei au bukana i girumi da wei parivai-nuaġanana ana rewapani tauvitumaġana ai au lawana ma kerisiana ai au voepaepa i viatataieta.

Buka rereġana 1.

Vokaukaua tauvimatamata aubai (1:1-26)

Iesu ana tarawatu ma ana parivainuaġana damona (1:1-11)

Judas Epaiana (1:12-26)

Tauvimatamata au Jerusalem (2:1-8:3)

Tauvimatamata au Judea ma Samaria (8:4-12:25)

Paul ana nola (13:1-28:31)

Paul ana vaġai tagogi (13:1-14:28)

Boru au Jerusalem (15:1-35)

Paul ana vaġai viruaina (15:36-18:23)

Paul ana vaġai vitonuina (18:24-21:16)

Paul i vipanipani au Jerusalem, Caesarea, ma Rome (21:17-28:31)

Iesu ana Apasol i parivainuaġani

¹ Egualau Theophilus, buka au naona a girugirumia* lamna Iesu ana tupua ma ana nola i vikarei da i kaukauei ma i viviararamana a pariverem

² i nae da ana ġae au marana. Muriai da Iesu i ġaiei au mara, Tauna Arua Vivivireinei ana apasol vinevinei riwa bagibaginei i pariverei.

³ Iesu ana iraġe au murina i vieġana-melei ana apasol awarii. Ma kaua maġamaġaui i kauet da apasol i vitumaġana kaua da Tauna anina i lawana me. Taui awarii i eġa au pom 40 au orana ma God ana vigulau i babaniei.

⁴ Maranai ana apasol maiteni i vitagogie i pa, “Eġa Jerusalem ona oputawanei, wate pulona amau i paripari-vainuaġanimi ona paini, maraotai a ririwemi nanare.

* **1:1:** Bukana au naona i girugirumi lamna Luke ana Gospel

5 [✧]John wairei i babataito, wate mara aburuna ava Amau, Arua Vivivireinei taumi ina babataitomi."

God Iesu i ġaiei au Mara

6 Muriai maranai Iesu ma Apasol i vitagogiei ma taui Iesu i vitara-virevirei i pa, "Bada! Marina, Israel ana[†] vigulau ma vere-melei bo?"

7 Ma Iesu i paribelei, "Amau ainelana ana rewapani mara ma iri e vivibadei, aubaina da taumi eġa ona aramanei.

8 [✧]Wate maranaina Arua Vivivireina au orami ina rui, maranaina taumi rewapani ona vaia. Ma aubaiu ona vitaunola au Jerusalem, Judea, au Samaria ma dobu au anatapuna."

9 [✧]I babani vorovei ma au matai God Iesu i ġaiei au mara. Ma apau i nei da i purui ma taui eġa ita inana-melei.

10 Ma taui i ġogouta au mara ma nelara ruāga ai gara ararapoiri au ririvai i raumairie.

11 Ma i riwa, "Mai Galili, aiwai weka o maimairie ma o ġogoutatei? Wei ravana menanarena o inanai i ġaenei, amapo nanare ina nememei."

Judas epaiana i vinei

12 Anina ma Apasol Ola Olive, i voterei ma i ġaira me au Jerusalem lamna eġa uama ma au ġereġere.

13 [✧]Ma au Jerusalem i ġeta ma i ġae numana i mamae lana au tepana au vatavatara. Taui ai wava, Peter, John, James ma Andrew, Philip ma Thomas, Batolomeo ma Matthew, James - Apius natuna, ma Simon tauna au naona Zealot[‡] ma Judas - James natuna.

14 Ma wei ravai mara patapatana i vivitagogiei ma i raraupari gogona, waivine ġelaui ma Iesu ana roaroa ma aloi Mary maiteni kampa.

15 Wei au marana, tauvitumaġana 120 i vitagogiei ma Peter i vomairi ma wenanare awari i babani,

16-17 "Varevareiu, Judas Iskariot lamna turata tagogi ma maiteni ta nola gogona, wate muriai i voagu da Iesu i pani. Arua Vivivireina wei riwana wariaġa gulau David i riwei da ina tupua; ma aiwai i ririwei anina nanare i tupua."

18 Judas Iesu i amverenei mane vainana aubaina, ma wei manenei doa i gimarai. Ma nai au doana tauna kolanei i peu ma manawana i wanawamai da amoamona i opu.

19 Ma rava anatapui au Jerusalem wei iraġena riwana i nonori, lamna aubaina taui nai dobuna ai ponei i viwavai Hakeldama, wei anona Tara Doana.

20 "Wariaġa Gulau David i girugirumia, nanare i tupua,

*Ana animae ina kwakwawa,
ma eġa aiai au orana ina mae.*

(*Psalm 69:25*)

Ma

rava ġelauna ana nola ina vaia.

(*Psalm 109:8*)

21 [✧]Lamna aubaina marina awarita, rava ġelauna tana vinei da ina raviepaiai. Tauna ravanana Iesu maiteni ta bababara-nae madeġa tonuġa au orana,

22 John rava i babataitoi au marana ma i nae da Iesu i ġaiei au mara. Ma maiteni tana nola ma rava tana riwei menanarena God Iesu iraġelei i vovaimairini."

23 Ma taui rava ruāga i vinei, Joseph-Barsabas (ana wava ġelauna Justus) ma Matthias.

24-25 Anina ma taui i raupari, "BADA tam rava anatapui orai u aramanei. Ma vieġelai da wei ravai ruāga, ma metauna u vinei da Judas ana gabu ina vaia da ina viApasol, aubaina Judas i voterelai da i nae ana au gabu."

* 1:5: Mrk 1:8 † 1:6: Rome gabemanina Juda i vibadei wei au marana, Mai Jew wei eġa ita ġoei, ma i ġoei da ita virai.

* 1:8: Mrk 16:15 * 1:9: Mrk 16:19 * 1:13: Mrk 3:16-19 ‡ 1:13: Rava ununurana. Wei ravai mai Rome ai gabemani e viviġavie. * 1:21: Mrk 1:9; Mrk 16:19

²⁶ Anina ma taui i vine, ma vinevine Matthias awarina i peu, ma tauna i vi-Apasol, ma Apasol 11 au orai i rui. §

2

Arua Vivivireina i ġairai

¹ Pentecost torelana i ġetai ma tauvitumaġana anatapui numa tagogi au orana i vitagogiei.*

² Maratagogi gugura ġaeġaena, nonorana me ive vivirewapanana marei i ġairai ma tauvitumaġana i mamae numana i vioai.

³ Taui purapura inanana me ai menamenana i 'nanai, i ġairai ma rava tagotagogi ava au kolai i kiala.

⁴ Ma Arua Vivivireina anatapui i vioai ma pona taputapunei ava i bababani Arua ana aguei.

⁵ Nai maranaina mai Jew patupatutui dobu au anatapuna i vitaomana au Jerusalem da Pentecost torelana ita apui.

⁶ Ma patarai kampa i viruberubei, ma i nonori da gugurana lamna tauvitumaġana taui tagotagigjava ai ponei i bababani ma taui ai nota i kwa.

⁷ Taui anatapui i baei ma taui ava i babani vivira i pa, "Wei mai Galili bo?

⁸ Ma menanarena da anataputa awarita ata ponei e bababani!

⁹⁻¹⁰ Tauta ġelauta mai Parthia, Mede ma Elam, ma mai Mesopotamia, Judea, Capadosia, Pontus ma Eisia, Pirijja, Pamphilia, Egypt ma Libya navanavana, au Sairini au ġereġerena, ma ġelauta mai Rome,

¹¹ ġelaui mai Jew ma ġelaui Jentail wate inibori i vaia da i vimai Jew. Ma ġelauta mai Crete ma mai Arabia. Wate God kaua ġaeġaena i kaukaueia, ata ponei i bababaniei ma ta nononori!"

¹² Taui anatapui i vinuanaina, nuanuai i raġaraġa ma i bababani vivira, "Wei aiwai kauana e tuputupua?"

¹³ Wate ġelaui taui i vinamei i pa, "Wei ravai i uma bua!"

Peter rava awarii i raugugula

¹⁴ Anina ma Peter i vomairi Apasol 11 maiteni, ma ponana ġaeġaenei patara awarii i babani,

Au rava mai Jew ma anatapumi au Jerusalem maemaemi, babani ana tere-kauei da ona aramanei. Ona rautaniġana kaua.

¹⁵ Wei marinaota, 9 kilok ubaubanai! † Wei ravai eġa ita uma bua me taumi o notanotai nanare,

¹⁶ Wei lamna wariaġa peroveta Joel i ririweia e tuputupua:

¹⁷ *Mara au damona,*

Aruau rava anatapui awari ana iwagi.

Ma natunatum i nelarai ma waivinei riwau ina jimej,

ma nelara voui mataiei kaua ina inanai,

ma babada magumaguri raubonie i kaua ina inanai.

¹⁸ Wate nanare, Aruau ana iwagi au taunola nelarai ma waivinei awarii,

ma ina vitababani.

¹⁹ *Ma kaua babai au mara ana kauei,*

ma au dobu mataira ana vieġgai

§ **1:26:** Wei kalona wenanare: mai Jew wawa ġaima muomuo i awari i girugirumi ma e tawatawanei, ma aiai ana namba i eġa lamna tauna ina vaia. Taui i vitumaġana da wei kauana awarinei God taui ina viatataiei da aiai ita vinei. (Pro 16:33)

* **2:1:** Mai Jew ai Raġona torelana au murina au pom 50 ma Pentecost torelana e vivikarei. Wei riwana anona amapo wei bukana au damona ona iavi ma ona aramanei. † **2:15:** Mai Jew taui au bigai sia e aniani ma wain e umaumai.

ai araratana, tara ma bau potopotona.

20 *Ma madega ina waguvarei
ma nawaravi ina ravitaratarai,
muriai da BADA ana mara gaeaea ma boruborumana ina nei.*

21 *Nai au marana aiavoi da BADA awarina e vivigore agu aubaina BADA taui ina vilawani.
(Joel 2:28-32)*

22 *Ma Peter i babani me:*
Mai Israel ona rautaniāna: God Iesu Nasaretei i vovai-virewapani da kaua babai, ma mataira ġaeġaei i kauei da ita viatataiemi da tauna anina Godei i nei.

23 [◊]Wate God wariaġa i viogei ma ana ġoana nanare da Iesu au urami i terei, ma taumi ġo'apoapoe ravai ai aguei, Tauna au korosi o tuparatui da o viraġeni.

24 [◊]Wate God, Iesu iraġelei i vovaimairini, ma iraġe iniviarana i vaitawanei ma iraġe eġa tagotagogina da tauna ita vojjini.

25 Wariaga David Iesu i bababaniei maranai i riwa:
Tau a inanai BADA God au naou mara au anatapuna.

Tauna au oieu lamna aubaina eġa ana rovo.

26 *Lamna aubaina nuaiai orau i oai ma menau i morelana,
ana iraġe ma a aramanei da tupuau ma paina-kauei.*

27 *Ma aruau eġa rava irairaġei ai au dobu ma voterei,
ma tam eġa am taunola vivivireina tupuana ma voterei da ina buda.*

28 *Tam lawana etanaina u viatataieu,
ma Tam maiteni a mamae ma a vinuaiai kaua.* **(Psalm 16:8-11)**

29 Au rava, A riwana-kauemi da amata gulau David i'raġe da i doboi, ma ana kokoaga weka e mamae.

30 [◊]Wate David lamna peroveta, ma i aramanei da God i parivainuaġani da ana damei gulau ina opu, me tauna nanare.

31 Ma David i 'nanai God muriai aiwai ina kauei ma i riwa,
Keriso ina vomairi me,
ma tupuana eġa rava irairaġei ai au dobu ina voterei da ina buda. **(Psalm 16:10)**

32 Ma God Iesu-na tagogina iraġelei i vovaimairini, ma tauai anatapuiai a vimatamata.

33 Ma God i ġaiei ma au oienā i vikialai. Ma Arua vivivireina i verei me i parivainuaġana nanare, ma nai Aruana tagogina Iesu awariai i waġi, lamna marina o nononori ma o inainanai.

34 [◊] David eġa ita ġae au mara, ma wate i riwa, BADA *au Bada i riwei*, "Au oieu ma kiala

35 *ma am ġavia au ae karem ana terei.* **(Psalm 110:1)**

36 Lamna aubaina mai Israel anatapumi ona aramana-kauei da wei ravana Iesu o tupatuparatuia, God i terei da BADA ma Tauvilawana.

37 Ma maranai rava wei riwana i nononori, taui orai i rautonai da Peter ma Apasol ġelaui i riwei, "Varevareiai, tauai aiwai ana kauei da ana lawana?"

38 Ma Peter i paribelei, "Taumi tagotagogi ava Iesu Keriso wavanei ona rupena ma ona babataito ma ami ġo'apoapoei ina nota-tawanei, ma God ana pulo Arua Vivivireina ona vaia.

39 Wei parivai-nuaġanana lamna taumi natunatumi maiteni aubaimi. Ma wate nanare mai jentail - aiavoi da e kwatukwatuei ina nei Tauna awarina."

40 Ma Peter riwa ġelaui maiteni rava i vinua-terenei, ma i egari, "God ona vianinei da ina vilawanimi, ma eġa kovoġa ona vaia."

41 Ma rava maġamaġau Peter ana babani i vitumaġanei ma i babataito ma nai au marana rava 3,000 ai au boru i rui.

Tauvitumaġana i mae gogona

42 Ma tauvitumaḡana Apasol ai viararamana i nononori, ma i viboruboru, i amam ma i raraupari gogona.

43 Apasol kaua babai ma mataira ġaeġae maġamaḡau i kaukauei ma anatapui i rovo ma God i vivirana-käuei.

44 [◇]Ma tauvitumaḡana anatapui gabu tagogi i vivitagogiei ma aiwai ġariei ai rava maiteni i ġutaġutai.

45 Taui ai doa, ai numa, ai wapu ma ai purapura i gimagimarei ma manena ai rava ġelau i maiteni i ġutaġutai.

46 Taui Mara patapatai au tempol i vivitagogiei, ma ai au numa ana nuaiai ma ana morelanai i amam gogona.

47 Ma taui God i vovoepaepai ma rava anatapui i vivinuaiaini. Ma marana patapatai rava voui i neneiai Iesu awarina ma tauvitumaḡana ai boru i viviratai.

3

Peter, oroto aena gwaġagwaġana i vilawani

1 Mara tagogi au bigai 3 oklok, Peter ma John pari aubaina i ġeġae au Tempol.

2 Ma oroto tagogi aena gwaġagwaġana i tupuei, ma Mara au anatapuna ana rava i avavara neiai da Tempol metaetana, e ġoreġorei, metaeta aiaina, kampa i vivikalai ma rava i ruirui tempol au orana i vivigimanei mane aubaina.

3 Maranai i 'nanai da Peter ma John aburuna ava da au metaeta ita rui, ma i vibaġai mane aubaina.

4 Peter ma John orotona i 'nana-tunutunui ma Peter i riwa, "Ma inanaiai!"

5 Ma orotona taui i 'nanai ma i notañotai da aiwai awarii ita vaia.

6 Ma Peter, orotona i riwei, "Awariu silva ma gold eġa wate aiwai awariu lamna ana verem. Iesu Keriso Nasaretei, wavanei ma vomairi, ma babara!"

7 Ma Peter oroto nimana au oieina i vojjini ma i voagui da i vomairi. Ma maratagogi oroto aena ma ae kwarukwaruna i ai ma i virewapana,

8 ma aenei i viauepa ma babara i vikarei. Anina ma taui maitenii rui au tempol ma tauna tempol oraninei i bababara, i viviaepla ma God i vovoepaepai.

9 Ma rava anatapui orotona i 'nanai i bababara ma God i vovoepaepai,

10 ma i aramanei da tauna ravana tagogina tempol metaetana e ġoreġorei *inanana aiaina* au naona, i kiakala ma i vivigimana. Ma rava anatapui i 'nanai aiwai i tupua wei orotona awarina ma i ba-guratana.

Peter patara awarii i babani

11 Ma orotona Peter ma John i vovojjini ma rava anatapui i bana-kauei, ma i viruberubei taui awari au lovelove e ġoreġorei, Solomon ana lovelove. *

12 Ma maranai Peter patarai i 'nanai ma i riwei:

Au rava mai Israel, aiwai aubaina o vivinuanaina? Ma aiwai aubaina o inainana-tunutunui, apamina tauai ai rewapani bo ai vipatutuei, wei ravana a kauei da i babara?

13 [◇]Wei lamna amamata Abraham, Isaac ma Jacob ai God, ana taunola Iesu i viborumei, ma taumi Tauna o verenei da ita viraġeni, ma Pilate au matana o geduaiei. Pilate i ġoei da ita rupeni wate taumi eġa ota vianinei.

14 [◇]Iesu lamna rava vivivireina ma jijimanina, wate o geduaiei. Ma Pilate i ġoei da Iesu ita rupeni, wate taumi o ġoei da tauviraġena i rupeni aubaimi.

15 Ma taumi lawana maemae-nonoana tauvereina o viraġeni, wate God i vilawana-melei, tauai wei a vimatematei.

* **2:44:** Act 4:32-35 * **3:11:** Solomon ana lovelove tagogi tempol au orana e mamae. Wei lamna gari au ririvana ma ana tuatua maġamaġauna. * **3:13:** Exo 3:15 * **3:14:** Mrk 15:6-14

¹⁶ Wei ravana aena gwaḡagwaḡana Iesu au wavana i vitumaḡana ma lamna aubaina i lawana. Taumi o aramanei ana doria menanare, Wate ana tumaḡana Iesu awarina i vilawani.

¹⁷ Ma au rava marina a aramanei da taumi ami babada maiteni Iesu o virāgeni, aubaina taumi ega ota aramanei da tauna tauvilawana.

¹⁸ Wate wei lamna wariaḡa God ana peroveta anatapui i ririweia i tupua, God i riwa da ana tauvilawana ina vinuapoapoe.

¹⁹ Ami goa apoapoe Ona voterei ma ona mae-taviremi God awarina da tauna ami go'apoapoe ina nota-tawanei.

²⁰ Ma lamna maranaina God aruami nualawalawana ina verei, God Iesu i vinei da ami Tauvilawana ma ina paritawaneiai.

²¹ Iesu au Mara ina mae da God kaua anatapui ina ravivouni, me God ana peroveta vivivirei wariaḡa i ririweia nanare.

²² [◇]Moses i riwa, “BADA ami God peroveta, me tau nanare, ina terei ma tauna ami dam oinei ina nei. Ma aiwai anatapuna e ririwemi ona rautaniḡanana-kauei. †

²³ [◇]Ma aiai da wei perovetana ega ina rautaniḡanei lamna God ana rava awariei ina vilamonei.”

²⁴ Peroveta Samuel ma muriai Peroveta maḡamaḡaui, kaua i ririweia marina e tuputupua.

²⁵ [◇]Taumi nai perovetai natunatui ma taumi maiteni parivainuaḡana bagibagina au orana. Au baina God Abraham i riwei, “Am epaepaia awariei dam anatapui au dobu ana viaiaini.”

²⁶ Ma maranai God ana taunola i vinei, ma au naona i paritawaneiai awarimi da ita viaiainimi, ma lamnei taumi tagotagogi ava ami go'apoapoe ota opu-tawanei ma ota nei Tauna awarina.

4

Jew babadai Peter ma John i etarei

¹ Peter ma John rava awari i bababani ma pirisi pulo tauapuina ma tempol taupainii* ai bada ma Sadusi ġelaui † i ġetai.

² Taui amlo i ġaigai kaua Peter ma John awari aubaina taui i viviararamana da God, Iesu iraġelei i vovaimairini ma wei i viatataiana da God rava anatapui iraġelei ina vovaimairini.

³ Taui Peter ma John i pani ma au i pom aubaina panipani au numana i terei da i mae mara.

⁴ Wate rava maḡamaḡaui riwa i nonori ma i vitumaḡana, ma ai maḡa nelara 5,000 waivine ega ita iavi.

⁵ Ma mara i tom ma Jew babadai, dogadogara ma tarawatu babadai au Jerusalem i vitagogie.

⁶ Ma pirisi ġegetelarana Annas kampa ma Caiaphas, John, Alexander ma pirisi ġegetelarana ana rava maiteni. ‡

⁷ Ma taui Peter ma John i neiei da au naoi i vimairini ma i riwei, “Aiwai rewapananei, ma aiai wavanei wei o kuae?”

⁸ Arua Vivivireina Peter orana i vioai ma taui i riwei, “Rava ai babada ma dogadogara;

⁹ tauai kaua aiaina a kuae gwaḡagwaḡana awarina ma amadodo taumi o vitaravirevirelai, da menanare tauna i lawananei.

* 3:22: Deu 18:15, 18 † 3:22: Mai Jew e ririwa da Moses lamna ai peroveta ġaeġaena. ◇ 3:23: Deu 18:19 ◇ 3:25: Gen 22:18 * 4:1: Tempol tau-painina lamna anatapuna au tempol e inainana-vaitetei (purusimani). Taui pirisi ġegetelarana ana taunola. † 4:1: Sadusi taui iraġelei vomairime ega ita vitumaḡanei ‡ 4:6: Mai Rome Caiaphas i vinei da Pirisi ġegetelarana, poiana Annas epaiana. Wate mai Jew ai au giu da aiai pirisi ġegetelarana vaivaina i vaia, tauna anina ina mae da au iraġe. Luke e ririwa da Annas tauna pirisi ġegetelarana.

¹⁰ Ma wei ona aramana-kauei, da taumi ma mai Israel anatapui, da Iesu Keriso Nasaretei o tuparatui, Wate God tauna irāgelei i vovaimairini ma tauna wavanei wei orotona au naomi lawalawaina e maimairi.

¹¹ Taumi tauvoa nai ġaimana o geduaiei, wate wei gaimana lamna numa ogona, numa ana tapuna e vovoijini. §

¹² —Lamna aubaina Iesu ainelana ina vilawanita. Ma God eġa aiai ġelauna au dobu rewapana ita verei da ina vilawana.”

¹³ Ma taui Peter ma John ai tepatora inanai ma maranai i aramanei da taui eġa girugirumai, ma i baei. Ma i aramanei da taui Iesu ana tauvotaġoġo.

¹⁴ Ma wate i 'nanai oroto i vivilawania Peter ma John maiteni i maimairi, lamna maranai taui gamoi i pota.

¹⁵ Anina ma Peter ma John i riwei da boru gabuna i opu-tawanei, ma taui ava i vitarairavira vivira.

¹⁶ Taui i vitaraviravira-viravira i pa, “Aiwai tana kuae wei nelarai awari? Rava anatapui au Jerusalem i aramanei da taui kaua babai i kaukuae, lamna eġa tana boviei.

¹⁷ Wate tana viġaei da wei kauai eġa ina tua rava ġelaui awari, ma riwa bagibaginei tana viġaei da eġa aiai awarina Iesu wavanei ina raugugula.”

¹⁸ Anina ma taui i ġorei da i rui me, ma riwa bagibaginei i viġaei da eġa aiai awarina Iesu wavanei ina raugugula bo ina viararamana.

¹⁹ Wate Peter ma John taui i paribelei, “Taumi ami nota aiwai. Tauai God ana voteletelei bo taumi?

²⁰ Tauai aiwai a inainanaia ma a nononoria babanina eġa ana voterei.”

²¹⁻²² Wei Orotuna i vivilawani lamna gwaġagwaġana ma ana madeġa 40. Lamna aubaina rava anatapui God i vovoepaepai, ma babada eġa ita aramanei menanare Peter ma John ina kovoġanei. Ma i parivairovorovo-melei ma i paritawanei da i nae.

Tauvitumaġana God i vibaġai agu aubaina.

²³ Peter ma John i nae me ai rava awari ma pirisi ġaeġaei ma dogadogara aiwai i ririweia taui i vieġei.

²⁴ [✳]Maranai tauvitumaġana wei riwana i nonori, taui anatapui i raupari gogona God awarina:

BADA tam ai gulau, Tam mara, dobu, boga ma anatapuna au orana maemaei taukaueina.

²⁵ Tam Arua Vivivireinei am taunola, amaiai David gamonei u babani ma u riwa,

Ai wai aubaina rava awariai e mejimeji,

ma aiwai aubaina ai oga e taratara labalabai?

²⁶ *Ma dobu ai gulagulau i vokaukaua ma babada ġaeġaei ġelaui maiteni i vitagogiei da BADA ma ana tauvilawana* maiteni i viġavie. (Psalm 2:1)*

²⁷ [✳]Anina riwa kaua. Wei kauai weka au Jerusalem i tupua, Herod ma Pontius Pilate, Jentail ma mai Israel maiteni i vitagogiei, da am taunola vivivireina Iesu u bulobuloia i viġavie.

²⁸ Ma tam am rewapanei ma am ġoanei am oga menanare u tarataranei marina nanare i tupua.

²⁹ BADA, nai ravai ai parivai-rovorovo au uram ma am taunola ma vovai-virewapani da ana teptorai riwam ina raugugulei.

³⁰ Uram ma viloloi da ma vilawana ma kaua babai ma mataira ġaeġaei ma kuae, am taunola Vivivireina Iesu wavanei.

§ **4:11:** Mai Jew ai numa ġaimei i voavoai. Iesu tauna anina God ana Tempol vouna oġona. (Eph 2:19-21, Isa 28:16).

* **4:24:** Exo 20:11 * **4:26:** Wei lamna Keriso. [✳] **4:27:** Mrk 15:1

³¹ Ma pari au murina, taui mepa i vivitagogiei gabuna i vigu. Ma Arua Vivivireina anatapui orai i vioai. Ma ana tepatorai God riwana i raugugulei.

Tauvitumağana ġariei i ġutaġutai

³² ♦Tauvitumağana anatapui ai nota ma orai tagogi. Ma ai purapura tagogi ma eġa aiwai ita nuanei.

³³ Ma Apasol ana tepatorai ma rewapanai BADA Iesu ana iraġe, ma ana vomairi me i raugugulei. Ma God ana viaiaina ġaeġaena taui anatapui awari i peu.

³⁴⁻³⁵ Ma taui au orai eġa aiai aiwai ita voladaġei aubaina, ai rava ġelaui ai doa bo ai numa i gimaginei ma manena i neneiā Apasol awari i tereterei, ma aiai da aiwai i vovoladaġei nanare i vovoagui.

³⁶ Me Joseph, tauna Levi ana damei, au Saipras i tupua, ma Apasol tauna i ġoreġorei Barnabas, wei wavana anona lamna tauduġu.

³⁷ Tauna ana doa i gimarei, ma manena i neiai da Apasol awari i terei.

5

Ananias ma Saphaira

¹ Anina ma Ananias awana Saphaira maiteni ai doa navanavana i gimarei.

² Ma airuāga i vianina tagogi da mane navanavana i nuanei, ma Ananias mane navanavana i naiei da Apasol awari i terei.

³ Anina ma Peter tauna i vitaravireirei, “Ananias aiwai aubaina Satan u vianinei da au oram i rui ma Arua Vivivireina u morui, ma doa u gimaginei manena navanavana u nuanei?

⁴ Doa lamna tam ġarimei da uta gimarei bo eġa. Ma maranai u gimarei lamna manena tam ġarimei da uta verenei, aiwai aubaina nota apoapoena au oram i rui? Tam eġa rava awarina uta moru, wate God awarina u moru.”

⁵⁻⁶ Maranaina Ananias wei riwana i nononori, tauna i peu da i'raġe. Anina ma nelara i rui da tupuana i umai ma i naiei da i doboi. Ma aiavoi da wei riwana i nonori i rovo kaua.

⁷ Taui eġa ita mae guratana, ora tonuġa nanare ma awana i nei, aiwai i tupua eġa ita aramanei.

⁸ Ma Peter wavine i paridadanei, “Abe uta riweu, tam awam Ananias maiteni doa o gimaginei maiana anina wei bo?” Ma tauna i paribelei, “Ee, doa maiana anina nai.”

⁹ Ma Peter i riwa, “Aiwai aubaina taumi o vianina da BADA Aruana ota raudadani? Nelarai awam i dobodoboi ma inanai au metaeta da tam maiteni ina avara-opunem.”

¹⁰ Maratagogi wavine Peter au ae karena i peu da i'raġe. Maranai nelara i rui au numa ma i 'nanai da wavine i'raġe, anina ma i avara-opunei da awana au ririvana i doboi.

¹¹ Lamna maranaina ekalesia anatapui, ma rava aiavoi da wei riwana i nonori i rovo kaua.

Apasol rava maġamaġaui i vilawani

¹² Ma Apasol mataira ma aniba kauai maġamaġaui i kaukauei rava awari. Ma tauvitumağana Solomon ana au lovelove i vivitagogiei.

¹³ Wate rava ġelaui ai au boru ruina i rovoei, wate rava taui i vivirana-kauei.

¹⁴ Wate nelara ma waivine maġamaġaui Iesu awarina i vitumağana ma tauvitumağana ai au boru i ruirui.

¹⁵ Ma lamna aubaina rava ai rava doridoriai i avavara-opunei au eta ma ai au animatave i vimataveni, da Peter inii ita vodadani bo eġa da ġouna taui ita ġouni da ita lawana.

¹⁶ Ma melagai ġelaui Jerusalem au ririvana ravai maġamaġaui ai rava doridoriai, ġelaui arua-apoapoei i ruiruinia i neiai ma anatapui i vilawani.

¹⁷ Anina ma pirisi ġegetelarana ma ana rava mai Sadusi anatapui orai unura i oai.

¹⁸ Ma Apasol i pani, ma panipani au numana i terei.

¹⁹ Wate waguvvarai BADA ana anela i nei da panipani numana metaetana i votawanei, ma taui i taravaina-opunei ma i riwei,

²⁰ “Ona rui tempol au orana, ona mairi ma lawana vouna riwana anatapuna rava ona pariverei.”

²¹ Anela i ririwei nanare, taui au tempol i rui ma rava viararamanai i vikarei. Nai maranai pirisi ġeġetelarana ana rava maiteni i ġetai ma boru ġaeġaena e ġoreġorei Sanhedrin i terei. Ma rava i paritawanei au panipani numana da Apasol ita neiai awari.

²² Taui panipani au numana i ġeta ma i baina-avei, ma i naeme da i vieġa.

²³ I pa, “Panipani numana anina i gudu-kauei, ma tauvipaipai au metaeta i maimairi; wate maranai tauai metaeta a votawanei lamna eġa aiai kampa.”

²⁴ Maranai tempol taupainina ai bada ma pirisi babadai wei riwana i nonori, taui i vinuanaina da aiwai i tupua.

²⁵ Ma rava tagogi i nei ma i riwa, “Ona rautaniġana! Nelara panipani au numana o teretereia, taui au tempol e maimairi ma rava e viviararamani.”

²⁶ Anina ma tempol taupainina ai bada, ma babada ġelaui maiteni i nae ma Apasol i neiai. Taui i rovo ma eġa ita egari mepa da rava ġaimej ita ravi.

²⁷ Ma Apasol i neiai boru ġeġetelarana au naoi, ma pirisi ġeġetelarana taui i vitara-virevirei.

²⁸ I pa, “A riwana-guratemi da wei ravana au wavana avena ota viararamana, wate ami viararamana i tua da Jerusalem i oai. Ma wei ravana tarana wavuna tauai o vereverelai.”

²⁹ Ma Peter Apasol ġelaui aubai i vitauvbabani i pa, “Tauai God ana voteletelei ma eġa rava.

³⁰ Taumi Iesu au korosi o tuparatui ma o viraġeni, wate amamata ai God Tauna i vovaimairini.

³¹ Ma marina Tauna God au oiena e kiakiala, Tauna BADA ma Tauvilawana, Da mai Israel ai ġo'apoapoe ina rupeni, ma ai ġo'apoapoe ina nota-tawanei.

³² Matauai Arua Vivivireina maiteni wei kauai anatapui mataielai a inanai. Ma nanare God Arua Vivivireina i paritawanei rava votelatelai awari.”

³³ Taui wei babanina i nonori ma amloi i ġaiġai kaua, ma i ġoei da Apasol ita viraġeni.

³⁴ Wate Pharisi ma tarawatu badana wavana Gamaliel, rava anatapui wei ravana e vivivirei. Tauna Sanhedrin boruna au orana i mairi, ma rava i riwei da Apasol i opunei au doa mara aburuna ava.

³⁵ Anina ma ana rava i riwei, “Mai Israel, ona inana kaua ma muriae da aiwai wei ravai awari ona kauei.

³⁶ Mara tagogi oroto wavana Theudas viġavia i vikarei ma i kauana-melei da tauna rava ġaeġaena, ma rava ai maġa 400 nanare tauna i votaġotaġoi. Ma maranaina tauna i viraġeni ana tauvotaġotaġo i vilamonei ma aiwai anatapuna kampa i kwa.

³⁷ Wate tauna au murina oroto Galiliei wavana Judas i ġeta, census au marana ma rava maġamaġaui tauna i votaġotaġoi, ma tauna maiteni i viraġeni, ma ana tauvotaġotaġo i vilamonei.

³⁸ Lamna aubaina a ririwemi da wei ravai ona voteretawanei! Mepa da taui ai nola ravei, amapo ina peu.

³⁹ Wate mepa da Godei, taumi eġa tagotagogina da wei ravai ona viġaei, taumi mepa da God o viġaviegi.”

⁴⁰ Taui Gamaliel ana babani i voteletelei. Ma Apasol i riwei da i rui, ma i wipiei i kwapui ma i viġaei da Iesu wavanei ina jima, ma i paritawanei da i nae.

⁴¹ Aubaina i aramanei da God taui i vinei da Iesu wavana aubaina ina vinuapoapoe. Anina ma Apasol ana nuaiaii Sanhedrin i opu-tawanei,

⁴² Taui mara patapatana tempol au orana ma au numa God riwana aiaina i raraugugulei ma i viviararamana da Iesu tauna Keriso.

6

Stephen i vinei tauvoaḡu

¹ Tauvitumaḡana ai boru i rarata, ma au orai mai Jew Greek taubabanieina, mai Jew kampa maemaei i viamparipariei. Taui i beubeura da ai kaikaiababa ai ġuta eġa ita tereterei.

² Anina ma Apasol 12 tauvitumaḡana ai boru i raukwatuei. Ma i riwei, "Tauai Apasol ma ai nola lamna God riwana ata jimejimei ma avena mane nolana maiteni ata kaukauei.

³ Lamna aubaina au rava, awarimi rava 7 ona vinei, taui orai Arua Vivivireina i oai ma nuaulaulai da wei nolana ina kuaeи,

⁴ Ma tauai ai nola da pari ma God riwana ava ana jimeи."

⁵ Rava anatapui wei ogatarana i vianinei, ma Stephen i vinei, Arua Vivivireina orana i oai, ma ana tumaḡana God awarina i rata kaua. Ma nanare Philip, Prokoras, Nikano, Timon, Pamenas ma Nicolas tauna Jentail, Antiokei ma ini bori i vaia ma i vikeresiana.

⁶ Ma wei ravai i neiai ma Apasol nimai taui au tepai i terei ma i raupariei.

⁷ Anina ma God riwana i vituai ma au Jerusalem rava maġamaġau Iesu i vitumaġanei, ma nanare pirisi maġamaġau i vitumaġana.

Stephen i pani

⁸ Anina ma God Stephen i viaiaini ma i vovai-virewapani da mataira ma kaua babai i kaukauei rava awari.

⁹ Wate mai Jew ġelaui provins nununai i nei mai au Sairini, mai Alexandria, ma Silisia ma Eisia ai parinumana e ġoreġorei panipani *waduboi, Stephen ana ġavia i vomairi.

¹⁰ Wate Arua Vivivireina, Stephen nuaulaula ma riwa i verei ma i bababani da taui i vigamopotai.

¹¹ Lamna aubaina taui rava ġelaui i gwalai da moruei Stephen ita vibenabenamei, ma ita riwa, "Tauai a nonori Stephen, Moses ma God i vivijibogħi."

¹² Ma lamnei patara i viamlo-ġaīgħaini, dogadogara ma tarawatu babadai maiteni. Anina ma taui Stephen i vojjini ma i naiei mai Jew ai Boru Ĝeġetelarana[†] awarina.

¹³ Ma taui rava ġelaui i neiai da moruei Stephen i vibenabenamei, ma i riwa, "Wei ravana mara patapatana Tempol vivivireina ma Moses ana tarawatu i vivijibogħi.

¹⁴ Tauai a nonori i riwa da Iesu Nasaretei tempol ina rikai ma tarawatu Moses i verevereta anatapui maiteni ina virai."

¹⁵ Ma rava anatapui nai au boruna i kiakiala, Stephen i 'nana-tunutunui, ma i 'nanai da tauna naona i lalalai me anela.

7

Stephen ana babani.

¹ Anina ma Pirisi ġeġetelarana Stephen i paridadanei, "Wei viwavuna, riwa kaua bo?"

² [✳]Stephen i paribelei:

Varevareiu ma amamau, au babani ona rautaniġanei. God boruborumana noita Abraham awarina i eġa au Mesopotamia, muriai da ita nae au Haran.

³ Ma God tauna i riwei, *Am dobu ma am dam ma netawanei da ma nae dobu ana viatataiem lana.*

⁴ [✳]Anina ma Abraham Mesopotamia i netawanei ma i nae da au Haran i mae. Amana i'rāġe ma au murina God Abraham i paritawanei da marina dobuna o mamae lana kampa ita mae,

* **6:9:** Wei ravai lamna slave waduboi, marina i voterei da ana ġoanei e mamae. † **6:12:** Sanhedrin. ✳ **7:2:** Gen 12:1

✳ **7:4:** Gen 12:4

5 ✧ Nai maranaina God ega Abraham doa ita verei, ega aburu dadadana! Wate i parivainuaġani, da ina verei tauna ma ana epaepaia aubaii. Nai au marana Abraham ega natunatuna,

6 ✧ ma God wenanare Abraham i riwei, *Am epaepaia au dobu ġela ina mae ma ina vitaunola, nai dobuna ravai taui ina rau-iviapoapoelei da madeġa 400 ina kwa.*

7 ✧ *Wate ravai, awarii e vivitaunola ana kovogħi, ma muriai mai Israel ina opui ma wei au dobuna ina voepaepaiu.*

8 ✧ Anina ma God inibori parivai-nuaġanana bagibagina Abraham maiteni i kauei, ma maranai Isaac i tupua ma au pom vi-8-na Abraham natuna inina i bori. Muriai Isaac natuna Jacob inina i bori, ma nanare Jacob natunatuna 12 anatapui inii i bori. Wei babadai lamna tauta noinoita.

9 ✧ Jacob natunatuna varei Joseph i unurei ma i gimarei da ita vitaunola au Egypt, wate God tauna awarina i mae.

10 ✧ Ma ana au nuabola i gagaloei. Ma God nuaulaula i verei ma i kauei da Egypt ai gulau nuanuana i vaia, anina ma i terei da Egypt i vibadei ma ana numa orana i vibadei.

11 ✧ Ma gomara ġaegħaena i ġeta au Egypt ma au Canaan, ma vinuapoapoe ġaegħaena i tupua. Ma noinoita ega ai lam.

12 Ma maranai Jacob i nonori da au Egypt lam, ma noinoita i paritawanei au Egypt, wei ai babara naona.

13 Ma muriai i nae me ma wei maranai Joseph i vieġana-melei varevareina awarii, ma kampa mai Egypt ai gulau Pharaoh, Joseph ana numa ravai i aramanei.

14 ✧ Anina ma Joseph riwa i paritawanei amana Jacob awarina ma i riwei da ana numa ravai anatapui, ai maġa 75, ita nei au Egypt.

15 ✧ Anina ma Jacob i nae au Egypt. Tauna kampa i'rāġe ma nanare natunatuna anatapui.

16 Taubeui i naiana-melei au Shekem ma Abraham Hamor natunatuna awarii kokoaga i gimigħi mara, kampa i vimataveni.

17 ✧ Maranai Mara i tuġereġgieri da God Abraham i paripari-vainuagħania ita kauei, ata patara i maġa guratana au Egypt.

18 Ma Pharaoh vouna au Egypt i vibada ma tauna noita Joseph ega ita aramanei.

19 ✧ Tauna amamata i morui ma i rau-iviapoapoelei, i egari da natunatui melamelai numei i viopuni da ita irāġe.

20 ✧ Wei au marana Moses i tupua, tevera inanana aiaina. Amana ma alona natui i ġamoi da nawaravi tonuġa i kwa.

21 ✧ Ma maranai tevera numei i tere-opunei, gulau natuna guguinina tevera i vaia ma i ġamoi da natuna.

22 Ma mai Egypt ai nuaulaula Moses i viararamani ma i virewapano, babani ma nola awarina.

23 ✧ Moses ana madeġa 40 ma i nota da ita nae ana dam ravai ita raugenari.

24 Ma i 'nanai da Egyptei, Moses ana rava oina i raviravi, ma tauna turana bainei Egyptei i vunui da i virażeni.

25 Moses i notai da ana rava ita aramanei da God tauna i paritawanei da ita agui da Egypt ita oputawanei. Wate taui wei ega ita aramanei.

✧ 7:5: Gen 12:7; 13:15; 17:8 ✧ 7:6: Gen 15:13-14 ✧ 7:7: Exo 3:12 ✧ 7:8: Gen 17:10-14; Gen 21:2-4; Gen 25:26; Gen 29:31-35:18 ✧ 7:9: Gen 37:28; Gen 39:2-21 ✧ 7:10: Gen 41:39-41 ✧ 7:11: Gen 42:1-2 ✧ 7:14: Gen 45:9-10, 17-18 ✧ 7:15: Gen 46:1-7; Gen 49:33 ✧ 7:17: Exo 1:7-8 ✧ 7:19: Exo 1:10-11; Exo 1:22 ✧ 7:20: Exo 2:2 ✧ 7:21: Exo 2:3-10 ✧ 7:23: Exo 2:11-15

²⁶ Ma maratomna Moses i nae me ma ana rava ruāga i viāgaiāiawa i 'nanai, ma i riwei, "Taumi ava ma aiwai aubaina o viāgaiāiawa?"

²⁷ Wate īaiawa tauvikareina Moses i vokaririei ma i riwei, "Tam aiai i terem da ma vibadelai bo tauai ai taurauetara?"

²⁸ Tam ma viraġeniu me pom Egyptei u viraġeni nanare bo?"

²⁹ Maranai Moses wei i nonori tauna Egypt i ruba-tawanei ma i nae au Midian, wei eġa ana dobu wate kampa i mae. Muriai dobuna wavinena i ravaġi ma natunatuna nelarai ruāga i tupua.

³⁰ [◇]Ma kampa i mae madeġa 40 i kwa ma BADA ana anela au mutulua ola Sinai au ġereġerena tauna awarina i eġa, inanana me ai menamenana ai aburuna rugurugui au orana i ġeġae.

³¹ Wei i 'nanai ma i baei ma i nae au ġereġere da ai arata ita tuvirevirei ma i nonori BADA i riwa i pa,

³² "Tau amamam ai God, Abraham ma Isaac ma Jacob ai God." Maranai Moses wei i nononori i rovo kaukaua ma naona i tere-govaġi.

³³ Ma BADA i riwa, "Am ae uma ma votawanei! Wei gabuna au tepana e maimairi, lamna doa vivivireina ma Viaiainana.

³⁴ A inanai menanare mai Egypt, natunatu e rarau-iviapoapoelei. Ai ora-tou a nonori ma a ġairai da taui ata vai-tawanei. Ma marina ma nei, Tau ana paritawanem au Egypt."

³⁵ [◇]Stephen i riwa:

Wei Moses na tagogina, mai Israel i parivirevirei i pa, "Aiai i terem da tauai ma vibadelai ma ma rauetarelai?" Moses i paritawaneiai da ita vibademi ma ita tereopunemi, anela i eġaġa ai menamenana au poui, ana aguei.

³⁶ [◇]Ma Moses taui Egyptei i ravena-opunenei ma mataira babai ma vivrewapanai i kaukauei au Egypt, Boga lebalebarina ma ai au vaġai madeġa 40 au mutulua.

³⁷ [◇]Wei Moses-na tagogina, mai Israel i riwei, "God muriai peroveta ami damei ina paritawaneiai me tau."

³⁸ [◇]Moses Israel patarana maiteni Egypt i opu-tawanei i vitagogie i ola Sinai ma anela Moses awarina i bababani, tauna kampa noinoita maiteni. Ma riwa mamaenoнона i nonori ma wei lamna i veredamanei tauta awarita.

³⁹ Wate noinoita Moses i parivirevirei ma au orai i ġoei da ita nae me au Egypt.

⁴⁰ [◇]Ma taui Aaron i riwei, "Nai ravana Moses, Egyptei i taravai-opunelai, tauai eġa ata aramanei aiwai awarina i tupua. Ma tauai ai god kokoitau ma kaei da ina rauetaraveniai."

⁴¹ [◇]Anina ma bulumakau īaubona kokoitauna i kaei, ma pulo i apui awarina ma i amei ma i umei, da aiwai uraiei i kaukauei i vimae-ġaeġaeni.

⁴² Wate God taui i mae-puputei ma i voterei da ubona ma nawaravi ma madeġa au mara i vimae-ġaeġaeni. Wei lamna peroveta nununai i ririweia i tupua:

Rava mai Israel! Maranai madeġa 40 au mutulua.

Taumi eġa Tau awariu īamōgamo ota vunui ma ota apui tapa?

⁴³ *Taumi ami god Molek ana numa gara ma ami ubona god kokoitauna Rephan o avarai. Kokoitau o kaei da ota vimae-ġaeġaeni.*

Lamna aubaina rava borui ami au dobu ina vainimi ma ina naiemi aueia,

Babilon ina netawanei da dobu au īelauna.

(Amos 5:25-27)

⁴⁴ [◇]Noinoita, God ana numagara, i avarai maranai au mutulua i mamae. Moses wei i voai, me God i viatataiei nanare.

⁴⁵ Muriai Joshua noinoita i rau-etalavani ma God ana numagara i avarai ma ana aguei i rui ma nai dobuna ravai i viopuni ma ai dobu ta vaia. Ma numagara kampa i mae da gulau David ana au mara.

⁴⁶ [☆]God, David nuanuana i vai-kauei ma David i vibaḡa da tauna God ana numa ita voai.

⁴⁷ [☆]Wate David eḡa numa ita voai ma natuna Solomon numa i voai.

⁴⁸ Wate God ḡegetelerana eḡa rava uranei numa ita voavoai au orana ita mamae, me peroveta wariaga i riwa i pa:

⁴⁹⁻⁵⁰ *Aubaina Tau aiwai anatapuna au mara ma au dobu a kauei. Tapa?*

BADA i riwa, “*Mara** au anikiala

ma dobu aeu kareu aniterenana.

Wate numa aiwaina ona voai tau aubaiu? Eḡateni!

Tau au animae-kaua mepa? Eḡa mepa!

(Isaiah 66:1-2)

⁵¹ Ma Stephen i riwa:

Taumi orami badobadoi. Ma eḡa ota ḡoeḡoei da God ona voteletelei ma taniḡami o vopotai da ana riwa eḡa ota nononori. Taumi Arua Vivivireina o viviḡavie i me noinoimi i kaukauei nanare.

⁵² Noinoimi metaui perovetai eḡa ita rau-iviapoapoelei. Wariaga perovetai, God ana tauvilawana, ana nei i vinolenolei; Wate noinoimi wei perovetai maiteni i viraḡeni. Ma marina Tauna i nei ma o vibenabenamei ma o viraḡeni.

⁵³ God ana anela i paritawanei da ana tarawatu noinoita i verei, wate taumi tarawatuna eḡa ota voteletelei.

Stephen ḡaimei i viraḡeni

⁵⁴ Maranai babada wei riwana i nonori ma i meji guratana ma ivoi i uta-ḡiriḡiriei Stephen awarina.

⁵⁵ Wate Arua Vivivireina Stephen orana i oai, i taepai au mara ma God ana boruma i 'nanai, ma Iesu God au oienai i maimairi.

⁵⁶ Ma i riwa, “Ona inana! Mara metaetana i wanatawanei ma Rava Natuna a inainanai God au oienai e maimairi.”

⁵⁷ Marina taui anatapui taniḡai i vopotai, i vigaragarei ma Stephen aubaina i ruba,

⁵⁸ ma i taina-opunei au doa, taon i opu-tawanei da au ririva ma ḡaimei ravina i vikarei. Ma tauviwau ai kwama i votawanei ma tevera laragana wavana Saul au aena i vidamni.

⁵⁹ Taui i viraurauei ma tauna i raupari i pa, “BADA Iesu, aruau ma vaia!

⁶⁰ Ma ae-tutunei i peu ma i garara, “BADA ai ḡo'apoapoe ma nota-tawanei.” Wenanare i riwa ma i'raḡe.

8

¹⁻² Ma Saul kampa da Stephen ana iraḡe i 'nanai ma i vianinei. Rava patupatutui ḡelaui ana toutoui ma ana tarakwatui i nei ma Stephen taubeuna i naiei ma au kokoaga i terei.

Saul Ekalesia i rau-iviapoapoelei

Nai maranaina rau-iviapoapoe ḡaegāena i vikarei ekalesia awarii au Jerusalem, Ma anatapui i viruba-tomana au Judea provins ma Samaria provins. Apasol ava au Jerusalem i mae.

³ [☆]Wate Saul i vikarei da ekalesia ai boru ita viamoai. Numa anatapui i ruini ma nelara ma waivine i taina-opunei ma i paritawanei au panipani-numana.

Philip au Samaria

* 7:46: 2Sa 7:1-16 * 7:47: 1Ki 6:1-38 * 7:49-50: Wei anona lamna Bada wenanare natuna i riwei, “Tam au oieu ma kiala ma am ḡavia au ae kareu ana tuvaidoedoei” * 8:3: Act 22:4-5; 26:9-11

⁴ Wate tauvitumaġana Jerusalem i rubaruba-tawanei taon ma dobu anatapuna i naeni ma Riwana Aiaina i raugugulei.

⁵ Ma Philip i nae au taon tagogi au Samaria ma kampa BADA ana Vinevine Keriso i raugugulei.

⁶ Maranai patarana, Philip i raraugugula i nonori, ma i 'nanai kaua babai ma mataira ġaegħae i kaukauei taui anatapui orai taputapunei i rautaniġana.

⁷ Tauna arua-apoapoei rava maġamaġaui au orai i egari da ana garagararai i viopuopuana, ma nanare rava maġamaġaui gwaġagwaġai ma sigesigei i vilawani.

⁸ Ma nuaiai ġaegħaena i mae nai au taona.

Simon tauna barabaravuna

⁹ Wenanare, nai au taona oroto tagogi i mae wavana Simon, ma tauna wariaġa ava ana baravu i kaukauei ma mai Samaria i baibaiei. Ma i voepaepana-melei da tauna rava ġaegħaena.

¹⁰ Rava labalababa, ma wavai naenaei anatapui ana babani i rarautaniġana-kauei ma i ririwa, "Tauna, God ana rewapani e ġoreġorei, Rewapani Ĝaegħaena."

¹¹ Taui i vineneġġanana-kauei aubaina mara nonoa taui Simon ana baravu i baebaei.

¹² Wate taui Philip i vitumaġanei maranai, God ana vigulau Riwana Aiaina ma Iesu Keriso rava awari i raugugulei. Ma lamna aubaina nelara da waivine i nei da i babataito.

¹³ Simon maiteni i vitumaġana ma i babataito. Ma Philip mepa i nena tauna kampa aubaina kaua babai ma mataira vivirewapanai i kaukauei. Tauna wei pulona i bana-kauei.

¹⁴ Maranai Apasol au Jerusalem i nonori da mai Samaria, God Riwana i vitumaġanei, taui Peter ma John i paritawanei awari.

¹⁵⁻¹⁶ Ma au Samaria i ġeta ma taui i raupariei da Arua Vivivireina ita rui au orai. Aubaina taui Iesu wavanei ava i babataito. Ma arua vivivireina eġa ita rui.

¹⁷ Peter ma John urai taui au tepai i terei ma i raupari da Arua Vivivireina au orai i rui.

¹⁸ Maranai Simon i 'nanai da mai Samaria Arua Vivivireina i vaia, maranai Apasol urai au kolai i terei, ma Simon mane i vilololoi,

¹⁹ ma i vibaġa i pa, "Tau maiteni nai rewapanana ma vereu da rava au kolai urau ana terei ma taui Arua Vivivireina ina vaia."

²⁰ Wate Peter i paribelei i pa, "Anina da God tam am mane maiteni ina tawanem ai au menamenana, aubaina tam e notanotai da God ana pulo manelei ma gimarai!"

²¹ Tam wei nolana au orana am gabu eġa ita mamae, aubaina oram eġa ita ai God au matana.

²² Am nota apoapoe ma votere-tawanei. Ma mae-tavirem BADA awarina ma ma vibaġai da am nota apoapoe ina nota-tawanei.

²³ Aubaina a inanaim da unura oram i oai tauai awariai ma wei notai apoapoei e panipanim."

²⁴ Simon marina Peter ma John i riwei, "Aubaiu BADA awarina ona raupari da aiwai o ririwei eġa ina tupua awariu!"

²⁵ Ma Peter ma John ai lawana ma BADA Riwana Aiaina ekalesia voui awari i raugugulei. Ma i raugugula nae Mai Samaria ai au taon nununai da i ġeta au Jerusalem.

Philip ma Ethio piei

²⁶ Mara tagogi BADA ana anela, Philip i riwei, "Ma vokaukaua ma ma nae au rauanaġei, etanai au Jerusalem da e ġaġairu au Gaza." (Wei etanaina lamna au mutulua).

²⁷ Anina ma Philip i vokaukaua ma i nae. Ma wei au etanaina oroto Ethio piei i 'nanai. Tauna mai Ethiopia ai kwin Kandake, ana mane taupainina. Wei orotona i nae au Jerusalem God viborumana aubaina,

²⁸ ma i nene-me ana au dobu. Ma ana au chariot i kiala ma wariağā peroveta Isaiah buka i girugirumia i 'aiavi.

²⁹ Ma Arua Vivivireina Philip i riwei, "Ma nae ma chariot au ririvana ma babara-nae."

³⁰ Anina ma Philip i ruba chariot au ririvana ma i nonori badana peroveta Isaiah ana buka i 'aiavi. Ma Philip i paridadana, "Aiwai e iaavia e araramanei bo eğā?"

³¹ Orotona i paribelei, "Menanare ana 'ramananei mepa da rava eğā ita parivai-araramaniu!" Ma Philip i vibağai da i ġeta da au ririvana i kiala.

³² Buka au orana, wei riwana i 'aiavi,

Tauna i taravaina-naiei me sipu virağenana aubaina

me sipu natuna e genugenuana maranai aparana e boribori,

tauna eğā aiwai ita latoni.

³³ *Tauna i vijibog̫i ma i vinimalamalai ma eğā ita kauana-kauei awarina.*

Aiai ana epaepaia ina babaniei.

Aubaina ana mara au dobu i vaitawanei.

(Isaiah 53:7-8)

³⁴ Ma orotona, Philip i paridadanei, "Isaiah e babaniana-melei bo rava ġelauna e babaniei?"

³⁵ Ma Philip, wei riwana awarina i vikarei ma riwa ġelaui maiteni ma Iesu Riwana Aiaina i viararamani.

³⁶ Ma i nene da waira i 'nanai ma Ethiopie i riwa, "Ma inana waira noi, aiwai aubaina da eğā ana babataito?"

³⁷*

³⁸ Badana, chariot taurubeina i riwei, "Chariot ma vojjini" Ma tauna ma Philip i ġaira waira au orana ma Philip, badana i babataittoi.

³⁹ Maranai wairei i ġeta, BADA Aruana maratagogi Philip i vai-tawanei ma turana eğā ita inana-melei, ma ana morelanana i nae ana au dobu.

⁴⁰ Wate Philip au Asotus i raueğā ma dobuna i naeni ma Riwana Aiaina i raugugulei da au Caesarea taon i ġeta.

9

Saul i vitumağana

¹ Wate Saul amapo da i mejimeji ma i ġoeğoei da BADA ana tauvitumağana ita virağeni. Ma i nae Pirisi Ġetelarana awarina,

² ma i vibağai da pepa ita girumi boru-numai babadai awarii au Damaskas da rewapana ita verei da Iesu ana etanai tauvitumağanai, nelara ma waivine ita pani ma ita neiae au Jerusalem.

³ Ma Saul, Damaskas i tuğereğerei, nanare ma lalalaina marei i ġairai da tauna i ravilalai.

⁴ Tauna i peu au doa ma pona i nonori awarina i babani i pa, "Saul, Saul! Aiwai aubaina e rarau-iviapoapoeleu?"

⁵ Saul i paridadana, "Tam aiai bada?"

Ma pona i paribelei, "Tau Iesu, tauna e rarau-iviapoapoeleu!"

⁶ Marina ma vomairi ma ma rui au Damaskas, ma kampa aiwai ina riwem ma kuae!

⁷ Nelara Saul maiteni i nene i mairi kwakwa, ana gamopotai, taui pona i nonori wate eğā aiai ita inanai.

⁸ Ma Saul au doa i matamatave i vomairi ma matana i kala, wate eğā aiwai ita inanai. Ma ana rava i raunimavoai ma i taravaina-naiei au Damaskas.

⁹ Ma au pom tonuğā eğā ita inana, eğā ita am bo ita uma.

¹⁰ Au Damaskas tauvitumağana i mae wavana Ananias. BADA ana au inana i viatataiei i pa, "Ananias!"

* **8:37:** Buka wadubo nonoana vs 37 eğā ita mamae.

Ma i paribelei, "Bada, tau weka!"

¹¹ BADA tauna i riwei, "Etanai wavana Etanai Jijimanina ma vaia da Judas ana au numa, kampa oroto Tarsusei wavana Saul ma baiei. Tauna marina e raraupari awariu.

¹² Ma ana au inana i 'nanai oroto wavana Ananias i nei awarina ma urana au inina i terei da ita inana-me."

¹³ Wate Ananias i paribelei, "Bada, rava maǵamaǵau i riweu da wei ravana ana kaua i apoapoe kaua tauvitumaǵana awarii au Jerusalem!"

¹⁴ Ma weka i nei pirisi ǵaeǵaei ai rewapanie da aiai wavam e viviborumei ina pani."

¹⁵ Wate BADA, Ananias i riwei, "Ma nae! Tau a vinei da aubaiu ina vitaunola ma wavau ina jimei, Jentail ma ai gulagulau awarii ma nanare mai Israel awarii."

¹⁶ Tau ana viatataiei da aubaiu ina jima ma rau-iviapoapoe ǵaeǵaena ina nei awarina."

¹⁷ Anina ma Ananias i ǵeta au numa ma i rui. Ma urana Saul au tepana i terei ma i riwei, "Vareiu Saul, BADA Iesu, Tauna au etanai awarim i eǵa maranai weka u nenei, i paritawaneu awarim da ma inana me ma Arua Vivivireina oram ina vioai."

¹⁸ Maratagogi purapura inanana me iana wenavina au matana i peu, ma tauna, inana me. Ma i vomairi ma i babataito.

¹⁹ Ma i am ma ana rewapanie i vai-melei.

Saul au Damaskas i raugugula

²⁰ Ma tauna maratagogi i nae ma pari au numai i raraugugula da Iesu anina God natuna.

²¹ Taui aiavoi da Saul i nonori i ba kaua ma taui ava i babani vivira i pa, "Wei ravana tagogina, rau-iviapoapoe ǵaeǵaena Iesu ana tauvitumaǵanai awarii i kaukauei au Jerusalem bo? Tauna i nei weka nolana tagogina aubaina da tauvitumaǵana ita pani ma ita naiei Pirisi babadai awarii bo."

²² Wate Saul ana raugugula i virewapanie kaua ma lamnei mai Jew au Damaskas i aramanie da Iesu anina Keriso, Vinevinena, ma lamna aubaina ana babani eǵa ita parivirevirei.

²³ Ma au pom biaǵa au murina Jew babadai i viogatara da Saul ita viraǵeni.

²⁴ Mai Jew marai ma waguvarai taon garina au metaetana i vipaipai da Saul ita viraǵeni. Wate Saul ai ogatara riwana i nonori.

²⁵ Ma waguvarai tauvitumaǵanai ǵelaui ai bada Saul i taravaini ma iriga ǵaeǵaena au orana i poai ma gavogavo aburuna taon au garina, kampa ǵuravei i tere-ǵairei au doa ma i ruba.

²⁶ Saul i ǵeta au Jerusalem ma maranai i ǵoei da tauvitumaǵanai ai au boru ita rui. Wate taui i rovoei ma eǵa ita vitumaǵanei da tauna Iesu ana tauvotaǵotaǵo.

²⁷ Wate Barnabas tauna i taravaini ma i naiei Apasol awarii, ma i riwei menanare au etanai Saul, BADA i 'nanai ma aiwai awarina i babaniei. Ma menanare au Damaskas ana tepatorana i raugugula Iesu wavanei.

²⁸ Anina ma taui Saul i taravaini ma maiteni i mae ma Jerusalem i naeni ma ana tepatorai i raugugula BADA wavanei.

²⁹ Ma nanare Saul mai Jew pona Greek taubabanieina maiteni i babani ma i viparipariǵai, ma taui i viogatara da tauna ita viraǵeni.

³⁰ Maranai tauvitumaǵana ǵelaui wei i nonori, ma Saul i taravaina-naiei au Caesarea da i paritawanei au Tarsus.

³¹ Anina ma ekalesia au Judea, Galili ma Samaria ana nuaubaii i mae. Ma Arua Vivivireina ana aguei ekalesia ai tumaǵana i vovai-virewapani, Ma ai boru i rarata, ma taui BADA i vivirana-kauei.

Aeneas ma Dorkas

³² Nai maranaina Peter dobu maǵamaǵau i naeni, ma God ana tauvitumaǵana awarii i ǵeta au Lidda.

³³ Kampa oroto wavana Aeneas i nelaḡai, tauna gwaḡagwaḡana madēga 8 ana au aravi i matave.

³⁴ Peter i riwa, “Aeneas, Iesu Keriso i vilawanim! Ma vomairi ma am aravi ma noui!” Ma maratagogi i lawana.

³⁵ Anina ma rava maḡamaḡau i Lidda ma Sharon wapuna melagaina, i mae-tavirei BADA awarina.

³⁶ Au Joppa tauvitumaḡana tagogi wavana Tabitha (Greek ponanei lamna Dorkas) tauna marana patapatana kaua maḡamaḡau aiaii i kaukauei molamokai aubaii.

³⁷ Wei marana tauna i doria ma i’raġe ma tupuana i oḡai ma numa vatavatara au aidamo, i vimataveni.

³⁸ Lidda, lamna Joppa au ġereġerena ma maranai tauvitumaḡana i nonori da Peter au Lidda, taui ai rava ruaġa i paritawanei da Peter i egari i pa, “Laḡilaḡina ma nei!”

³⁹ Ma Peter taui maiteni i nae da i ġeta ma i taravaina-ruiei au numa vatavatara. Kaikaibaba maḡamaḡau ana toutoui Peter i mairi kwaviviroi. Maranai Dorkas lawalawaina ma kwama da gara i popopoia Peter i viatataiei.

⁴⁰ Wate Peter anatapui i vibaġai da i opu au doa, ma ae-tutunei i mae-ġaira ma i raupari, ma taubeu i riwei, “Tabitha, ma vomairil!” Tabitha matana i kala ma maranai Peter i ’nanai, i vomairi da i kiala.

⁴¹ Peter urana i viloloi ma i voagui da i vomairi. Ma tauvitumaḡana anatapui ma kaikaibaba maiteni i kwatueiai, ma wazine lawalawaina taui i verei.

⁴² Ma wei riwana dobu Joppa i naeni ma rava maḡamaḡau Iesu i vitumaġanei.

⁴³ Peter au Joppa i mae au pom biaġa nanare Simon ġamoġamo opina taurauġaroġaroeina ana au numa.

10

Peter ma Cornelius

¹ Au Caesarea oroto* wavana Cornelius, tauna mai Italy sorodia boruna ai bada.

² Tauna rava jijimanina ma patupatutuna, ma ana numa ravai maiteni God tau-rauduneleina. Ma molamolakai i paipaina-kauei ma marana patapatai i raraupari God awarina.

³ Au bigai tagogi 3 oklok nanare i raraupari ma ana au inana, God ana anela au aiaina i ’nanai, i nei awarina ma i riwa, “Cornelius!”

⁴ Cornelius ana rovona anela i ’nana-tunutunui ma i riwa, “Au bada, menanare!”

Ma anela i paribelei, “Am pari ma am verena molamolakai awarii, i ġeta God awarina me pulo apuapunana ġabuna.

⁵ Ma marina nelara ġelaui ma paritawanei au Joppa ma ravana wavana Simon wavana ġelauna Peter ina taravainiai.

⁶ Tauna rava wavana Simon, ġamoġamo opina taurauġaroġaroeina awarina e mamae gera au ririvana.”

⁷ Maranai anela i nae, Cornelius ana taunola ruaġa i ġoreiai, ma ġelauna lamna sorodia, tauna ana tauvípaipai, tauna God tauvitumaġaneiana.

⁸ Tauna aiwai anatapuna taui i riwei ma i paritawanei au Joppa.

Peter Cornelius i ruugenari

⁹ Maratomna au benai nanare maranai nelarai Joppa i tuġereġerei, Peter i ġeta numa au tepana da ita raupari.

¹⁰ Ma am i’raġe ma i ġoei da aiwai ita ani, maranai taui lam i vovokaukauei, ma Peter matanei rauboni i ’nanai.

¹¹ I ’nanai mara i wanatawanei ma purapura inanana me puru ġaegħaena au adana 4 i vojjini ma marei i tere-ġaireiai au dobu.

* **10:1:** Wei ravana jentail.

¹² Au orana lamna sia tapuna ma tapuna, tetetei me mota ma kiu au aidamo lavelavei.

¹³ Ma pona i riwa, “Peter ma vomairi, ma viraġena ma ma am!”

¹⁴ Wate Peter i paribelei, “Eġa! Lamna eġa melanai ana kuae. Eġa melanai lam viviġana ata am-dadani.”

¹⁵ Wate pona i babani me, “Aiwai God i viviaiainia, eġa ma riwa da i apoapoe.”

¹⁶ Mara tonuġa wenanare i tupua ma me marana puruna i ġaiana-melei au mara.

¹⁷ Ma Peter aiwai i 'ninanai anona i vinua-notenotei, nanare ma Cornelius nelara i paripari-tawanei, taui Simon ana numa i nelaġai ma i ġeta ana au metaeta.

¹⁸ Taui i paridadana, “Weka rava wavana Simon-Peter e mamae bo eġa?”

¹⁹ Peter amapo da wei i vivinua-notenotei maranai Arua vivivireina i riwa, “Simon, nelara tonuġa e baibaiem!

²⁰ Lamna aubaina ma vomairi ma ma ġaira au gabaura, eġa ma geduai, aubaina tau a paritawanei awarim.”

²¹ Peter i ġaira ma awarri i riwa, “Taumi tau o baibaeu bo, Ami ġoana aiwai?”

²² Ma nelarai i paribelei, “Tauai Cornelius mai Rome ai sorodia ai bada i paritawanelai, tauna rava jijimanina ma God tauvoepaepana, ma mai Jew maġamaġaui tauna e vivivirei. Anela vivivireina i riwei da uta nei ana au numa da aiwai u araramanei uta riwei.”

²³ Ma Peter nelarai i ġorei da i rui au numa ma kampa i matave.

Peter Cornelius ana au numa

Ma maratomna anatapui i nae, Tauvitumaġana ġelaui au Joppa maiteni i vomairi.

²⁴ Ma au pom ġelauna taui au Caesarea i ġeta. Cornelius taui i paipaini, ma ana numa ravai ma ana rava i ġorei da i nei.

²⁵ Ma maranai Peter i ruirui au numa, Cornelius Peter i 'nanai ma i mae-ġaira au ae karena ma ana vivirana i raudune.

²⁶ Wate Peter tauna i voepai ma i riwa, “Ma vomairi, Tau rava ota me tam.”

²⁷ Peter ma Cornelius i bababani ma i ruirui au numa. Ma i 'nanai da patara tauna i paipaini.

²⁸ Peter taui i riwei, “Taumi o aramana-kauei da tauta mai Jew ata tarawatu e viviġaeta da Jentail maiteni tana mae-gogona bo tana raugenari. Wate God i viatataieu da eġa rava ana ġorei rava apoapoeni bo miramirana.

²⁹ Lamna aubaina maranai u vibaġaiu da ata nei, Tau au nota aiainei a nei. Tau ata paridadanem, Marina ma riweu aiwai aubaina au riwa u paritawanei?”

³⁰ Cornelius i paribelei, “Au benai wenanare au pom 4 marina i kwa, au numa a raraupari, nanare ma rava ana gara ararapoirina ma namanamarina au naoiu i raumairiei.

³¹ Ma i riwa, ‘Cornelius! God am pari i nonori ma am verena molamolakai awarri i vinuiaiae!

³² Ma nelara ma paritawanei au Joppa da Simon e ġoreġorei Peter awarina. Tauna Simon, ġamogħam opina taurauġaroġaroena ana au numa e mamae’.

³³ Lamna aubaina da am riwa laġilaġina ava a paritawanei, ma i ai da tam u nei. Tauai anatapuiai marina weka God au matana a vivipaipai da BADA aiwai i riwem ana nonori.”

Peter ana babani

³⁴ Ma Peter babani i raukarei, “Marina a inana-kauei da God rava anatapui e vaivaia da tagogina.

³⁵ Wate dobu dobua i rauvai God e vivivirei ma kaua aiaii e kaukauei, Tauna wei ravai e ġoegħei,

³⁶ Taumi o aramanei God Riwana Aiaina i paritawanei mai Israel awarri da rava ina mae-kaua God maiteni, maranai Iesu Keriso ina vitumaġanei ma tauna ai lawana ina vibadei.

³⁷ Taumi o aramanei Iesu aiwai i kauei Judea au anatapuna, au Galili i vikarei maranai John babataito ai kaua i raugugulei.

³⁸ God Arua Vivivireina ma rewapana Iesu Nasaretei i verei da dobu maǵamaǵau i naeni ma kaua aiai i kaukauei, ma rava au orai arua apoapoe i ruiruini, i vilawani.

³⁹ —Aiwai anatapuna au Judah provins ma au Jerusalem i kaukauei tauai anatapuiai a vimatematei ma a bababaniei. Tauna au korosi i tutui da i'raǵe.

⁴⁰ Wate God tauna iraǵelei i voepa-melei aupom au vitonuina ma i kauei da ǵelauai awariai i eǵa.

⁴¹ Eǵa rava maǵamaǵau i tauna ita inanai, anina tauvimatamata i vinevinei awari ava i ǵeta. Lamna tauai maiteni a uma ma am ana vomairi au murina.

⁴² Ma i egariai da dobu au anatapuna ana raugugula ma ana jima da God Iesu i vinei da rava anatapui lawalawaii ma irairaǵei ina rauetarei.

⁴³ Peroveta anatapui i jimei da maranai rava Iesu i vitumaǵanei, Tauna wavinei God taui ai ǵo'apoapoe ina vaitawanei."

⁴⁴ Maranai Peter i bababani ma Arua Vivivireina i ǵairai ma rava i raurautaniǵana i vioai.

⁴⁵ Ma mai Jew Joppei i nenei Peter maiteni, i ba kaua maranai God Arua Vivivireina i paritawana ǵairei Jentail awarii.

⁴⁶ Au baina mai Jew i nonori taui pona tapunei i bababani ma God i vivimae-ǵaeǵaeni. Anina ma Peter i riwa,

⁴⁷ “Taui Arua Vivivireina i vaia me tauta. Wei lamna aubaina eǵa aiai ina viǵaeta da wei ravai tana babataitoi.”

⁴⁸ Ma taui Cornelius ana numa ravai maiteni ma ana rava ǵelauui Iesu Keriso wavanei i babataitoi, ma taui Peter i vibaǵai da maiteni ita mae mara aburuna.

11

Peter ana babani

¹ Apasol ma tauvitumaǵana au Judea provins i nonori da Jentail maiteni God riwana i nonori ma i vitumaǵana.

² Ma maranai Peter i ǵeta me au Jerusalem tauvitumaǵana mai Jew ǵelauui tauna i eni i pa,

³ “Tam Jentail ai au numa u rui, ma maiteni u am!”

⁴ Anina ma kaua menanare i tuputupuanei anatapuna Peter taui i pariverei:

⁵ I riwa i pa:

Maranai a raraupari au Joppa ma matauei kaua a inanai, ma purapura inanana me puru ǵaeǵaena adana 4 i voijini ma marei i tere-ǵaireiai awariu.

⁶ Au orana a inana lamna ǵamoǵamo maramaraǵamai ma moduei, tetetei me mota ma kiu au aidamo lavelavei.

⁷ Ma pona a nonori i pa, “Peter ma vomairi, ma viraǵena ma ma am!”

⁸ Tau a paribelei, “Eǵa! Lamna eǵa melanai ana kauei. Eǵa melanai lam vivigana ata am-dadani.”

⁹ Wate pona marei mara viruaina i babani, “Aiwai purapurana God i riwa da i ai, tam eǵa ma riwa da i apoapoe.”

¹⁰ Mara tonuǵa wenanare i tupua, ma puruna i ǵaiana-melei au mara.

¹¹ Nai maranaina mai Caesarea ai rava tonuǵa i paripari-tawaneiae, au metaeta i raumairie.

¹² Ma Arua Vivivireina i riweu da eǵa aiwai ana notai ma orau taputapunei ana nae. Mai Joppa tauvitumaǵana 6 maiteni a nae ma ravana ana au numa a rui.

¹³ Cornelius i riwelai da anela awarina i eǵa, ma i riwei, “Rava ma paritawanei au Joppa da rava wavana Simon Peter ina neiai.”

¹⁴ Tauna wei riwana ina neiai ma lamnei tam ma am numa ravai maiteni ina vilawanimi.

¹⁵ Ma babani a raukarei ma Arua Vivivireina i ġairai da taui i vioai me au naona awarita i tupua nanare.

¹⁶ [◇]Anina ma Iesu aiwai i ririwei a notai, “John wairei i babataito, wate taumi Arua Vivivireinei ina babataitoimi.”

¹⁷ Inanana au aiaina da God Jentail pulona tagogina i verei, me tauta i verevereta maranai Iesu Keriso ta vitumaġanei, ma tau aiai da God ata viġaei?

¹⁸ Taui i vigamopotai maranai wei i nonori, ma God i viborumei i pa, “Riwa kaua da God Jentail maiteni i vianinei da ina rupena ma ina lawana.”

Ekalesia au Antiok

¹⁹ [◇]Ekalesia ġelaui rau-iviapoapoe i rovoei maranai Stephen i virāgeni ma i vilamonei au uama. Ĝelaui i ruba nae au Phonisia, au Saipras ma Antiok, ma kampa Iesu Riwana Aiaina i raugugulei mai Jew ava awarii.

²⁰ Wate ekalesia ġelaui mai Saipras ma mai Sairini i nae au Antiok Jentail awarii ma Iesu Riwana Aiaina i raugugulei.

²¹ BADA ana rewapania taui au orai i mae ma Jentail maġamaġaui i vitumaġana ma i mae-tavirei BADA awarina.

²² Wei riwana i ġeta ekalesia awarii au Jerusalem, ma taui Barnabas i paritawanei au Antiok.

²³⁻²⁴ Maranai i ġeta ma i 'nanai da God ravai i viaiaina-kauei, tauna i vinuaiai ma i egari da BADA awarina ina vipatutu orai taputapunei. Barnabas tauna rava aiaina, Arua Vivivireina orana i oai ma ana tumaġana i rata, ma God ana aguiei, i rauguga ma rava maġamaġaui i taini BADA awarina.

²⁵ Ma Barnabas i nae au Tarsus da Saul ita baiei.

²⁶ Ma i nelāġai ma i neiai au Antiok, ma kampa tauvitumaġana maiteni i mae madeġa tagogi i kwa, ma patara ġaegħa awarii i viararamana. (Weka au Antiok lamna i vikarei da tauvitumaġana i viġorei Kerisiana)

²⁷ Wei au marana peroveta ġelaui Jerusalem ei i ġairai.

²⁸ [◇]Peroverta tagogi wavana Agabas i vomairi ma God ana rewapani i vieġa da gomara e nenei au naoii dobu au anatapuna (Caesar Claudius ana vibada au marana gomarana i nei).

²⁹ Tauvotaġoġa au Antiok i vianina da taui ava ita kauana-guratei da mane vounaina ita kauei da ari rava ekalesia au Judea ita voagui.

³⁰ Taui nanare i kauei ma manena Barnabas ma Saul au urai i terei ma taui ekalesia ai babada au Jerusalem i verei.

12

James i virāgeni ma Peter i pani

¹ Lamna maranai, gulau Herod Agrippa* i raukarei da ekalesia ġelaui i rau-iviapoapoelei.

² James, John tuana uana sodei i bori-tuini.

³ Ma maranai Herod i 'nanai da mai Jew wei kauana i vinuaiae, ma ana sorodia i egari da Peter maiteni ita pani da au pani numana ita terei. Wei kauana Palawa Bagibagina ana au torela i tupua.

⁴ [◇]Ma Peter i pani ma au pani numana i terei ma sorodia 16 tauna i paini. [Sorodia 16 i terei da borui 4 ma i vipaipai.] Herod i ġoei da Peter ita vojijini da raġona torelana au murina ma au deba ita rauetarei.

* **11:16:** Act 1:5 ◇ **11:19:** Act 8:1-4 ◇ **11:28:** Act 21:10 * **12:1:** Tauna gulau Herod 1 ġoġana. ◇ **12:4:** Exo 12:1-27

⁵ Ma lamna aubaina Peter au pani numana i vojjini mara aburuna. Wate ekalesia i raraupari guratana God awarina Peter aubaina.

Peter pani numanei i tere-opunei

⁶ Ma nai waguvvaraina, ma maratomna da Peter ita rauetarei, Peter sorodia ruāga au poui i matamatave. Urana seinei i rağini sorodia ruāga au urai, ma sorodia ġelaui au metaeta i vipaipai.

⁷ Maratagogi BADA ana anela i eğā ma pani numana i ravilalai. Ma Peter i vogugui da matana i kala ma i riwei, “Lağilağina ma vomairi!” Ma sein au urana i dabarara.

⁸ Ma Peter i riwei, “Ma vigara ma ae uma ma oteni.” Ma nanare i kauei. Ma i egari, “Am kwama potopotona ma oteni ma ma votağotağoi.”

⁹ Peter anela i votağotağoi da pani numana i opu-tawanei, wate eğā ita aramanei anela aiwai i kaukauei, tauna i notai i rarauboni.

¹⁰ Taui, sorodia boruna ruāga au doa i netawanei, da i opu au metaeta iramei, wei e opuopu au taon. Metaeta ainelana i wanatawanei aubaii ma i opu. Taui etanai tagogi i ġairani ma maratagogi anela tauna i voterei.

¹¹ Peter ana nota i nememei ma i riwa, “Wei anina riwa kaua! BADA ana anela i paritawanei da Herod au urana i vaitawaneu, da mai Jew aiwai i notanotai da ita tupua lamna eğā ita tupua.”

¹² Maranai ana nota i nememei tauna i nae Mary ana au numa. (Mary lamna John alona. John wavana ġelauna Mark). Kampa rava mağamağau i vitagogiei ma i raraupari.

¹³ Peter au metaeta i raupewapewa ma taunola wavana Rouda i nei da metaeta ita votawanei.

¹⁴ Ma Peter ponana i nonori ma i aramanei da tauna, ma i vinuaiai guratana da eğā metaeta ita votawanei ma i ruba-rui da i vinolanola i pa, “Peter au metaeta e maimairi!”

¹⁵ Wate taui eğā ita vitumağanei ma i riwei, “Tam ma bubua!” Wate tauna i riwa bagibagi. Ma taui i riwa, “Nai Peter ana anela.”

¹⁶ Wate Peter i rarau-pewapewa ma maranai taui metaeta i votawanei ma i 'nanai da tauna, taui orai i auepai.

¹⁷ Peter urana i voepai da rava i genuana ma i riwei menanare BADA pani numanei i tere-opunei. Ma i riwei, “James[†] ma ekalesia ġelaui wei ona pariverei.” Ma Peter i nae au dobūgela.

¹⁸ Maranai mara i tom kampa au pani numana nuabola ma vinuanaina ġaeğäena i peu sorodia awarii da aiwai i tupua Peter awarina

¹⁹ Herod, ana sorodia i egari da Peter i baiei wate eğā ita nelağai. Lamna aubaina sorodia 16 i etarei ma i virägeni. Muriai Herod Judea i netawanei ma i nae au Caesarea da ita mae mara aburuna.

Herod iräge

²⁰ Maranai Herod amlona i ġaiğai kaua Taia ma Sidon ravai awarii, lamna aubaina taui ana borui i nei da Herod maiteni wei i babaniei. Taui Herod ana taunola ġaeğäena Blastus, i taravaini da ita voagui. Taui rom i vibağei Herod maiteni. Aubaina ai lam Herod ana dobuei i nenei.

²¹ Ma marana i ġetai da Herod maiteni ita viboru ma tauna ana vigulau garana i vigarei ma ana au anikiala i kiala ma awarii i babani.

²² Ma patara ana babani i nonori ma i logoi i pa, “Wei lamna god e bababani ma eğā rava!”

²³ Maratagogi BADA ana anela Herod i vipeuni au doa ma motamota orana i ani da i'rağe, aubaina tauna rava ai voepaepa i vinuaiaeie ma eğā rava ita riwei da BADA ita voepaepai.

[†] 12:17: Iesu ana tevera

²⁴ Ma ekalesia BADA riwana i raraugugulei ma rava maǵamaǵau i nenei BADA awarina ma ekalesia i rarata.

²⁵ Maranai Barnabas ma Saul ai nola au Jerusalem i vikwai, taui John-Mark i taravaini da maiteni i nei au Jerusalem.

13

Barnabas ma Saul i viaiaini ma i paritawanei

¹ Kerisiana au Antiok au orai peroveta ma taugiu wavai wenanare, Barnabas, Simeon (e ǵoreǵorei Gawara), Lusias Sairiniei, Manaen (Tauna gulau Herod Antipas maiteni i rata tagogi), ma Saul.

² Mara tagogi maranai taui i ujiuji ma BADA i vovoepaepai ma Arua Vivivireina i riwa i pa, “Tau, Barnabas ma Saul a vinei, ona tereriei au nola aubaina.”

³ Anina ma uji ma pari au murina taui urai Barnabas ma Saul au tepai i terei ma God ruāǵai i viaiaini ma i paritawanei.

Au Saipras

⁴ Ma Arua Vivivireina Barnabas ma Saul i paritawanei da i ǵaira au Selusia ma kampa i amkuka damana au bonabona Saipras.

⁵ Ma au Salamis i ǵota ma i nae mai Jew ai au boru numana ma God riwana i raugugulei. John-Mark taui maiteni i nae da ai tauagu.

⁶⁻⁷ Taui bonabonana i kwaviviroi da au Paphos taon i ǵeta. Weka Jew ei barabaravuna ma peroveta morumoruna i nebelei wavana Bariesu. Tauna bonabonana ana gavena Segius Paulus i vituranei, Segius Paulus rava nualaulaunana ma i ǵoei da God ana babani ita nonori ma lamna aubaina Barnabas ma Saul i rauǵoreiai.

⁸ Wate barabaravuna Bariesu (Greek ponanei lamna Elimas) Saul ma Barnabas i viǵavie i gavena ana tumaǵana ita viapoapoeni.

⁹ Saul wavana ǵelauna Paul, Arua Vivivireina orana i oai ma barabaravuna matana i 'nana-tunutunui.

¹⁰ Ma i pa “Tam Satan natuna ma kaua aiaii ma jijimani tauviapoapoenina! Tam morumoru kaukauam ma gwalagwalamerum. Ma amapo da BADA ana kaua ma voviravirai da moru.

¹¹ Ma marina BADA urana ina kovoǵim da matam ina apoapoe mara aburuna ma eǵa madeǵa lalalaina ma inanai.” Maratagogi matana i vinawanawa ma i gimtona ma nare da were i voladaǵa-nae da rava au urana ita vojijina.

¹² Maranai gavena i 'nanai aiwai i tupua ma i vitumaǵana, aubaina tauna BADA ana viararamana i bana-kauei.

Paul God Riwana Aiaina i jimejimei au Antiok taon au Pisidia

¹³ Paul ana rava maiteni Paphos i voterei ma i amkuka damana au Perga taon au Pamphilia provins, Ma weka John-Mark taui i voterei ma i naeme au Jerusalem.

¹⁴ Perga i voterei ma i rui da au Antiok taon au Pisidia provins. Ma au Sabate i rui au boru-numana ma i kiala.

¹⁵ Ma rava ǵelaui, Moses ana tarawatu bukana ma peroveta ǵelaui ai buka i 'avi, ma babada riwa i paritawanei Paul ma Barnabas awari i pa, “Varevareiu! Mepa da awarimi nota aiwai da ota voaguiai lamna marina ona ǵei da ona babaniei.”

¹⁶ Paul i vomairi ma urana i voepai da rava i genuana ma babani i vikarei i pa:

Mai Israel ma taumi eǵa mai Jew ai God tauviborumeina, ona rautaniǵaneu!

¹⁷ ✽ Mai Israel ai God noinoita i vinei, ma i vimaurai ai au mae au Egypt, ma ana rewapani ǵaeǵaenei dobunei i taravaina-opunei.

18 ✠Madeğā 40 au mutulua ami kaua apoapoei ami beura ma ami gunura anatapui am-iauei.

19 ✠Dam ġaeġaei 7 i vipupui au Canaan ma dobuna mai Israel i verei da i viġariananonoei.

20 *Wei anatapuna madēga 450 au orana i tupua. Wei au murina God taurauetara† i terei da taui i vibadei da peroveta Samuel ana mara.

21 ‡Anina ma rava God i vibaġai da gulau ita verei. Ma God Saul, Kish natuna Benjamin ana damei i terei; ai gulau da madēga 40 i kwa.

22 §Ma God Saul i tere-opunei ma David i terei ai gulau. Ma wenanare i riwa i pa, “Tau a aramaniei da David, Jesse natuna orau ana rauoġara, ma au ġoana anatapuna ina kauei.”

23 Muriai me God i parivainuāġani nanare, Mai Israel ai Tauvilawana, Iesu David ana damei i nei.

24 ✠Muriai da Iesu ita nei, John mai Israel anatapui awari i jima da ai ġo'apoapoe ina voterei ma ina mae-tavirei God awarina ma ina babataito.

25 ✠Ma John ana nola au damona i riwa, “Taumi o notanotai da tau Tauvilawana bo? Eġa! Tau eġa tauna. Wate ona rautaniġana, rava au muriu e nenei tauna i ġetelara, tau eġa tagotagogina da ana ae uma ġuravana ana rupeni.”

26 Varevareu - Abraham natunatuna ma taumi Jentail God tauviviborumeina, God tauta awarita, kwakokwakoi vilawanai riwana i paritawanei!

27 Mai Jerusalem ai babada maiteni God ana Tauvilawana i vinua-nainei, ma lamnei Iesu i kovoġi, Peroveta wei lamna i jimejimei au Sabate marana patapatana.

28 ✠Taui eġa ana apoapoena aiwai ita nelāġai da Iesu ita virāġeni, wate Pilate i vibaġai da ita virāġeni.

29 ✠Maranai rava ai babada maiteni, ai nuabola Iesu awarina i kauana-paiei me peroveta i ririwei nanare, ma tupuana au korosi i tere-ġairei ma au guba i vimataveni.

30 Wate God Iesu iraġelei i vovaimairini.

31 ✠Ma au pom maġamaġaui Iesu taui maiteni au Galili da i ġeġae au Jerusalem awari i eġa. Wei ravai marina e vivimatamata rava awarii.

32 Marina tauai Riwana Aiaina a paripariveremi. Wei parivainuāġanana wariaġa noinoita awari i kauei.

33 Ma God nanare i kauei tauta eda muri aubaita, da Iesu iraġelei i vovaimairini, au Psalm viruaina wenanare I girumi,

Tam natu.

Amadodo Tau a viamanem.

(Psalm 2:7)

34 God Iesu iraġelei i vovaimairini da eġa tupuana ina buda. Me i girugirumi nanare i pa, *Au viaidina vivivireina David a parivainuāġani tam ana verem.* *(Isaiah 55:3)*

35 Psalm ġelauna wenanare i girumi,

A 'ramanei da Tam am Messiah-Tauvilawana tupuana eġa au kokoäga ma voterei da ina buda. *(Psalm 16:10)*

36 Maranai David i mamae ma God ana nola i kauei ma i'rāġe, ma amamana maiteni i doboi ma tupuana i buda.

37 Wate God Iesu iraġelei i vovaimairini ma tupuana eġa ita buda.

38-39 Lamna aubaina au rava, ona aramaniei da Iesu awarinei God ami ġo'apoapoe ina nota-tawanei. Rava anatapui da Iesu e vivitumaġanei, ai ġo'apoapoe e notanotatawanei ma ai viturana e viviaiaini. Wei Moses ana tarawatu eġa ita kaukauei.

40 Ona paina-melemi da peroveta aiwai i ririwei eġa awarimi ina tupua. Aubaina i riwa;

41 *Ona rautaniġana vivijibogami,*

* **13:18:** Num 14:34 ✠ **13:19:** Deu 7:1 * **13:20:** (a) Jdg 2:16; (b) 1Sa 3:20 † **13:20:** Wei ravai lamna ai ġavia babadai ma ai tauravena ma taurauetara *Judge*. ‡ **13:21:** (a) 1Sa 8:5; (b) 1Sa 10:21 § **13:22:** (a) 1Sa 13:14; (b) 1Sa 16:12 ✠ **13:24:** Mrk 1:4 ✠ **13:25:** Mrk 1:7 ✠ **13:28:** Mrk 15:13-14 ✠ **13:29:** Mrk 15:42-47 ✠ **13:31:** Act 1:3

kaua ġaegħena ana kaei da Ona baei ma ona iraġe!

Aubaina ami au lawana kaua ġaegħena ana kaei da taumi ona vitumaġħana-avei.

42 Paul ma Barnabas i opuopu ma rava i nei ma i vibaġa-guratei da ita nememei au Sabate ġelauna da Tauvilawana ana kaua ita babanana-kauei.

43 Boru i kwa da rava i vilamonei, mai Jew borui ma ġelaui marina ina bori i vaia da i vimai-jew, taui Paul ma Barnabas i votaġgi, ma i riwana-guratei da Iesu ana aguei ina maejjina.

44 Au Sabate ġelauna taon ravai anatapui i ġeta da Iesu riwana aiaina ita nonori.

45 Maranai mai Jew wei patarana i 'nanai ma orai unura i oai ma Paul i vikau-morumoruei ma i vitepaubaubai.

46 Ma Paul ma Barnabas ana teptorai i babani, "God riwana a jimej awarimi au naona, wate taumi wei riwana o geduaiei. Wei e viviatataiana da taumi lawana mamae-nonoana eġa ota ġoegħoei. Lamna Aubaina ana voteremi ma God riwana ana jimej Jentail awarii.

47 BADA wenanare riwa bagibaginei i riwelai,

Tau a vinemi da lalalaina Jentail awarii,

da rava anatapui au dobu ona riwei menanare ai ġo'apoapoe a nota-tawanei ma a vilawani. (Isaiah 49:6)

48 Maranai Jentail wei riwana i nonori, taui i vinuajai kaua ma BADA Riwana Aiaina i voepaepai, ma taui da God i vinei lawana mamae-nonoana ita vaia, i vitumaġħana.

49 Ma BADA Riwana Aiaina i vituaj nai au paratana.

50 Wate mai Jew Jentail waivinei manemanei ma mai Jew ġelaui i egari da Paul ma Barnabas ai ġavia i vomairi ma dobunei i viaġaġana-opunei.

51 ♫Anina ma taui aei pokauna i rauabuabui da ita viatataiei da BADA eġa ita vinuajaw awarii ma i nae au Ikoniam taon.

52 Wate Arua Vivivireina kerisiana voui au Antiok orai i oai ma i vinuajaw kaua.

14

Paul ma Barnabas i jima au Ikoniam.

1 Kauana tagogina i tupua au Ikoniam. Paul ma Barnabas i nae mai Jew ai au boru numana ma menanare i babaninei da mai Jew ma Jentail maġħamaġau i vitumaġħana.

2 Wate mai Jew ġelaui eġa vivitumaġħanai Jentail i kelari ma ai nota i barai da Paul ma Barnabas i geduaiei.

3 Avena ma Paul ma Barnabas kampa i mae guratana ma ana teptorai BADA ana aguei i jimajima. Ma kaua babaii ma vivirewapanai maġħamaġau i kauie. Wei i vimataira da ai jima lamna riwa kaua.

4 Taon i kai ġelaui mai Jew aubaii i mairi ma ġelaui Aposol aubaii i mairi.

5 Ma mai Jew ma Jentail ġelaui i vioga da Paul ma Barnabas ġaimej ita viraurauei.

6 Wate taui riwana i vaia ma dobuna i ruba-tawanei ma i nae au taon ġaegħaei Listara ma Derbi au Laikonia provins ma taon au ririvai.

7 Ma weka Riwana Aiaina i jimana-naiei.

Rava i notai da Paul ma Barnabas god

8 Au Listara oroto aena ġokkokarana, alona manawanei gwaġagwaġana i vinatunei ma eġa ita babara dadana.

9 Kampa i kiala ma Paul i bababani i rarautaniġanei. Paul matana i tawanei ma i 'nanai da tauna i vitumaġħana da ita lawana

10 ma i garara awarina, "Aemei ma mairi!" Ma orotona aenei i mairi ma babara i vikarei.

¹¹ Maranai patara i 'nanai Paul aiwai i kauai tauai ava ai ponei i babani vivira, "god ruaāga i āgairai awarita me *rava."

¹² Tauai i riwa da Barnabas lamna mai Greek ai god Zeus[†] ma Paul i vitauvibabani aubaina i riwa da tauna Hermes.

¹³ Zeus ana pulo gabuna, taon au giana, Zeus ana pirisi patara maiteni bull ma berana ulaulai i neiai taon au metaetana da Apasol ita puloi.

¹⁴ Wate maranai Paul ma Barnabas wei riwana i nonori, tauai ai gara i sikai ma i ruba-opu patara awarii ma i garara,

¹⁵ [◊]"Aiwai aubaina wei kauana o kaukauei? Tauai rava ota me taumi nanare! Tauai Riwa Aiaina a neneiai da nai kauai kwakwavi ona voterei ma ona nae BADA lawalawaina ona viborumei. Tauna mara ma dobu ma boga ma aiwai anatapuna au orai i kaei.

¹⁶ Wariaāga tauna rava i voterei da ai āgoanei i mae.

¹⁷ Wate marana patapatai e viviatataiemi da tauna e mamae ma ana nuavaina e verevereta, garewa marei ma maura ma lam e vereveremi ma au orami nuaiai e oaoai."

¹⁸ Apasol i bababani ma i kauana-guratei da ravai ita viāgei da tauai avena ita puloi.

Mai Listara Paul āgaimei i viraurauei.

¹⁹ Mai Jew āgelaui Antioh ei ma Ikoniam i nei ma patarana i egari da Paul āgaimei i viraurauei ma taonei i taina-opunei, i notai da tauna irāge.

²⁰ Wate maranai vivitumaāganai i āgeta da i mae-kwaviviroi, tauna i vomairi ma i naeme au taon.

Aupom āgelauna tauna ma Barnabas i nae au Derbi.

²¹ Paul ma Barnabas Riwana Aiaina i jimei au Derbi ma ekalesia voui maāgamaāgau i rui. Ma i nae me au Listara, Ikoniam ma Antioh.

²² Metauna au dobuna i jimajima kampa tauvitumaāgana i ririwana-guratei ma i vovavirewapani da ina mairi-jijina ai au tumaāgana i pa, "Piripiri maāgamaāgau au orana ona rui wate au murina God ana au vibadana ona rui."

²³ Paul ma Barnabas ekalesia nununai ai babada i vinei ma i raupari ma i uji BADA awarina, da ai ekalesia ma ai babada ina paini.

²⁴ Anina ma au Pisidia provins i verautua da i nae me au Pamphilia provins.

²⁵ Au Perga BADA riwana i jimei ma i āgaira au Atalia.

²⁶ Ma kampa i amkuka ma i nae me au Antiok au Syria provins, weka ai nola i vikarei, maranai ekalesia kampa God i vibaāgi da tauai ita viaiaini ai au nola ma i paritawanei ma marina ai nola e vivikwai.

²⁷ Ma kampa i āgeta ma ekalesia i vitagogie, ma aiwai anatapuna God ana aguei i kaukauei rava i vieāgei, ma menanare Iesu metaeta i votawanei da Jentail maiteni Tauna i vitumaāganei.

²⁸ Ma kampa tauvitumaāgana maiteni i mae guratana.

15

Boru au Jerusalem

¹ Wate nelara āgelaui Judeaei i āgairai au Antiok ma ekalesia i viararamani i pa, "Mepa da āga inibori ona vaia Moses ana tarawatu e ririwei nanare, God taumi āga ina vilawanimi."

² Ma karuwaāgawaāga āgēgāena i bauni Paul ma Barnabas maiteni. Ma tauai Paul, Barnabas ma rava āgelaui i vinei da i āgae au Jerusalem da Apasol ma babada ita inanai wei babanina aubaina.

* ^{14:11:} Paul ma Barnabas Greek ponanei i bababani † ^{14:12:} Zeus lamna mai Greek ai god āgēgāena. Rava ai vitumaāgana da godna e vivilawani. Hermes lamna Zeus natuna ma tauna lana Tau-vinolanolana. Zeus ma god āgelaui aubai. Rava i notai da Hermes lana e kauwei da rava e babana-kauwa ma ai babara e aiai. Wate nanarena e notanotai da tauna kauwa aiaina e vivitupui ma e kauwei da rava e vivinatuna kauwa. [◊] ^{14:15:} Exo 20:11

³ Ma i paritawanei au Jerusalem, Ma ai au vāgai ekalesia au Phonisia ma Samaria provins i pariverei menanare Jentail i mae-tavirei God awarina. Ma taui i vinuaiaii kaua maraina wei i nonori.

⁴ Maranai i āgeta au Jerusalem, ekalesia ma Apasol i nei da i nebelei. Taui i pariverei menanare kaua anatapui God ana aguei i tupua.

⁵ Wate ekalesia āgelaui mai Pharisi, i vomairi ma i babani guratana i pa, “Jentail anina da inibori ina viaia ma ona egari da Moses ana tarawatu ina voteletelei.”

⁶ Apasol ma babada i viboru da wei babanina i okei.

⁷ [☆]Ma i vitarapiri guratana ma Peter i vomairi ma taui i riwei i pa, “Au rava! O aramanei da au orata God i vineu da Riwana Aiaina ana jimei Jentail awarii da taui ina nonori ma ina vitumaāgana.

⁸ [☆]God rava anatapui ai nota e araramanei, ma Jentail Aruana Vivivireina i verei me tauta nanare. Wei matairana i viatataieta da God i vianina.

⁹ Tauna Jentail ma tauta e vaivainita da tagogina, ma ata vitumaāganei orata i viaiaiani.

¹⁰ Marina aiwai aubaina God o viviamlo-āgaiāgini? Tauta amamata maiteni ega tata virewapana da tarawatu tata vojjina-kauei. Wate marina wei vitana Jentail ta verevere-damanei.

¹¹ Eāgateni! Tauta anataputa ta vivitumaāgana da BADA Iesu ana aguei tana lawana, ma nanare Jentail maiteni.”

¹² Rava anatapui i genuana ma Barnabas ma Paul i rautaniāganei, taui i bababani menanare ana au vāgai God ana aguei kaua aniba ma vivrewapanai i kauei Jentail awarii.

¹³ Maranai i babani vorovei, James* babani i vikarei, “Au rava ona rautaniāganeu.

¹⁴ —Peter †au naona i pariveremi menanare God Jentail i raugenari ma āgelaui i vinei da tauna āgarinei.

¹⁵ Ma Peroveta nununai wei kauai i bababaniei marina nanare e tuputupua:

¹⁶ Wei au murina ana nememei,

ma David ana numa gara ana voa-melei.

Ana vituramairini

ma ana kauei da ina virewapana me.‡

¹⁷ Da rava mamae-terenai

BADA ina baiei,

Wate Jentail a raugorei da āgariuei, BADAi riwa.

(Amos 9:11-12)

¹⁸ Wariaāg da marina wei ta aramanei.

¹⁹⁻²¹ [☆]Lamna au baina ega tana kauei da ina piripiri Jentail aubaii, taui e mamae-tavirei God awarina. Wate pepa tana girumi ma tana egari da lam e pulopuloei god morumorui awarii ega ina ani, ega ina viawawana labalababa, āgamōgamo uai e kikiki ega ina ani ma sia ana tarana ega ina ani. Aubaina wariaāg da marina Moses ana tarawatu e raugugulei boru au numai Sabatena patapatana.”

Pepa i girumi Jentail awarii

²² Ma Apasol, babada ma ekalesia anatapui rava āgelaui i vinei ma i paritawanei au Antiok au Syria provins Paul ma Barnabas maiteni. Taui ai babada ruaāg i vinei wavai Judas wavana āgelauna Barsabas ma Sailas.

²³ Ma wei pepana au urai i terei,

Aposol, ekalesia babadai, varevareimi.

Jentail ekalesia au Antiok, Syria provins ma Silisia provins. Varevareiai, egualau!

* 15:7: Act 10:1-43 † 15:8: Act 10:44; 2:4 * 15:13: Iesu ana tevera † 15:14: Peter wavana āgelauna Simon.

‡ 15:16: Maranai God David ana numagara e bababaniei lamna David ana vibadana vouna e ririwei ma ega ana epaepaia. * 15:19-21: Lev 18:6-23; Lev 17:10-16

²⁴ Tauai riwana a vaia da rava ġelaui ai au boru i ġairai ma ai viararamani i vinuabolaimi ma i visina-viraviraimi, wate tauai nai ravai eġa ata paritawanei.

²⁵ Lamna aubaina tauai a viboru ma a vianina da taupariverena ata paritawaneiai, ata rava Paul ma Barnabas maiteni,

²⁶ taui i verena-melei ma ai lawana eġa ita vinuabolei BADA Iesu Keriso wavana aubaina.

²⁷ Judas ma Sailas a pariparitawanei da taui gamoiei ina riwemi aiwai tauai a girumi.

²⁸ Arua Vivivireina ma tauai ai ġoana da eġa vita ġaeġaena ana veremi, anina wei tarawatuna ava.

²⁹ Lam god morumorui i puloi eġa ona ani,

Eġa tara ona umai, Eġa ġamogħamo uana kikikina vioana ana tarana ona ani.

Eġa ona viawawana labalababa, §

Mepa da wei tarawatui ona vojjina-kauei, taumi kaua aiaina o kaukauei.

Equalau kaua.*

³⁰ Ma nelarai i paritawanei da i ġaira au Antiok, ma ekalesia i rieiae da pepa i verei.

³¹ Ma taui i 'avi ma i vinuajai kaua pariverena aiaina aubaina.

³² Judas ma Sailas taui God ana peroveta ma i babani guratana awarii ma wei taui i vinuajiae ma ai tumaġana i vovai-virewapani.

³³ Ma kampa i mae Mara aburuna ma ekalesia ana nuaubai i paritawana-melei au Jerusalem.

³⁴ †

³⁵ Wate Paul ma Barnabas au Antiok i mae, ma taui maiteni BADA Riwana Aiaina i viararamani ma i raugugulei.

Paul ma Barnabas i vilamonei

³⁶ Ma muriae Paul, Barnabas i riwei, "Tana nae dobu au anatapuna mepa BADA Riwana Aiaina ta raugugulei ma ekalesia tana raugenari, ma tana inanai taui anina bo eġa."

³⁷ Barnabas i ġoei da John-Mark ita taravaini.

³⁸ ♦ Wate Paul wei notana eġa ita ġoei aubaina au naona John taui au Pamphilia i rubatwanei ma eġa ita mae da maiteni ita nola.

³⁹ Ai vipariparinigai i apoapoe guratana da taui i vilamonei. Barnabas, Mark i taravaini ma kukei i damana au au Saipras.

⁴⁰ Paul, Sailas i vinei. Ma ekalesia, BADA i vibaġai da ana aguei taui ai au nola ina paini.

⁴¹ Taui Syria da Silisia i naeni ma ekalesia i raugenari ma i vinua-terenei.

16

Timothy Paul ma Barnabas maiteni i nae

¹ Paul i nae au Derbi da au Listara, kampa tauvotaġotaġo i mae wavana Timothy. Tauna alona Jew ei ma kerisiana, Wate amana Jentail.

² Ekalesia au Listara ma Ikoniam Timothy i voepaepana-kauei.

³ Paul i ġoei da tauna ita taravaini ana au vaġai, lamna aubaina ini bori i verei aubaina mai Jew kampa i aramanei da tauna amana Jentail.

⁴ Maranai taon nununai i nenaeni, ma ekalesia kampa i paripari-verei Apasol ma babada au Jerusalem ai nota, ma i riwei da tarawatu i ririwei ina votaġotaġoi.

§ **15:29:** Viawawana labalababa ġelaui wei: Rava ġelaui awawai maiteni e viawawana. (Exo 20:14, Deu 5:18) Mane aubaina e viawawana (Lev 19:19, 1 Cor 6:15) Am femili ravai o viviawawanei (Lev 18:22, Rom 1:26-27) Ġamogħamo e viviawawanei (Lev 18:23) Rava eġa uta ravaġi ma e viviawawanei (Eph 5:3) Rava u egari da u viawawanei. (Gen 34:7, Deu 22:25-28) * **15:29:** Kaua ġaeġaena lamna eġa ini bori ma Iesu ana aguei, u korosi i take aubaita. † **15:34:** Buka waduwaduboi au orai vs 34 eġa ita mamae "Wate Sailas i ġoei da kampa ita mae." ♦ **15:38:** Act 13:13

⁵ Ma ekalesia ai vitumaḡana i vovai-virewapanai ma tauvitumaḡana voui i ruirui marana patapatai.

Paul ana rauboni

⁶ Arua Vivivireina Paul ana rava maiteni i viḡaei da eġa BADA riwana ita jimei au Eisia provins, ma Pirijia ma Galatia paratana i naeni.

⁷ Maranai i nei Maisia ana au provins ma i ġoei da ita damana au Bithinia provins. Wate Iesu Aruana eġa ita vianinei.

⁸ Ma Maisia i verautuini da i nae au Troas.

⁹ Waguvvaraina Paul ana au inana i 'nanai oroto Macedoniei i maimairi ma i vivibaġai i pa, "Ma damanai au Masedonia da ma voaguiai!"

¹⁰ Paul ana rauboni au murina tauai a vioga da laġilaġina ana vomairi Masedonia provins aubaina. Tauai a vitumaḡana da God i ġorelai da Riwana Aiaina kampa ana jimei.

Paul i nae au Philipai

¹¹ Au Troas tauai amkuka, a viaruana damana au Samotreis bonabonana a ġeta ma au pom ġela a kuka-nae au Neapolis.

¹² Ma kampa da a babara nae au Philipai taon au Masedonia provins, weka mai Rome ai sorodia ai bareki ġaġġena i mae, kampa a veraumae.

¹³ Ma au Sabate taon a opu-tawanei ma a nae au waira, a notanotai da kampa boru gabuna wate eġa. A kiala ma waivine ruāga ota kampa i rauriei awari a babani.

¹⁴ Taurautaniġana tagogi lamna Jentail wavinena wavana Lidia ma ana dobu Thaiataira. Tauna gara lebalebarina maiana ġaġġena taugimareina ma God i vitumaġanei, ma God orana i votawanei da aiwai Paul i bababaniei i rautaniġanana kauuei.

¹⁵ Maranai wavine ana numa ravai i babataito ma i rauġorelai i pa, "Ona nei au numa mepa da o notanotai da tau kerisiana ririwa kauana." Ma i egariai da ana au numa a mae.

Paul ma Sillas au panipani numana au Philipai

¹⁶ Mara tagogi a nenea boru au gabuna ma taunola guguini a nebelei, Tauna au orana arua apoapoena i mae ma lamnei aiwai amapo da ina tupua i vivieġai. Ma mane ġaġġena i kaukauei ana taniwaga aubaina.

¹⁷ Tauna Paul ma tauai i votaġotaġoiai ma i garagarara "Wei nelarai God ġeġetelarana ana taunola! E vivinolanola menanare God e vivilawananei."

¹⁸ Wei kauana i kauuei au pom biäga da Paul i viamlo-ġaiġaini da i mae-tavirei ma arua apoapoena i riwei, "Iesu Keriso wavanei a egaegarim da wavine ma opu-tawanei!" Marat-agogi arua apoapoena wavine i opu-tawanei.

¹⁹ Maranai taunola guguini ana taniwaga i aramanei da ai mane etanaina i vine-boai, taui Paul ma Sillas i vojjini ma i taina naiei au deba Gabemani awarii.

²⁰ Taui i nei ai taurauetara awarina ma i riwa, "Wei nelarai mai Jew wei dobuna ravai e vivinuaraġaraġai.

²¹ Taui ata rava kaua ġelaui e viviararamani ma wei ata giu e teretereġairei."

²² Ma patara i rui Paul ma Sillas vunuai aubaina. Ma gabemani Paul ma Sillas, ai gara i sikai ma wipiei i kwapui.

²³ I vunu-kauei ma i tawana-ruiei au panipani numana. Ma numana badana i egari da ita paina-kauei da eġa ita ruba.

²⁴ Anina ma Panipani badana taui i tawana-ruiei, panipani numana au orana ma aei, ai vivitainei au orana i raġita-jijini.

²⁵ Nubaутуvai Paul ma Sillas i raraupari ma i welawela God awarina ma panipani ġelaui i rarautaniġana.

²⁶ Nanare ma lolo ġaġġaeotana dobuna i gui. Ma maratagogi pani numana metaetana i wana-tawatawanei ma panipani anatapui ai sein i dabarara.

²⁷ Pani numana badana i vomairi ma ita inanai da metaeta wanatawanana ma i notai da panipani i ruba ma lamna aubaina ana sod i lavui da ita viraġena-melei.

²⁸ Wate Paul i garara, “Eġa ma vunu-melem! Tauai anatapuai weka!”

²⁹ Pani numana badana ana taunola i ġorei da lalalaina ita neiae ma i ruba-rui ma ana sisisina i mae-peu Paul ma Sailas au naoi.

³⁰ Ma i opunei au doa ma i paridadanei, “Babada aiwai ana kuae da ana lawana?”

³¹ Taui i paribelei, “BADA Iesu Keriso ma vitumaġanei ma ma lawana, am numa ravai maiteni.”

³² Ma God riwana i raugugulei tauna ma ana numa ravai awari.

³³ Nai maranaina avena da waguvvarai, pani numana badana Paul ma Sailas i naiei ma keroi i ḥġaj, Ma maratagogi tauna, ana numa ravai maiteni i babataito.

³⁴ Paul ma Sailas i ġaiei ana au numa da i viambagibagi. Tauna ana numa ravai maiteni i vinuaiai kaua da marina God i vitumaġanei.

³⁵ Ma marana i tom ma tauetara ana taunola* i paritawanei pani numana badana awarina ma i egari i pa, “Nelara ma voterei da ina nae.”

³⁶ Pani numana badana Paul i riwei, “Taurauetara i egariu da ana voteremi da ona nae. Marina ana nuaubami ona nae.”

³⁷ Wate Paul, taurauetara i riwei, “Tauai eġa ita rauetarelai ma i vunu-kuelai patara au matai. Ma avena da tauai mai †Rome, wate marina i ġoei da govagovaġanei ina paritawanelai bo? Eġateni kaua! Ona voterei da taurauetara ina nei weka da ina naielai.”

³⁸ Taui wei babanina i naiana-melei da babada i riwei ma taui i rovo kaukaua maranai riwana i nonori da Paul ma Sailas lamna mai Rome.

³⁹ Ma i nei au pani numana ma i riwa, “Tauai a kauana-boai, ai ġo’apoapoe ona notawanei.” Ma i tere-opunei ma i vibaga-guratei da dobuna ita oputawanei.

⁴⁰ Ma Paul ma Sailas pani numana i opu-tawanei ma i nae Lidia ana au numa ma kampa kerisiana maiteni i vivoruboru ma i vovai-virewapani. Anina ma taui dobuna i netawanei.

17

Au Thesalonika

¹ Paul ma Sailas Amphipolis taon ma Apolonia taon i voterei da i nae au Thesalonika taon. Weka mai Jew ai boru numana i mamae.

² Ma i rui au boru numana au Sabate me mara patapatai i kaukuei nanare, kampa Sabate tonuġa rava awari God riwana i viararamani.

³ Ma God riwanei i viararamana da Keriso ina vinuapoapoe ma iraġelei ina vomairi me, “Wei ravana a babbaniei awarimi, tauna Iesu Keriso.”

⁴ Mai Jew ġelaui orai i taini ma taui i votaġotagoi. Ma nanare Jentail nelara maġamaġagaui God taurauduneleina ma waivine wavai naenaei maġamaġaui.

⁵ Wate mai Jew i unura ma rava ora-potapotai maġamaġaui au etanai i tami ma au taon vikaruwaġawaġa i vikarei. Ma oroto wavana Jason ana numa i ruini Paul ma Sailas i baibaiei da ita opunei patara awari.

⁶ Wate maranai eġa ita nelāġai taui Jason ma kerisiana ġelaui i taina-naiei taon babadai awari, ma i garara, “Wei ravai dobu au anatapuna apoapoe maġamaġaui i kuae, marina i ġetai ata au dobu.”

⁷ Ma Jason, Paul ma Sailas i taravaini ana au numa. Taui Caesar ana tarawatu e viviaigai ma e ririwa da gulau ġelauna e mamae wavana Iesu.

⁸ Maranai patara ma taon babadai wei babanina i nonori taui amloj i ġaġiġai kaua,

⁹ ma Jason i egari da mane ġaġaena i vimaiei da eġa mae boaboa ġelauna ina vitupui. Ma taui Jason i voterei da i nae.

* **16:35:** vs. 20 ma inana. † **16:37:** Mai Rome ai tarawatu lamna, “Eġa rava Romei ma kwapu labalababai bo ma pani da au naona ma rauetarei.” Rome Israel i vibadei Iesu ana au mara.

Au Berea

¹⁰ Ma waguvarai tauvitumaḡana Paul ma Sailas i paritawanei au Berea. Maranai kampa i ġeta, ma i rui au boru numana.

¹¹ Mai Berea i viaiaii, eġa me mai Thesalonika. Taui i rautaniġana ma i votelatela ma marana patapatana God ana buka i 'aiavi da ita aramanei da Paul aiwai i bababaniei lamna riwa kaua.

¹² Ma lamnei mai Jew maġamaġaui i vitumaġana, ma nanare mai Greek waivinei wavai naenaei ma nelara.

¹³ Maranai mai Jew au Thesalonika paratana i nonori da Paul God riwana i raraugugulei au Berea, taui maiteni i nae kampa, ma rava i rauegari da ġavia ita vikarei.

¹⁴ Maratagogi kerisiana Paul i paritawanei au gera wate Sailas ma Timothy au Berea provins i mae.

¹⁵ Ma nelara Paul i tauvigwanigwaniei da au Athens, ma Paul nelarai i riwei ma i paritawanei au Berea da Sailas ma Timothy ita riwei da laġilägina ita nei awarina.

Paul au Athens i raugugula

¹⁶ Ma Paul au Athens ana rava i paipaini, ma i 'nanai da kampa kokoitau i maġa kaua ma i vinuabola kaua.

¹⁷ Mai Jew ma mai Greek God tauviborumeina awari i jima guratana au pari numana ma nanare au deba, aiai da i ġeta ma i rautaniġana.

¹⁸ Ma rava ġelaui nuaulaulai i ġetai ma maiteni i vitarapiri, taui e ġoreġorei mai Epicure ma mai Stoic^{*}, taui lawana ai kaua tauviararamanai. Ma ai rava ġelaui i paridadana, "Wei ravana aiwai e voġavoġanei?" Ĝelaui i riwa, "Mepa da tauna dobu ġelaui ai god e bababaniei." Taui wenanare i babani aubaina Paul Iesu Riwana Aiaina ma ana iraġe ma ana vomairi me, i raugugulei.

¹⁹ Ma i taravaini ma i naiei ai au boru e ġoreġorei Areopagus ma i riwei, "Ma nei ma a ġoei da am viararamana vouna e bababaniei, ata aramanei.

²⁰ Kaua ġelaui e babaniei tauai a vivinuanainei, ma a ġoei da ana aramanei anona aiwai?"

²¹ (Taumana ma mai Athens marana patapatai ai nola eġa aiwai, da kaua voui ina virarautuei ma ina nononori.)

²² Ma Paul babadai au naoi i mairi ma i riwa:

Dogadogara mai Athens! A inana da taumi vipatupatutumi ami god awarii,

²³ A bababara ma ami pulo aniapunana a inainanai, ma tagogi a inanai au tepana i giruma, "Wei God eġa ata araramaneia aubaina." Wei Godna o viviborumei wate eġa ota aramanei. Tau ana riwemi nai Godna aiai.

²⁴ ²⁵ Tauna God mara ma dobu ma aiwai anatapuna au orana i kauei. Ma tauna mara ma dobu badana, ma numa rava uranei e voavoai au orana eġa ita mamae.

²⁵ Ma eġa rava ai agu ita paipaini, tauna agu eġa ita ġoegħoei. Aubaina tauna rava lawana ma lavutu ma anatapuna e vereverei.

²⁶ Au karena rava tagogi i kauei ma nai ravanei dam patarai i vitupua ma dobu i maeni. Tauna ainelana rava ai mara i terei da ina mae ma ina iraġe ma animae paratana i aiterei.

²⁷ God wenanare i kauei da rava tauna ina baiei da mepa ina nelaġai. Wate tauna au ġereġereta, eġa au uama.

* **17:18:** Mai Epicure rava wavana Epicurus ana viararamana i votaġoġoi. I viararamana da lawana ana ano lamna nuaiaii. Da taui aiwai da tupuai ma matai ana rauoġara, e vivinuaiaiei. Ma aiwai da e virovorovoi bo iniviara e verevereia. Taui wei lamna e ġeduguediae. Taui e ririwa da God rava eġa ita vivuvainei Stoic rava wavana Zeno ana viararamana e votaġoġoi. I viararamana da rava ma ai maiteni au ririvata ta mamae (nature) ita vivirei, Taui ai ġoana ma ai erawa ita teretawanei ma ita vinuanotana kaua ma avena rava ġelaui ai agu ita raunenelei. Taui e ririwa, "Nuaiaii lamna kaua e vovoterei da mena ina tupua nei nanare ina tupua." ^{17:24:} 1Ki 8:27; Act 7:48

²⁸ Taugiruma ġelauna Greekei i riwai pa, “Taunei ta mamae ma ta bababara ma anatapuna ta kaukauei.”[†] Ma wate ami taugiruma ġelauna i girumi i pa, “Tauai nanare tauna natunatuna.”[‡]

²⁹ Ma tauta God natunatuna, eġa tana notai da God lamna me kokoitau, goldei bo silvei i kaei. Rava uraiei ma ana nuaulaulauei i kaei.

³⁰ Wariaga rava God eġa ita aramanei wate God taui i 'nana-tawanei, wate marina anataputa egaegarita da tana rupena ma tana mae-tavireta awarina.

³¹ Aubaina mara i vinei maranai rava anatapui aiainei ma jijimaninei ina kovoġi. Rava i vinei da taunei ina kovoġa. God wei ravana iraġelei i vovaimairini lamna ina vimataira rava awari da ravana anina tauna.

³² Maranai Paul iraġelei vomairina i babaniei, rava i nonori ma ġelaui tauna i vinamei wate ġelaui i riwa, “Tauai a ġoei da muriae wei babanina ma babaniana-melei.”

³³ Ma Paul ai boru i opu-tawanei ma boru i gudu.

³⁴ Wate ġelaui i vitumaġana ma Paul i votaġotaġoi. Tagogi lamna Dionisius, Areopagus boruna au orana, ma wavine wavana Damaris, ma rava ġelaui.

18

Paul i nae au Corinth da rava awari Iesu ita jimej

¹ Paul Athens i netawanei ma i nae au Corinth.

² Kampa Akwila tauna Jew au Pontus i tupua, marinaota au Italy* da i nei awana Prisila maiteni. Aubaina Rome ai gulau Claudius mai Jew anatapui i viägägei da Rome i opu-tawanei. Paul i nae da taui ita inanai.

³ Paul taui maiteni i mae, taui tauampopo, (ġamoġamo opina ma gara i popopoi numa aubaina ma i gimagimarei) me Paul ai nola tagogina.

⁴ Sabate patapatana au pari numana tauna mai Jew ma Jentail awari i jima guratana da orai ita sinavirai.

⁵ Maranai Sailas ma Timothy au Masedonia da i ġetai, Marina Paul BADA riwana ava i raugugulei mai Jew awarii da Iesu tauna anina God ana Vinevine Keriso.

⁶ Wate mai Jew Paul i viġavie i riwa apoapoenei i ririwei. Ma tauna ana gara i rauabuabui ma awari i riwa, “Mepa da o kwako, lamna ona viwatu-melemi, eġa tau ona viwavui! Marina da e nena, ana nae Jentail awari.”

⁷ Ma taui i voterei ma i nae Jentail wavana Titus Justus ana au numa i mae, tauna God tauviborumeina ma ana numa pari numana au ġereġerena.

⁸ Crispus, pari numana ai bada, BADA i vitumaġanei ana numa ravai maiteni, ma mai Corinth maġamaġaui Paul i rautaniġanei, i vitumaġana ma i babataito.

⁹ Waguvvara tagogi BADA Paul ana au inana i babani i pa, “Eġa ma rovo, ma babani ma eġa ma genuana.”

¹⁰ Aubaina Tau tam maiteni. Ma rava eġa ina rau-iviapoapoelem aubaina au tauvotaġotāgo i maġa wei au dobuna.

¹¹ Ma Paul kampa i mae madeġa tagogi ma nawaravi six, ma God riwana i jimej.

¹² Wate maranai Galio i vi-Gavena au Akaia provins, mai Jew kampa i vitagogie i Paul i vojjini ma i naei Gavena awarina da ita rauetarei.

¹³ Ma taui i viwavui 'pa, “Wei orotona ana moruei rava orai e taitaini da God e viviborumei ma ata tarawatu e viviaigai.”[†]

† 17:28: Epimenides Ciritei au 6 century BC. ‡ 17:28: Aratus Silisiei 3 century BC. * 18:2: Rome taon lamna taon ġaegħaena au Italy ma ai kapital AD. 49 au orana kampa viġaġiawa ġaegħaena da wavalatona Claudius mai Jew i riwei da dobuna i netawanei. † 18:13: Mai Jew e ririwa da Paul eġa taui ai vitumaġana oina ita viararamani ma wei Rome ai tarawatu i vianinei, wate e ririwa da Paul rava taparoro vouna e viararamani ma wei Rome ana tarawatu e viviaigai, lamna aubaina taui i ġoei da Rome ai bada Paul ina kovoġi. Ma inanai Act 16:20-21 ma 17:7.

¹⁴ Ma Paul gamona i laġi da ita babani ma Galio i babani mai Jew awari i pa, “Mepa da taumi wei ravana o viviwavui da kaua ġaegħaei bo kaua apoapoe aubaina, lamna tau au nola da ata rau-taniġanemi.

¹⁵ Wate wei taumi ami babani ami wava ma ami tarawatu, ana voterei au urami. Tau eġa wei kauai ana rauetarei.”

¹⁶ Ma etara numanei i viaġaġana-opunei.

¹⁷ Taui anatapui pari numana ai bada Sothenis i vojjini ma i vunui etara numana au naona wate Galio taui i 'nana-tawanei.

Paul i nae me au Antiock au Syria

¹⁸ Paul i mae mara aburuna tauvitumaġana maiteni au Corinth ma wagei i nae au ġereġere au Cenkirei waga ai au animae. Prisila ma Akwila maiteni. Ma kampa Paul ana parivainuaġana aubaina aparana i ġari, ma anatapui i nae au Syria.

¹⁹ Taui au Ephesus i ġeta ma Paul, Prisila ma Akwila i voterei. Ma i nae au boru numana Mai Jew awari i jima.

²⁰ Rava i vibagħi da ita mae mara aburuna wate tauna eġa ita vianina.

²¹ Wate maranai i opu da ita nae ma taui i riwei, “Ana nememei mepa da God ana ġoana, ma Ephesus i netawanei ma wagei i damana.”

²² Maranai i ġeta au Caesarea ma i nae au Jerusalem da kerisiana i raugenari ma i nae au Antiock.

²³ Au Antiock i mae mara aburuna ma Galatia provins ma Pirijja provins i naeni ma kerisiana i vovai-virewapani.

Apolos mai Ephesus awari i raugugula

²⁴ Wei marana Apolos tauna Jew, au Alexandria da Egypt da i nei au Ephesus. Tauna BADA riwana ma ana giruma i aramana-kauei ma rava bababanina.

²⁵ Rava ġelaui, Apolos BADA ana etanai babanina, i viararamani, ma ana teptorana i jima ma Iesu ana kaua ma ana lawana i viararamana-kauei. Wate tauna John Taubabataito ana babataito babani ava i aramanei.

²⁶ Ma i vikarei da ana teptorana i raugugula au boru-numana. Wate maranai Prisila ma Akwila tauna ana babani i nonori. Ma i ġorei da maiteni i nae ai au numa ma BADA ana etanai ana babani i viaramana-kauei.

²⁷ Maranai Apolos i nena au Akia, kerisiana Apolos i vovai-virewapani. Ma kerisiana au Akia ai pepa i giruma da ita pariverei da tauna ita nebelei. Maranai au Akia i ġeta ma taui God ana aguei i vivitumaġana, agu ġaegħaena i verei.

²⁸ Tauna ana babaniei au deba mai Jew i vovaiubai. Ma God riwana i vaia ma lamnei rava i viararamani da Iesu anina Keriso.

19

Paul au Ephesus

¹ Apolos au Corinth taon Akia provins i mae, ma Paul ola i taġoni da au Ephesus i ġeta. Kerisiana ġelaui kampa

² ma i paridadanei i pa, “Arua vivivireina o vaia bo eġa maranai o babataito?”

Taui i paribelei i pa, “Eġa, Tauai eġa ata aramanei da Arua vivivireina e mamae.”

³ Ma Paul i paridadana, “Aiwai babaitona o vaia?”

Taui i paribelana, “John ana babataito a vaia.”

⁴ [✳]Paul i riwa, “John ana babataito lamna mataira da taui ai ġo'apoapoelei i mae-tavirei; ma mai Israel i riwei da Tauna au muriu e nenei ona vitumaġanei lamna Iesu.”

* 19:4: Mrk 1:4, 7-8

⁵ Maranai wei i nonori ma i aramanei taui i babataito BADA Iesu wavanei.

⁶ Ma Paul urana au kolai i terei ma Arua vivivireina au orai i rui. Ma i vikarei da ponatapunei i bababani ma God riwana i raugugulei.

⁷ Taui nelara iayana twelve.

⁸ Paul i nae au boru-numana ma kampa nawaravi tonuā au orana ana tepatorana mai Jew awarii i bababani. Da rava orai ita sinavirai da BADA ana vigulau ita vitumaḡanei.

⁹ Wate ġelaui kampa orai i bagibagi ma eġa ita ġoei da ita vitumaḡana, ma patara au matai Iesu ana etanai i vijibogi. Ma Paul taui i voterei ma kerisiana i taravaini ma i nae Tairanus ana au numa, ma kampa i viararamana ma i giugiu pompom.

¹⁰ Ma nanare i mae madeġa ruaġa i kwa, da mai Jew ma Jentail ravai maġamaḡau i au Eisia provins maemaei BADA riwana i nonori.

Sceva natunatuna

¹¹ Ma God ana rewapanei Paul kaua ġaeġaei ma aniba i kaukauei,

¹² lamna avena wate rava ai agesi da ai nola garai i naiei Paul awarina da i vodadani ma i naei da rava doridoriai i vodadani, ma arua apoapoei i opu-tawanei ma i lawana.

¹³ Mai Jew ġelaui dobuna i naeni ma arua apoapoei i viviaġana-opunei ma i raudadana Iesu wavanei da arua apoapoei i viviaġagei. Taui arua apoapoei i riwei i pa, “Iesu wavanei, taunei Paul e raraugugula, Tau a egarim da ma opu.”

¹⁴ Skeva, pirisi ai bada natunatuna nelarai seven wei kauana i kaukauei.

¹⁵ Wate mara tagogi arua apoapoena i paribelei, “Iesu a aramanei ma Paul a aramanei ma taumi aiavoi?”

¹⁶ Ma rava au orana arua apoapoena maemaena i aeupai ma taui i vunui da eġa ita vikalokaloei. Ai gara i sika-naei ma ana kovakovai ma tararatai numei i viopuopuana ma i viruberubei.

¹⁷ Mai Jew ma Jentail ravai au Ephesus maemaei wei riwana i nonori ma rovo orai i ġaeni ma Iesu wavana i vivirana-kauei.

¹⁸ Maġamaḡau i vitumaḡana ma i nae kerisiana awarii ma ai ġo'apoapoe i rupeni.

¹⁹ Tauvitumaḡana voui maġamaḡau paraparaumai,* ai buka i vidamni au deba ma i apui. Maranai bukai ai maia i 'avi da silver 50,000†.

²⁰ Kaua babai me wei, Iesu riwana i vibabarai nai au dobuna ma rava maġamaḡau i vitumaḡana.

²¹ Wei anatapuna au murina Paul au orana i vinua-notanota da au Masedonia da Akaia ita verautuini da ita damana au Jerusalem ma i riwa, “Ana nae au Jerusalem ma muriae ana nae da Rome ana inanai.”

²² Ma Paul ana tauagu ruaġa Timothy ma Erastus i aiparitawanei au Masedonia provins, ma tauna kampa i mae mara aburuna au Eisia provins.

Viġaiġaiawa au Ephesus

²³ Iesu ana babani ma ana kaua vouna aubaina, ma viġaiġaiawa ġaeġaena i tupua au Ephesus.

²⁴ Silver taunoleina wavana Demetrius, mai Greek ai god wavinena ana numa taparoro kokoitaui i rarau-ġarogħaroei da i gimaginei, ma wei nolana mane ġaeġaena e neinei silver taunoleina nai au dobuna aubaii.

²⁵ Ma taui anatapui ai rava nolana tagogina e kaukauei maiteni i rauġorei ma i riwa, “Au rava, O aramanei da ata maura wei nolanei ta vaivaia.

²⁶ Ma o inanai ma o nonori menanare wei ravana Paul e kaukauei, Rava ai nota i sinavirai da maġamaḡau god Artemis raudunena i voterei au Ephesus ma dobu Eisia paratana anatapuna. Ma e ririwa da ‘rava god i rauġarogħaroei, lamna eġa god.’

* **19:19:** Au Deu 18:10-14 God ana rava e viviġaei da eġa ina parauma. † **19:19:** Dracma coin tagogi lamna tau-vobagibagi ana maia au pom tagogi aubaina. Marina lamna million biaġa.

²⁷ Tauta tana inana kaua da wavata ma ata mane ani kauana ega ina apoapoe. Ma ata god getelarana Artemis ana numa taparoro ma wavana ega ina vijibogi, ega au Eisia provins ava ma dobu au anatapuna.”

²⁸ Maranai patara wei babanina i nonori taui i meji kaua ma i vigaragarei, “Artemis mai Ephesus ai god i getelera!”

²⁹ Ma taui i garagarara rava nai au dobuna i nonori ma taui maiteni i garara labalababa. Anina ma patara Gaius ma Aristakas i vojjini taui ruaigai mai Masedonia Paul ana tauvigwaniganiana, ma i rubana-naiei nai dobuna ana boru gabuna.[‡]

³⁰ Paul i goei da patara au naoi ita rui da ita babani wate kerisiana ega ita vianinei.

³¹ Wate nanare Paul ana rava gelauai au gabemani tauna i vigaesi da ega ina nae au boru.

³² Patara i vinuanaina, i logologoi ma i garagarara labalababa ma ega ita aramanei aiwai aubaina weka i nei.

³³ Mai Jew oroto tagogi i dudu-opunei au naoi wavana Alexander ma patara gelauai i garara awarina da ita babani. Alexander urana i voepai da taui ita genuana ma tauna ana rava aubai ita babani.

³⁴ Wate maranai i aramanei da tauna Jew. Taui anatapui pona tagoginei wenanare i garagarara, “Tauta mai Ephesus ata god Artemis i getelera!” da hour ruaigai i kwa.

³⁵ Ma taon badana patara i riwei da i genuana ma i riwa, “Au rava mai Ephesus, rava anatapui au dobu i aramanei da tauta tauvipaipai mai Ephesus ai god gegetelarana Artemis ana numa taparoro ma ana gaima vivireina marei i peuai aubaina.

³⁶ Ega aiai wei ina vikaua-moruei. Lamna aubaina orami ina rauei ma ega aiwai apoapoena ona kuae.

³⁷ Wei ravai o neiae weka wate taui ega au numa taparoro aiwai ita danenei bo ata god ita riwana-boei.

³⁸ Mepa da Demetrius ana rava maiteni e viviwavui taui ina nae ina rauetara ma ami viwavu ona naei kampa taurauetara awarina.

³⁹ Ma mepa da ami nuabola gelauai e mamae lamna taon babadai ai au boru ona babaniei ma ona tere-jijimani.

⁴⁰ Ma amadodo aiwai i tupua, tau a rovo da ina viwavuita mae-boaboa aubaina. Wei vikaruwaigawaganana anona ega, ma mepa da Rome ina paridadana ma tauta menanare tana paribelananei.

⁴¹ Anina ma boru i gudui ma rava i vilamonei.”

20

Paul i nae au Masedonia ma Greece

¹ Vikaruwaigawaganana au Ephesus taon i kwa ma au murina Paul kerisiana i raukwatueiai da i vinua-terenei, i viegualauai ma i netawanei da i nae au Masedonia provins.

² Ma dobuna gaeigaenana i naeni ma kaua magamaigai kerisiana i vinua-terenei. Anina ma au Akaiā* i geta.

³ Kampa nawaravi tonuigai i mae. Tauna i vokaukaua da ita nae au Syria ma wate i nelagai da mai Jew gelauai viraigenana i viviogatarei lamna aubaina da i nae me au Masedonia.

⁴ Nelara gelauai i votaigotaigo taui lamna Piras natuna Sopater ana dobu Berea; Aristakas ma Sekundus, mai Thesalonika, ma Gaius tauna ana dobu Derbi; ma Tijikus ma Trophimus ai dobu Eisia provins; ma Timothy.

⁵ Taui wagei i ainae au Troas ma kampa i painiai.

^{‡ 19:29:} Dobuna ana boru gabuna lamna numa gaeigaena. Ega poewana, ma inanana me nawaravi gebona. Rava magamaigai 26,000, nanare ina kiala **meeting place**. Rava e nenea kampa da kalo tapuna ma e raraubiiga. * 20:2: Marina e goregorei Greek.

⁶ Ma palawa bagibagina torelana au murina, wagei Philipai taon au Masedonia provins a netawanei. Ma aupom 5 au murina au Troas a ġeta ai rava awari, kampa aupom 7 a mae.

Au Troas, Paul Eutikus iraġelei i vovaimairini

⁷ Wiki au karena - Sunday tauai a vitagogielai voepaepa ma BADA ana amgogona aubaina, ma kampa Paul i jima da nubautuva, aubaina maratomna da ita nae.

⁸ Numa vatavatara au tepana a vitagogielai, ma kampa rampa maġamaġaui i ararata.

⁹ Orotu laragana wavana Eutikus au windo i kiakiala ma Paul i raraugugula, ma tauna matana i pota kaua da i raunuavuru, ma kampa au tepa dewadewana i peu-ġaira da au doa i raei. Maranai taui i ġaira da ita voepai, tauna irairaġena.

¹⁰ Paul i ġaira, i matave-tepani ma i rapai ma rava i riwei i pa, “Eġa ona vinuabola, tauna lawalawaina!”

¹¹ Anina ma Paul i ġae me au numa ma kerisiana maiteni BADA ana amgogona amna i ani ma awari i babani maratom. Ma Paul nai dobuna i netawanei.

¹² Taui laragana lawalawaina i naiei au numa ma rava orai i raei.

Paul i amkuka au Miletus

¹³ Paul aenei i nae au Assos ma tauai i riwelai da wagei ana nae au Assos da tauna kampa ana vigerui.

¹⁴ Ma au Assos a vigerui ma a nae au Miletus

¹⁵ Maratomna bonabona Kios au ġereġerena a nae. Ma marana i tom au Samos a ġeta, ma maratom ġela au Miletus a ġota.

¹⁶ Paul i ġoei da jijimanina ina nae ma avena ita rui au Ephesus, eġa ita ġoei da au Eisia provins ina mae-guratana. Tauna i vipaparana ma mepa da tagotagogina au Jerusalem ina ġeta muriai da Pentecost torelana.

Paul kerisiana au Ephesus i netawanei

¹⁷ Au Miletus Paul riwa i paritawanei au Ephesus taon kerisiana babadai awari da ita nebelei.

¹⁸ Maranai au Ephesus taon i ġetai ma taui i riwei i pa:

O aramanei au lawana menanare maranai vovounai weka au Eisia provins a ġetai.

¹⁹ Mai Jew i ġoei da ita rau-ivapoapoeleu wate tau a vilamolamona ma ana toutou BADA awarina a vivitaunola.

²⁰ O aramanei da maranai God Riwana Aiaina awarimi a raugugulei, riwa aiaina aniąguimi eġa ata tajjini. Au deba a raraugugula rava maġamaġaui au naoi, ma ami au numa a viararamanimi

²¹ Riwa bagibagina mai Jew ma Jentail a verei, A riwei da ita rupena ma ita mae-tavirei God awarina ma Iesu ita vitumaġanei.

²² Ma marina Arua Vivivireina i riweu da ana nae au Jerusalem. Eġa ata aramanei kampa aiwai awariu ina tupua.

²³ Wate taon nununai awari a nena ma Arua Vivivireina e vivieġeu da amapo ina paniu ma au deri ina tereu ma ina rau-ivapoapoeleu.

²⁴ Ma mepa da ina virāgeniu, wei lamna eġa kaua ġaegħena tau awariu. Wate kaua ġaegħena lamna BADA Iesu nola i verevereu da ana vikwai. Wei nolana lamna, God ana iviaiāi maemaena, riwana ana raugugulei.

²⁵ Maġamaġaumi awarimi a nei ma God ana vigulau a raugugulei wate marina a aramanei da amadodo da i nena, naou eġa ona inana-melei.

²⁶⁻²⁷ God ana vilawana ogatarana rava aubaii eġa ata govaġi awarimi lamna aubaina riwa bagibaginei a ririwemi da mepa da rava au babani eġa ina vitumaġanei ma ana lawana maemae-nonoana ina vine-boai, lamna eġa tau au wavu.

²⁸ Taumi babada ma ona paina-melemi, nanare tauvitumaḡana taui aiavoi da Arua vivivireina au urami i teretereia. Ona inana-vaitetei me sipu taupainana ana sipu e paipaini. Taui lamna God ana vinevine taranei i gimarai.

²⁹ A aramanei da ana nae ma au muriu tauraugugula morumorui ina nei awarimi ma rava ai tumaḡana ina viapoapoeni, me auou moduei sipu au boruna viraḡena aubaina.

³⁰ Ma rava ġelaui ami au dam oina ina vomairi ma ina viararamana ma moruei rava orai ina taini da taui ina votaḡotāgoi.

³¹ Lamna aubaina matami ina kala ma ona aramanei da madeḡa tonuḡa marai ma waguvvarai a notanotaimi ma ana toutou a viviararamanimi.

³² Ma marina God au urana a tereteremi. Ana agu e verevereoimi ona vivitumaḡanei. Wei aguina e vovaivirewapanimi, ma ami pulo ina veremi, aubaina taumi God natunatuna viaainai.

³³ Ma tau eḡa rava ana mane bo ana purapura ata rauoḡarei

³⁴ Taumi o aramana-kauei da tau nimauei a nola da mane a vaia da tau au taubagibagi turau aubaiai.

³⁵ Nanare, a viatataiemi da ona nola guratana da mane ona vaia ma molaka ona voagui. Iesu ana babani eḡa nuanuami ina vuru, Tauna i riwa i pa, “Verena i ai kaua eḡa me vainana.”

³⁶ Paul i babani vorovei ma anatapui i mae-ḡaira au doa ma i raupari.

³⁷⁻³⁸ I vinolanola i pa, “Amapo eḡa naou ona inana-melei.” Wei riwana i vinuabolai da i vitouana, Paul i taragwabai ma i vigia-lagolagonei. Ma i naiei da au waga i vigeruei.

21

Paul ana vagai au Jerusalem

¹ Ephesus kerisiana babadai a viegualuae i ma wagei jijimanina a nae au Cous bonabonana ma ubaubanai a nae au Roudes bonabonana, kampa da a damana au Patara taon.

² Weka waga ġelauna i nenaue au Phoenicia a gerui,

³ da au Saipras bonabonana a rubatawanei, au kelakelauai da a nae au Taia au Syria provins a ḡota, da purapura ita viopuni.

⁴ Kampa tauvitumaḡana a baiei ma aupom 7 maiteni a mae. Arua Vivivireina kerisiana i riwei da Paul awarina aiwai ina tupua, ma lamna aubaina Paul i viḡaei da eḡa ina nae au Jerusalem.

⁵ Ma mara i ġetai da ata vomairi, kerisiana awawai maiteni da natunatui taon i voterei ma anatapuiai a ḡaira au gera, a raupari gogona.

⁶ A viegualau da tauai au waga a geru ma taui i nae-me ai au numa.

⁷ Au Taia ma a nae au Tolemais taon a ġeta. Tauvitumaḡana kampa a nebelei ma aupom tagogi maiteni a mae.

⁸ [◊]Ma marana i tom ma dobuna a voterei ma a nae au Caesarea, kampa God riwana taujimeina Philip ana au numa a mae, tauna oroto vi-7-na au Jerusalem i vinevinei da lam taupainina.

⁹ Tauna natunatuna waivinei 4 eḡa tavitavinei, taui God ana riwa i vivieḡai rava awari.

¹⁰ [◊]Aupom vomaḡaui i kwa, kerisiana wavana Agabas, tauna nanare God riwana i vivieḡai, Judeaei i ġairai au Caesarea.

¹¹ Ma i nei awariai da Paul ana tairoro i vaia ma tauna urana ma aena i raġina-melei ma i riwa i pa, “Arua Vivivireina e ririwa, da Jew babadai wei tairorona taniwigana wenanare ina raġini, ma Jentail au urai ina terei.”

¹² Maranai wei riwana a nonori, tauai kerisiana ġelaui maiteni Paul a vibaḡana-guratei, da avena ita nae au Jerusalem.

13 Wate i pa, “Aiwai aubaina o vivitouana ma orau o viviapoapoeni! Tau a vokaukaua nonoa da ina raġiniu, wate eġa lamna ava ma ina viraġeniu au Jerusalem, BADA Iesu a vovotaġoġoġi aubaina.”

14 Tauai a viviġaei ma eġa tagotagogina da nuanuana ata sinavirai lamna aubaina riwanana a voterei ma a riwa a pa, “BADA ana ġoanei nanare ina tupua.”

15 Wei au murina a vokaukaua ma a vomairi au Jerusalem.

16 Kerisiana ġelaui mai Caesarea I naielai Nason ana au numa ma kampa a mae. Tauna oroto Saiprasiei, ma Iesu votaġona i vikareni maranaina rava vovounai i vikarei da Iesu Riwana Aiaina i rarau-gugulei.

Paul, James i raugenari

17 Maranai au Jerusalem a ġeta kerisiana ana nuaiaii i nebelelai.

18 Maratom ġela Paul maiteni a nae da* James a raugenari,† dogadogara anatapui kampa.

19 Paul taui i viegualuei ma ana au vaġai God aiwai i kaukauei Jentail awari anatapuna taui i pariverei.

20 Maranaina wei riwai i nonori, taui God i voepaepai ma Paul i riwa i pa, “Turaiai u aramanei mai Jew ai maġa tausan nanare weka Iesu e vivitumaġanei, ma God ana tarawatu e vovotaġo-kauei.

21 Wate rava Jew kerisiana weka au Jerusalem am kaua i vibenabenaei, da tam Jew Jentail maiteni e mamae e viararamani da Moses ana tarawatu ina gedugeduaiei. Ma u riwei da natunatui ini eġa ina bori ma ai kaua ġelaui eġa ina votaġoġoġi.

22 Taui i aramanei da tam u ġetai, Marina aiwai tana kauei?

23 Aiwai a ririwemi ona kauei. Au nelara 4, taui parivainuaġana bagibagina God awarina i kauei.

24 Ma taravaini ma ona nae au Tempol ma ona viaiaina-melemi ma ma vimaia da taui ai viaiaina pulona ina kauei. Anina ma taui kolai ina ġari ma rava anatapui ina aramanei da tam Moses ana tarawatu anina e vovotaġoġoġi, ma babani au naona lamna anatapuna moru kaua.

25 ✖Ma Jentail marina i vivitumaġana aubaii pepa a girumi ma wenanare a riwei, sia e pulopuloei kokoitau awarii eġa ina ani, Tara eġa ina umai, Rava ġamoġamo uai e kikiki tarai eġa ita toi-tawanana, eġa ona ani. Eġa ona viawawana labalababa.”‡

26 Anina ma marana i tom Paul nai nelarai 4 maiteni i viaina-melei God au matana. Muriae Paul i rui Tempol au orana ma i vinolanola pirisi awarii da mara aiwai taui ai viaiaina ina voterei. Ma maranaina polo ita terei taui tagotagogi ava aubai.

Paul i pani.

27-29 ✖Ma aupom 7 aburuna ava da ita kwa ma Jew ġelaui au Eisia provins maemae taui Paul i 'nanai Tempol au orana. Au naonei taui Paul i 'nanai oroto Ephesusei wavana Trophimus maiteni, au taon i bababara ma i notai da tauna Trophimus i ruiei Tempol au orana. Taui Paul i vojjini ma i garara i pa, “Nelara mai Israel ona nei, ona voaguiai! Wei orotona dobu anatapuna e nenaeni ma rava anatapui e viviararamani da mai Jew ma

* **21:18:** Wei lamna Iesu ana tevera. Act 12:17; 15:13 ma Mrk 6:3 † **21:18:** Mane anatapui ai au vaġai i tami bo rava i puloi i verei damanai mane taupainina i verei ✖ **21:25:** Act 15:29 ‡ **21:25:** Viawawana labalababa wei anatapuna e vaivaipai: Rava ġela awana oroto bo wavine maiteni e viawawana (Exo 20:14, Deu 5:18); Rava ġela maiteni e viawawana mane bo purapura aubaina (Lev 19:29, 1 Cor 6:15); Natuoim maiteni e viawawana, me oroto natuna wavinena maiteni bo wavine natuna orotona maiteni (Lev 18:6); Oroti ma oroto bo wavine ma wavine e viawawana (Lev 18:22, Rom 1:26-27); Rava ma ġamoġamo e viviawawana (Lev 18:23); Rava ġela, eġa awaoim maiteni e viawawana (Eph 5:3); Rava ġelaui e gaegari da maiteni ma viawawana. (Gen 34:7, Deu 22:25-28). ✖ **21:27-29:** Act 20:4

ata tarawatu ma Tempol i parivirevirei. Tauna Jentail i neiai gabuna au vivivireina ma i tuvaidoedoei God au matana!"

³⁰ Ma rava anatapui i nonori da au Tempol viġaiġaiawa i tupua ma anatapui kampa i ruba. Ma Paul i vojjini ma i taina-opunei au doa ma Tempol metaetana i gudui.

³¹ Maranai taui Paul viraġenana i kaukauei, Mai Rome sorodia ai bada ġaeġaena i nonori da viġaiġaiawa ġaeġaena i tupua au Tempol.

³² Tauna laġilaġina ana sorodia ma ai babada i vaini ma i ruba kampa, maranai rava taui i 'nanai, Taui Paul vunuana i voterei.

³³ Sorodia ai bada i nei Paul awarina da i vojjini ma ana sorodia ruāga i riwei da seinei Paul urana au urai i pani jijini. Anina ma tauna patara i vitara-virevirei i pa, "Wei aiai orotona? Aiwai i kauei?"

³⁴ Patara au orana rava ġelaui babani tagogi i gararei, ma rava ġelaui babani tapuna i gararei. Rava were da nare i garagarara da sorodia ai bada menanare ita nelaġai gaiawa karena aiwai, lamna aubaina ana sorodia i egari da Paul ita naiei, ai au bareki.

³⁵ Maranai Paul bareki tetena i tutuġereġgerei, patara i ġaiawa guratana aubaina sorodia Paul i voepai da i avarai da ita gagaloei.

³⁶ Patara amapo da taui i vovotaġotaġoi ma i garagarara i pa, "Ona viraġeni, ona viraġeni!"

Paul patara awarii i babani.

³⁷ Maranai taui aburuna ava da au bareki ita rui, Paul Greek sorodia ai bada i riwei i pa, "Anina bo eġa da awarim ata babani?"

Ma tauna i auepai ma i riwa i pa, "Tam Greek u aramanei bo?

³⁸ Tau a notai da tam Egyptei, rorova ai babada u viġavie, Ma rava 4,000 orai potapotai u opunei au mutulua, Tam nai ravana bo?"

³⁹ Paul i paribelana i pa, "Eġa! Tau Jew ei, au taon Tarsus a tupua, au Silisia provins, a vivibaġaim da rava awari ana babani."

⁴⁰ Tauna i vianina ma Paul au tete i mairi. Tauna urana i voepai da patara garara i voterei. Maranai taui i genuana, Paul taui awarii ai ponanei i babani i pa.

22

¹ "Amamau ma varevareiu, ona rautaniġaneu ma ana viatataiemi da tau eġa aiwai ata kauana-boai."

² Maranai patarana Paul i nonori da taui ai ponei i bababani, taui i genuana ma i rautaniġana.

³ [✳]I riwa:

Tau Jew ei, Tarsus au Silisia provins a tupua wate weka au Jerusalem a rata ma a giruma. Amamata ai tarawatu a girumei ma au tauviararamana Gamaliel.^{*} A ġoanaguratei da God ata voepaepa-kauei me taumi anatapumi nanare.

⁴ [✳]Tau Iesu ana etanai tauvotaġotaġoina a rau-iviapoapoelei da ġelaui i'rāġe. Nelara ma waivine a pani ma au numa panipani a tawana-ruiei.

⁵ Pirisi ġegetelarana ana boru ġegetelarana[†] maiteni i aramanei da tau a ririwa kaua. Taui ai vianina pepana i vereu da ai rava au Damaskas ata verei ma a nae au Damaskas da kerisiana ata pani ma a neiai da kovoġa ita vaia weka au Jerusalem.

⁶ Aubenai Damaskas a tuġereġgerei ma maratagogi lalaina gamrina ġaeġaena marei i ġairai da i tunuiai.

⁷ A peu au doa ma pona a nonori i pa, "Saul! Saul! Aiwai aubaina e rarau-iviapoapoeleu?"

⁸ Tau a paribelei, "Bada tam aiai?"

* 22:3: Act 5:34-39 * 22:3: *Gamaliel* tauna tauviararamana ma rava aiaina Paul ana au mara. Tauna Pharisi ma boru ġegetelarana (Sanhedrin) au orana. [✳] 22:4: Act 8:3; 26:9-11 [†] 22:5: Sanhedrin

Tauna i paribelei, "Iesu Nasaretei e rarau-iviapoapoelei."

⁹ Rava maiteni a nenaе lalalaina i 'nanai wate babani eѓa ita nonori.

¹⁰ A paridadana a pa, "Bada Aiwai ana kuae?" Ma Tauna i riwa i pa, "Ma vomairi ma nae au Damaskas. Kampa rava am nola ina pariverem."

¹¹ Lalalaina gamrina i rata guratana ma matau i kamoi da eѓa ata inainana. Ma tauvigwaniganiana au urai i voa ma i naieu au Damaskas.

¹² Oroto wavana Ananias kampa i mae tauna God i voepaepai ma ana tarawatu i vovoijina-nonoei. Mai Jew tauna i vivirana-kauei.

¹³ I nei da au ririvau i mairi ma i riwa, "Vareiu Saul ma inana me!" Nai marana a inana me.

¹⁴ Anina ma i riwa, "Amamata ai God i rautanim, da ana ѓoana ma aramanei, ana Taunola Jijimanina‡ - matamei ma inanai, ma riwana tanigamei ma nonori.

¹⁵ Aiwai u inainanai ma u nononori ma vimatematei rava anatapui awarii.

¹⁶ Marina aiwai e paipaini! Tauai ana babataitoim ma BADA awarina ma raupari da am ѓo'apoapoei ina oѓa-tawanei."

¹⁷ Anina ma a nae au Jerusalem. Au Tempol a raraupari ma matauei kaua a inanai.

¹⁸ A inanai BADA awariu i bababani i pa, "Rava weka am jima tau aubaiu eѓa nonorana ita ѓoeѓoei. Laѓilagina Jerusalem ma opu-tawanei."

¹⁹ Wate tau a paribelei, "BADA wei ravai i aramanei da pari numai a nepai da kerisiana a vunu ma a pani-naiei.

²⁰⊕ Ma maranai am peroveta Stephen tarana i toi, tau kampa a maimairi ma ana iraѓe a vianinei ma ѓaima tautawanai ai gara a paipaini."

²¹ Ma BADA i riweu, "Ma nae a paripari-tawanem ueia Jentail awarii."

Paul e ririwa da tauna Romei

²² Patarana Paul i rarautaniгanei ma maranai wei babanina i kuae taui i meji guratana ma i vigaragararei i pa, "Ona viraѓena-tawanei, eѓa ina mae!"

²³ Taui i vigaragararei, ai kwama i kwajikwajie i pokau i tawatawanei awarina.

²⁴ Ma sorodia ai bada sorodia i egari da Paul i naiei ai au bareki. Ma i riwei da Paul ita wipi da ita vieѓa aiwai aubaina ana rava amlo i ѓaigai ma awarina i garagarara.

²⁵ Ma urana ruaga i terepai au aidamo ma i raѓiraѓini da ita wipi ma Paul sorodia ai bada i riwei i pa, "Tau Rome-ei, Eѓa ota etareu ma o vunu vunu-labalababaiu. Lamna menanare?"

²⁶ Maranai sorodia ai bada wei i nonori ma i nae da ai bada ѓaeѓaena i pariverei. Ma tauna i vitara-virevirei i pa, "Aiwai e kaukuae? Wei ravana Rome-ei!"

²⁷ Sorodia ai bada i nae Paul awarina ma i paridadanei, "Ma riweu! Riwa kaua da tam Rome-ei bo?"

Ma Paul i paribelei, "Ee, lamna riwa kaua!"

²⁸ Sorodia ai bada Paul i riwei, "Tau mane ѓaeѓaena Rome gabemanina a verei da a vimai Rome."

Paul tauna i riwei, "Tau a tupua da Rome-ei."

²⁹ Sorodia i ѓoei da Paul ita etarei wate maratagogi ita ѓori-melei. Ai bada ita ѓori ma i rovo-kaukaua maranai i aramanei da i kauana-boai da Paul, Rome-ei seinei i pani.

Paul Jew ai boru ѓetelarana\\$ au naoi i mairi.

³⁰ Au maratomna sorodia ai bada i ѓoei da ita aramana-kauei mai Jew ai viwavu aiwai Paul awarina. Ma lamna aubaina Paul ana seini i votawatawanei ma i opunei boru ѓetelarana au naona i vimairini.

‡ **22:14:** Rava Jijimanina bo bulobulona, lamna Iesu wavana. Paul eѓa Iesu wavana ita latoni mepa da taurautaniгana mai Jew ita viamloѓaигaini. ⊕ **22:20:** Act 7:58 \\$ **22:29:** Wei lamna Sanhedrin

23

¹ Paul boru ġeġetelarana i 'nana-jijini ma i riwa, "Varevareiu tau au nola God awarina i jijimana ma orau aiaina da wei paratana."

² Ma Pirisi ġeġetelarana Ananias rava ġelauna Paul au ririvana i maimairi i egari da Paul i raunavanavai.

³ Ma Paul Ananias i riwei, "God ina raunavanavaim, tam morumorum! Moses ana tarawatuei e rarauetareu wate maranai am rava u riwei da i raunavanavai tam tarawatu u viaigai."

⁴ Taui Paul au ġereġerena i maimairi Paul i riwei, "Aiwai aubaina God ana Pirisi Ĝetelarana e vivijibogī?"

⁵ Paul i paribelei, "Varevareiu eġa ata aramanei da tauna God ana Pirisi ġeġetelarana. Au buka i terei da *Eġa God ana taunola ma parivai-apoapoeni.*" (*Exodus 22:27*)

⁶ ♦Anina ma Paul i 'nanai da Sadusi ma Pharisi ġelaui kampa ma ponana i rata ma i riwa, "Varevareiu tau Pharisi, amau maiteni Pharisi. A vivitumaġana da God rava iraġelei ina vovaimairini wei lamna aubaina taumi o etaetareu!"

⁷ Maranai wei i latoni Pharisi ma Sadusi viparipariniġai i raukarei ma boru i kai da ruāġa.

⁸ ♦Aubaina Sadusi e ririwa da rava e irairaġe lamna eġa ita vovomairi me, ma anela da aruarua eġa ita vivitumaġanei, wate Pharisi wei anatapui e vivitumaġanei.

⁹ Gaiawa ġaġaġena i tupua ma tarawatu babadai ġelaui taui Pharisi, i vomairi ma i babani guratana i pa, "Tauai eġa aiwai apoapoeni ata inanai wei ravana awarina! Mepa da anela bo Bada Aruana tauna awarina i babani?"

¹⁰ Viġaiġaiawa ġaġaġena i tupua ma sorodia ai bada i rovo mepa da rava Paul ina viaisikasikai ma sorodia i egari da i rui ma Paul i taravaina-opunei ma ina naieiau bareki.

¹¹ Ma waguvvarai ġelauna, BADA Paul au ririvana i mairi ma i riwei, "Tepam ina tora! Me aubaiu u jima au Jerusalem nanare aubaiu au Rome ma jima."

Mai Jew i vioga da Paul ina viraġeni

¹² Ubaubanai mai Jew ġelaui i vitagogiei ma i viogatara ma i parivainuaġana da eġa ina am bo ina uma da Paul ina viraġeni.

¹³ Nelara 40 nanare i vianina da Paul ina viraġeni.

¹⁴ Taui i nae pirisi babadai ma dogadogara awarri ma i riwei, "Tauai parivainuaġana bagibagina a kaei da eġa ana am da Paul ana viraġeni."

¹⁵ Taumi Boru ġeġetelarana maiteni ona moru ma riwa ona pari-tawanei sorodia badana awarina da Paul ina neiae ma ona vitara-virevirei da riwa kaua ona vaia. Tauai ana vipaipai da ana viraġeni muriai da weka ina ġetai.

¹⁶ Wate maranai Paul avuna wei ogatarana i nonori ma i nae sorodia ai au bareki ma Paul i pariverei.

¹⁷ Ma Paul sorodia badana i ġoreiai ma i riwei, "Wei laragana laġilaġina ma naiei ami bada awarina da ana riwa ina riwei."

¹⁸ Ma i naiei ai bada ġaġaġena awarina ma i riwei, "Panipani wavana Paul riwa i paritawanei awariu ma i riweu da wei laragana ata neiae awarim aubaina am riwa awarina."

¹⁹ Sorodia ai bada ġaġaġena laraga i vinimavoai ma i maeria ma i paridadanei, "Am riwa aiwai ma riweu?"

²⁰ I riwa, "Mai Jew i riwa da ita vibaġaim da au maratom Paul uta naiei ai au Boru ġeġetelarana, Wei anatapuna moru.

²¹ Wate eġa ma rautaniġanei aubaina rava 40 nanare pota e paipaini da ina viraġeni. Taui i vioga da eġa ina am da Paul ina viraġeni. Taui i vokaukaua ma am vianina ava e paipaini."

²² Ma bada laraga i riwei da eġa aiai ina riwei ma i paritawanei.

Tau i Paul i paritawanei Gavena Felix awarina.

²³ Anina ma sorodia ai bada ġaeġaena babada ruaġa i ġoreiai ma i riwei, i pa, "Sorodia sod ravai 200, aiera ravai 200 ma hos ravai 70 ma vaia ma ona vokaukaua da waguvarai 9 oklok ona vomairi.

²⁴ Hos biaġa ona vaia Paul aubaina da aiaina ona naiei gavena Felix awarina au Caesarea."

²⁵ Ma sorodia ai bada pepa wenanare i girumi:

²⁶ Tau Claudius Lisias, a girugiruma awarim au bada vinualaulaunam, Gavena Felix. Equalau.

²⁷ Mai Jew wei orotona i vojjini ma ita virāgeni, wate maranai a nonori da tauna Rome-ei ma lamna aubaina au sorodia maiteni a opu da au urai a vaitawanei.

²⁸ A ġoei da ata aramanei ana apoapoe aiwai, da ata naiei ai Boru ġeġetelerana awarina.

²⁹ Ma a nelāgai da viwavuna lamna tauiava ai tumaġana kauai ma Rome ana tarawatuei lamna tauna eġa aiwai apoapoena ita kuae da ata virāgeni bo ata pani.

³⁰ Maranai riwana a vaia da mai Jew i ġoei da govagovaġanei tauna ita vunui. Lamna maratagogi a paritawanei awarim, ma nanare tauviwavu a riwana-guratei da kampa ina ġetai da ai viwavu ina kuae.

³¹ Ma sorodia ai babada i ririweia nanare i kuae ma waguvarai Paul i taravaini ma i naiei da au taon Antipatris i ġeta.

³² Au maratomna aiera ma sod sorodai i naeme au Jerusalem ma hosi sorodia Paul i naei au Caesarea.

³³ Maranai hosi sorodai au Caesarea i ġeta pepana ma Paul gavena i veredamanei au urana.

³⁴ Gavena pepa i 'avi ma Paul i paridadanei metauna provins-na u tupua ma i riwa, "Silisia."

³⁵ Gavena i riwa i pa, "Am etara ana nonori maranai am tauviwavu ina ġetai." Ma sorodia i naiei Herod numa i voavoiana da ita inana-vaitetei.

24

Paul Gavena Felix au naona i mairi

¹ Aupom 5 au murina Pirisi ġeġetelarana Ananias ma dogadogara i ġaira au Caesarea ai taurauetara wavana Tertelus maiteni.

² Ma Paul i ġoreiai gabemani au naona. Ma Tertelus i vomairi ma viwavuna i vikarei:

Au bada Felix *vinualaulaunam, Am vibadanei ta mae ubauba ma ata nota eġa aiwai. Ma kaua vouii ma aiaii u kaukauei ata dobu voana aubaina i voagu-kaueta.

³ Anatapuiai mepamepa a mamae a vinuaiai kaua tam awarim.

⁴ Wate eġa ata ġoei da ana visina-viraviraim. Ma lamna aubaina a ġoegħoei da uta rautaniġaneu mara aburuna ava.

⁵ Tauai a nelāgai da wei ravana lamna orana potapotana ma viġaiġaiawa tauvikareina mai Jew awarii dobu au anatapuna. Tauna boru vouna e ġoreġorei mai Nasaret[†] ai bada.

⁶ Tau i ġoei da Tempol maiteni ita tuvaidoedoei ma lamna aubaina a pani.

⁷ [‡]

* **24:2:** *Felix ana au vibadana lamna eġa ita ai. Tertelus lamna Felix i gwalagwalamerui da Paul ita viwavui ma ita pani. Felix rava vita ġaeġaei i verei da madegħa ruaġa i kwa Sisaei Nero wei ravana i viopuni. Ĝavia ġaeġaena i tupua ma Jew Rome i viġavie i ma taui Jerusalem i rikai da eġa aiwaina ita mae.* † **24:5:** *Wawa Nazarene lamna Iesu ana tauvotaġoġi e babaniei aubaina tauna Nasareti. Maranai Tertelus taui e ġorei Nazarene Lamna Kerisiana e vivijibogħi. Jew Jerusalem ei ma Judea Provins anatapuna mai Galili provins ravai e inainana ġairei, (John 1:46 ma iavi). Tauna wate e ririwa da menanare Paul e tapatparoro nei lamna mai Rome ai tarawatu e viviaigai.* ‡ **24:7:** *Verse 7 lamna buka waduwaduboi biaġava au orana e mamae, wate buka Greek ponanei i girugirumi maġamaġaui wei ves-na au orana eġa.*

⁸ Ma rauetarei ma ma nelaǵai da ai viwavu lamna anatapui riwa kaua.

⁹ Ma mai Jew Tertelus au murina i mairi ma i riwa, “Wei babani anatapui riwa kaua!”

¹⁰ Anina ma Gavena Felix Paul i raumotemotei da ita babani. Paul babani i vikarei i pa:
Au bada vinualaulaunam, a aramanei da tam madeǵa biaǵa wei dobuna ai tauraue-tara lamna aubaina tau ana nuaubau ana babani aubaiu.

¹¹ Am rava ina riwem da tau pom ota aupom 12 nanare a ġeta memei au Jerusalem da BADA ata voepaepai.

¹² Au tauviwavu eǵa ita nelaǵaiu ata viǵaiǵaiawa au Tempol bo au boru-numana bo mepa nanare au Jerusalem.

¹³ Ma ai viwavu tau awariu menanare tana aramanei da lamna riwa kaua?

¹⁴ Wate riwa kaua da tau amamata ai God a voepaepai ma BADA Iesu ana etanai, a votaǵotaǵoi ma taui e ririwa da wei lamna taparoro morumoruna. Wate nanare Moses tarawatu i girugirumi ma God ana peroveta nununai i girugirumia anatapuna a vivitumaǵanei.

¹⁵ Tau God awarina a vitumaǵana guratana me ravai nanare, da tauna muriai rava anatapui iraǵelei ina vilawana-melei, ravai aiaii ma rava apoapoei.

¹⁶ Lamna aubaina a kaukauana guratei da orau ina ai rava ma BADA awarii.

¹⁷ [⊛]Jerusalem a netawanei madeǵa biaǵa i kwa ma pom ota a nememei da molamolakai ata puloi ma pulo ata kuae God awarina. §

¹⁸ Tau aiaiu, maranaina i nelaǵaiu au Tempol viaina pulona a kaukauei. Eǵa patara maiteni ma eǵa visinaviravira.

¹⁹ Wate mai Jew ġelaui Eisia provinsei i nei kampa. Taui mepa marina! Ita nei au naom da ai viwavu ita terei.

²⁰ Bo babada weka ita riweta au apoapoe aiwai maranai boru ġegetelarana au naona a mairi.

²¹ [⊛]Wate mepa da maratagogi awarii a garara a pa, “A vitumaǵana da God rava anatapui iraǵelei ina vovaimairini! Lamna aubaina tau weka a maimairi.”

²² Felix tauna BADA Iesu ana Etanai riwana i aramana-kauei, boru i gudui ma i riwa, “Maranai sorodia ai bada Claudius Lisiás ina nei, ma ina paribelem.”

²³ Ma sorodia ai bada i egari da Paul ita inana-vaitetei ma ita voterei da ita bababara ma ana rava ita nei da ita raraugenari.

Paul Felix i viararamani

²⁴ Aupom biaǵa au murina Felix awana Drusila maiteni i nei. Drusila lamna wavine Jew ei. Ma riwa i paritawanei da Paul i neiae, ma rava ai tumaǵana Iesu Keriso awarina i babaniei ma Felix i rautaniǵana. *

²⁵ Wate maranai Paul babani i vikarei da God ana ġoana, da rava lawana aiaina ma jijimanina ina maeni, ma erawa kauai ma ġo'apoapoe ina geduaiei, aubaina mara e nenei maranai rava anatapui ina etarei. Felix wei babanina i nonori tauna i rovo ma Paul i riwei, “Ma nae! Ma maranai ana ġoem lamna ana kwatuem.”

²⁶ Ma Felix i ġoegoei da Paul tauna manelei ita gwalai ma lamna aubaina mara i maǵa i raukwatuei ma awarina i babani.

²⁷ Madeǵa ruaǵa au murina Felix i rautom ma ana gabu Posias Festus i vaia. Felix i ġoiei da wavana ita ai mai Jew awarii lamna aubaina Paul au numa panipani i votere-tawanei.

* ^{24:17:} Act 21:17-28 § ^{24:17:} Madeǵa 5 i kwa ma Paul i nememei au Jerusalem da ita mae mara aburuna da tauvitumaǵana ita vovaivirewapani ma ana babara ma nolana aiaina ita virarautuei. (Act 18.22) * ^{24:21:} Act 23:6

* ^{24:24:} Mepa da Drusila Jew wavinena awarinei Felix wei ravai e ġoreǵorei tauvitumaǵana i aramanei. Drusila lamna Herod Agrippa natuna guguinina umauna ana madeǵa 20. Tauna wavalatona Siriei i ravaǵi wate i votere maranai ana madeǵa 16 da Felix i ravaǵi. Wei lamna ana tavine viruainma Felix ana tavine vitonuina.

25

Paul i vibaḡa da Sisa au naona ita mairi

¹ Festus i ġeta au Caesarea da ana nola ita vikarei ma aupom vitonuina i ġae au Jerusalem.

² Weka pirisi ġeġetelarana ma dogadogara Festus i nebelei ma ai viwavu Paul awarina tauna i verei.

³ Ma Festus i vibaḡai da ita voagui da Paul ita paritawanei au Jerusalem. Taui ava i vioga da Paul au etanai ita viraġeni.

⁴ Wate Festus i paribelei i pa, “Paul au deri au Caesarea ma tau a ġaigaira me kampa aupom ruāga au murina.

⁵ Mepa da Paul aiwai i kauana-boai lamna ami Babada maiteni ana ġaira da kampa ami viwavu ina terei.”

⁶ Aupom 8 da 10 nanare au murina Festus i ġaira me au Caesarea ma maratomna au numasetara i kiala ma ana sorodia i eġara da Paul ita ruieiai au naona.

⁷ Maranai Paul i ruieiai, ma Jew babadai Jerusalem ei i ġairai i nei awari ma ina viwavui, kaua maġamaġau apoapoei aubaii. Wate taui ai viwavu anatapui anona eġa.

⁸ Paul wei *viwavui i vinua-nainei ma i pa, “Tau eġa aiwai apoapoena ata kuae mai Jew ai tarawatu awarina bo ai Tempol awarina bo Caesar awarina.”

⁹ Wate Festus i ġoei da mai Jew ita vinuaini lamna aubaina Paul i paridadanei i pa, “E ġoegħoei bo eġa da tana ġae au Jerusalem ma etara?”

¹⁰ Paul i riwa, “Tau marina Caesar ana au etara gabuna a maimairi, weka ina etareu. Tam u aramana-kuae da tau eġa aiwai apoapoena ata kuae mai Jew awarii.

¹¹ Wate mepa da aiwai apoapoena a kuae lamna ma viraġeniu. Tau eġa iraġe ata rovoei. Wate mepa da wei lamna viwavu moru lamna eġa aiai ana rewapani ita mamae da ina veredamaneu. Tau a vivibaġa Caesar awarina!”

¹² Festus Caesar ana dogadogara ai nota i vaia ma i paribelana i pa, “Tam u vibaġa Caesar awarina, Anina Caesar awarina ma nae.”

Festus Paul ana babani gulau Agrippa i pariverei

¹³ Aupom biaġa au murina gulau Agrippa† novuna Benisi maiteni i nei au Caesarea da gavena vouna Festus i rauenari da ita viegħalauei.

¹⁴ Ma i mae aupom vomagauna ma Festus Paul i rrauetara gulau i pariverei i pa, “Felix panipani tagogi weka i voterei.

¹⁵ Ma maranai a nae au Jerusalem mai Jew ai pirisi babadai ma dogadogara ai viwavu i neiai awariu ma i vibaġai da Paul ata viraġeni.

¹⁶ —Ma a riwei da tauai mai Rome ai tarawatu e ririwa da eġa rava ana kovoġa labalababai da au naona ana rauetarei. Taui ina ġetai da ai viwavu taurauetara au naona ina mairi da ina gagħloha-melei.

¹⁷ Maranai tauviwvu maiteni weka a ġetai. Tau eġa ata vipaipai ma maratomna a egara da ravana i neiai da ita etara.

¹⁸ Tauviwvu i vomairi ma a notai da aiwai apoapoena aubaina ita viwavui wate eġa.

¹⁹ Anina kaua biaġa ava ai taparoro kauaii, ma rava tagogi irairaġena wavana Iesu i vitarapiriei. Wate Paul e ririwa da Iesu lawalawaina.

²⁰ Tau nuanuu i raġaraġa menanare riwa kaua ana vainei ma Paul a paridadanei da i vianina da maiteni ata ġae au Jerusalem da kampa ata etarei.

²¹ Wate Paul i vibaġa da Caesar ana viwavu ina rautaniġanei. Ma sorodia a egari da au numu panipani ina paini da ana paritawanei Caesar awarina.”

* **25:8:** *Paul au Tarsus i tupua wate tauna wavana Rome gabemanina awarina. Lamna aubaina tauna ana rewapani e mamae da ana nuabola ina naiei au Rome da Caesar ina rauetarei.* † **25:13:** *Wei lamna Herod Agrippa 11, Herod Agrippa 1 natuna.*

²² Ma Agrippa Festus i riwei, “A ġoei da ravana ana babani ana rautaniġanei.”
Ma Festus i paribelei, “Anina, au maratom ma rautaniġanei.”

Gulau Agrippa Paul i rautaniġanei

²³ Au maratomna gulau Agrippa ma Benisi gulau garai i oteni ma ana gabemani babadai ġaeġae maiteni, i arana-ruei au boru numana. Festus ana sorodia i egari da Paul i ruieiai.

²⁴ Festus i riwa, “Gulau Agrippa ma anatapumi o rieiai weka, wei ravana o inainanai! Tauna mai Jew au Jerusalem ma weka au Caesarea e ġoegħoei da ina irāġe.

²⁵ Wate tau a nelaġai da tauna eġa aiwai ita kauana-boai da ina irāġe. Wate i vibaġa da Caesar tauna ina rauetarei. Lamna Aubaina a pariparitawanei Caesar awarina.

²⁶ Wate Caesar aiwai ana riwei, eġa ata aramanei aiwai ana girumi? Lamna Aubaina a neiai awarimi ma tam gulau Agrippa maiteni da tana babaniei da nota ona vereu da aiwai ana girumi.

²⁷ Aubaina eġa ita ai da panipani ana paritawanei Caesar awarina ma ana viwavuna eġa!”

26

Paul ana gudu i tarai

¹ Ma Agrippa Paul i riwei, “A vianinem da ma babani.” Ma Paul urana i voepai ma ana gudu tarana i vikarei

² i pa:

I ai kaua gulau Agrippa da amadodo tam au etara e rarautaniġanei da Jew babadai ai viwavu awariu ana tere-vajjimani.

³ Tau aramanei da tam mai Jew ai giu ma ai paripariġai u aramanana-kauei. Lamna Aubaina a vivibaġaim da au paribelana ma rautaniġanana-kauei.

⁴ Mai Jew anatapui au lawana i aramanei, aburu da marina, au dobu oina da au Jerusalem.

⁵ [◊]Taui rorova ava i aramaneu ma ina riwem da tau ai boru bagibagina ma piripirina, Pharisi au orana a rui ma tarawatu anatapuna a vojjina-kauei.

⁶ Ma marina a vivitumaġana da God aiwai noinoita i parivainuaġani ina kauei. Ma lamna Aubaina tau weka a maimairi.

⁷ Wei parivai-nuaġanana ata dam 12 e vipaipaiei da ina nei lamna Aubaina ata rava i vipatutu ma marai ma waguvvarai God e viviborumei. Au gulau wei vitumaġanana Aubaina mai Jew e viviwavui.

⁸ Aiwai Aubaina o notanotai da God eġa tagotagogina da rava irāġelei ina vovaimairini?

⁹ [◊]Tau au naona a notai da aiwai anatapuna ata kauei da Iesu Nasaretei ata viġavie.

¹⁰ Ma anina lamna a kauei au Jerusalem. Pirisi ġegetelerana babadai pepa i verei ma lamna i vovai-virewpaniu ma kerisiana vivivireii maġamaġauj au numa panipani a terei, ma nanare ai irāġe a vianinei.

¹¹ Mara maġamaġauj boru numai a naeni da kerisiana a vununaiei da ai tumaġana ita boviei. Amlou i ġaġġai kaua da dobu ġelauj a naeni kerisiana a baibaiei.

¹² Mara tagogi pirisi babadai au Jerusalem pepa i vereu da rewapani a vereu ma a nae au Damaskas.

¹³ Ma aubenai nanare, tau au etanai a nena ma a inanai, lalalaina marei i ġairai ma i lalaiai, gamrina madeġa i ġetawanei! Au rava maiteni a bababara i lalaiai.

[◊] 26:5: Act 23:6 [◊] 26:9: Act 8:3; 22:4-5

¹⁴ Anatapui a vipeuana au doa ma pona Hebrewei awariu i bababani. I riwa, “Saul, Saul aiwai aubaina e vivigavieu? Tam e goegoei da Tau ma viapoapoenu wate ega da tam e viviapoapoena-melem!”

¹⁵ Ma a paridadana, “Bada tam aiai?”

Ma BADA i paribelei, “Tau Iesu, ravana tauna e vivigaviei.

¹⁶ Wate ma vomairi. Tau a nei awarim da vaivai ata verem da ma vitaunola Tau aubaiu, ma amadodo aiwai u inanai ma aiwai ana viatataiem, ma vimatamatei rava awarii.

¹⁷ Tau ana gagaloem am rava mai Israel awarii ma nanare Jentail ravai awari, ma ana paritawanem Jentail awarii,

¹⁸ da matai ma vikalai, da ai lawana apoapoe ina voterei ma ina nei au lalalaina, ma Satan ana rewapana ina votere-tawanei ma ina nei God awarina. Tauna ai go'apoapoe ina nota-tawanei, ma ina taravaini natunatuna rarautanii, ai tumagana awariu aubaina.”

¹⁹ Lamna aubaina Gulau Agrippa, tau riwa marei au inana a inanai a voteletelei.

²⁰ [◊]Au naona a jima mai Jew awarii au Damaskas ma nanare au Jerusalem ma Judea anatapuna ma muriai Jentail maiteni awarii. A jima da ai go'apoapoe ina votere-tawanei ma ina mae-tavirei God awarina, ma ai lawana ina vimataira da ai kaua apoapoe i votere-tawanei.

²¹ Wei babanii aubaina mai Jew au Tempol i vojjiniu ma i goei da ita viraegeniu.

²² Wate God i vilawaniu da marina, ma weka a maimairi da a vimatamata rava muomuoi ma nanare rava gaegaei awarii. Aiwai a bababaniei lamna peroveta nununai ma Moses i ririweta ina tupua.

²³ [◊]Taui i riwa da tauvilawana Keriso ina vinuapoapoe. Ma tauna ina irage ma ina vinao da ina vomairi me ma wei matairana ina vinolanola da tauna God lalalaina mai Jew ma Jentail aubaii.

²⁴ Weka Festus i vionagi ma i garara Paul awarina, “Tam u bua! Am aramana i vibuaim!”

²⁵ Wate Paul i paribelei, “Au bada Festus tau ega ata bua. Tau aiwai a bababaniei lamna riwa kaua ma babani anona.

²⁶ Wei kaua ega govagovaagna ma aramanei da Gulau Agrippa anatapuna i aramanei, ma lamna aubaina ana tepatorau wei kauai ana babaniei awarina.”

²⁷ Paul Gulau Agrippa i riwei i pa, “Peroveta e vivitumaagni bo ega? A aramanei da nanare!”

²⁸ Ma Agrippa i paribelei, “U notai da tau lagilaagna ma sinaviraiu da ana vikerisiana!”

²⁹ Paul i paribelei, “Laquilaagna bo amapo, a raraupari God awarina da tam ma rava anatapui wei au boruna ina tupua-vira me tau nanare wate ega sein maiteni.”

³⁰ Anina ma gulau ma gavena ma Benisi i vomairi ma i nae.

³¹ Ma anatapui i nenea ma i babani vivira ma i vianina i pa, “Wei ravana ega aiwai apoapoena ita kauei da tana viraegeni bo tana pani.”

³² Ma Agrippa Festus i riwei, “Mepa da ega ita vibaaga gae Caesar awarina, lamna marina tata rupeni.”

27

Paul wagei i vagai nae au Rome

¹ Festus mara i tereterei i getai da tauai ata nae au Rome. Paul ma tau ma panipani gelau maiteni au waga a geru ma a vagai Rome aubaina. Rome ai sorodia badana wavana Julius au urana i terelai. Tauna Caesar ana sorodia vinevinena.

² Waga Adaramitei i nei da a geru ma wagana i gota-nae au Eisia provins gerana. Oroto wavana Aristakas ana dobu Thesalonika au Masedonia provins tauna maiteni i geru.

³ Au maratomna au Sidon taon a ġota, Julius ivina i ai Paul awarina ma i voterei da i opu au gera da ana rava ita raugenari ma ana ġoana aiwai ita vibaġei.

⁴ Muriai wagei a opu da a nenaе ma ive i verau-matamataniai ma lamna aubaina bonabona au Saipras ma dobu ġaeġaena au pouna au mulāġina ambori.

⁵ Ma boga ġaeġaena a bori da Silisia provins da Pamphilia provins geraii a voterei da au Maira taon a rui au Lisia provins

⁶ Au Maira taon kampa sorodia badana mai Egypt ai waga Alexandriei i nenaе au Italy kampa i vigeruiai.

⁷ Ma aupom maġamaġaui nuatauai a ruba ma a voia guratana da Cinidus taon a tuġereġerei wate ive i verau-matamataniai da kampa waga a virai da Crete bonabonana ma mutu Samone au poui au mulāġina a nae.

⁸ Ma kampa nuatauai bonabona Crete gerana a naeni aubaina mara i apoapoe ma a ġeta dobu e ġoreġorei U Ajaina, Lasea taon au ġereġerena.

⁹ Mara ġaeġaena a vine-boai au vaġai* ma Rupena Ujina marana boibogi i kwa,[†] marina lamna ive ma rabama ai mara ma boga bazarana i vinirovorovo.

¹⁰ Ma Paul i riwa, “Nelara, malana a vaivaia da ata vaġai ina apoapoe kaua ma waga ma purapura tana vine-boa-pai. Ata lawana maiteni tana vineboai.”

¹¹ Wate sorodia ai bada, kapena ana babani i rautaniġanei ma eġa Paul da kampa ata mae ma eġa ata nae.

¹² Wei gabuna eġa ita ai wei ivena au marana ma rava maġamaġaui i goei da waganei ata nae da Phinix una, Crete au bonabonana da kampa ata mae da bodu ita kwa. Wei u ġaeġaena ma mutuuii lavarata ma rauanaġa e vinao-vereverei, da au mulāġina e mamae.

Kojikojira Ġaeġaena

¹³ Maranai rauanaġa i vikarei ma waga ravai i notai da marina mara aiaina da ita nae au Phinix una. Ma anika i taini ma Crete bonabona geraei i nae.

¹⁴ Ma eġa barana ita uama ma kojikojira‡ olei iveiai.

¹⁵ Ive wagana i verau-matamatani ma waga eġa tagotagogina da ita vobelei ma i voterei da ive waga i avara-opunei.

¹⁶ Bonabona aburuna Kauda gerana au mulāġina a ruba ma kampa a voia guratana da dingy a terepai au waga da a ragita-jijini.

¹⁷ Wei i kauana vorovei ma ġuravei waga au gabaurina da waga adana i raġita-kwaviviroi. Taui i rovo mepa da au maratete ina amġaena au Syrtis,[§] Libya au gerana. Lamna aubaina ġuravei ai da kuka, i raġita-tagogiei ma au boga i viorereni da waga ita bibi. Ma i voterei da kojikojira waga i avara-naiei.

¹⁸ Maratomna kojikojirana i rarau-guratanelei da purapura ġelaui au boga a viorereni.

¹⁹ Aupom vitonuina taui waga purapurai i viorereni au boga.

²⁰ Kojikojira i ruba da aupom biäga da madeġa ma ubona i purui. Ravai ai nota i kwa.

²¹ Wei au marana rava au waga am i kauana-avei, anina ma Paul i vomairi ma taui i riwei, “Nelara ota rautaniġaneu ma Crete eġa tata oputawanei, amapo waga eġa tata viapoapoeni ma ata purapura eġa tata vineboai.

²² Wate a ririwana-guratemi da eġa orami ina peu! Aubaina avena da waga ina monu wate eġa ina iraġe.

²³ God lamna tau au BADA ma ana taunola tau. Waguvvarai God ana anela i paritawaneiae awariu.

²⁴ Ma i riwa, ‘Eġa ma rovo! Tam anina da Caesar au naona ma etara! Ma ġelauna lamna God ana nuavaina maemaena rava anatapui maiteni e vaġavaġai ina lawana.’

* ^{27:9:} Iri i parei da kojikojira ana mara ma i vagai. † ^{27:9:} Eng. *Atonement* bo *Yom Kippur* marana wei lamna September bo October rabama ma ive ai mara ‡ ^{27:14:} Kariwabu ġaeġaena § ^{27:17:} Wei lamna maratete.

²⁵ Lamna aubaina tepami ina tora! Aubaina tau God a vivitumaḡanei ma menanare i ririweia nanarena ina tupua.

²⁶ Wate tauta au maratete tana amḡaena.”

²⁷ Kojikojira i avara-naielai au Mediteranean Bogana da aupom 14 i kwa ma nubautuva waga ravai malana i vaia da taui gera i tuġereġerei.

²⁸ Ma barawa au giana ġaima i raġini ma au boga i tawanana-ġairei da topa ana gabinou ita aramanei. Ma i aramanei da 40 meter ma i mae aburuna ma i raudadana-melei lamna marina 30 meter.

²⁹ Ma taui i rovo mepa da rabama waga au kira ina viairikarikai lamna aubaina waga au ipuna anika 4 i tawana ġairei ma i vipaipai da mara ina tom tawanana.

³⁰ Ma waga ravai ai kaua i kaukauei da ita ruba-govaġa. Ma i vioga da dingiei ita opu waga au naona da anika ita dubara-naiei, ma lamna aubaina dingy i teretere-ġairei au boga,

³¹ Wate Paul sorodia ai bada maiteni i riwei, “Mepa da waga ravai ina rubatawanemi lamna anatapumi ona iraġe.”

³² Ma sorodia dingy ġuravana i borituini ma dingy kwakwavina i peu au boga ma i avara-naiei.

³³ Ma maratomtomai Paul rava anatapui i egari da ita am, i pa, “Taumi marina aupom 14 rovo i kauemi ma eġa ota am.”

³⁴ “Tau a vivibaġa-guratem da ona am da ona virewapana, eġa aiai tagogi ina iraġe.”

³⁵ Paul i babani vorovei ma au matai palawa i vaia, BADA i viegualuae i vogimai ma i ani.

³⁶ Ma rava anatapui inanai ma orai i bagibagi ma am i vikarei.

³⁷ Tauai anatapuiai 276 au waga.

³⁸ Ma rava anatapui i am da i am-iaua. Ma witi baikei au boga i viorereni da waga ita votelateli da au gera ita ġota da avena ita amġaina.

Waga au maratete i amġaena

³⁹ Maranai mara i tom tawanana taui dobu i 'nanai wate gerana eġa ita aramanei, wate U inanai da gerana aiaina ma i notai da gerana aiaina da waga kampa ita viġaeni.

⁴⁰ Anina ma anika ġuravai i viaituituini, ma labilabi i tere-ġairei, ma waga au naona kuka voaburunei i votawatawanei ma gera aubaina i ruba.

⁴¹ Wate waga au maratete i amġaena da i tapaiei, ma rabama waga ipuna i viairikarikai.

⁴² Sorodia i ġoei da panipani ita viraġeni, da avena ita toa-ġaira au gera ma ita viruberubei.

⁴³ Wate sorodia ai bada i ġoei da Paul ita vilawani ma i viġaei, anina ma ai viogatara eġa ita kauei. Ma taui aiavoi toa i aramanei i egari da i viauepa au boga ma i toa-ġaira au gera.

⁴⁴ Ma ġelaui aiwai da i tenatenam i vidiae. Ma nanare anatapui lawalawaii au gera i ġota.

28

Paul au Malta bonabonana

¹ Maranai a ġota au gera ma a aramanei da tauai au Malta bonabonana.

² Dobuna ravai i nebelelai ma ivii i ai kaua awariai. Garewa atuna i vikarei ma i ubauba, ma taui au gera ai i viviri.

³ Ma Paul ai ragorago i ġuna da ai au tepana i tereterei ma mota ġaiġaiawana ai bolana malana i vaia da i opui ma Paul nimana i ani.

⁴ Dobuna ravai i 'nanai da motana Paul au nimana i dawedawe ma i pari-ararava, “Wei ravana lamna tauviraġena ma eġa ita monu wate ata god* e ririwa da tauna eġa ina lawana.”

⁵ Wate Paul motana i viaikwajie i ai au menamenana i rauei ma tauna eġa ita kero.

* **28:4:** God wavinena wavana kaua aiaina bo kaua jijimanina (Justice).

⁶ Rava i vipaipai da Paul nimana ita dodo bo ita peu da ita irāge. Wate maranai i vipaipai guratana ma i 'nanai da tauna anina, taui ai nota i virai ma i riwa da tauna god ġelauna.

⁷ Au gerana a ġotāgota - lana au ġereġerena lamna dobuna badana Publius ana wapu ġaġġena. Tauna i taravainiai ma i paina-kauelai da aupom tonuġa

⁸ Publius amana i doria manawa ruba ma iniġuġura i vaia da i matamatave, Paul i rui inanana aubaina ma urana au tepana i terei ma i raupariei ma i vilawani.

⁹ Anina ma rava anatapui doridoriai au bonabona i nei ma i vilawani.

Paul au bonabona Malta da i nae au Rome

¹⁰⁻¹¹ Kampa mai Malta maiteni a mae nawaravi tonuġa. Ma ravai i voagu-kauelai ma maranai ata vomairi, ai ġoana vaġai aubaina anatapuna i verelai. Ma waga ġelauna a gerui lamna mai Alexandria ai waga bodu aubaina kampa i mae. Waga au naona lamna ai god ruuġa kokoitaui i tai[†].

¹² Kampa ma a amkuka-nae da au Sairakius a ġota ma a mae aupom tonuġa

¹³ Kampa da ambori damana au Regium ma maratomna rauanaġa i wanabauni ma amkuka ma geraei a ruba da maratom ġela au Puteoli a ġota.

¹⁴ Kerisiana kampa a nelāġai ma i riwelai da maiteni a mae wiki tagogi. Anina ma a babara-nae da au Rome taon a ġeta.

¹⁵ Kerisiana au Rome riwaiai i vaia da a nenei ma i ġei da ita nebelelai, ġelaui i ġei au taon e ġoreġorei Vaġavaġai Tonuġa ai Numa ma ġelaui i ġae Apius ana au maket. Maranai Paul wei ravai i 'nanai, ma i vinuaiai kaua ma God i viegħulauei.

¹⁶ Maranai au Rome taon a ġeta taui Paul numa i verei da ainelana i mae ma sorodia i terei da i 'nana-vaitetei.

Paul au Rome i raugugula

¹⁷ Ma aupom tonuġa au murina Jew babadai kampa maemaei i rauġoreiħi ma awarii i babani, "Varevareiu tau eġa aiwai ata kauana-boai ata rava awarii bo amamata ai tarawatu ata viaigai. Wate au Jerusalem i paniu ma i veredamaneu Rome gavena awarina.

¹⁸ Mai Rome i etareiu ma i ġoei da ita rupeniu aubaina eġa aiwai apoapoena ata kauelai da ina viraġeniu.

¹⁹ [✧]Wate Jew babadai wei eġa ita ġoei ma lamna aubaina Rome babadai a riwei da tau eġa ana mae wate ana ġae au ġaġġena Caesar awarina da ita rauetareiu. Wate lamna eġa au rava ata viviġavie, eġa.

²⁰ Lamna aubaina a ġoremi weka da tata babani gogona, ma ata riwemi da tau a vepanipani aubaina a vitumaġħana da mai Israel ai tauvilawana wariaġa i ririwei boibogħi i nei."

²¹ Taui i paribelei, "Tauai eġa pepa Judeaei ata vaia bo ai rava riwa ita neiai.

²² Tauai aramanei da ravai anatapui kerisiana boruna e paripari-virevirei. Wate tauai a ġoei da am nota ana vaia."

²³ Ma taui mara i terei da Paul maiteni ita viboru, ma patara i ġetai mepa Paul i mamaelana. Ma ubaubanai Paul God ana vigulau jimana i vikarei da wagħuvarai i vorovei. Moses ana tarawatu ma peroveta nununaii ai au buka i mairi ma i jima. I ġoei da orai ita taini da Iesu ita vitumaġħanei.

²⁴ Ana babaniei ġelaui orai i taini ma ġelaui eġa ita vitumaġħana.

²⁵ Ma taui ava babanina i veparipariniġaiei ma muriai da ita vilamonei Paul wei riwana tagogi i latoni i pa, "Arua Vivivireina riwa kaua Peroveta Isaiah ponanei amamamii i riwei i pa:

²⁶ *Ma nae am rava mai Israel awari da ma riwei,
ona nononora wate eġa ona araramanei*

[†] **28:10-11:** Wei lamna mai Rome ai god raġaraġa wawai *Castor* ma *Pollux* ruāġai e ġoreġore *Dioscuri* bo **raġaraġa marei**, Taui lamna god *Zeus* ma *Leda* natunatui. [✧] **28:19:** Act 25:11

ona inanai wate ēga anona ona aramanei.

27 Aubaina wei ravai orai i bado.

Tanīgai i gudui,

Taui matai i vopotai.

Mepa da taui mataiei ita inainana,

tanīgaiei ita nononora

oraiei ita araramanei,

ma ita mae-tavirei awariu ma ata vilawani.

(Isaiah 6:9-10)

28-29 —Lamna aubaina ona aramanei da God Riwana Aiaina vai-melana aubaina i paritawanei Jentail awarii. Taui ina rautanīgana.”

30 Paul kampa numa i vivimaiei ma i mae madēga ruāga taputapuna. Ma rava māgamāgau i nenei da i raraugenari ma wei i vinuaiae.

31 Ana tepatorana God ana vigulau ma Iesu Keriso riwana Aiaina i jimei. Ma ēga aiai ita vīgaei.